

Bien. A. VII. 8



Dialogorum

Sacrorum

Libri Quatuor

autore Sebastiano
Castatione.

Coloniae Aгриппинаe

Anno 1579.

[Faint, illegible handwriting]

[Faint, illegible handwriting]

[Faint, illegible handwriting]

[Faint, illegible handwriting]

Been, A. VII. 8

Dialogorum Sacrorum
Sebastiani Castalio-
nis Liber primus.

Adamus. Gen: 3.

Argumentum.

Serpens Evam, et Eva peris Ad-
amum impellit ad vescendū fru-
ctu veritatis, Deus vero ipsos tres ad
tollendam panam damnat.

Serpens, Eva, Adamus, Iova.
Cur vetuit nos Deus vesci omni-
bus arboribus pomarij? E. Licet
nobis vesci fructibus arborum po-
marij: tantum Deus nobis interdi-
xit ea arbore, qua est in medio

14
maris, ne vesceremur fructu eius,
ne ve etiam attingeremus, nisi vel-
lemus mori. S. Nequaquam morie-
mini propterea: sed scit Deus, si co-
mederitis de eo, tum oculus vobis
apertum iri, atq; ita vos fore tan-
quam deos scientes boni atq; mali.
E. Ita plane videtur, et fructus ip-
se est pulcher sane visu: nescio
an sit ita dulcis gustatu, verum ta-
men experiar. Van, quā dulcis est?
impertendum est etiā marito. Mi-
vir, si scires quam sapidus sit hic
fructus, iam dudum comedisses. Ac-
cipe. A. Quando ita faciam. H. Magi-
strum

Tuum fecimus. E. Quid est? A. Nōne
vides misera, nos esse nudos? E. Vi-
des, et me pudet: sed quid nobis fa-
ciendum est? A. Texamus nobis
subligacula: ex foliis, quibus tege-
mus frūdēda. E. Bene mones: et
est hic ficus foliis magnis, et aptis
huic rēi. A. Sed o vos infelices:
videor mihi audire vocem. E. Nova
est. Miseram me, vereor ne deprehe-
dat nos nudos. Adamus nos in hoc
dēsūm nemus. A. Heus heus Ada-
me ubi es? A. Audita voce tua in
pomario territatus sum: et quia nu-
dus eram, abscondi me. A. Unde
didicisti esse te nudum? Numnam

comedisti de arbore, de qua prece-
peram tibi ne comederes? R. Come-
di quidem: sed praeiit mulier,
quā tu adiunxisti mihi. S. Quid-
nam fecisti mulier? R. Decepta
a serpente comedi. S. Quoniam istud
fecisti serpens, tu eris detestabilif-
sima omnium bestiarum, omnium
animalium terrestrium, et incedes
in pectus, et vorabis pulverem quā-
dā vives. Quinetiam conciliabo
tantas inimicitias inter te et mu-
lierem, in terg^m semen tuum et ejus,
ut id conterat tibi caput, tu au-
tem ei calcem. Te quoq^m femina af-
ficiam.

ficiam plurimis doloribus et
rumis, et cum dolore parias, et
tota pendes ex imperio viri
tui. Et tu Adame, quoniam mo-
rem gerens uxori tue, comedisti
de arbore, cujus esu interdixe-
ram tibi, habebis terram infa-
cundam tua culpa, et ex ea
queres victum laboriose, dum
vives, cum interim ipsa procre-
abit tibi carduos, et sentes. Tu
vesceris herbis terra nascentibus,
et cum sudore vultus tolerabis
victu: donec redeas in terram, ex qua
ortus es, nam pulvis es, et in pulvere
redibis.

Sententia.

Ob unius hominis inobedientiam
mors intravit in mundum. Disce
puer obedientiam.

Cainus Gen: 4.

Argumentum

Deus Cainum damnat ob fratri-
cidium.

Iova, Cainus.

Caine, ubi est frater Abel tuus? C.

Nescio: nū quid ego sum custos fra-
tris mei? S. Quid fecisti? ipse san-

guis fratris tui edidit ad me clamor-
em de terra. Quamobrem uteris ter-

ra infesta: ut quis aperto ore hau-
serit sanguinem fratris tui, de
tua manu, ea non prabeat am-

plius

plius vim suam sibi colenti. Tu er-
rabis vagus per orbem terrarū. C.
Mea culpa est major, quam ut prof-
sit remitti. En ego hodie exterminatus
à te, ex ipso solo terrarū, errabo
vagus per orbem terrarū, fugiens tu-
um conspectum: ita ut qui proxi-
mus invenerit me, interficiat. N. Imò
verò quicumq; interfecerit Cainum,
subibit penā septupli. Quare appo-
nam tibi hanc notā, ne si quis inci-
derit in te, perimat te.

Sententia.

Injusti nequeunt ferre iustos. Quae
clām perpetrantur, palam puni-
entur.

Lotus. Gen: 18.

Argumentum.

Abrahamus excipit Genios hospitio:
et Sara ei prolem promittit, consilium
suum de Sodomis inversione patefa-
cit. Adem facit deinde Lotus, et à
Geniis eripitur ex periculo.

Abrahamus, Sara, Genii duo
Puer, Sara, Lotus, Uxor Loti,
Sodomitarum.

Video tres homines adversum me.
Non dubitè est quin sint defessi de
via, praesertim hoc tanto aestu: qua-
rè currà eis obviam, ut retineam
eos apud me. Domine, si vis facere
mihì gratissimum, noli alio potius

divertere: quum ad me. Lavabitis
pedes praeputio aqua adhibita, de-
inde requiescitis sub arbore. Ego
interea curabo vobis parandum pan-
nem, ut recreetis animos vestros, de-
inde pergetis. Haec est vobis idonea
causa divertendi ad me. S. Sic faci-
emus. A. Sicut propero in casam Sara,
sume properè tria sata farinae siligi-
nes, ex qua deposita facias panes
subcinericios. Nam adventant nobis
hospites, quos ego: volo accipere laute.
Itaque iam curro ad bove: volo enim
maclare vitulum, quo eos tractem
opipare, tu interea cura, ut nihil
desit eis quod opus sit hospitibus.

S. Tit. Propere Magar, incende ignem,
tepesce aquam ad desendum, dum
ego promo farinam. Age iam dum
aqua tepesit, para mactram. Subige
farinam: expediamus omnia que ius-
sit Herus. A. Macta eum expedite pu-
er. Herus Sara. S. Quid vis mi vir?
A. Cura nobis luculentum focum. S.
Iam accessus est. A. Impone ahenu.
Volo ego hospites meos curari diligen-
tissime atq; humanissime. Estne adhuc
detracta pellis isti vitulo, puer? P.
Ano iam dissectus est. Conijciamus
haec fusta in ahenum. Subijce tu
fulura ligna, ut coquantur celerius,

Dequibus jus. Regar, instrue mensa:
sed foris in umbraculo, sub arbore. Ni-
hil libentius quam viatoribus benefa-
citor: et certe eos negligere, inhumanum
est. Respites, omnia sunt parata: ac-
cumbite, et vescimini lato animo. Ni-
lat hic butyrum, habetis et lac. No-
ni consulite quod adest, quod Deus lar-
gitur in presentia. Puer appone eis
vitulinam. S: Ubi est Sara, uxor tua?
A: Adest in tabernaculo. S: Cum revi-
sam te eadem tempestate anni quis
nunc est, habebit Sara uxor tua fi-
lium. S: Ha ha he, ridiculum. Ege iam
vieta sum, et indulgelo voluptati, sci-
licet: cu^m meus quoq^{ue} dominus consenu-
erit.

erit. N. Cur tandem ridet Sara, ne-
gans se posse parere, quia consensit?
Etne aliquid, quod Iova non possit
facere? Cum revisam te, inquam, anno
vertete, habebit Sara filium. S. Ego no
risi. N. Imo vero risisti. Sed iam per-
gamus conficere iter reliquum. A. Ego
comitabor vos, nisi molestum est. S. Ego
ne ut celem Abrahamum, de eo quod
sum facturus ex quo profectura sit
gens maxima et potentissima, per
quem omnes gentes orbis terrarum sint
consecutura felicitatem? nam certo scio
eum praecepturum esse suis liberis, et
porro suis in posterum stirpi, ut vi-
vant ex meo praescripto, et colant ius-
titiam

stiliam atq; jus, ut ego prestem. Abra-
hamo quæ promisi ei: profecto non
calabo. Abrahamæ, volo tibi indicare
qui sim, et quo eā. Ego sum Iova. Cum
viderem dissipatos esse rumores de
tot tantisq; flagitijs Sodomitariorum
et Gomorræorū, statui devenire huc,
et explorare, utrū sint planè profligati,
quemadmodū accepi fama et
auditiōne: an non sint. N. Nos quidē
antecedamus. A. Sed quid perdesne
etiam bonos unā cum improbis? Si
erunt quinquaginta viri boni in ur-
be, an etiam perdes? neq; ignosces illi
loco, propter illos quinquaginta bo-
nos, qui erunt in eo? Absit ut tu sic
facias,

facias, ut interficias bonos cū malis,
sitq. eadem conditio proborū et impro-
borum. Absit ut tu, qui moderaris, to-
tū orbem terrarū, non facias æquum.

S. Si invenero in orbe Sodoma quingua-
ginta viros bonos, ignoscam toti loco
propter eos. *A.* Facio, fortasse audacter,
qui audeam alloqui te Dominum
meū, ipse pulvis et cinis: sed tamen
si fortē defuerint quinque de quingua-
ginta bonis, an propter quinque excin-
des totam urbem? *S.* Non evertā, si in-
venero ibi quadraginta quinque viros
bonos. *A.* Quid si quadraginta? *S.* Etā
propter quadraginta abstinebo. *A.* Quæ

so ne agrè ferās Domine, si pergo
quarere. Quid si triginta? *R.* Etiam sic
abstinebo. *R.* Possim videre audacior,
qui alloquar Dominum meum. Quid
si viginti? *R.* Etiam eorum causa non
pervertetur. *R.* Interrogabo te hoc po-
sterum, si tibi gravis non sum, quid
si decem? *R.* Propter decem non ever-
tatur. *R.* Jam advesperascit, et nos ap-
propinquamus urbi. *S.* Video huc
adventare duos hospites. *M.* eis obviā
ut eos dedecam ad me. Salvete viri
prestantissimi. *S.* Salve et tu vir hu-
manissime. *S.* Peto à vobis, ut diver-
tamini in domum meam, ut ibi lo-

tis pedibus pernoctetis eras repeti-
turi vestrum iter. S: Præno pernoctabi-
mus in foro. L: At ego non patiar,
divertimini ad me: accipiam vos,
si non laute, at certe hilarè. S: For-
tasse erimus tibi graves. L: Succum-
di potius: ne veremini. Tam mihi
erit gratum, vos accipere hospitio, quàm
esset accipi à vobis, si istic essem. S:
Postquam tanto tempore vis, nolumus
esse pertinaces. L: Ergo sequimini me.
Hic est mea domus. Intrate: quod bonum
sit. Uxor curam calefaciendam aquam,
ad lavandas pedes horum hospitem:
et simul confice panes coquendos

in

in foco. Vos interea hic conquiescite,
cum paratur cœna. Age iam uxor,
construe mensam: fac ut omnia sint
nitidissima, ne quid offendas animos
horum. Hospites accumbite, utimini læ-
to animo his, quæ suppeditant nobis
in presentia divina benignitate. Sed
quid? quem tumultum audio uxor?
quis est iste clamor? quæ turba excitan-
tur? Uxor Soli. Hei mihi, perijmus
mi vir. L: Quid tandem est mali? U:
Tota civitas, mi vir, obsidet ades nostras.
Juvenes, senes, deniq; univexi circumsi-
dent nos. L: Valde vereor, quo hæc evasu-
ra sint. Sed audio clamantes. S: Heus
heus

hæcus Eote, ubi sũt homines isti, qui
venerũt ad te sub nocte? Produce eos
nobis, ut eos cognoscamus. S: O flagi-
tium. Sed ne trepidate hospites: exibo
ad eos et obserabo post me ianuam. Ad-
sum. Quid clamatis? So: Volumus vide-
re hospites, qui diversantur apud te. So:
Obsecro vos, fratres mei, ne tantum sce-
lus faciatis. S: Sunt mihi duæ filia, ad-
huc à viris integræ: eas malo dedere ve-
stra libidini, quàm sinere ut quid no-
ceatis his hominibus, qui commiserunt
se sub presidium mei tecti. So: Recede
paulisper isthuc, ut consulamus de
istâ re. Quid facimus, populares? acci-

sciemusne puellis ea conditione, ut
dimittamus iuvenes. M. Non est opus
longa deliberatione. Note unus peregrin-
natus in nostra civitate, et nos regit, si diis
placeat. S. Sane te Note populus imitabi-
mus, quam ipsos: ne tu putes nos velle
subijci peregrinis. Agite, invadamus eam.
E. Recipe te confestim, ad nos Note. Lo.
O facinus audax, o profligata et per-
ditam nationem. Obseremus fores fir-
missime. S. Effringamus fores: occida-
mus istos advenas, qui cum nusquam
possint habitare, veniunt ad nos. S.
Ne trepida hospes, nunquam erum-
pent nobis invitis. Lo. O Inaudita
nequitiam. Siccine hic violare hospi-
tes

tes, et peregrinos, quorum jus debet
esse sanctissimū? S. Sede teipsum. Jam
videbis ultionem presentem. S. Quid
est hoc, o cives? nimis ego cecus, an
oborta sunt tenebrae densissimae? A.
Nescio quid accidat aliis, sed ego
non magis dispicio oculis, quā cal-
cibus. Ubi est janua? A. Cave cave
ne incidas in me. Nei michi proxi fron-
tem ad parietem. A. At ego nescio ubi
terrarum sim, neq. possum invenire exi-
tum ex hoc loco, neq. ingressum in aliū.
S. Quid si quos habes praeter ea gene-
res, aut filios, aut filias, deniq. quoscumq.
habes in urbe, educ ex hoc loco. Nam

nos quidem iam debeamus hunc lo-
cum. Huc enim ad hoc ipsum misi-
sumus a Nova, apud quem increbuit
tanta importunitas horum. Lo: Ha-
beo vobis gratiam, qui habeatis ra-
tionem non solum mea scitis, sed
etiam meorum. Nam adeo eos. Ux:
Valde sum sollicita de meo viro,
qui est egressus domo: ita conscelera-
tus est hic totus populus. Metuo ne
quid gravius patiatur, etiam à suis.
Nam hodie nulla sancta fides est,
ne inter fratres quidem. Lo: Nam re-
deo. S: Quid egisti. Lo: Visus sum
jocari eis,

iocare eis, quorum salutem providebam.
At. Homines sunt desperati. Pereant,
quoniam nolunt servari. Sed iam di-
luculum est, et tempus admonet emi-
grandum esse hinc. Agedum, adium-
ge tibi uxorem tuam, et duas filias,
ne aggregeris ad interitum tam per-
dite civitatis. Quid cunctaris? nunquam
potest nimis mature vitari pericu-
lum. Q. Atqui non videtur emigram-
dam tam manè. S. Atqui nos non si-
nemus te perire, quin potius manu e-
ducemus et te et tuam coniugem, et
filias. Agite, exeamus ex urbe. Sed
cave, si tuam vitam amas, ne respicias
post

post tergum, neve usquā moreris
in planicie. Evade in mōtes, ne pe-
reas. S. Peto à te Domine, ut remit-
tas hoc mihi, postquam tu pro tua be-
nignitate devincis me tanto beneficio,
ut custodias mihi vitam. Certe non

potero evadere in montes, quin me
attingat illud malum, quod moriar.

Sed est hic propinquum oppidulum
ad confugiendum in quo queso ut
liceat mihi evadere, et ita consilium
vitæ meæ, est sanè perparvum. S.

Etiā in hac re indulgēs tibi, ut
non evertam istud oppidum. Conser te
illō neque enim licet mihi facere

quicquā

quicquam, quin tu eo perveneris. -

Sententia.

Deus versatur cum piis, eisq; patefa-
cit arcana sua, et eos remuneratur, et
tuetur. Maxill^{is} Deus ut innumerabi-
les impij vivant, quam ut vel unus
pius una cum illis pereat. Maior est
Dei in unum piium amor, quam in
omnes impios odium, quem quidem
eius amorem debent imitari pii.

Abrahamus. Gen 22.

Argumentum.

Abrahamus iussu Dei, filium suum
Isaacum vult immolare. Deinde pro-
hibente Deo, immolat arietem.

Abrahamus, Isaacus, Irenus.
Nam tertium diem iter facimus,
et videor videre procul locum de-
stinatum sacrificio, vos hic operi-
mini unè cum asino, sum ego et
puer unus illuc, ut adoremus De-
um, postea redituri ad vos. Tu Is-
saace portabis hæc ligna ad com-
burendam hostiam, ego feram ignem
et culter. Eamus. *P.* Mi pater. *A.*
Quid vis fili mi? *P.* Hic quidem
est ignis, et ligna, sed vbi est a-
gnus immolandus? *A.* Deus pro-
videbit ipse sibi agnum in sacri-
ficium, fili: nos interea pergamus

Ecce venimus in locum, quem Deus
dicebat mihi. Construamus hic aram.
Recte est: disponamus lignum. Nunc
mihi oportet esse colligem, mactemq:
quando ita visum est Deo optimo maxi-
mo, cuius voluntati resistere nefas est. *Is.*
Mihi pater, si ita certum est Deo, fiat.

Nam didici, ei, tibiq: parere in rebus
omnibus. *Is.* Pater omnipotens, cuius est im-
perare, obsequor tuis iussis tibiq: macto
hanc hostiam, hoc cultus, mea ipsius
dextera. *Is.* Melchame, Melchame. *Is.*
Quis me vocat? *Is.* Cave ne afferas ma-
tum puero, cave ne ladas. Nam enim
mihi satis perspecta est tua religio.

et pietas, qui propter me non peper-
eris filio, eiq; unico. A. Nem quid hoc
rei est? Sed ulideone arietem in die
no harentem cornibus? Salva res
est: vivet Isaacus: hac mactabitur
gratior Deo victima.

Sententia.

Nihil tam difficile aut durum est,
quin id possit qui credit. Deus suorum
pietatem remuneratur.

Ephron. Gen. 23.

Argumentum.

Abrahamus mercatur ab Hethais sum-
dum ad sepulturam Sarae uxoris suae.

Abrahamus, Hethai, Ephron.

Ego sum peregrinus et advena inter vos.

Hebraei. Quare tribuite mihi possessionē
sepulture inter vestras, ubi sepeliā
Saram conjugem meā, quæ mortua est
ut scitis. He. Attende nos Domine. Tu
es quidem princeps divinus in nobis:
tuū est eligere ē nostris sepulchretis,
ubi inhumes tuum mortuum. Nemo
nostrum prohibebit te suo sepulchro,
quo minus sepelias in eo. A. Ago vobis
gratias pro vestra tantæ humanitate
ac liberalitate. Sed si vobis cordi est
ut sepeliā mecum defunctum, et aufer-
ram ē conspectu meo: concedite mihi
preterea, ut agatis pro me cum Ephro-
ne filio Sidoris, ut attribuat mihi car-
verem duplicem, quā habet in carce.

sui agri: et attribuat iusto argento,
in vestra presentia, in usum sepul-
chri. E: Ausculta mihi potius Do-
mine. Ego tibi dono et agrum, et ca-
vernā agri, et quidem in presentia
meorum popularium. Sepeli tuum
mortuum. A: Imō tu potius auscul-
ta mihi. Ego solvam tibi pecuniam
pro agro, eam tu accipe à me. E:
Domine attende. Hic fundus, quo de-
agitur inter nos, est quadringentis
siclis argenti: si vis sepelire tanti. A:
Accipio tanti. Et jam appendam ti-
bi presentem pecuniam. Vos He-
tai estote testes, ut Ephron adducat
michi

mitti in possessionem, quadringentis
his siclis argenti, agrum suum du-
plici caverna, qui ager est e regio-
ne Mambre, id est, Hebronis, una cum
ipsa caverna, et omnibus arboribus, que
sunt undiq in toto spatio ejus. E. Ad-
dico. H. Testes erimus.

Sententia.

Justitia commendat hominem apud
eos qui non sunt omnino perdit.

Rebecca

Gen. 24

Argumentum.

Dispensator Abrahami ducit Rebecca filiam
Laban Mesopotamiam, in matrimonium, Isaac
filio.

Dispensator Abrahami, Rebecca,
Laban, Bathuel.

Mors heus puella, da mihi libere patā
aguis ex tua urna. R: Imò verò potlibet, vir
optime. Mem, bibe. Quinetiā adaquabo tuos
camelos, quantū sat eris. Q: At ego te, pro i
sto beneficio, dono haec in aure, atq; his dua
bus armillis. Sed ego fac sciam, cujus sis
filia, et an sit in adibus tui patris locus, ubi
possimus pernoctare. R: Equatē sum filia
Bathuelis, quē Melca peperit ex Nachore.
Straminis autē et papuli apud nos affati
est, nec nō locus ad pernoctandū. Sed ego cur
ro in oppidū, ut nunc cē haec omnia domi,
ita ut habent. Q: Ago tibi gratias Iova, quod
nō destitisti tua bonitate, et fide, Mra ha
mū herem meū, tui cultore: qui me deduxit
per eam viā, qua venire domū cognator
domini mei. Q: An tu. R: Ita est. Q: Et dono
dedit

dedit tibi istam inaurē et armillas? R. Etiam.
S. Mihi reliquisti? R. Ad fontem, et ecce cum ti-
bi apud camelos. S. Precor tibi Novā propitiū
homo. D. Et ego tibi vicissim, vir humanissime.
S. Narravit nobis hæc soror mea Hebeëa, quæ
nam sis, et unde venias. Quod cum primū
audivi, statim curavi parari tibi diversori-
um, et tuis camelis stabulū, ne foris maneat.
Quamobrem sequere me. D. Ago tibi gratias
pro tanta comitate et diligentia. Sequor. S.
Eamus hæc. Hic sunt aedes nostra. Vos cura-
te hos camelos stramine et papulo. Vos af-
fecte aquam hauritis pedibus hujus,
et comitum. Bene est, accumbite. D. Da-
bitis mihi veniam. Nō capiā cibum, quin
prius dixerō, cuius causa huc venerim.

L. Dic ergo. D: Ego sum servus Abra-
hami hominis, quē Dicitur mirum in mo-
dum, ove, capra, bove, argento, auro, servis,
ancillis, camelis, atq; asinis: cui etiam iā
seri Sara, uxor peperit filium, quē ipse
constituit heredem ex asse, meq; etiam
iurejurando astrinxit, ne locarem ei mipe-
tum, quā esset ex Cananeis, in quorū terra,
habitaret ipse: sed irem domū paternā
eig; eligerem uxore gentile. Cui cum ego
dicerem Quid si mulier nallet me sequi?
Deus inquit illo, cui ego per omnē vitam
paravi, tecum mittet nuncium suum,
qui tibi secundabit hoc iter: ita sumes
filio meo uxore mihī gentile, ortamq; ex do-
mo paterna, hac re exolveres te religione iu-
risjurandi

risjurandi; quo te astringo: si forte non
impetraveris, ut mulier te sequatur.
Ita persuasum est mihi ut venire.
Cumque hodie venissem ad fontem, ita
cogitabam mecum. Nova Deus heri
mei Abrahami: si tu mi ades in
hoc itinere, da mihi ut me nunc
hic stante ad fontem, veniat
puella hystura, que mihi rogitan-
ti det aquam ex urna bibenda,
atque etiam aquetur meos
camelos, ut intelligam eam esse qua
destinasti heri meo. Vix hoc
mecum tacitus cogitabam,
cum subito ecce e-
gressa

gressa Rebecca, ferens urnam in humeris, descendit ad fontem, atque haurit, & cum petivissem potum ex ea, confestim deposita urna offert, & dicit etiam. Me adaquaturam eos: quod & fecit, adaquavitq; me & camelos, Ego quæsi ex ea, cujus esset filia? Respondit Bathuelis filii Nachoris ex Melca. Tum ego accommodavi fronti ejus in aurem, & manibus armillas, & summisse adorans Jovam Deam heri mei Abrahami gratias egi, quod deduxisset me in rectam viam, ad conciliandam filiam herilis cognato filio herili, quam ex his argenteis intellexi eam esse. Nunc ergo, si certum est vobis facere hoc beneficium domino meo, facite ut sciam: sin minus, nihilo secius, ut insistam aliam viam. L. Hæc res plane ex Deo orta est, neque nos omnino possumus repugnare tibi, B. Ita habet. Proinde habet tibi Rebeccam tuo arbitrato, eamq; ducito nuptatum hero tuo, sicut visum est Jove. D. Gratiam habeo Deo primum, quia ita voluerit: deinde vobis, quia non repugnaveritis. Tu verò Rebecca, & vos, non recusatis hæc quantulacunque dona, quæ attuli jussu mei domini.

A. D.
Deus dirigit pios in viam, eorumq; afflictiones secundat.

1733



A.P.

*Esavus vendit Iacobo fratri prærogativam ætatis.**Esavus, Iacobus.*

IMPERTI mihi de rufo isto, nam redeo. ru-
re exanimatus lassitudine. **I.** Vende mihi
in præsentia Prærogativam tuæ ætatis. **E.**
Enego jam jamq; emorior: quo mihi istam
prærogativam? **I.** Ergo confirma mihi
jam nunc venditionem jurejurando. **E.**
confirmo quid vis? juro, addico, nihili fa-
cio jus istud ætatis, præ edulio.

SENTENTIA.

*Brevissima voluptas hominem privat perpetuis bonis. Idem usu ve-
niet impijs, qui amore carnalium voluptatum prodigunt bona cœlestia.*

VENATOR; Gen: 27.

ARGUMENTUM.

*Iacobus arte materna prævertit à Patre felicitatem Esau, Esavus se-
ritus veniens frustra lacrymatur.**Rebecca, Iacobus, Isaacus, Esavus.*

PATER tuus misit venatum fratrem tu-
um Esavum, me audiente, ut afferat fe-
rinam ex qua confectum palpamentum i-
pse edat, eiq; benè precetur à Jova, antequã
moritur. Nunc audi, fili mi, quid velim à te
fieri. Adi pecus, & inde afferto mihi duos
hœdos optimos, ex quibus conficiam pa-
tri tuo edulium, quali maximè delectatur:
quod offeres ei, ut tibi benè precetur,
priusquam excedat vita. **JA.** Sed frater pi-
losus est, ego depilis. Quod si fortè pater
me attrectaverit, putabit se mihi esse ludi-
brio,

brio, itaq; mihi malè non benè præcabitur.
 R. Istam imprecationem ego præstabo na-
 te: tu modò gere mihi morem. JA. Si ita ju-
 bes certum est obsequi, eo. RE. Mihi ma-
 gnopere curandum est, ut agam hanc rem
 callidè & prudenter, ne meus maritus de-
 prendat fallaciam. Nam ut amat rusti-
 cum illum Esavum, nunquam eum postpo-
 net Jacobo, nisi fraude inductus. Ego verò
 Jacobum plus amo, & studeo eum obrepe-
 re infelicitatem, quam conciliabunt patris
 preces ei, cui benè ominatus fuerit. JA. Re-
 deo mater: affero hœdos. R. Factum benè:
 agedum parem cupedia patri tuo cujusmo-
 di scio suavem esse ejus palato. Rectè est,
 parata sunt omnia, non age, induã tibi ve-
 stimenta preciosa Esavi, quæ habeo penes
 me. Hic ornatus te concedet, JA. Quid
 manus & collum, quod pilis caret? R. Ve-
 stientur pelle hœdorum. Bene habet: acci-
 pe nunc hanc escam, atq; hunc panem, què
 confeci. Abi, vide, ut agas prudenter. JA.
 Dabo operam. Pater. IS. Qui tu es fili?
 JA. Esavus primogenitus tuus. Exequutus
 sum mandatum tuum, surge, age, vescere
 ferina, ut mihi benè preceris. IS. Quid sibi
 vult, quod tam citò nactus es, fili. JA. Jova,
 Deus ille, quem colis: objecit mihi, IS. Ac-

cede huc, ut te attrectem fili, sciamque
 utrum sis ipse Esavus, nec ne. Quid hoc?
 vox quidem Jacobi est, sed manus Isavi.
 Tu ne ergo ipse natus meus Esavus?
 JA. planissime. IS. Accede ad me, ut
 vescar tua ferina, fili, tibiq; bene precer.
 Suis esca sanè: funde vinum. IA. Hem
 tibi. IS. Nunc age, amplectere me. Quam
 suavis odor venit ad nares meas? Fragas,
 fili mi, non aliter quàm solet ager lætus mu-
 nere Jovæ. Faxit Deus, ut terra pingvis ir-
 rigata rore cælesti effundat tibi magna co-
 pia segetes & uvas, tibi serviant nationes,
 te colant populi, dominus sis fratrum tuo-
 rum, teq; revereantur ex eadem matre na-
 ti qui tibi imprecabunt, esto execrabilis &
 infelix: qui tibi benè volet & optabit, esto
 fortunatus. IA. Bene gessi meum negocium
 mater. Non agnovit me, & ex attrectatione
 patavit esse Esavum. RE. Bene est, Sed Esa-
 vus jam reversus parat ferinam, quam offe-
 rat patri. Videamus, quid agat: nam mul-
 tùm fallit eum spes. ES. attolle te mihi pa-
 ter, & vescere mea ferina, ut mihi benè pre-
 ceris: IS. Nam quis tu es? E. Rogas? primo-
 genitus tuus Esavus. IS. Totus obstupesco,
 horreoque. Quis ergo is est, qui modò mi-
 hi attulit ferinam? Nam ecce ea prorsus
 comedi ante tuum adventum, eique fau-

sta omnia sum precatus: quæ res rata erit.
 E. Heu mihi, num quid causæ est, quin
 ergo perpetuo perierim? Attamen mihi
 quoque bene precare pater. IS. Frater
 tuus rem astu tractavit: abstulitque fau-
 stitatem tuam. E. Næ ille probè respondet
 suo nomine, qui me jam bis circumvenierit.
 Primum enim fraudavit me prærogativa gra-
 tias: deinde nunc intercepit bonam pre-
 cationem mihi debitam. Sed nihilne tibi
 reliquum fecisti? quo mihi faustum aliquid
 precare? IS. Protectò feci eum dominum
 tuum statuique ut fratres ei servirent, eum-
 que munivi frumento & vino. Quid tibi
 jam faciam fili? E. Solumne id habebas?
 Imperti etiam me aliqua felicitate: Hem
 quid agam miser? IS. Habebis quidem
 domicilium minus bonum & à pingvitu-
 dine soli, & à superno rore cœli, & vives
 gladio, servies fratri, veruntamen erit tem-
 pus illud, cum vicissim vinces executies-
 que jugum eius de collo tuo. E. Non pro-
 cul abest luctus à patre meo. Nam certum
 est mihi, interficere Jacobum fratrem.

SENTENTIA.

*Properandum est, & arripenda occasio. Serò ploratur Esauus, serò
 venit ad colligendum Manna post ortum Solem, aut die Sabbathi.
 Serò afferuntur falces post messam, cum jam nihil superest in spicile-
 gio. Serò pulsant fores fatuæ virgines. Serò conabuntur mirare
 nigri per portam iam clausam.*

DIALOG. SACRORUM.
 JACOBUS PROFUGUS. Gen. 29.
 ARGUMENTUM.

*Iacobi profugi congressio cum Rachele sobrina sua.
 Iacobus, Pastores, Rachel.*

FRatres unde estis? P. Ex Charra. I. ec-
 quid noſtis Labanem filium Nachoris?
 P. Maximè. I. Valetne? P. Valet; atq; ecce
 tibi Rachelem filiam ejus, huc venientem
 cum pecudibus. I. Hem diei multum ad-
 huc eſt, nec dum tempus eſt cogendi peco-
 riſ, quin aquetis pecudes, deinde ituri pa-
 ſtum? P. Non poſſumus, donec convene-
 rint omnes greges, quo avolvamus ſaxum
 ab ore putei, atq; ita adaquemus. I. Sed ve-
 nit Rachel agens pecus, quid ceſſo avol-
 vere ſaxum, ut hauriam ei aquam, atque
 hanc primam ab ea ineam gratiam? O mea
 Rachel amplectere me. R. Abſtine tu ma-
 num, quis tu eſ? Ego ſum Iacobus patruel-
 liſ tuus, filius Rebeccæ, non contineo la-
 chrymas præ gaudio. R. O felicem adven-
 tum! Sed ego ceſſo ire in urbem, ut nunci-
 em hæc meo patri?

SENTENTIA.

*Gaudent mutuo congressu conſanguinei. Sunt autem pij omnes in-
 ter ſeſe divina conſanguinitate conjuncti.*

LABAN. Gen. 31.
 ARGUMENTUM.

*Laban fugiente: Jacobum aſſecutus, cum eo jurgatur. Deinde fit
 inter eos foedus.*

Laban, Iacobus, Rachel.

Que

Quæ ratio impulit te, ut in scio me ab-
 duceres meas filias tanquã ferro par-
 tas? Cur clam & nesciente me aufugisti, ne-
 que fecisti me certio rem, ut prosequerer te
 voluptate carminum, tympanorum, citha-
 rarum? neq; permisti mihi, ut oscularer
 meos natos & natas? Stultè sanè fecisti, &
 erat mihi in manu nocere vobis. Sed Deus
 vester patrius heri monuit me, ut caverem,
 ne te offenderem ulla re. Verùm esto, pro-
 fectus sit sanè præ desiderio quod capie-
 bas è domo paterna, Deos verò meos cur
 furatus es? **I.** Illud feci adductus metu,
 veritus ne tu eriperes mihi tuas filias, quod
 autem attinet ad tuos deos, si quem penes
 inveneris eos, per me quidem plectatur ca-
 pite. Noscita præsentibus necessarijs no-
 nostris, si quid tui est apud me. **L.** Rectè di-
 cis. Perscrutabor vestra tabernacula, **IA.**
 Non recuso quo min9 vestiges omnia, **RA.**
 Video me esse in magno periculo. Nam La-
 ban pater meus conquirat per omnia ten-
 toria suos deos penates, quos ego furata
 sum, meo viro nesciente. Quod si furtum
 deprehenditur, concitavero magnas tur-
 bas. Comminiscenda aliqua fallacia est, &
 quidem subito, nam meus pater jam aderit
 hic. Probe inveni viam, obruam eos in hoc

stercore camelino, deinde sedebo super, facile eum fallam. L. Rimatus sum acerrimè tabernaculum Jacobi, tum Liæ, tum duarum ancillarum, nusquam inveni. Restat tabernaculum Rachelis: in quo si non erunt, mirabor. Hęc omnia sunt mihi perscrutanda. Hic quidem non sunt: neq; hic. Quid si sub hac culcitra? tantundem. At in hoc angulo erunt: at non sunt. R. Noli egre ferre domine, quod non possum assurgere tibi: nam sum in menstruis. L. perquisivi omnia diligentissimè: sed nusquam comperi meos deos penates. I. Quodnam concepisti tantum scelus, aut quod facinus admisi in te, ut tu me sic persequerere? Scrutatus es omnia mea consilia, ecquid invenisti de ulla suppellectile tuæ domus? Prome huc coram necessariis utriusq; nostrum, ut ipsi iudicent de utroq; nostrum. Jam viginti annos egi apud te, tuæ oves & caprę nunquã fuerunt infœcundæ: non comedi arietes tui gregis, nihil ad te retuli ereptum feris: ipse semper præstiti damnum: tu mihi semper imputasti, si quid per furtum amissum est, tam interdum quam nocte meo periculo amissum est. Denique ea fuit mea conditio, ut & de die conficerer æstu, & de nocte gelu, & interea somnus abesset ab oculis meis.

is. Jam hic mihi vigesimus annus agitur, cum sum domi tuæ. Servivi tibi quatuordecim annos pro tuis duabus filiabus: sex autem pro ovibus & capris: cum tu interea mutavisti mihi mercedem decies. Quod nisi Deus patrius, videlicet Deus Abrahami, & terror Isaaci affuisset mihi, tu quidem dimisisses me vacuum, Sed respexit ille miseras & labores, quibus sum perfunctus: id quod heri satis ostendit. L. Meæ sunt hæc filiæ, mei filii, meum pecus: denique quicquid hîc vides, meum est. Et nunc quo pacto optime consulam meis his filiabus & filiis, quos pepererunt? Opinor, si ego & tu feriemus foedus, quod sit testimonio utrique nostrum I. Optime ego hîc erigam cippum ex hoc saxo: vos mei propinqui accumulate lapides. Capiamus cibum super hoc tumulo. L. Hic hodie tumulus erit medius testis, inter me & te. I. Perplacet, atq; ex hac re vocetur Galaarus. L. Aut etiam Masphæ, ut significet: Deum aspecturum quid fiat à me & te, cum discesserimus alter ab altero. Quid si tu eris durus meis filiabus, aut si duces alias in matrimonium præter eas, tum hæc pacta perinde sunt, atque si nulla facta sint. Atque hujus quidem rei testis esto De-

us utriusque. Vides hunc tumulum, vides & hunc cippum, quem extruxi inter me & te: Hic tumulus, & hic cippus, testes sunt, neque me adversum te, neque te adversum me transiturum ad nocendum. Deus Abrahami, & Deus Nachoris utriusque patris sunt nostri vindices. I. Ego conjuro per terrorem mei patris Isaaci. Atque ut hæc sint sanctissima, faciam hodie sacrificium in hoc monte, ad cujus epulas vos omnibus invito. L. Conciliemus.

SENTENTIA.

Deus suos tuetur ab adversariis.

JACOBUS REDUX. Genes. 33.

ARGUMENTUM.

Jacobus ex Mesopotamia rediens Esavum fratrem domus placat.

Esavus, Iacobus.

O Salve multum, mi frater charissime. I. Salve & tu plurimum, germane mihi optatissime. E. Ut te libenter amplector post longum spacium temporis. I. Et mihi profecto tam diu nihil fuit jucundius, quam nunc videre te incolumem, itaque præ gaudio non teneo lachrymas. E. Nec ego possum non flere, ita totus lætitiâ gestio. Sed quid sibi vult iste grex mulierum & puerorum, quos tecum ducis? I. Uxores sunt, & liberi, quibus me Deus, quæ sua est liberalitas, ditavit. E. Quid autem tibi vult totus ille

ille grex quem offendi veniens? I. Volui te
 eo dono mihi placare. E. Satis multa habeo
 frater, habe tibi tua. I. Ne repudia me quæ-
 so, si te mihi propitium habeo, accipies à
 me munusculum. Nam quod vidi faciem
 tuam, videor mihi vidisse numen quiddam:
 nec mirum, qui mihi tam facilis fueris. Ita-
 que quæso, ut accipias a me munusculum
 quod ad te adductum est: postquam Deus
 pro sua benignitate tam multis bonis me
 cumulavit, ut nulla re caream. E. Quando
 urges tantopere, accipio, et si nisi opus erit.
 Age eamus? ego ibo una tecum. I. Scis pu-
 eros esse teneros, ovesq; & capras & boves
 prægnantes: quod si fatigentur vel unum
 diem, actum est de ovibus & capris omni-
 bus, interibunt. Sed amabo, i præ, ego per-
 gam clementer & placide, prout postulant
 ea quæ præ me duco, ipsique pueri, donec
 veniam ad te in Seir. E. Saltem relinquam
 tibi aliquot ex meis comitibus. I. Quid
 opus? gere obsecro mihi morem.

SENTENTIA.

Potentiorum ira comitate & summissione est lenienda.

JOSEPHUS VENDITUS. Genes. 37.

ARGUMENTUM

Iosephum ob invidiam vendunt fr̄ atres mercatoribus Ismaelitis

Simeon, Levi, Ruben, Iosephus, Iudas, Mercatores.

ECce vobis somniator ille. Agite occi-
 damus

damus eum: dejiciamusq; corpus ejus in aliquem specum. L. Sed quid renunciabimꝰ patri de eo? S. Devoratum esse ab aliqua fera. Videbimus quorsum evadent ejus somnia. R. Impium fit, maculare manus sanguine pueri, idq; fratris. Deducimini ab ista mente. Nihil potestis gravius consulere in nos, aut in patrem nostrum. S. Unde tibi incessit ista nova religio? Vis ergo sinamus eum vivere, qui suis in somnis portendit, nos omnes, ipsosq; adeo parentes fore sibi supplices? An non dignus est, qui eat somniatum apud inferos? R. Frater, si ita futurum est, qui caveas? sin minus, quid times? Usq; adeo ne indignum tibi videtur, si puer imperitꝰ somniavit? quid potest esse culpæ in somniis? postremò si ad eò obfirmastis animum, neque potestis avocari ab isto consilio, est hîc puteus sine aqua: saltem abstinete manus, dimittite in puteum, culpa erit aliquanto minor. S. Videris Rubentꝰ, nobis certum est, perdere puerum. JO. plurima salute vos impertio, fratres amantissimi. S. At nos te malo maximo impertimus, qui somnias, te coli à fratribus, quos nunc salutas tam blande. Agite, discindamus vestem hanc versicolore, quâ pater eum ornavit delicatulum puellum. JO. Hei

Hei mihi, quid cogitatis mihi facere? L. nec
 abimus. IO. Ah ne facite. S. Stat sententia.
 IO. O fratres charissimi, per Deum opti-
 mum maximum, per communem nostrum
 parentem, qui conficietur mœrore, obse-
 cro, obtestor, quid fecit? quod est meum
 scelus? quæ mala mens vos agit? S. Frustrâ
 rogas. IO. Patrem vestrum? S. Certum est.
 IO. Ah vester sum, vester sum frater. S. Sur-
 do canis, demitte. R. At ego subduco me
 hinc, non sustineo adesse in tam tristi spe-
 ctaculo. IO. Heu me miserum, quo detru-
 dor? nimirum ad manes. O pater, pater
 quàm triste nuncium accipies de filio, in
 quanto luctu trahes vitam: Juda obsecro
 tuam fidem, miserere mei, miserere paren-
 tum. L. Sedeamus hîc meridiaturi. IV. Vi-
 deo mercatores quosdam venientes: vul-
 tis auscultare mihi? Quid profuerit nobis
 cruenta cedes fratris nostri? Vendamus
 eum potius Ismaelitis, quos videtis veni-
 entes. Ne afferamus hostiles manus fratris:
 abstineamus à sanguine. Nam certè frater
 noster est, procreatus eodem sanguine. A-
 gite, finite vos exorari. L. Rectè ais. S. Sed
 ne forte. Frater ne metue, amittes eum
 venditione non minus quàm nece. L. Ita
 est, accedit etiam quæstus ex venditione:
 quem

quem questum amitteremus, si eum necaverimus. SI. Sine fiat. IV. Heus marcatores, vultisne emere puerum quendam elegantem? M. Fortasse: fac videamus. IV. Extrahite eum è puteo: empturi sunt. IO. Nunc quidem mihi pereundem est, video, extrahor ad cædem. IV. Ne trepida, non necaberis, sed venderis. En nobis puerum lepida forma. M. Herclè, bellum, & ingenuum. Quanti eum judicatis? IV. triginta argenteis. M. Accipimus. Accipite pecuniã.

SENTENTIA.

Invidia homines impellit ad quodvis facinus. Et Deus non quidem deserit, sed ut exploret, in extremos angores venire patitur.

JOSEPHUS CAPTIVUS. Genes. 40.

ARGUMENTUM.

Iosephus, captivus interpretatur somnia Prægestatoris & Pistoris Pharaonis.

Iosephus, Prægestator Pharaonis, & Pistor.

Quid accidit, ut hodie vultu sitis adeo mœsto? PR. Somniavimus uterque & caremus conjectore. IOS. At habet Deus conjectores. Agite narrate mihi. PR. Videbar mihi in somnis videre ob oculos vitem, ex qua tres palmites orientur; quæ deinde quasi germinaret, produxit florem, unde uvæ plenæ racemis maturescunt. Erat autem mihi in manu poculum Pharaonis, itaq; cepi uvas, easq; in id expressi, deinde tradidi ei in manum IO. Hæc est inter-

interpretatio: Tres palmites tres dies sunt, hinc ad triduum Pharaos jubebit te produci e carcere, restituetq; in locum muneris pristinum, stabisq; ei ad cyathos, ut ante. Quamobrem ubi adeptus fueris hoc tantum bonum, facito queso, ut memineris mei, praestesq; mihi hoc beneficium, ut facias mentionem mei apud Pharaonem, meq; extrahas ex hac domo. Nam surreptus sum clam ex terra Hebraeorum; neq; quicquam feci, quamobrem compingerer in carcerem. PI. recte sane interpretatus es. Sed audi meum quoq; somnium. Tria alba canistra erant super capite meo, in quorum summo inerant Pharaonis omnis generis cibi pisto-rij, quos inde aves comedebant. I. Accipe conjecturam. Tria canistra tres dies sunt. Ab hinc tres dies jussu Pharaonis securi ferieris, atq; in crucem tolleris, ubi alites vorabunt tuum cadaver.

SENTENTIA.

Deus piis arcana detegit: idemq; viam ad eorum salutem saepe longe ante praeparat.

JOSEPHUS CONJECTOR Genes. 41.

ARGUMENTUM.

Iosephus interpretatur Pharaoni duo somnia, ob eamque causam Pharaos praeficit eum toti Aegypto.

Pharaos, Iosephus.

Somniavi quiddam, quod nemo mihi potest interpretatione explicare. Te autem audio

audio esse conjectorem somniorum, ideo-
 que accersivi. I. Equidem is sum, per quem
 Deus interpretatur somnium tuum Pharao.
 Itaq; narra. PH. Videbar mihi ad stare ripa
 fluminis: atq; ex eo exierunt septem vaccæ
 benè habitæ, & pulchrę visu, quæ pascebantur
 in carecto. Ecce autem deinde septem
 aliæ graciles, & deformes supra modum &
 tenui corpore, quales nunquam vidi in Æ-
 gypto: quę devoraverunt priores, quas
 cum demississent in sua viscera, tamen id nō
 apparebat: aded semper macie deformes
 erant, ut prius. Ego somno solutus sum.
 Deinde rursus oppressus somno videbar
 videre septem spicas crescentes in uno ca-
 lamo, opimas & formosas, secundum quas
 succrescebant totidem alię graciles & te-
 nues, & exesæ uredine, quæ devoraverunt
 septem illas generosas. Hęc ego indicavi
 conjectoribus: sed nemo est, qui possit mi-
 hi explicare. I. Somnium tuum unum est
 Pharao, Deus præmonet te eorum, quæ fa-
 cturus est. Septem vaccæ generosę sunt se-
 ptem anni, item septem spicę, idem volunt:
 unum idemq; somnium est. Septem verō
 vaccæ, & spicę tenues septem alii sunt an-
 ni, quibus fames vigebit. Hoc id ipsum est,
 quod dixi: Deus quod facturus est, tibi in-
 dicat.

dicat. Sic habeto: septem annos proximos futuros esse felicissimos frugum terræ, præferim in Ægypto, quos sequentur alteri, ita infesti penuria omnis cibi, ut læta illa ubertas priorum sit omnino consumenda fame. Tanta, inquam, laborabitur penuria, ut tantæ rerum abundantie ne vestigium quidem ullum supersit. Nam quod his somniaſti, id ideo factum est, ut intelligas omnino decretum esse Deo ita facere, idq; brevi. Quare dispice, Pharao, virum aliquem scientem & peritum, quem præficias Ægypto: præterea curatores & ædiles annonæ, qui legant quintas in Ægypto, cogantq; quam maximum numerum frumēti his proximis septē annis uberibus, quod condat nomine tuo in urbes. Ita fiet ut proximo septennio duplas consequaris annonas, quibus Ægypto defendatur à fame & pernicie altero septennio, PH. Salutare consilium, & dignum homine sapientissimo. An quisquā hodie est, qui æquè spiret numen atq; hic? Ergo cum Deus indicet tibi Iosephe tantas res, non est dubium, quin tu sis prudentissimus & sapientissimus omnium. Itaque jam nunc volo, ut sis Gubernator domus meæ, atque omnis meus populus pareat imperio tuo, Major ero te solio tantum.

Entrado tibi curam & gubernationem totius Ægypti, atque ad confirmationem huius rei, hunc annulum detractum meis digitis induo tuis, dono hac veste byffina, & hoc torque aureo. Jubeoque te vehi curru primo secundum meum: & volo proclamari ante te. Congratulate. Ne vivam Pharaon, nisi tu unus eris in tota Ægypto, cujus injussu non audebit quisquam vel mutire. Deinceps jam non vocaberis Josephus, sed Saphnatopaneas, ut nomine ipso pollicearis interpretationem obscurorum. Atque ego tibi despondeo Asnatam filiam Potiphare Pontificis Heliopolitani. I. At tibi Rex pro tantis beneficiis habeo gratiam, quantam maximam possum, daboq; operam, Deo volente, ut nec te mandati, nec me recepti muneris poeniteat.

SENTENTIA.

Deus pios post dolores & infamiam mira arte evehit ad voluptates & honores. Quod si non omnibus piis accidit in hac vita, ac in futura accidet. Nam prima pars vitæ Iosephi, quæ calamitosa fuit, umbra est huius vitæ piorum. Altera verò futura. Atq; idem dico de Iacobo & Davide. Ad gaudia venit per dolores: ad honores per infamiam, ad dulcedinem per amaritudinem: ad altitudinem per humilitatem: per mortem ad vitam.

JOSEPHUS AGNITUS Gen. 44.

ARGUMENTUM.

Filij Israël revocati de via jussu Iosephi facti simulatè accusantur, tandem Iosephus sese eis aperit.

Præfectus domus Iosephi, Filij Israël, Ruben, Iudas, Iosephus.

Restate viri, Heus, Vos appello, sistite gressum

gressum. Hoc cene est humanum factum aut dignum hospitibus, pensare bonum malo? An nesciebatis eam esse, qua herus est solitus potare? Ac etiam sperabatis eum ignoraturum, qui est divinus? male omnino à vobis factum. F. Quid tibi vis homo, cum tua ista iracundia? Aut quid nos accusas? P. Ita vos. Deus amet, ut nescitis. F. Nam qui sciamus? P. Suffurati estis pateram heri mei. Scitis nunc? At etiam ut fingunt vultum. IV. Pacetua dixerimus, vir optime: absit procul à nobis istud facinus. Tute scis, ut reportaverimus ad te usq; è sinibus Chanaanæorum, argentum repertum in ore sacco- rum nostrorum: tantum abest, ut sustulerimus è domo domini tui aurum, aut argen- tum. Ita tecum agemus: Si quem penes de- prehensa fuerit patera, ipse moriatur, nos omnes perpetuæ servituti addicamur. P. I- mò agemus mitius. Qui fuerit convictus furti, mihi servus esto, cæteri liberi disce- dunt. F. Placet: deponamus sarcinas ocy- us, hem, scrutare ut libet. P. Placet conqui- rere à maximi sarcina ad minimi. Hic qui- dem non est, neque hîc: sed profecto inve- nietur, Ubi ubi est, diu celari non potest. Euge manifestum furtum. Hic est in sacco minimi natu. An etiam nunc potestis nega-

re? deprehendi ne ego furem manifestariū:
 F. Aperta res est perjimus funditus. Heu
 rem miseram & luctuosam! An ulli unquā
 mortales fuerunt æquē infortunati, atque
 nos fumus. IV. Equidem nequeo satis mi-
 rari, atata data nobis sunt verba, redeamus
 properè omnes ad Saphnatopaneam si ulla
 superest spes salutis. Ah pater, pater, inquam
 metuo malè, ne tibi accidat quod metue-
 bas tantoperè. Jo. Quod facinor fecistis ho-
 spites? An ignoratis me unum eorum esse,
 qui divinant? IV. Quid dicemus Domine?
 quid loquemur? quam causam afferemus?
 Deus patefecit peccatum nostrum: ecce
 nos tibi servos, una cum eò, apud quem in-
 venta est patera. IO. Bona verba, imò ipse
 unus mihi serviet, vos redite salvi ad pa-
 trem vestrum. IV. Quæso ut liceat mihi pau-
 caloqui apud te cum bona venia, nam tu
 quidem es alter Pharao. Cum primum huc
 venimus, ut tute scis, frumentandi gratiā,
 rogasti, numnam esset nobis pater aut fra-
 ter. Nos respondimus, patrem esse nobis se-
 nem, fratremq; natum jam annoso patre,
 cujus item germanus alter excessisset vita,
 ullum tum solum restare domi cum matre,
 patriq; esse charissimum, & tu jussisti fratrem
 illum adduci ad te, quod diceres velle te
 videre

videre. Nos respondimus, patrem non posse carere, ^{eo} quin moreretur præ mœrore. Tum tu interdixisti nobis aditu ad te, nisi minimꝰ natu frater compareret nobiscum. Nos retulimus omnem rem patri. Cumq; juberet nos redire hac eadem de causa, negavimus venturos sine fratre. Pater dicebat, ex duobus filiis, quos sustulisset ex uxore, alterum à feris devoratum esse, nec postea visum sibi: alterũ supereffe, qui abduceretur à se, & si aliquid humanitꝰ accideret ei, nos fore in causa, ut senex miserè interiret. Nunc si revertar ad eum neq; reducam puerum, quem unice amat, simul atq; viderit me, morietur, atq; ita fuerimꝰ auctores miserimæ mortis patris nostri, ejusque senis. At qui ego vas factus pueri sistendi. Quare obsecro, ut ego potius serviam servitatem apud te pro puero: ipse redeat domum cum fratribus. Neque enim sustineo redire ad patrem sine puero, ne videã mala, quibus afflictabitur. JO. Enimverò jam non contineo me, nec possum amplius dissimulare. Vos exite omnes foras. O fratres mei, ego sum Josephus. Obsecro, est ne superstes pater? Quid obstupuistis? Amplectimini me. Oh! non contineo lacrymas. Ego sum Josephus germanus vester, quẽ vendidistis

didistis mercatoribus euntibus in Ægyptum. Proinde ne angimini, neve dolete, quod me vendideritis. Nam hoc totum profectum est à providentia Dei, qui voluit ut huc ante venirem. Etenim duo anni fame infesti elapsi sunt, superest adhuc quinquennium, quo neque sementis fiet, neque messis. Quamobrem Deus præmisit me in hæc loca, quo sciebat vos esse venturos, ut esset qui servaret vos, paternamque domum. Itaque non vos, sed Deus misit me, qui effecit ut essem Pharaoni pater, toti ejus familiæ Dominus, universis Ægyptiis princeps. Quocirca proficiscimini continuo ad patrem, & narratote ei, me esse & vivum & magnum, atque gratiosum, proinde ne cunctetur commigrare ad me una cum tota domo & pecoribus. Suppellectilem ne moretur: plurimam enim hîc esse. Nam alam vos in terra quadam feraci, non procul hinc. Ecce vos videris oculis vestris, videt charissimus frater Benjamin, ut colloquar vobiscum meo ipsius ore? licet agnoscatis, & omnia renunciatis patri. O mi Benjamin: teneo ne ego te? ut libenter amplectar vos omnes, salvete fratres, redditi mihi post longum tempus. FR. Salve & tu frater mitissime,

LIBER I.
SENTENTIA.

39

Deus est mirificus, etiam peccata suorum convertit ad ipsorum salutem.

MOSES EXPOSITUS Exod. 2.

ARGUMENTUM.

*Moses infans à matre expositus reperitur à filia Pharaonis & matris
ignoranter traditur alendus.*

*Iacobeda mater. Moysi, Maria soror, Thermutis filia
Pharaonis, Ancilla.*

Hucusque evasimus clanculum, & jam
pervenimus ad flumen. Nunc expo-
nendus est hic infans puer, ne Pharaon re-
sciscat eum esse servatum à nobis contra
suum mandatum atque voluntatem. Nam
quod servavimus eum jam tres Menses, fe-
cimus cum magno periculo. Sed melius e-
rat venire in discrimen etiam de vita, quam
sinere necari tam formosum puerum. O
crudelem regem qui iusserit interfici om-
nes partus mares: Quam multi sunt per-
empti iussu ejus, in ipso ingressu vitæ: Que
est unquam audita tanta immanitas, infan-
tes jugulari in ipso limine & ingressu vitæ?
O mi filiule, ego mater misera cogore expo-
nere te hinc in papyro? te, quem tuli utero,
quem peperit, quem per tres menses occul-
tavi, & occultarem adhuc, si possem. O rem
acerbam! mense separari à te, sine ulla spe
tui unquam videndi? Quid me futurum
est? Quid te autem fili, quem hic defero?
Verum cum non possimus quod volumus,
C 5
velimus

velimus quod possumus, quod meum fuit,
 feci ut te oculum haberem. Nunc com-
 mendo te clementiæ & providentiæ divi-
 næ. Vale meæ delitiæ, vale mi filiolo. M. Ma-
 ter, ego hîc manebo in occulto, si tu per-
 mitteres, ut videam quid futurû sit. I. Permit-
 to & domum redeo. T. Hic est flumen, quo
 venimus ad lavandum. Vos pedissequæ hic
 inambulabitis secundum flumen: ego cum
 ancilla concedamus in hunc recessum a-
 moenum & occultum. Sed quid video in
 papyro, ancilla? vise quid sit. Videtur mihi
 esse cista. A. Et recte videtur, hera: & qui-
 dem est oblita bitumine & pice. T. Affere-
 am huc, aperiamus. Ah miselle puer, est va-
 giens miseret me ejus. Ex pueris Hebræo-
 rum est. M. Venio in summam spem confer-
 vandi pueri. Accedam. Salve Domina. T.
 Quid tu ais? M. Vis ne ut accersam tibi nu-
 tricem ex Hebræis, quæ nutriat tibi puerû?
 T. Benè dicis, accerte. M. Jam hic aderit.
 T. Bonis auspiciis huc descendi. Habeo
 puerum, quem curabo educâdum pro meo.
 Nihil potuit accidere mihi optatius. Neq;
 vereor offendere meum patrem in re tam
 pia & humana: Ah scelus est, jugulare
 partus recentes. At quam elegans est
 quam benè natus, Nonne flagitium
 est

est necare tales pueros? M. Hic tibi adduco
nutricem Domina. T. Mulier, tu educabis
mihi & enutries hunc puerum. Ego tibi sol-
vam mercedem. I. Faciam.

SENTENTIA.

*Quos Deus servare vult, eos quidem in summa pericula venire pati-
tur: non perire.*

DUMUS Exod. 3.

ARGUMENTUM.

*Iova in dumo ardente alloquitur Moſen, cumq; mittit in Ægyptum,
ad liberandos Israelitas ex ſervitute.*

Mofes, Iova.

DEum immortalem quid mōſtri video eſt
dumum ita ardentem, ut tamen non
conſumatur? Libet videre, quid hoc ſit rei.
I. Moſes, Moſes. M. Quid eſt? I. Locus hic
facere eſt, noli accedere huc. Detrahe tibi
calceos de pedibus. Ego ſum Deus patrum
tuorum: Deus Abrahami, Deus Iſaaci,
Deus Jacobi. Vidi anguſtias populi mei,
qui eſt in Ægypto, gemitumq; audivi, quem
exprimit violentia exactorum operum. No-
vi labores meorum. Itaq; deſcendi, ut eri-
pam eos è montibus Ægyptiorum, abdu-
camq; ex illa terra, in terram bonam & am-
plam, abundantem lacte & melle: quam in-
colunt Chananæi, Hettæi, Amorrhæi, Phe-
rezei, Hevæi, Jebuſei. Et nunc volo mitte-
re te ad Pharaonem, qui educas populum
meum poſteros Iſraelis ex Ægypto. M.
Nam

Nam quis ego sum, ut adeam Pharaonem, & educamq; Israelitas ex Ægypto? I. Adero ego tibi, atque hoc signo intelliges esse à me missum: Cum eduxeris eos ex Ægypto, coletis Deum in hoc monte. M. Age sane, adivero Israelitas, dixero me missum à Deo patrum ipsorum. Quod est, dicent, nomen ejus? Hic quid respondeam? I. Ero qui ero, dices Israelitis: Ero misit me ad vos: dices, inquam, missum te à Jova Deo patrum ipsorum Abrahami, Isaaci & Jacobi, atque hoc esse nomen meum immortale, quo nomine volo notus esse in sempiternum. I. modo, convocatisq; senioribus Israelitis dicito, te à me missum, qui tibi apparuerim: quiq; statuerim eos respicere, liberareq; calamitate, quâ opprimuntur per Ægyptios, atque avehere in regionem longè omnium felicissimam. Ubi te audierint (audient enim) adibis tu una cum senioribus regem Ægypti, quem admonebitis nomine Dei Hebræorum, ut sinat vos procedere iter tridui per deserta, vestroq; Deo sacrificare. Nec verò me lateat, non permisurum, nisi vi coactum. Quare affictabo Ægyptum miris modis, ut tandem amittat vos libens. Quin etiam ne abeatis vacui, ponam populum in gratia cum Ægyptiis, per-

perficiamq; ut mulieres egressuræ exorent
 vicinas & hospitas, vasa aurea & argentea,
 & vestem: quæ deinde imposita vestris li-
 beris exportabitis, atque ita compilabitis
 Ægyptum. M. At enim non habebunt fi-
 dem dictis meis, negabuntque visum mihi
 Jovam. I. Quid istud est, quod tenes in ma-
 nu? M. Virga est. I. Abjice humi; quid nunc?
 quid est? M. Perij, serpens est. I. Ne fuge,
 sed prehede manu caudam ejus, Vides rur-
 sum virgam factam ut credant tibi visum
 esse Jovam, Age rursus immitte manum
 in sinum tuum, educ: vides tam albam le-
 pram, quam est nix? Nunc refer in sinum, e-
 duc, vides sanam esse iterum, ut est ceterū
 corpus? quod si primo signo non adducen-
 tur: ut fidem habeant tibi, ut altero. Sin ne
 duobus quidem prodigiis persuasum eis
 fuerit, sumes de aqua fluvij, quam ubi tu-
 deris in terram, fiet sanguis. M. Quæso te
 Domine, neque antea eam disertus, neque
 nunc sum post tuum colloquium, nam la-
 boro titubantia oris, & tarditate lingue. I.
 Ecquis dedit os homini? aut quis facit mu-
 tum, aut surdum? quis videntem aut cæ-
 cum? An non ego is sum? cedo ego mode-
 rabor tuæ linguæ, tibi que suggeram, quid
 sis dicturus, M. Obsecro, mitte idoneum
 aliquem

aliquem. I. Enimvero odiosus es. Est tibi frater Aharon Levita, is benè difertus est, scio quin procedet tibi ob viam, teque viso letabitur animo. Et tuo præbis verbis, quod voles ego verò moderabor tuo ori & ejus, præmonstraboque quid sit vobis faciendum. Ipse alloquetur populum pro te, eritque tibi pro ore, tu eris pro Deo. Feres etiam manu istam virgam quâ edas portenta. Abi sanè.

SENTENTIA.

Deus voce Balborū dejicit hostes suos. Eloquentia debet servire pietati.

VITULUS. Exod. 32.

ARGUMENTUM

Moses placat Iovam iratum Israelitis ob aurum vitulum, ipse pœnas illis irrogat.

Iovæ, Moses, Iosua, Aharon, Levitæ.

ABi, descende. Jam enim depravati sunt populares tui, quos eduxisti ex Ægypto. Deflexerunt citò de via, quam docueram, duxeruntque sibi ex auro vitulum quem adorant, cui sacrificant, dicuntque Deum esse à quo sunt educti ex Ægypto. Video sanè populum esse intractabilem, & refractarium. Quamobrem sine me ut irascar, conficiamque eos, deducamque ex te gentem magnam. M. Cur exardeas irâ in tuos, quos eduxisti ex Ægypto magna vi manuque valida. an ut jactent Ægyptij, eductos à te malitiosè, ut deleres eos in motibus

tibus ad inter necionem, prorsusq; tolleres
 è medio? Quin omitte istam tuam iracun-
 diam, atq; ita, ut decet, remitte hanc no-
 xam populo, Memineris Abrahami, Isaaci,
 & Israelis, cultorum tuorum, quorum po-
 steritatem iurasti te multiplicaturum ad
 numerum stellarum, daturumq; ei terram
 illam quam possideat in æternum. I. Jus o-
 ras; hem, remitto. M. Facis ut te dignum est.
 Ego verò descendo de monte cum his dua-
 bus tabulis. IOS. Quem clamorem audio?
 pugnatur in castris. M. Non est iste cla-
 mor urgentium vi, aut terga vertentium;
 sonum audio cantantium. Sed accedamus.
 Hei mihi, quod flagitium video? totq; totq;
 iracundia ardeo: valeant tabulæ. Ah, fra-
 ter frater, quid tibi fecit hic populus, ut eũ
 obligares tanto scelere? Aha. Ne Irasce-
 re Dñe, Tute nosti hunc populum, quam
 sit perversus. Cũ flagitarent à me ut facerẽ
 sibi Deos, qui p̄irent eis. (sese enim nesci-
 re quid accidisset isti Mosi, à quo esset edu-
 cti ex Ægypto) iussi, ut quod quisq; habe-
 ret ornamenti aurei, detraheret sibi, & affer-
 re ad me: quod etiam fecerunt: id ego immisi
 in ignem, unde effectus est hic vitulus. Itaq;
 vides eos nudatos ornamenti: id quod ideo
 feci, ut eos notarẽ ignominia apud hostes.

M. Vide-

M. Video, Nunc si quis à Jova stat, huc ad me; Benè habet, convenerunt omnes. Levita, agite nunc viri fortes, ac cōmodate suum quisque fratrem, amicum proximum; nemini parcite, nam ita jubet Jova, Deus Israelitarum, L. Ita fiet.

SENTENTIA.

Populus, si absunt boni magistri, sicilicet labitur in gravissimos errores. Deus piorum precibus placari se sinit.

CONQUERENTES Num. II.

ARGUMENTUM.

Populus voluptates Ægyptias desiderat, fastidians caelestem cibum. Et Jova conquerenti Moysi pollicetur sese illis suppeditaturum carnem, sed ad penam.

Populus, Moyses, & Jova.

UTinam nunquam emigrassemus ex Ægypto. Quid enim agemus in hac vasta solitudine? quis dabit hinc nobis carnem, quâ vescamur? Nam cum venit in mentem piscium, quibus immunes vescebamur in Ægypto, tūc autem cucumerum, pepo- num, porrorum, ceparum, alliorum: confenescimus, nihil ante oculos habentes, præter nescio quod Manna. M. Hei mihi, quas querimonias audio? O Jova, cur ita mihi adversus, ita à me voluntate alienus es, ut mihi imposueris onus totius hujus populi? Nunquid ego populum hunc concepi? nunquid peperis? ut mihi jubeas eum ferre in sinu meo, quomodo tert nutritrix a-
lumnium

lumnum in terram, quam jurasti majoribus ejus. Unde mihi carnes ad tantum populum, qui eas à me cum fletu flagitat? Non possum ergo solus eum sustinere: est enim gravior, quàm pro me. Quod si isto modo agis mecum, interficere me potius, si quid apud te autoritatis habeo, quàm ut videam perniciem meam. I. Congrega mihi septuaginta viros senioribus Israelitis, quos scis esse senatores & primarios populi; eosque adducito ad oraculare tabernaculum, ibi affuturos tecum. Ego descendam, & ibi colloquar tecum de manique de spiritu, quo præditus es, quo eos afflabo, ut ipsi tecum ferant partem oneris populi, ne tu solus sustineas. Populo autem sic dicit: Lustramini in crastinum & vescimini carne. Fletus enim vester pervenit ad aures Jovæ, dum flagitatis carnem, & desideratis vobis Ægyptum. Dabit vobis Jova carnem, quam comedatis, & comedatis non uno die, non duobus, non quinque, non decem, non viginti, sed ad menstruam diem, dum vobis exeat per nares, & faciat nauseam, quoniam contempto Jova, qui versatur inter vos, plorantes apud eum conquerimini, vos exisse ex Ægypto, M. Sexcenta sunt millia peditum hujus populi, qui adest

D

mecum,

mecum, & tu dicis, te daturum eis carnes, quibus vescantur, per mensem. Nunquid eis mactabuntur oves & capræ, & boves, quæ satis sint? I. Nunquid debilitata est Jovæ manus? Jam videbitis, eventurane quæ promiseram, nec ne.

SENTENTIA.

Cupiditas rerum carnalium parit fastidium spiritualium. Et Deus carnalia petentibus interdum largitur, sed illa brevis voluptas parit longos dolores. Cum maximè explebuntur carnales voluptate, aderit poena.

CALEBUS Num. 13.

ARGUMENTUM

Populus de terrentibus exploratoribus, desperat de expugnanda promissa terra. Quare iratus Iova jurat non perventuro, exceptis duobus, qui considerant, videlicet Iosua & Calebo.

Exploratores, Calebus, Populus, Iosua, Moses, Iova.

VENIMUS in eam terram Moses, & Aaron & Israelitæ, ad cujus explorationem missi sumus à vobis & quidem abundat lacte & melle, atque ecce vobis fructus illius terræ. Videtis quanta sit hæc: una quæ in palo portatur à duobus, videtis & hac malogranata, & ficus. Sed incolas habet fortes, & urbes maximas, easque munitissimas. Enaci quoque prognatos illic vidimus, Amalechitæ ad Austrum incolunt; Hettæi, & Jebusei, & Amorrhæi in montanis. Chananæi autem accolunt mari & Jordani. CAL. Ne dubitemus eo proficisci, & invadere illos fines: nam sumus futuri victores. E. Minimè verò: est enim populus ille

ille fortior, quam nos terra infausta suo-
 rum habitatorum consumptrix, in qua non
 nisi immani statura homines vidim⁹. Quid
 quod vidimus Enacios de genere Gigan-
 tum, cum quibus comparati videbamus
 nobis esse locustæ. P. Utinam aut in Ægy-
 pto mortui essemus, aut in hac solitudine
 moriamur. Cur enim adduxit nos Jova in
 hanc terram ferro trucidandos, mulierib⁹
 nostris, & parvulis prædæ futuris? Nonne
 fatius nobis est repetere Ægyptum? Cree-
 mus nobis imperatorem, quo duce rever-
 tamur. JO. Cavete Israelitæ, ne quid faci-
 atis, cujus vos post hac poeniteat. Terra
 quam explorantes lustravimus, terra est
 bona imprimis. Si nobisnaverit Jova, in-
 tromittet nos in eam, eamq; nobis dabit,
 terrâ scatentē lacte & melle. Coeterum ne
 rebellate contra Jovam, & ne illius terre
 incolas timete, quos nos præsidio destitu-
 tos, adjuvante Jova conficiemus. De-
 ponite metum. P. Lapidentur, lapiden-
 tur. JOV. Quousque tandem irritabit me
 iste populus? Moles, quousque mihi fi-
 dem non habebit, tot miraculis per me e-
 ditis apud eum. Quin eum peste illata ex-
 scindo, ductur⁹ ex te gentē majorē poten-
 tiorēq; quàm ista est? M. Ergo cum audient

Ægyptii (quibus de medio vi tua eripueris
 hunc populum) cumque audient incolæ i-
 stius terræ, te, Jova, qui in hoc populo ver-
 satus ab eo conspectus sis præsens, ipsius
 oculis: te, cujus nubes supra eum steterit,
 qui præiveris ei interdiu in columna nu-
 bis, noctu in columna ignis, qui, inquam,
 audiverint hunc populum à te funditus es-
 se deletum, dicent, te, quia nequiveris in-
 tromittere eos in terram, quam eis jurave-
 ris, trucidasse eos in desertis. Quare ute-
 re excellenti ista virtute, Domine, de qua
 loquens ita dicebas: JOVA AD IRAM TAR-
 DUS, AD CLEMENTIAM PROPENSUS, CUL-
 PAM ET PECCATA CONDONANS: IN POENA
 AUTEM IRROGANDA PARENTUM CUL-
 PAM IN NATOS, AD TERTIAM ET QUAR-
 TAM STIRPEM PERSEQUENS. remitte que-
 so culpam huic populo, ut tua benignitas
 postulat, utque ei ab Ægypto hucusque re-
 misisti. JOV. Remitto ut postulas: Verun-
 tamen ne vivam, nisi Jova gloria replebit
 totum orbem terrarum. Nam eorum, qui
 viderunt meã gloriã & miracula, que feci
 tum in Ægypto, tum in solitudine, & me
 tamen tentaverunt jam vel decies, neque
 mihi obtemperaverunt: eorum, inquam,
 qui me irritaverunt, nemo videbit terram
 quam

quam juravi majoribus eorum. Sed Caleb-
 bum meum (quoniam alio animo prædi-
 tus, quam cæteri, mihi obsecutus est) in-
 troducam in terram, quam adibit: eamque
 possidebit ejus progenies. Cras revertimi-
 ni in solitudinem, versus mare rubrum: ete-
 nim quem ad finem tandem audiam istius
 in me sceleratæ multitudinis Israelitarum
 maledicta? Renuntia hæc eis, Ne vivam
 (inquit Jova) nisi quemadmodum locuti
 estis, audiente me, sic faciam vobis. In isto
 deserto cadent cadavera vestra, & omnis
 vestrum numerus, quotquot recensui su-
 pra vigesimum annum murmurastis in me,
 Non intrabitis, inquam, in terram in qua
 promisi me collocaturum vos. Excipio
 Calebum Jephonis, Josuam Nunis filium,
 Parvulos quoque vestros, quos dixistis
 præde futuros, introducam in terram, quæ
 vos renuistis, eaque potentur, Atque in-
 terea, dum vestra cadavera per deserta la-
 buntur, & consumuntur, liberi vestri ibi-
 dem poenas dabunt vestri meretricij, per
 quadraginta annos, quibus vos supplicio
 afficiemini, pro numero dierum, per quos
 dies explorastis terram, totidem annis du-
 ctis pro totidem diebus, sentietisque quid
 sit in me esse contumacem. Ego Jova & di-

co, & sine dubio efficiam ut hujus perversæ multitudinis homines qui contra me cojerunt, consumantur, & intereant in hac solitudine.

SENTENTIA.

Nihil est perniciosius illi qui docent minora sperare, quam ferant promissa Dei. quibus tamen maxima pars hominum credit. Deus ignavos & diffidentes averfatur, atque deserit: confidentes vero jurat. Tantum quisque potest, quantum se divina ope posse credit, si modò est ejus fides fundata in Dei promissis.

BALAAMUS Num. 22.

ARGUMENTUM

Asina Balaami ab ipso, quia resistit, verberata loquitur, & Genius, qui ei in via obstabat, Balaamum alloquitur.

Balaamus, Asina, Genius.

UT te Deus malè perdat asina, quæ me invitum de via avehis in agrum. At ego te pro isthoc maleficio onerabo ictibus improba. Ary, ary: quin ergò redis in viam? Nunc sumus inter duas macerias, non licebit mihi amplius declinare. Hei mihi, attrivit mihi pedem ad maceriam. At dispaream, nisi te malè multo plagis. Ary, Ary quid hoc monstri est? succumbit, at jam saxo te attolles? alloqui hîc te contundam usque fustè, hem! A. Quid in te commisi, ut me jam tertium cæderes? B. Rogitas improba, quæ me hîc ludificaris indigne? Atq; utinam mihi esset gladius præ manu: nam te hîc jam confoderem. A. Nonne ego sum asina tua, cui tu semper hæcenus inequi-

inequitasti? Nunquid tale solita sum facere tibi? B. Nihil. G. Balaame, cur cecidisti asinam tuam jam tertium? Ecce ego ipse veni tibi adversatum, quia hoc iter susceptum est contra meam sententiam. Asina verò ubi me vidit, declinat me jã ter: quod nisi fecisset, profectò jam te interfecissem, eam verò sivissem vivere. B. Peccavi fateor: sed non videram te mihi obvium in via. Itaque si hoc iter tibi displicet, revertar. G. Imò eas licet cum istis: veruntamen vide ut ea demùm dicas, quæ tibi suggestero

SENTENTIA.

Falsa vates minus interdum vident, quàm jumenta.

TRANSJORDANI Num. 22.

ARGUMENTUM.

Rubenses & Gadinii impetrant à Mose sedem trans Jordanem.

Rubenses & Gadinii. Moses.

HÆc regio, quam Israelitæ ceperunt, hæsis lova duce incolis, regio est, apta pecori alendo, nos autem habemus pecus: quod nisi tibi molestum est, Moses, liceat nobis possidere hanc terram, ut non trajiciamus Jordanem. M. Scilicet, fratres vestri ibunt in bellum, vos hic manebitis ociosi? Cur deterretis animos Israelitarum, ne perveniant in regionem, quam ipsis Jova dedit: Ita nimirum fecere patres vestri, quando eos ego misi à Cadebarne specu-

latum regionem. Cum enim pervenissent ad fluvium Escolem, vidissentq; terram, fregerunt deinde animos Israelitarum, ne irent in terram sibi à Deo datam. Quare iratus Deus, eodem die juravit, nullum eorum, qui egressi essent Ægypto, qui modò excessisset vige simum annum, visurum terram, quam ipse promiserat Abrahamo, Isaac, & Jacobo, & quod non paruissent sibi: exceptis Caleb & Josua, qui paruerant. Ergo iratus eos ductavit ultrò citroque errantes per deserta quadraginta annos, donec tandem desit totum illud genus hominum, qui offenderant Jovam. Ecce autem vos extitistis pro patribus vestris, qui augeatis numerum nocentum, ut ira Jovæ in Israelitas incremento augeatur. Nam si deseretis eos, ductabit eos adhuc per deserta, atque ita perdidideris hunc populum.

R. Ædificabimus hîc caulas pecudibus nostris, & urbes parvulis & imbellibus: nos verò in armis erimus parati ante Israelitas, donec collocaverimus eos suo loco. Nostri autem liberi, & cætera turba ad bellum inepta, manebunt in urbibus muratis, ut sint tuti ab incolis terræ. Nec revertemur domum, quin prius Israelitæ venerint quisq; in hæreditatis suæ possessionem: neq; enim

enim cernemus hareditatem cum eis trans Jordanem, quibus obvenerit eis Jordanem orientem versus. M. Siquidem re præstabitis, quod pollicemini verbis, armatique ad bellum, quotquot potestis ferre arma, Jova spectante, Jordanem transmittetis, non redituri, nisi deturbatis à Jova hostibus, terraque subdita Jovæ imperio: si, inquam, ita agetis, invenietis postea, purgati & Jovæ & Israelitis, atque hac quidem lege possidetote terram, Jova volente. Sin hæc non feceritis, sic habetote, vos peccare in Jovam, vestrumq; peccatum in vos recusurum.

SENTENTIA.

Quibus jam prospectum est, ij debent ceteros, quibus nondum prospectum est, adjuvare.

RACHABA Jos. 3.

ARGUMENTUM.

Rachaba meretrix abditos apud se exploratores Israelitarum clamè dimittit per fenestram, pacta cum eis de salute sua & suorum.

Ministri Regis Hicrichuntis, Rachaba, Exploratores Hebræi.

Rachab, nos sumus missi à Rege, ut abducamus homines eos, qui devenerunt ad te: venerunt enim gratia explorandæ totius regionis, proinde vide ut eos producas nobis. R. Ad me quidē venerunt homines quidam, qui cujates sint lateret: ii cum vespere clauderetur porta exierunt, nec scio quò se receperint. Si voletis con-

fequi velociter assequimini. Salva res est,
 abierūt. Ra. nūc adeo hospites quos occu-
 lui in tecto sub fascibus lini, ut eos servem
 beneficio meo. Heus, he9 hospites, dormi-
 tis? EX. nondum. R. Attendite quę dicam.
 Non ignoro, Jovam dedisse vobis hāc ter-
 ram: nosq; omnes incolas hujus terrę per-
 culsos vestri terrore abjecisse animos. Ni-
 mirum audivimus ut exiccaverit Jova ma-
 re rubrum, quo vobis pateret iter abeunti-
 bus ex Ægypto: usq; tractaveritis duos re-
 ges Amorrhæorum, qui trans Jordanem ha-
 bitant: Sehonem dico, & Oggum quos de-
 levistis funditus. Quæ res ubi audita est,
 concidimus animis, nec jam quisquam est,
 qui audeat vel mutire in vos: propterea
 quod Jova Deus vester Deus est tam supra
 in cœlo, quàm infra in terra. Qua circa ju-
 rate nunc mihi per Jovam, si ego vos deme-
 rita fuero meo beneficio, vos quoq; parę
 gratiam telaturos domui meę paternę, &
 mihi date certę signum, quo consuletis sa-
 luti mei patris & matris, & fratrum, & so-
 rorum, & omnium, quæ habent, asserve-
 tisque vitam nostram à morte. EX. Fi-
 dem damus: nec recusamus mortem
 (modò indicetis vos) cum Jova tradiderit
 nobis hanc regionem, nī vos bona fide
 confer-

conservaverimus. R. Ergo hac lege demittam vos per funem per hanc fenestram, quæ prospicit rus. Rectè est evasistis. Nunc contendite in montes, ne incidatis in eos, qui vos persequuntur; & ibi, dum redeunt, latitote triduum, post ituri. EX. Attende diligenter, quæ dicemus. Cum ingressi fuerimus hos fines, tu appendes funiculum istum rubrum de hac fenestra, per quam nos dimisisti, convocabisque ad te totam vestram familiam. Quod si quis à domo tua foras exierit, suo id periculo fecerit, nos aberimus à culpa. Quæ verò erunt apud te, ea si quis attigerit, nos præstabimus damnum. Quod si hanc rem palam feceris, erimus liberi à jurejurando, quo tu nos obstrinxisti. R. Placet conditio, valete. EX. Et tu.

SENTENTIA.

Pios adversus impiorum injuriam abscondere, pium est, & Deus hujusmodi officia remuneratur.

GABAONITÆ Jos. 9.

ARGUMENTUM.

Iosua deceptus à Gabaonitis foedus pacifitur cum eis,

Gabaonitarum legati, Iosua.

ASsumus huc à finibus remotis, Josua & Israelitæ, missi ad faciendum foedus vobiscum, si vobis ita videtur. I. Fortassis habitatis in finibus his, quod si est, non est nobis

nobis fas inire foedus vobiscum. L. Nos quidem parati sumus dedere nos in tuam potestatem. I. Cujates estis, & unde ad estis? L. Assumus ex terra admodum remota hinc, moti nomine Jovæ Dei vestri. Audivimus enim famam ejus, & quanta facinora ediderit in Ægypto, usque acceperit duos Amorrhæos reges Transjordaninos, Sehonem, Heseboniorum, & Oggum Basanæ apud Astorota. Hac de causa mandaverunt nobis nostri Senatores & universi nostrates, ut sumto viatico veniremus obviam vobis, oblaturi vobis servitium nostrum, & pacturi foedus vobis. Atque ecce panes, quos domi sumus in comestum, cum sumus profecti ad vos: qui jam marcuerunt, mucueruntque, ut videtis. Hæ quoque lagenæ, quas replevimus novas, videtis ut sint laceræ: vestimenta etiam, & calcei nostri, jam detrita sunt longitudine itineris. Quare, nolite putare, nos meditari dolum illum: bona fide agimus, ut res est sic loquimur. I. Ergo componemus pacem vobiscum, vosque conservabimus: & id jurejurando confirmabimus.

SENTENTIA.

Et proinde interdum fallimur. Nam quò minus sunt ipsi malitiosi, eò facilius credunt aliis, eos existimantes ex suo ingenio. Itaque cavenda piti est credulitas, & cum columbina simplicitate conjugenda est serpentina astutia.

JOSUA

JOSUA. Jos. 24.
ARGUMENTUM.

Josue concio ad populum. In qua commemorat Iovæ erga ipsos beneficia, & populus sese Iovæ servitutum promittit.

Josua, Populus.

Audite universi Israelitæ, quamobrem
 Jova Deus Israelitarum jussit me vobis
 effari. Majores vestri olim incoluerunt trās
 flumen, videlicet Thara pater Abrahami
 & Nachoris, coluerūtq; duos peregrinos.
 Jova autem illinc evocavit Abrahamum
 autorem generis vestri, eumq; perduxit per
 omnes fines Chanæorum, & auxit proge-
 niem ejus, deditque ei Isaacum: Isaaco au-
 tem Jacobum & Esavum: Esavo assignavit
 Seir montem possidendum: Jacobus ejusq;
 liberi descenderunt in Ægyptum, Ibi cum
 excrevissent in gentem magnam, numero-
 samque, & potentem, divexebantur ab Æ-
 gyptiis, sed Deus Ægyptios mirè infesta-
 vit, tandemq; eductos ex Ægypto Israeli-
 tas deduxit ad mare rubrum: Quo Ægy-
 ptii & quadrigariis & equitibus perle-
 quentibus, invocaverunt Jovam, qui illos
 arcuit à vobis, densa quadam caligine, im-
 missoq; mari, eos demersit, spectantibus o-
 culis vestris tam inaudita facinora. Dum
 autem diu mansissetis in solitudine, intro-
 duxit

duxit vos in fines Amorrhæorum transjordaninorum, eosque bellum vobis inferentes subegit vobis: eisq; cōcisis dedit vobis possessionem eorum agri. Extitit deinde Balacus Saphoris filius, Moabitarum rex, qui vos bello lacefferet: acersivitque Balaamum filium Phegoris, qui vobis imprecaretur, dicas. Sed noluit Deus audire Balaam, convertitque imprecationem ejus in faustam precationem, & vos tutat9 est à manu illius. Ita trajecti Jordane pervenistis ad Hierichuntem, & bello resistentes Hierichunteos, & reliquos populos superavistis auxilio Dei: qui quasi missis ante vos vespis egit vobis in fugam duos reges Amorrhæorum, nullo vestro vel ense, vel arcu, vobisque dedit & agrum non vestro labore cultum, & urbes ab aliis, quã à vobis ædificatas, quas incolitis: vineisq; & olivetis, quę non levistis, vivitis. Quibus de causis veremini Jovam, eumque verè & sincerè colite, & auferte Deos quos majores vestri coluerunt trans fluvium, & in Ægypto. Quod si non placet vobis servire Jovæ, dispicite hodie utrum servituri sitis diis, quibus servierunt conditores vestri trans flumen, an deis Amorrhæorum, quorum fines habitatis, Nam ego quidem,

& do-

& domus mea servimus Jovæ. PO. Absit ut omisso Jova serviamus aliis diis. Nam Jova Deus noster est. Hic eduxit nos, majoresque nostros, ex Ægyptia servitute, idem fecit in oculis nostris mira illa miracula, & nos custodivit in omni itinere, quod confecimus, & inter omnes nationes per quas iter fecimus, fugavitque nobis omnes gentes, & Amorreos incolas. Nos quoque colemus eum, est enim Deus noster. IO. Non poteritis colere Jovam, est enim Deus sacrosanctus, Deus rivalis impatiens, non feret vestra delicta & peccata. Quod si eo relicto coletis deos peregrinos, avertetur, & vos non minus multis conficiet, quàm antè bonis affecit. P. At eum colemus. IO. Ergo testamini vos deligere vobis Jovam ad colendum? PO. Testamur. IO. Itaque tollite Deos istos peregrinos, & expiate animos vestros Jovæ Deo Israelitarum. PO. Jovam Deum nostrum colemus, & ei dicto audientes erimus. I. Igitur consignabo hæc literis, & erigam hoc ingen's saxum sub hac quercu, quod testis erit (utpote quod audiverit omnia Jovæ ad vos dicta) si fortè fregeritis fidem Deo vestro,

SENTENTIA.

Deo seruatori, bonorumque datori, seruari debet.

JAEL. Judic 4.

ARGUMENTUM.

Iael Sisaram Chananeorum ducem telo occidit.

Iael, Sisara, Baracus.

DIverte ad me Sisera, quò fugis? diverte ad me tutò. S. Benè mones, Sed ubi abdes me? I. bono animo es; sub hoc centone latebis tutissimò. S. Amabo, da mihi paululum aquæ, quod bibam; nam valde sitio. I. Imò lac dabo ex hoc signo, quod melius est aqua, Hem bibe, Nunc quiescito, ubi texero te hac stragula veste. S. Sed ita ad januam casæ, ut si quis me quæret, neges hîc esse. I. Fiet, nunc demum facinus edam majus fœminea manu. Quid hoc gestit animus jubetque audere ulisci hostem Dei & bonorum. Periisti Sisara fœminea manu interimeris. B. Quis mihi nunc, quis demonstrat, quò fugerit hostis? Quem ego si affecutus fuero, dispeream nisi ei animam eripio malis modis. Sed quò se surripuit? quo fugit? IA. O Deum immortalem, quantum ego facinus feci? quantam laudem inuenies Jael? Sed videonè Baracum? Ipse est: sectatur hostem jam jacentem. Barace, huc sis ad me ut tibi commonstrem hominem quem quæris: B. Obsecro est ne is apud te? I. Videbis. B.

Proh

Proh superi, quid video? Sifaram jacentem humi exanimem! quis hoc fecit? I. Mulieris factum. B. At non muliebrem tamen, Sed quælo, tunè hoc fecisti? I. Ipsa res indicat. B. Video, sed narra obsecro, quo pacto egeris. I. Vidi fugientem, jussi, ut ad me veniret, eumq; operui centone. Deinde cum jam quiesceret, cepi clavum, quem malleo adegit tempus ejus. Ille provolutus ad pedes meos afflavit animam. B. Utinam sic pereant, quotquot adversantur Deo.

SENTENTIA.

Turpi morte digni sunt, qui Deo aut ejus populo adversantur. Debilium manu vincit Deus fortes.

GEDEON Triturans Judicum 6.

ARGUMENTUM

Genius Gedeonem mittit ad debellandos Madianitas.

Genius, Gedeon.

ADsit tibi Jova, vir fortissime. G. Quæso te Domine, si adest nobis Jova, cur tam dira patimur? Ubinam sunt tot ejus mira facinora, quæ nobis narravere majores nostri, nos ab eo esse eductos ex Ægypto: cum nos nunc deseruit, & addixit Madianitis? GE. Vade cum tua ista virtute, & defende Israelitas à Madianitis, Ego sum tibi author vadendi. G. Amabo te Domine, qua tandem re defendam Israelitas, qui sum tenuissimus omnium Mauassensium, & minimus totius paternæ familiæ? GE. Adju-

E

vante

vante me, concides Madianitas ad unum.

G. Quæso te, nisi molestum est, ut signo aliquo mihi confirmes, te eum esse, qui mecum loquare. Noli discedere, donec redam ad te, & expromam opem quam faciam apud te. **GE.** præstolabor tibi. **G.** Paravi omnia. **GE.** Pone carnem, & panes non fermentatos super hoc saxo, & effunde jus. **G.** Hei mihi, ignis consumpsit omnia, Jovæ Genius est: me miserum, qui viderim Genium Jovæ. **GE.** Salvus es: per metum, non ideò morière.

SENTENTIA.

Dei ope quivis quivis potest.

GEDEON. Judic. 6.

ARGUMENTUM.

Gedeon deluctu habito dimissisq; domum imbellibus, castra Madianitarum noctu explorat: deinde cum trecentis militibus aggressus profugat.

Iova, Gedeon, Præco, Phara, madianita, alter Madianita, Milites.

Gedeon, tu nimis multos habes milites. Quòd si cum istis copiis vinceretis hostes, Israelitæ jactarent sese victoriam adeptos esse suo Marte, atque ita non ego laudarer, sed ipsi, id quod detraheret meæ gloriæ. Proinde cura, ut proclametur in exercitu, ut timidi repetant domum, & discedant ex monte Galaad. **G.** Præco indica timidis & cæteris discessum, secundum legem, ut nosti, **PR.** Audite, audite, milites.

Si quis

Si quis edificavit novam domum, neque dedicavit, is domum repetato, ne si in prælio occubuerit, alius eam dediceret. Item si quis vineam conseruit, neque profanavit, domum repetato, ne si occubuerit in prælio, alius eam profanet. Item si quis uxorem desponsavit, neque duxit, domum repetato, ne si in prælio occubuerit, alius eam ducat. Item si quis timidus est, & molli animo, domum repetato: ne animi sui molli-
 tie effoeminet animos aliorum, G. Rectè est, restant decem millia. I. Sed ne sic quidem satis pauci sunt. Nam quò pauciores erunt, eò mihi gloriosior erit victoria: Deduc ista decem millia ad aquas, ego eos illic tibi probabo, & ostendam, quosnam velim ire tecum, quos item nolim. G. Agite milites, descendite ad aquas. I. Da operam, ut quicumque lambent aquam ligamore canum, hoc secernas ab eis, qui ad bibendū procubuerint in genua. G. Ita factū est. Superfunt trecenti: qui ducta ad os manu lamberunt aquam: reliqui omnes proni in genua biberunt. I. Per istos trecentos dabo tibi victoriam. Gedeon, & Madianitas tibi dedam. Quocirca jube reliquos omnes ut domum repetant. G. Ite domum Israelitæ exceptis his trecentis, &

& nobis relinquitte com meatum & tubas.
 I. Gedeon, descende, dum nox est, ad ca-
 stra Madianitarum, ut intelligas me ea tibi
 tradere. Quod si solus descendere vereris,
 descende unà cum Phara famulo tuo, ut
 audias, quæ dicentur, ut ita confirmeris
 ad invadenda astra. G. Phara descenda-
 mus clanculum in vallem, ut exploremus,
 quid animi habent hostes. PH. Placet. G.
 Cave ne strepitum edas, hic est via. PH.
 Tace, tace here. G. Quid est? PH. Jam non
 procul absumus à castris. G. Sic habet,
 audio stertentes, hi sunt extremi armato-
 rum. Sed tace, nescio quis loquitur. M.
 Scin tu quid ego somniaverim? AL.
 Sciam, si dixeris. M. Panis hordeaceus
 videbatur mihi volvere se cum strepitu per
 castra Madianitarum, qui tandem delatus
 est ad tabernaculum, quod valida vi impul-
 sum & labefactum, à culmine dejecit. AL.
 Vis tibi certo interpreter? Ensis est procul
 dubio Gedeonis Filii Joë Israelite, cui in
 manum dedit Deus Madianitas unà cum
 universis castris. G. Audisti? P. Atque
 equidem libenter. C. Satis habeo, no-
 stra est victoria, i, redeamus ad nostros.
 Habeamus tibi Gratiam Deus immortalis,
 qui nobis bene fortunatus hoc consilium.
 PH.

PH. Non est dubium, quin perierint Madianitæ. O felicem noctem, & quouis etiam die clariorem! G. Adeste viri, expugnificimini, vicimus: Deus dat nobis castra hostium: Sed audite diligenter, quæ dicam: Distribuem vos in tres classes, feretis singuli singulas tubas manu, testasque vacuas, & in testis tædas: sed videte, ut imitemini me. Cum venero ad extrema castra, facirote, ut videbitis me facientem, cumque audietis meam tubam, & eorum, qui erunt mecum, vos quoque repente colliditote testas, sumtisque manu læva tædis, dextra tubis clangitote, & magnum strepitum circum castra editote, simulque proclamatote, Gladius Jovæ & Gedeonis. Auditis ne? MIL. Audimus & meminimus. G. Vadamus. Jam ferè media nox est, ventum est ad ultimam partem castrorum: Vos ambite Castra, sed excitantur custodes, clangamus propere MIL. Gladius Jovæ & Gedeonis. IO. Pæan. GE. Deum immortalem, quid video! Deus convertit ipsorum enses in ipsos: confodiunt sese mutuis vulneribus. M. Ut cadunt crebri, jam bona pars interiit: ceteri mandant se fugæ. G. Fugiunt: instate viri, urgete, consequimini, sectamini, ut è tanto numero nullus evadat.

Christianum bellum (quod in Gedeonico adumbratur) à voluntariis non coactis gerendum est. & præstat esse paucos alacres quàm multos ignavos. Stulti duces milites numerant, sapientes ponderant.

JEPHTHA. Judic. II.
ARGUMENTUM

Jephtæ persuadent senatores Israelitarum, ut se militiæ ducem præbeat adversus Madianitas.

Senatores Israelitarum, Jephtæ.

Missi sum⁹ ad te Jephtæ ab Israelitis ut à te postulemus, ut præbeas te nobis ducem ad gerendum bellum contra Ammonitas. Scimus enim te esse eo corporis & animi robore præditum, eaque peritia belli, ut nemo hodie possit id præstare melius. I. Enimverò vos exegistis me domo paterna præ odio: cur nunc venitis ad me rebus adversis, cur non potius retinivistis me cum non egeretis, ut esset vobis copia mei, cum egeretis? S. Noli, quæso Jephtæ, meminisse injuriæ: Si nos non rectè fecim⁹, qui te expulerimus, tu rectè facies, si malefium pensabis beneficio, & innocentiam tuam magis commendabis. Quod si nobiscum profectus fueris & debellaveris Ammonitas, constituemus te principem omnium Galaaditarum. Atque ita fiet, ut tibi longe plus sit boni, quàm quanta fuit injuria. I. Ergo si revocatis me ad bellandos Ammonitas, & Jova subegerit eos mihi, obtinebo principatum in vos? S. Con-
testa-

restamur Jovam; nos esse facturos isto modo. I. *Peruasistis, eamus.*

SENTENTIA.

Præstantes viri, licet eis in præsentia non egeas, retineri debent in casus futuros.

RUTHA Ruth. I.

ARGUMENTUM.

Noemium ex Moabtica descendentem in Israeliticam terram, quamvis dissuadentem, comitatur præ ejus amore Rutha, ejus quondam nurus.

Noemis, Rutha, & Orpha ejus nurus.

Postquam Deus cœpit misericordiam sui populi (ut accepimus) eumque levavit fame, quæ cogerat me & meum virum & liberos confugere ad Moabitas, jam nihil est, quod velim diutius agere in regione aliena. Sed vobis, meæ nurus charissimæ, censeo redeundum suam cuique in domum patriam, postquam estis private viris, jam satis me comitate estis ita sanè secundo Deo, quem precor, ut vobis rependat pietatem, quâ usq̃ estis in mortuos & in me. Det inquam vobis Jova, ut nanciscamini quietem utraque apud suum maritum. Amplectimini me, charissimæ conjuges meorum olim filiorum. R. Heu nos miseris siccine disjungimur à te? Ah non fiet suavissima socrus; quin ibimus tecum ad tuos populares. N. Nihil opus est, meæ filioliæ, an putatis me adhuc utero edituram filios, qui futuri sint vobis viris? Reverti-

timini potius mea filiola, abite. Nam ego quidem grandior sum, quam ut sim apta viro. Sed fingite non abesse spem, meque tradi viro vel in proximam noctem, filiosque gignere: an estis expectaturę, donec adoleverint? poteritis ne tam diu durare sine viris? Non ita filiola: parendum est necessitati. Et quidem valde angor vestro discessu, sed nolo repugnare urgenti Deo. O. vera prędicat: melius est reverti. N. Sapis, amplectere me. Vale, mea quondam nurus. O. Vale & tu mea quondam focus. N. Vides Rutha, ut tua fratria repetat patriam, & deos penates? quid apud me heres? revertere unã cum ea. R. Ne me urge de te relinquenda. nam quo tu cunq; ibis, ego ibo: ubi tu commoraberis, ego commorabor: Communis mihi tecum erit populus, communis Deus. Tecum unã moriar, tecum unã humabor: Ita omninõ statui. Atque ita mihi habeam Jovam propitium, ut una mors est me à te separatura. N. Postquam ita animum obfirmasti nolo improbius obfistere tuo studio Eamus sane Deo bene fortunante.

SENTENTIA.

Beati, qui Deum Deique populum anteponunt & parentibus & patriã, eos DEUS longe remunerabitur.

BOOZUS. Ruth: 2.

ARGUMENTUM.

Boozus comiter alloquitur Rutham spicas legentem, ejusque pietatem collaudat.

Boozus, Messores, Curator messis, Rutha.

A Ssit vobis Deus messores. **M.** Et tibi benè omnia fecundet. **B.** Quæ est ista puella Curator, quam hic video spicas legere? **C.** Moabitris est, quæ huc sequuta est Noemem, remigrantem ex agro Moabitarum; Ea rogavit, ut liceret sibi legere spicas post messores, id quod adhuc fecit à manè, tam paulùm manet domi. **B.** Audi filia ne i-veris in agrum alium ad colligendas spicas, neve hinc abieris; sed hereto apud meas ancillas, & videto, ut sequaris eas, in quemcūque agrum ibunt messum. Ego vetabo, ne famuli sint tibi molesti. Quod si sities, petes potum ex iisdem vasis, quibus ipsi hauriunt: **R.** Quidnam est in me, quamobrem digneris ita respicere me, cum sim peregrina? **B.** Perlatum est ad me qualem tu te præstiteris erga tuam focrum, post obitum viri tui; utq; relicto parente terraq; patria contuleris te ad populum tibi antea ignotum. Quod factum Jova Deus Israelitarum rependet tibi cumulatissimo præmio, sub cujus quasi alatum præsidium te receperis. **R.** Agnosco tuam gratui-

gratuitam benignitatem & misericordiam, qui tam comiter confirmas animum meum consolando: cum tamen indigna sim, quæ vel in ancillarum tuarum numerum veniam.

SENTENTIA.

Pii favent piis, iisque benefaciunt.

DISCALCEATUS. Ruth. 4.

ARGUMENTUM.

Boozus recusante altero propinquo, emit bona Noemis, eamque ducit uxorem.

Boozus, propinquus Ruthæ, Senatores.

HEus tu qui hac transis, ades dum, paucis te volo. P. Quidnam id est? B. Cōfiste hinc paulisper, dum evoco aliquot de senatoribus civitatis, qui transeunt per hanc portam, ut assint nobis in hoc negotio, nam serio accomodetis huc nobis aliquantisper vestram operam: non faciemus longius. S. Assumus, dic quid velis, B. Partem fundi qui fuit cognati nostri Elimelechi, vendat Noemis reversa ex agro Moabitaram. Hanc rem visum est mihi ut tibi significarem, ut, si empturus es, emas in præsentia senatus nostri: sin minus, indices mihi. Nemo est enim cognatus propinquior te, secundum quem ego sum. PR. Ego vero emam, B. Sed cum fundum emes à Noemi, & à Rutha Moabitide, uxore demortui, emes ea conditione, ut ipsam Rutham du-

cas in matrimonium, ut fuscites nomen il-
 lius in ejus hæreditate. PR. Non licet mi-
 hi hac lege emere, ne corrumpam patri-
 monium meum. Eme si tu vis, meo loco,
 mihi quidem emere non licet. Atque in
 hujus rei testimonium accipe calceum me-
 um de manu mea. Ego quemadmodum
 exui me hoc calceo, ita testor, me cedere
 tibi meum jus in hac re. B. Vos senes &
 populares, hodie mihi testes eritis, ut ego
 emam omnia bona Elimelechi, & Chilionis
 & Machlonis, à Noemi: ut mihi vindic-
 cem in matrimonium Ruthã Moabitidem,
 conjugem Machlonis, ut consulam no-
 mini demortui in ejus hereditate, ne ejus
 nomen tollatur ex ejus consanguinitate &
 patria. Vos hodie testes nuncupo. SE. Te-
 stabimur. Faxit Jova, ut mulier ista, quæ
 est intratura tuam domum, tam sit foecun-
 da, quam fuerunt Rachel & Lea, quæ duæ
 prole instruxerunt domum Israelitarum:
 utque egregium quid facias in Ephrata, &
 tibi nominis famam compares Bethlehe-
 mæ: fiatque domus tua similis domui Pha-
 ris, quem Judas iustulit Thamare, proge-
 nie tibi à Jova data ex puella.]

SENTENTIA.

*Qui vult defuncti possessionem, habeat & viduam. Qui vult quod
 placet, habeat & quod displicet.*

Samson victus ad Palestinos deductus abruptis vinculis occidit maxilla asini mille viros.

Iudæi, Samson, Palestini.

AN nescis Palestinos habere imperium
in nos? S. Scio. I. Cur ergo incendi-
sti segetes eorum, magno nostro malo? S.
Par pari retuli. I. Atqui huc venimus, ut te
vinctum dedamuseis. S. Siquidem jureju-
rando confirmatis, vos non illaturos mihi
manus violentas, vinciatis licet. I. Fidē da-
mus. S. Agite, colligate, ducite, abducite,
quantum potestis. P. Euge adducitur ille
hostis noster capitalis, qui immisit scelera-
tas faces in segetes nostras, nunc, nunc ul-
ciscemur. Nunquam hodie effugies Sam-
son, hic tibi finis adest vitæ. S. Agite verò,
si quid animi haberis, aggredimini vin-
ctum, experiar ramen, si quid habeo solita-
rum virium. P. Euge. Perimus, abruptis vin-
cula, sed invadamus undique: non evadet,
præstemus nos viros. S. Sed vnde mihi te-
lum? Ecce autem commodum sese offert
hæc maxilla asini, hæc præbebit vicem cla-
væ. Pugnite viri pro virili: sentiat qui
vir sim, Hem tibi, qui primus me lacestis,
primus perito. Et vos qui hic jam ense
conglobati estis, sentite quæ sint vires Sam-
sonis, qui vincit inermis armatos. Heus
cogi-

cogitatis pugnare pedibus? quò fugitis? Hic adest hostis, ne prodite victoriam. Tu quidem hic jacebis, tu quoque adjungeris ei comes: dormite. Euge Samson, quantam cædem fecisti? Maxilla asini quantam stragem edidi? maxilla asini prostravi mille viros.

SENTENTIA.

Qui Dei spiritu prædictus est, invidus est, frustra quoque constringitur. Deus sæpe vilissimis telis ulciscitur hostes suos.

DIALOGORUM SACRORUM.

LIBER SECUNDUS.

ELIS. I. Reg. 3.

ARGUMENTUM.

Iova Samueli prædicit, sese animadversurum in domum Elis sacerdotis, qui in filios suos non animadverteret.

Iova, Samuel, Elis.

SAMUEL. SA. Quid me vis? Accurram, Assum, vocatus à te. E. Non vocavi, Redi cubitum. S. Fiet. I. Samuel. S. Assum, Eli, nam vocasti me. E. Non te vocavi, fili. Redi cubitum. S. Faciam. I. Samuel. S. Assum, nam vocasti me. E. Atat, nunc demum intelligo, quid sit, Discede cubitum. Quod si te vocaverit, respondeto, Loquere Jova, audio. SA. Faciam. I. Samuel, Samuel. SA. Loquere Domine, audio. I. Ego

Ego sum quiddam facturus in Israelitis, quod quisquis audiverit, prorsus obstupescet. Sum enim aliquando importaturus in domum Elis omnia, quę decrevi, & rem ad exitum perducturus, ei que ostensurus, me persequuturum culpam eiq; in eiq; domū in perpetuum; qui cum sciret filios suos malę audire, non animadverterit in eos. Quam ob causam juro, hanc nexam nullo unquam vel sacrificio, vel libamine Elis posteritati remissum iri.

SENTENTIA.

Qui divinę voci non est assuetus, eam interdum esse putat hominis. Peccantes natos non punire, grave peccatum est. Parentum, quamvis honorum, indulgentia perdit natos. Natos qui vere & sapienter amant, castigat. Sed ne quid injuste immo dicitur fiat.

SAULUS I. Reg. 9.

ARGUMENTUM.

Saulus quęrens asinas patris it consultum Samuelem patrem, & ab eo discit se futurum Regem.

Saulus, Puer, Puella, Samuel.

ENimverò satis jam diu acquisivimus asinas, neque invenimus: revertamur domum, puer, ne pater meus omissis asinellis, sit sollicitus de nobis. P. Non censeo redeundum esse re infecta. Ajunt esse divinum quendam & gravem virum in proximo oppido, qui quicquid dicit futurum evenit. Conveniamus eum, si forte indicet nobis id, cujus causa venimus. S. Sed quid offeremus homini? nam etiam pœne exhau-

ste sūt peræ nostrę nec habem9, quod dono
 demus ei, & ire vacuos religio est. P. Tace,
 est mihi in præsentia quadrans sicli argen-
 tei quem dabo ei, ut indicet nobis quam
 viam insistamus. Olim inter Israelitas, qui
 ibant consultum Deum, dicebant se ire ad
 Videntem: nam qui hodie dicitur, Vates,
 olim vocabatur, Videns. S. Recte mones:
 eamus. Ingrediendum est hoc ascensu ar-
 duo. Sed video puellas, quæ exeunt aqua-
 tum, adeamus eas. Heus puellæ, annon
 hices vates quidam? P. Est, & quidem in-
 cidetis in eum, si pergetis: properate mo-
 dō, nam hodie venit in oppidum: quia po-
 pulus facturus est rem divinam in sacello,
 simul ac introjeritis in oppidum offende-
 tis eum antequam ascendat in sacellum e-
 pulaturus: populus enim non inibit epu-
 las ante adventum ejus, quoniam ejus est
 consecrare sacrificium postea epulabuntur
 invitari. Itaque ascendite: non est dubium,
 quin inventuri sitis eum. SA. Habemus
 gratiam, ascendamus in oppidum. SA. vi-
 deo adolescentem huc venientem unā
 cū puero. Nimirum hic est, quem heri præ-
 dixit mihi Deus, venturnm ex regione, Bo-
 nia mitarum, ut eum unctione creem Im-
 peratorem Hebræorum, ut eum vindicet

ab injuria Paullenorum. S. Amabo te, indica nobis domum Vatis, Sam. Ego, sum ille, conscendite ante me hunc collem, hodie epulabimini mecum, deinde dimittam vos manè & indicabo vobis, quidquid cogitatis cum animis vestris. Quod attinet ad asinas perditas tertio ab hinc die, tu ne esto anxius de eis, repertæ sunt. Sed quorsum de asellis? Ad te veniamus: Debes existimare, te esse columem totius nostræ nationis, omniumque salutem positam esse in te, tuaque domo paterna. SA. Quid ais? in mene, qui genus refero ad Jeminem, ortus ex obscurissima familia Benjamitarum, quæ tribus est minima Israelitarum? S. Concedamus modo in hospitium, Deus providet cætera.

SENTENTIA.

Deus opera sua inopinalibus occasionibus ad exitum perducit.

SAMUEL, I. Reg. 12.

ARGUMENTUM

Samuel jam senex innocentiam suam, & Dei in Israelitis beneficia commemorat: eorumque peccatum reprehendit, qui regem sibi deposuerunt: & impetrato divinitus tonitru eos ad obedientiam cohortatur.

Samuel, Israelitæ,

EN ego vobis in omnibus obsequutus regem creavi deinceps jam vobis præfuturum. Nam me quidem jam senem esse, indicio est canicies. Mei liberi inter vos degunt, & ego vobis jam ab ineunte ætate

tate præfui. Hic assum, respondete mihi coram Jova, & coram ejus uncto: si cujus bovem aut asinum sustuli, si cui injurius, aut violentus fui, si à quoquam præmium accepi, ut in ejus culpa conniverem, paratus sum vobis reddere. I. Neque injurius in nos aut importunus fuisti, neque quicquam ab ullo accepisti. SA. Testis est hodie apud vos & Jova & Jovæ unctus, nihil habere vos quod me accusetis. I. Planè. S. Adeste igitur, placet vobiscum disputare, quanta Jova, & Mosis & Aharonis creator & majorum vestrorum ex Ægypto reditus auctor, tum in vos, tum in majores vestros beneficia cõtulerit. Cum migrasset Jacob. in Ægyptum, invocatus à majoribus vestris Jova, Mosen misit, & Aharonè, qui illos ex Ægypto eductos in hoc loco collocarunt. Postea ipsos oblatos emancipavit Silaræ, ducis exercitus. Hazoris tum Palæstinis & Moabitarum regio, à quibus bello vexati sunt. Deinde invocantibus eis Jovam peccatumque confitentibus, quod eo relicto Baales & Astrotum coluissent: & auxilium contra hostes orantibus seque & servituros pollicentibus, misit Jerobaalem, & Bedanem, & Jephtham, & Samuelem, per quos ita vos ab hostibus vestris undique

vindicavit, ut in tuto essetis. Vos vero, cum videritis vos à Nabasso Ammonitarum rege invadi, postulastis à me, ut mutato rerum statu à rege vobis regi liceret: cum Jovam Deum vestrum regem haberetis. Igitur ecce vobis regem, quem delegistis & efflagitastis regem vobis præficit Jova. Si Jovam Deum vestrum reverebimini, eique servietis & dicto audientes sine contumacia, unâ cum rege vestro parebitis, benè vobiscum agetur: Sin minus & vos, & regem vestrum Jovæ manus impetet. Jam vero agite videte, quantam rē Jova jam nunc in oculis vestris faciat. Tritici messis nunc est, quo tempore tonare aut pluere in his finibus non solet. Atque ego jam Jovam exorabo, ut tonet atque pluat ut intelligatis, vos in Jovam gravem culpam commisisse, qui regem vobis poposceritis. Jova cœli terrarumque Deus, emitte nunc tonitrua & nimbum, ut hic populus suum peccatū agnoscat. I. Ut tonat? ut pluit, heu nos miseros? Supplica pro nobis Jovæ, Deo tuo, ne peream⁹, qui ad tot superiora nostra scelera hoc insuper adjecimus, ut regē nobis peteremus. S. Bono animo este. Vos quidem ista re graviter peccastis: Veruntamen nolite à Jova deficere, sed eū toto pectore colite,

colite, neve discedite ad vana ista, quæ ne-
 que juvare possunt, neque defendere, sunt
 enim vanissima. Neq; enim destituet Jova
 populum suum propter sui nominis cele-
 britatem, postquam semel cœpit vos sibi
 populum habere. Ego quoq; absit ut Jo-
 vam offendam, aut pro vobis supplicare,
 vosq; decente & recta via deducere inter-
 mittam. Tantum Jovam metuite, eumque
 verè & tota mente colite: videte enim,
 quantam rem apud vos fecerit. Quod si
 peccatis indulgebitis, & vos & rex vester
 peribitis.

SENTENTIA.

Iusti homines (qualis fuit Samuel) nemini faciunt injuriam. Magna est hominum erga Deum ingratitudo, qui toties tam fideliter à Deo defensi, tot beneficiis cumulati, tamen hominem regem sibi deposcant: digni sanè, qui inclementi regi serviant, quando clementem repudiant. Immensa est Dei clementia, qui sic ingratos tamen non deserat. Multum valent apud Deum preces justorum, qui etiam alieno tempore vel pluviam possint impetrare.

SORTILEGIUM, I. Reg. 14.

ARGUMENTUM.

Saulus Ionathanem filium suum vult occidi, propter gustatum mel contra votum populi. Sed populus eum prohibet occidi.

Saulus, Populus, Ionathan.

HUc adeste omnes populi primates, di-
 spicite & conquirete, cujus hodie cul-
 pa fiat, ut Deus roganti mihi oraculum non
 reddat. Nam Jovam ego opt. max. Israeli-
 tarum conservatorem juro, si etiam Jona-

tham filius meus is fuerit, eum esse capite
 pœnas daturum. Vos totus populus confi-
 stite isthinc, ego & Jonathan consistemus
 altrinsecus. P. Ut liber facio. J. Jova Deus
 Israelitarum age severè, ducantur sortes.
 Atat, nos petit fors; alter nostrum sit oportet.
 Sortiamur: Ohe Jonathan, fors indicat te.
 Indica mihi, quidnam feceris. J. Gustavi
 paululum mellis de capite hujus baculi, quem
 in manu habebam, quod tu nesciente me fieri
 vetueras. Hoccine mihi capitale esse æquum est?
 S. Deum ego juro, te morituram Jonathan,
 qui tam præclaram victoriam peperit
 Israelitis? P. Nequaquam: per Jovam
 immortalem, ne pilum amittet, qui hodie
 Deum suum facti adiutorem habuerit.

SENTENTIA.

In hac vita unius peccatum luunt interdum multi: quia sunt unum quasi corpus, cujus membrorum omnium est tanta conjunctio atq; cognatio, ut sit eorum consensus tum dolorum, tum voluptatum. Sed in altera vita, in qua punientur animæ, sui quisque non alieni peccati, pœnas dabit.

OBEDIENTIA, 1. Reg. 15.

ARGUMENTUM.

Samuel Saulum reprehendit, qui Amalechitas clementius, quam Jova præceperat, ultus fuerit.

Saulus, Samuel.

Iovam tibi propitium precor. Feci justum Jovæ. Sam. Quem ergo balatum & mugitum audio? Saul. Oves sunt, & capræ, & boves, quæ ex Amalechitis abegimus,
 Nam

Nam ab horum pecorum optimis quibusque necandis abstinuere milites, ut Jovæ Deo tuo sacrificium fierit. Reliqua funditus excidimus. Sam. Licetne mihi quod bona tua venia fiat, tibi significare, quid mihi Jova hac nocte dixerit? Saul. Licet. Sam. Nonne cum te vel judice parvus fueris, nunc Princeps es tribuum Israelitarum, unctus à Jova rex eorum? à quo cum in hâc expeditionem missus sis, jussusq; sceleratos Amalechitas excindere, & bello ad interuersionem persequi; cur ei dicto audiens non fuisti? req; ad prædâ, vetante Jova, convertisti? Saul. Imò Jovæ parui: expeditionemq; ad quam ab eo sum missus, confeci, & deletis Amalechitis, Agagum eorû regem abduxi. Tantum milites de manibus pecora, bovesq; devotorum primitias, desumerunt, quæ Jovæ Deo tuo immolarentur apud Galgala. Sam. Quasi vero Jovæ tam placeât hostiæ ad sacrificia, quam ejus dicto audientem esse. Scito obedientiam præstantiorem esse sacrificio, & obtemperacionem adipi arietum. Nam non parendi peccatum perinde est, ac magia, & contumacem esse eadem in culpa ponitur, ac simulacricolam esse: & quia Jovæ mandatum repudiasti, ipse te vicissim regno exiget.

Sau. Peccavi, qui contra Jovæ jussum, contraque tua dicta fecerim, milites veritus, eisque obsequutus. Sed da mihi quæso hanc veniam, & mecum revertare, ut Jovam adorem. Sam. Non revertar tecum, qui Jovæ mandatum aspernatus sis, & idcirco ab eo abdicatus regno Israelitarum. Vale. Sau. Ac non patiar te abire, ut non me comiteris. Sam. Quid me retines? ah rupisti meum pallium, & Jova hodie Israelitarum regnum à te abrumpit. Idque alteri te meliori tradit. Neque vero fallet Israelitarum triumphator, neque factum mutabit, non enim homo est, ut factum mutet. Sau. Fateor peccatum à me esse. Sed concede mihi hunc honorem apud fenatores meorum popularium, apudque Israelitas, ut mecum redeas, Jovam Deum tuum adoraturus. Sa. Age, age, præi, sequar.

SENTENTIA.

Nihil placet Deo, quod ejus præcepto contrarium est, etiamsi bono alioquin animo fiat. Debet enim homo Deo (sicut servus hero aut filius patri) servire non suo, sed illius arbitrio.

GOLIATHUS. I. Reg. 17.

ARGUMENTUM.

David Saulo impetrat, ut liceat cum Goliatho pugnare, & illum cum funda & pedo aggressus occidit.

*David, Eliabus, Goliathus, Israelita quidam, alius
Israelit. Nuncius, Saulus.*

S Alvete mei fratres optimi. E. Deus dat
Squæ velis, germane lepidissime. Ut valet
pater?

pater? D. Optime gratia Deo, meque misit ut viferem quid ageritis, vobisque afferrem placentam, & decem panes & tesseram vestram acciperem. Dedit etiam mihi decem caseos ad centurionem. Sed quamego vocem audio? G. Quid opus est vos exire ad praelia dimicandum nobiscum? Ego sum Palæstinus, vos estis clientes Sauli, Deligite ex vobis aliquem, qui conferat manus mecum, qui si superaverit me prelio & interemerit, nos serviemus vobis: sin ego vicerero, vos nobis servietis. Quanta ego hodie ignominia afficio instructos in aciem Israelitas? Date mihi virum, quo cum contendam singulari certamine. D. Quis est importunus iste, & turgidus Gigas, qui tantopere despicit nos præ se? cujus vicem & affectum contremiscunt omnes & refugiunt? Ii. Nescio quis est natus in nostram perniciem & dedecus: cum quo nemo audet conferere manus: adeo jungens est, & terribilis. D. Quid ergo præmii foret, qui sustulerit eum de medio, & aboleverit hoc tantum probum Israelitarum? Nam quis est impurus iste Palæstinus, qui inurit tantam notam ignominiae castris DEI immortalis? Israel. Si quis eum dejecerit, Rex eum valde ditabit, locabitque ei nuptum filiam suam,

suam, donabitq; immunitate perpetua do-
 mum ejus paternam, El. Cur venisti huc im-
 probe puer? aut cur deseruisti pauculas il-
 las oviculas in saltu? Ego novi temerita-
 tem, audaciamq; tui ingenii. Mirum, ni ve-
 nisti spectatum prælium. D. Quid ego hoc
 commisi? annō erat caussa cur venirem? Sed
 adibo alios. Heus tu quo præmio afficiet
 Rex eum, qui occiderit immanem illum
 Palæstinum? Is, maximo. D. Quonam? Is.
 Ornabit eum maximis divitiis & opibus,
 committetque ei natam suam uxorem, &
 liberabit domum ejus patriam in perpe-
 tuum, D. Condignum sane præmium & re-
 gale. Equidem ausim aggredi hominem:
 nescio quomodo gestit animus, indigna-
 turque tantum licere cuiquam in populum
 Dei. Hæccine ut patiar? Impune ergo ne-
 fanda illa probra evomuerit in sacram gē-
 tem? Mori me malim. N. Adolescentule,
 jubet Rex ut venias ad se. D. Nihil est quod
 faciam libentius, Eamus. O si fiat mihi po-
 testas pugnandi cum eo, quantum bellum
 confecit Deus uno occiso? N. Adduco ti-
 bi hic adolescentulum, Rex, quem jussisti
 accersi. Saul. Quid audio David? tu ne di-
 xisti te audere in Palæstinum illum porten-
 tosum, qui perterrere facit totas nostras a-
 cies?

cies? Da. Bono animo es, ô Rex, ne despondeat quisquam animum. Vos spectabitis, ego ipse subibo hoc certamen & congregiar cum Palæstino. S. Vide quid dicas David. Num possis pugnare cum eo adolescētulus, & rudis belli cum viro robustissimo, & in armis exercitatissimo jam à puero. D. Nihil facio neq; vires, neq; usum armorum ejus, habeo longe aliam rationem certandi. Audi quid dicam. Cum aliquando pascerem oves patris mei, leo unà cum urso invasit gregem, ovemq; corripuit. Eum ego consecutus occidi, eripuiq; ovem è faucibus ejus, Tum ursus in me irruere: ego vero prehensum rostro ad terram affligere, & cædere, atque ita occidi & leonem & ursum. Non dubio quin idem exitus maneat nefarium hunc & deterrimum hostem, qui audet proscindere convitiis exercitum Dei immortalis. Jova qui defendit me à leone & ursu, idem defendet etiam à Palæstino isto. S. quando tanta fiducia es, per me licet, descendas in certamen. Assit tibi Deus: Veruntamen es armandus. Volo accomodare tibi mea ipsius arma. D. Nunquam equidem arma tuli. Sed faciam periculum, si possum uti: Hæc lorica valde me gravat, cassis quoque premit caput, etiam caligæ

sunt duplo majores: quam pro meis pedibus: nec ensis admodum decet meum latus: videorque magis alligatus ensi, quam ensis mihi. Vah non possum ingredi cum his impedimentis. Apage hæc arma, non sum assuetus his ferendis, malo ferre nota tela: pedum dico, & fundam unâ cum his quinque, levibus filicibus, quos geram in sacculo. Bene spera rex, cernes me hodie victorem redeuntem, cum exuviis hominis ferocissimi. S. Ita faxit Deus. G. Video ego hominem venire ad me? Tandem habeo quo cum certem. Sed quæ, malum, intemperæ agitant Israelitas? Quis misit nobis huñc pulchellum pusionem rubicundum? Heus puer, mene putas canem, qui cogites pugnare pedo? ut te dii deæque omnes, quantum est, perdant. Accede ad me sodes, ut jam proponem te dilaniandum & comedendum volucris & bestiis. D. Tu quidem adoriris me, fretus gladio & hastili, & scuto, ego vero aggredior te armatus solo nomine Jovæ armipotentis, Dei copiarum Israelitarum, in quas tu hodie contulisti omnia maledicta. Hodie Deus conclusit te in manum meam, ut te dejiciam, abscindamque tuum caput, & pascam volucres & feras non tatum tuo cadavere, sed etiam omnium,

omnium, qui militant in vestro exercitu, ut
 sciant omnes mortales, eum demum esse
 Deum, quem Israelitę agnoscunt & reve-
 rentur, discatq; omnis hæc manus specta-
 trix, Jovam non adhibere ensẽ aut hastam
 in vincendo, cujus sit unius gerere bella,
 quique tradiderit vos nobis in manus. G.
 Proh Jupiter, ego ne ut hodie hæc audive-
 rim, Idque à puero? ac me Deus perdat nisi
 te jam discerpo his unguibus. D. quia age,
 si quid potes: interim excipe hunc lapidem
 recta in frontem. Ohe Goliathe, corruis,
 qui modo stabas tam firme? At ego te con-
 tundam usque hoc pede. Hem tibi. Nunc
 istic jace prostratus manu pueri; qui modo
 solo aspectu viros ad cœlum armis territa-
 bas. Hic te puer jugulat tuo ipsius gladio,
 caputq; tuum horrendum præfigit tuæ ha-
 stæ, quod ostendit exercitui.

SENTENTIA.

*Nemo vel tam vir est, quin facile vincatur abs quovis adverso Deo,
 vel tam puer, quin facile vincat quemvis, propitio Deo. Dei est victoria:
 Et credenti nihil arduum.*

JONATHAN, I. Reg. 20.

ARGUMENTUM.

*David & Jonathan inter sese rationem ineunt, qua resciscere David
 queat, quis sit Sauli erga ipsum animus, & fœdus inter sese in perpe-
 tuum paciscuntur.*

David, Jonathan.

Quodnam esse potest meum tantum in
 tuum

tuum patrem peccatum, Jonathan, ut me
 quærat ad necem? Jon. Ad necem vero?
 non est credibile: nam tanta me res non la-
 teret: quippe cum meus pater nullam rem
 tantam tantulamve faciat, quam non me-
 cum communicet, nedum ut hoc me celet.
 Non est ita. Da. At scit, ut me habeas inti-
 mum: ideo hoc te fortasse celat, ne agre fe-
 ras. Crede mihi nihil tam certum est, quam
 me in summo vitæ discrimine versari. Jon.
 Ecquid ergo me tibi hac in re commodare
 posse arbitraris? Da. Cras, ut tute scis, agi-
 tur primus dies mensis, quo ego die soleo
 cum rege accumbere. Ruri latebo, te scien-
 te, usque ad vesperam tertii abhinc diei.
 Quod si me requiret, dices tuo permissu
 excurrisse Bethlehemam in meam patriam,
 ad sacrificium gentilium, quod universi
 anni versarium facitamus. Si laudabit, sal-
 vus sum: sin succensebit, scito eum nun-
 quam ad sanio rem mentem reversurum.
 Sed dabis hanc veniam mihi, quem religio-
 sissimi no foedere infamiliaritatem recepisti,
 ut si commerui; tu me interficias potius,
 quam in tuo patri dedas. Jon. Deus meliora.
 Imò si sensero eum obstinato animo in tuã
 ferri perniciem, admonebo te. Da. Sed quis
 mihi refert, utrum tibi asperius responde-
 rit?

rit? Jon. Exeamus sub dium, Ita mihi bene-
faciat Jova Deus Israelitarum, hujus cœli,
quod vides, conditor & habitator, mi Da-
vid, ut ego cras aut perē die scrutabor, quid
animi habeat meus pater: quem si intelle-
xero bene esse in te, animatum mittam qui
faciat te certiozem: sin autem tibi malum
cogitare, id quoque tibi indicabo, ut: me
autore abeas salvus; assitq; tibi Jova, ut af-
fuit meo patri: hęc ego me facturum, testor
Deum. Quod si fallam, tum Jonathani nu-
men iratum sit, quod si tum, cum tui hostes
omnes Dei num fuerint è medio sublati,
ego jam non ero in vivis, ut tua misericor-
dia salutem meam invicem custodire pos-
sis; at certo meæ in posterum familię & ge-
neri eam non denegabis. Itaq; nunc iterum
in eo foedus non solum tecum meo nomi-
ne, sed etiam cum tua domo nomine poste-
rorum, tibiq; juro mi David, quem amo ex
animo, facturum me, ut dixi, Sed accipe ra-
tionem. Cras quod novilunium celebra-
tur, tu desideraberis, nam tua sessio vaca-
bit. Descendes autem ad summum iter tri-
bus diebus in locum, ubi commode lateas,
quocunque die negotium hoc fiet: erisque
post saxum Azellum. Ego re facta veniam
eo, & ad lapidis latus tres sagittas jacula-
bor,

bor, collineans ad scopum. Deinde puerum ad eas petendas mittam, cui si dixerō, eas esse: citra ipsum, venias licebit, tua res erit in tuto, testor Deum immortalem: sin autem, ultra, abito sane Deo volente. Ac quos inter nos sermones contulimus, Jova esto eorum testis certissimus.

SENTENTIA.

Bo norum indivulsa est amicitia, estque arctior virtutis, quam sanguinis conjunctio.

NOVILUNIUM. I. Reg. 20.

ARGUMENTUM.

Saulus filium suum Ionathanem propter ejus cum Davide amicitiam jaculo transigere conatur.

Saulus, Ionathan.

CUr non venit Isai filius ad cibum capiendum, neque heri, neq; hodie? J. Petiit à me veniam conscendendi Bethleham; futurum enim sacrificium gentilitiū in eo oppido, ad quod adesse iussus esset à fratre suo. Itaq; magnopere oravit, ut si sibi vellem gratissimum facere, facerem eo se conferendi, fratresq; visendi potestatem. Hęc causa est, quam obrem ad regiam mensam non venit. S. Improbæ & contumacis foeminæ progenies: quasi ego nesciam, te Isai nati percupidum esse, ad tuum quidem & tuæ parentis dedecus atq; ignominiam. Nam quam diu vivet in terris Isai filius, nunquam tu firmum regnum habebis.

Quare

Quare cura ut ad me fistatur: nam morte dignus est. Jon. Cur ita tandem? quid commisit? Sau. Docebo te hoc jaculo, quid commiserit. Jon. At ego hinc effugiam. O rem indignam! actum est de Davide, nisi aufugit.

SENTENTIA.

*Impii piorum amicitiam ferre non possunt: iniustus nihil est intol-
rabilis iustitia.*

ACHIMELECHUS, I. Reg. 21.

ARGUMENTUM.

David fugiens Saulum ab Achimelecho sacerdote panem enseque impetrat, sese ad regnum quoddam negotium ex ipsius regis mandato proficisci simulans.

Achimelechus sacerdos, David,

Quid est, quod solus sis, nullo comita-
tu? D. Rex mihi quoddam negotium
mandavit, quod negotium ne quis omnino
mortalium rescisceret, neve quo mitterer,
præcepit. Eam ob rem famulis certum
quendam locum assignavi. Quare si habes
quinque panes, trade mihi; aut quot habes.
Ach. Panem profanum non habeo, sed sa-
crum habeo, si modo tui famuli à mulieri-
bus abstinerunt. Da. Cum mulieribus ni-
hil nobis rei fuit, hunc jam tertium diem,
quo profectus sum: suntque corpora
meorum famulorum casta. Quod si forte
tum, cum profecti sunt, fuerunt cum uxo-
ribus, atq; ita corpora pura non habeant:
at hodie quidem antequam sacris panibus
vescan-

vescantur, purierunt, quoniam hic dies tertius est, quod spacium lustrationis tribuitur in nostra lege. Ach. Igitur accipe panem sacrum. Nam nullum habeo, præter hos appositos panes, è conspectu Jovæ sublato submissi statim in eorum locum recentibus. D. Habesne hic præterea ullam hastam aut ensẽ? Nam neq; hastam neq; ensẽ cepi: aded me Regis mandatum urgebat. A. Hic est ensis Goliathi Palæstini à te in valle quercus occisi, involutus panno, post Ephodum. Eum tu, si vis, capias licet: nam alius nullus est. D. nullus est isto melior, trade eum mihi.

SENTENTIA.

In periculis interdum simularunt sancti homines. Lex est facta propter hominem, non homo propter legem. David urgente necessitate panes sacros insons comedit, quamvis non esset sacerdos, & solis sacerdotibus vesci per legem liceret.

DOEGUS. 2. Reg. 12.

ARGUMENTUM.

Saulus injustè curat occidendos Iovæ sacerdotes, quia ei Davidem non indicaverint.

Saulus, Achimelechus, Doegus.

Audi Ahitobinate. A. Assum Domine. S. Cur in me conjurasti cum Isai nato: cui & cibaria & ensẽ dedisti, & pro quo Deum consuluisti? quæ insidia mihi manifesto parantur? A. Ecquis autem est ex tuis omnibus æquè fidus, atq; David, regis gener, tuo jussu profectus & apud te maxima digni-

dignitate habitus? An nunc primùm Dei oculum ejus nomine sum percontatus? Absit à me omne scelus, cave ne mihi, aut omnino meæ paternæ familiæ ullum in hac re crimē imponas, nam istius totius negotii sum planè ignarus. S. Morieris Achimeleche, una cum tota tua paterna familia. Agite mei cursores, circumdate & occidite hos Jovæ sacerdotes, nam Davidis partes tuentur, sciebantque profugum esse, neq; me certiozem fecerunt. Quid dubitatis? quæ vos religio impedit? Cur & vos mihi non paretis? Age Doege, circumveni eos tu, & interfice. D. Fiet.

SENTENTIA.

Impius princeps sanguinarius est, & suspicione iræque suæ magis credit & obsequitur, quam veritati. Miserum est cum iudice negotium habere, qui veram causæ dictionem non admittit.

DAVID LATITANS, I. Reg. 24.

ARGUMENTUM.

David Saulum solum nactus in antro ejus penulæ oram abscondit. Deinde digressus alte voce apud eum innocentiam suam testatur: & Saulus suam injustitiam confitetur.

Comites Davidis, David, Saulus.

ATat deflectit Saulus in hoc antrum, ad parendum necessitati. Dies advenit David, quo die tibi Jova promisit, se tibi traditurum tuum hostem in potestatem, ut eo utaris ad tuum arbitrium. DA. Tacete, vos tacete, obrepam ad eum pedetentim à tergo, dum ventrem exponerat. Co. Quid facit? non

G

eum

eum interfecit? o hominem insanum, qui tantam tam subito oblatam occasionem ulciscendi hostis non arripiat. D. Ah toto animo commoveor, posteaquam oram ejus penulæ abscindi. Avertat Jova, ut hoc ejus inuncto Domino meo faciam & ei manus afferam: vel hoc solo nomine, quod Jovæ unctus est. Co. Tu nimium religiosus es. Nos ipsi faciemus non ita cunctanter. Dav. Nolite Dei munus usurpari, regem non fecistis, regem non delere. Ejusdem est abolere qui creavit. Sinite eum. Jam exit, ego eum subsequar. Heus Domine rex. S. Et quis me revocat? D. Cur fidem habes dictis eorum, qui dicunt Davidem tibi malum moliri? Vides profecto oculis tuis, ut hodie Jova in spelunca tui mihi fecerit potestatem? nec defuit, qui me in tuam necem conhortaretur, sed peperci tibi, neq; negavi manus allaturum Domino meo, qui esset unctus Jovæ. Sed vide pater, vide tuæ penulæ extremum in manu mea, quod cum abscinderim, neq; te interfecerim, cognosce & intellige, nullum me scelus commisisse, nullum contra te facinus admisisse dignum, quamobrem meæ vitæ infidias tenderes. Suscipiat hanc Jova causam, teque mihi sine mea opera ulciscatur. Vetus est proverbium, à scelerato proq; dicit scelus. Te
qui-

quidem mea manu non ulciscar. Cui tandem instat rex Israelitarum: quem tu persequeris? canem mortuū, pulicem. Jovam precor, ut hujus sibi causæ Judicium suscipiat, measq; partes defendens tuas in me injurias persequatur. S. tuamne ego vocem audio David fili? hei mihi, tu æquū & bonum habes, qui mihi bonum pro malo rependeris, id quod satis hodie ostendisti, cum mihi (quem in tuam manum Jova concluderat) mortem non intuleris. Nam quotusquisq; est, qui hostem suū nactus idem ne demittat? Sed te pro isto tuo hodierno in me facto Jova cōdigno premio remuneretur. Ego quidem scio de regē futurum & regnum in Israelitas obtenturū. Quare jura mihi per Jovā, te meam stirpem post meum interitum non esse excisurum, meive nominis memoriam de mea familia deleturum. D. Juro.

SENTENTIA.

Injusti calumniatoribus facillime credunt. Injusti malum pro bono justis contra bonum pro malo reddunt, & Deus utroq; tandem pro meritis remuneratur.

ABIGAIL. I. Reg. 15.

ARGUMENTUM.

Missi ad Nabalem famuli Davidis ad petenda cibaria repudiantur ab eo. Quo audito Nabalis uxor Abigail munera Davidi obviam ferre properat, & ei obviam facta ejus in Nabalem iram pacat.

Famuli Davidis, Nabal, Puer, Abigail, David.

David Isai filius te Nabal, tuamq; domū, tuaque omnia plurima salute impertit. Is, quia audivit, ut tonsuram ovium facias,

misit nos ad te, rogatum, ut (si cum tuis pastoribus non solum sine ullo maleficio aut injuria, verum etiam cum magno beneficio sumus versati, ita ut eos ab omni jactura tutos præstiterimus quamdiu fuerunt in Carmelo: cujus nobis rei tui famuli testes esse possunt) benigne nobis facias: hoc præsertim tam fausto die: & qua commode poteris, des cibaria ad ipsius Davidis, tui prope dicemus filii, ejusque comitum famem propellendam. N. Quis est iste David? quis est iste Isai filius, isne est, ad quem hodie servi passim à Dominis transfugiunt? Scilicet ego cibum potionemque meam, & quæ mactavi ad alendos meos consores, dem hominibus mihi prorsus ignotis? F. Aliunde nobis prospiciamus. Nam hinc quidem nihil aufereamus, ut eum affectum video. Redeamus ad Davidem. P. Meus Dominus consuluit sibi pessimè. Eo narratum omnem rem heræ ut caveat. Hera nunc, si quando, tuà est opus prudentià. A. Nam quod malum recens ortum est? P. Et quidem maximum. Missi à Davide nuntii à desertis ad herum nostrum, ut aliquid hinc per humanitatem auferrent, repudiati ab eo sunt: & tamen illos experti sumus viros plane bonos: nulla unquam contumelia aut damno affecti, quamdiu sumus

mus inter eos rusticati. **Quin** pro muro nobis noctes diesq; fuerunt, donec versati cum eis sumus pascendo pecudes. Proinde dispicere tu diligenter, quid agas, alioquin actum est de Domino nostro, & tota ejus familia: Nam ipsum quidem convenire, hominem profligatissimum ac perditissimum stulticia fit. **A.** Famuli, capite propere omnia hæc, qua vobis tradam quæ imposita asinis feretis ante. Ego jam subsequar. Huc mihi propere asinum. **Quam** male metuo, ne mei viri stulticiam luamus. **O** hominem insanum, qui pro nihilo habuerit, eum hominem in se irritare, à quo maximè potest & juvari amico, & lædi infenso! Sed video ipsum Davidem adverso colle descendentem. Nescio quid tratus loquitur cum suis. **DA.** Ego frustra conservavi omnia, quæ habet iste in desertis, ita ut nihil omnino de suo perdiderit; & reddidit mihi malum pro bono? At ita perdat Deus hostes Davidis, ut ei ante crastinum mane nihil prorsum reliqui faciam. **A.** Obsecro te Domine, tibi ad pedes suppliciter jacens, ut bona me venia audias. Vide mi David, ne hominem despiciatissimum, Nabalem dignum judices, in quem iras veritas: qui sicut nomine, ita re ipsa stultus est. Nam ego quidem, cujus est culpam præsta-

re, missos à te juvenes non videram, neque enim sivilsem abire vacuos: Sed vides profecto, vir clarissime (neq; enim dubitari potest) te à Deo immortali absterreri à sanguine faciendo in tuis inimicis per temet ipsum persequendis: cum ipsius Nabalis insania ejusmodi sit ipsa per se supplicium, ut non aliud tuis hostibus & invidis imprecandum esse, videatur. Quare equo animo patere, hoc munusculum, quod tibi hinc affero, juvenibus tibi merentibus dari auferendum, & mihi hanc noxam remitte. Sic tuas tibi fortunas bella divina gerenti in tuto constituat Deus, & te in omni vita omni malo prohibeat. Ac si quis tibi infestus, & tuæ necis cupidus existat, precor Deum, ut te semper incolumi, & fortissime consistente, tuus hostis variis jactatus procellis dispereat. Jam vere cum preclara Dei promissa consequutus Israelitarum dux fueris constitutus, tanta tua felicitas nulla quasi labefactabitur labe conscientia, qua necesse esset tuam lætitiã contaminari recordatione effusi sanguinis, & supplicii ob privatam injuriam sumti. Deus faciet tibi meliora, meminerisq; aliquando mei. D. Gratias age Jovæ Deo Israelitarum, qui te mihi hodie miserit obviã: nec non tibi, quæ mihi tua oratione à cede & vindictæ injuriæ

injuriæ in me commissæ avocaris. Nam Deum immortalem testor, qui me tibi male facere prohibet, nisi tu mihi occurrere properavisses, Nabalem ante diluculum fortunis omnibus funditus evertissem. Verùm ejus culpam tibi cōdono, tuaq; munera grato animo accipio. Abi sane domum salva.

SENTENTIA.

Incitare potentiorē, vesania est: bonum malo pensare, scelus: Iratum potentiorē muneribus verbisq; placare, sapientia est.

ABISÆUS, 1. Reg. 19.

ARGUMENTUM.

David noctu clam in Sauli castra ingressus ejus dormientis hastam matellamq; surripit. Deinde digressus illinc procul clamorem excitat, suamq; innocentiam iterum testatur in calumniatores irvehens, & ille iniquitatem suam iterum confitetur.

David, Abisæus, Abner, Saulus.

Uter vestrum descendet mecum in castra ad Saulum? ABI. EGO. DA. Eamus sensim & pedetentim per noctem, dum dormiūt hostes. D. omnes sunt oppressi altissimo fomno. A. David, David. D. Quid est? AB. Hic stertit Saulus in tentorio hasta humi ad caput ejus defixa. Abner & reliqui temere circum eum jacent, nimirum tibi Deus facit tui hostis potestatem. Vis ergo eum ego hasta configam ad terram uno ictu non repetendo? D. Noli eum perimere: quis enim afferat manum ei, quem Deus unctioe creavit regem, quin obliget se nefario scelere? Aut Deus eum perdat oportet, aut dies ei fa-

ei fatalis veniat, aut in prælio cadat: Certe meam manum à rege creato divinitus avertat Deus. Sed cape hastam ejus, & matellam: abeamus, A. Deus bone, ut alte sopiti sunt: nullus omnino expergiscitur. D. Non sine numine hæc fiunt. Conscendamus montem. Volo ego de summo cacumine clamare Saulum, & ei ostendere, me non minus fidum, quam quemvis eorum, quibus stipatoribus utitur. Satis jam procul absumus ab eis, ne repentino eorum adventu possimus opprimi. Heus Saule, heus stipatores Sauli, heus Abner, non mihi respondes? heus te apello Abner. AB. Quis tu es, qui clamas Regem? D. Næ tu es vir eximius, & dignus, qui inter Israelitas principatum teneas. Itane vero regem dominum custodis, ut ad eum necandum miles quidam modo introierit tentorium? Haud egregium sane istud fecisti. Per Deum immortalem vos estis digni supplicio capitali, qui tam male custodiatis Dominum vestrum, regem à Deo constitutum. Quoeso, vide ubi sit hasta & matella regis, quæ erat propter caput ejus. S. Estne ista tua vox fili mi David? D. Mea, ô mi Rex, & domine. Sed cur tandem persequeris servum tuum? aut quid feci, aut commisi? Veruntamen ne gravare paulisper audire me loquentem.

Si

Si Deus te mihi infestum reddit, precor eum tibi propitium: sin homines sunt execrabiles, sunt in conspectu Jovæ, de cujus me hodie patrimonio deturbant, quantum est in ipsis, & ad cultum deorum peregrinorum impellunt. Sed non sinet Jova terram meo sanguine funestrari, quamvis Israelitarum Rex occupatus sit in persequendo publico (ut ita dicam) ut si perdicē per montes persequatur. S. Peccavi, revertere David fili: juro enim, tibi non male faciam, qui ita abstinueris te mea nece. Erravi nimis quàm imprudenter, fateor. D. Hic depono hastam tuam, eam petito aliquis juvenum: cæterum Deus remuneretur quemq; ut dignus meritusque est. Te quidem hodie tradidit mihi in manū, sed continui me à nece regis. Ergo quemadmodum tuam ego salutem charam habui, sic ille habiturus est meam, meq; hostili manu liberaturus. S. Maacte virture David fili, haud dubie conata perficies.

SENTENTIA.

Et justiiuste, & injustiiuste facere perseverant. Calumniatores, et anesi utriusque nocent, tamen revera perniciosiores sunt in, qui eorum calumniis credunt, quam ii, quos calumniantur.

PHOEBAS. I. Reg. 28.

ARGUMENTUM.

Phœbas Saulo Samuelem elicit ab inferis, & ab eo Saulus futurum exitum suum cognoscit.

Saulus, Phœbas, Samuel, Farnuli.

PHœbas, redde mihi oraculum Phœbi, & excita, quem dicam tibi. PH. At tu scis, ut exterminaverit Saulus ex hac terra Phæbadas & divinos, cur me in tantum capitis periculum adducere vis? SAU. Jovam Deum immortalem juro, hanc tibi rem fraudi non futuram. PH. Ecquem tibi excitem? SAU. Samuelem. PH. Fiet: heu me miseram! disperii. Tu Saulus es, & me indigne decepisti. SA. Ne formida, sed quid vides? PH. Video augustam quandam, & plane divinam personam è terra ascendentem. SAU. Qua est specie? PH. Vir est senex indutus pallio. SAU. Samuel est, præbebo ei honorem. SAM. Quamobrem me eliciendo inquietas Saule? SAU. Magnis premor angustiis, Palæstini me bello petunt, Deus adversatur, nec jam respondet; neque per vates, neque per somnia, hanc ob causam accivite, ut me doceas, quid mihi sit faciendum. SAM. Cur ergo me consulis si ipso Jova tibi non modo non favet, sed etiam adversatur? faciet ille quidem, quod eloquutus est voce mea, tibi que extorquebit regnum de manu, quod tradet alteri videlicet Davidi: quia non obtemperasti ei in ulciscendis Amalechitis; quibus infensus erat? eam ob rem ita sine dubio te accipiet: Quin etiam addi-

cet tecum Israelitas Palæstinis : & cras tu, tuiq; liberi eritis una mecum : castra etiam Israelitarum tradet Palæstinis. SAU. Eheu ! PH. Perii misera, corruit. Saule, Saule, obsecro te, obsequere mihi : cape cibum. Tu scis ut sim tibi morigerata, & caput meum summo periculo objecerim, ut exequerer tua jussa, agedum præbe te mihi facilem vicissim, & vescere cibo, quem tibi apponam, ut recreatus viribus aggrediaris iter. SAU. Non edam. FA. Quare ? Imo vero edes. PH. Jus oramus. SAU. Quando tantopere urgetis : fiat. PH. Agedum surge, & recumbe in hoc lectulo, dum ego vobis mactō vitulum altilem, quem habeo domi : subigoq; farinam, ex qua conficiam panes subcineritios.

SENTENTIA.

Qui Deum deseruerunt, tandem deseruntur à Deo. Deserti à Deo confugiunt ad eum, à quo ante abhorruerant, Diabolum, à quo nihil nec cognoscunt, nec consequuntur, nisi suum exitium, Et sane æquum est, ut qui bonum fugit, incidat in malum.

ACHIS. 1. Reg. 29.

ARGUMENTUM.

Achis Gethæ rex admonitu procerum suorum Davidem (qui ad ipsum confugerat) ab exercitu suo dimittit.
Proceres Palæstini, Achis Rex, David.

Quinam sunt Hebræi isti, quos habes in nostro exercitu ? A. David est Sauli Israelitarum regius servus, qui mecum egit per hosce dies, vel potius annos, in quo ad nos aufugit. PR. Remitte hominē in eam provinciam,

ciam, cui tu eum præfecisti, ne si nobiscum descenderit in certamen, in nos se convertat. Nam qua tandem re melius possit cum suo Domino reconciliari, quam horum hominum capitibus? Nonne hic est ille David, carmine illo in choreis celebratus? Saulus mille, decem concidit millia David. A. David, Jovam ego immortalem testor, te mihi, tuamq; castrensem consuetudinem probari: neq; enim ullum adhuc in te vitium, posteaquam ad me primum te contulisti, deprehendi. Sed optimatibus non places. Quamobrem discede cum pace, ne Palæstinos Proceres offendas. D. Nam quid ego commisi? aut quid in me adhuc deprehendisti, ex quo primum in tuum conspectum veni, ut in bellum contra hostes tuos non proficiscar? A. Scio equidem te mihi tam placere, quam si divinus esses genius. Sed vetant satrapæ Palæstini te prælium secum inire. Quamobrem manè ubi diluxerit, proficiscere sane una cum tui domini servis, qui tecum venerunt. D. Equidem invitis illis militare nolum: parebitur.

SENTENTIA.

Non abs re suspectum est perfugorum contra suos auxilium.

AMALECHITA. 2. Reg. I.

ARGUMENTUM.

Amalechita quidam Davidi necem Sauli nunciat, cujus necis auctorem ipse se esse dicit, eamq; ob rem David eum jubet interfici.

David,

David, Amalechita.

Video quendam huc venientem scissa veste, & capite insperso pulvere. Haud temere est, nimirum aliquem sinistrum nuncium afferre. Undenam ades tu? A. Ex exercitu Israelitarum evasi. D. Quid actum est? eloquere. A. Fugerunt milites è prælio, multi è vulgo ceciderunt. Saulus quoque & Jonathan ejus filius occubuerunt. D. Qui scis Saulum & Jonathanem occubuisse? A. Cum forte venissem in Gelboem montem, vidi Saulum innixum hastæ, cui currus & equitatus jam jamque imminet. Respexit ille, & me viso: Huc ades, inquit. Accessi: tum ille: Quis tu es? Amalechita, inquam ego. Aggredere me, inquit, & interfice, nam magno dolore discrutior, nec adhuc possum emori. Hic ego quid agerem? Videbam non victurum post tam gravem casum: itaque interemit eum, abstuliq; coronam de capite ejus, & armillam de brachio, quæ tibi afferro, ut vides. D. Heu calamitosa clades! heu lugubre prælium! ô facinus audax! Cujas es? A. Filius sum advenæ cujusdam Amalechitæ. D. Tene ergo non esse veritum ista impura manu perdere unctum Jovæ? Tu juvenis invade hominem, neca: merito morieris, & tuo judicio peris, qui te de Rege interfecto jactaveris.

SEN-

Si potentes sic tractarent eos, qui ipsis mortem aut malum inimicorum, tanquam rem lætam, nunciarent, ut Amalechitam hunc tractavit David: aut si saltem hujusmodi nunc adversarentur: minus auferem assentatores.

NATHAN, 2. Reg. 12.

ARGUMENTUM.

Nathan Davidem jussu Iovę ficta ad rem narratione similis ita prouidenter adulteri homicidique arguit, ut ipse David contra semetipsum ferat sententiam.

Nathan, David.

DAVID, duo homines erant in quadam Urbe; alter dives, alter pauper. Dives ovibus & capris, bobusque abundabat, pauper unam omnino habebat oviculam à se emptam & altam, quæ adoleverat unâ cum ipso, & liberis ejus; vescebatur eodem cibo cum eo, bibebat eandem potionem, quiescebat in sinu ejus: breviter, erat ei pro filia. Ad illum autem divitem venit quidam hospes, quem accepturus præteritis pecoribus suis; oviculam illam pauperis mactavit. DA. Per Jovam immortalem dignus est morte, qui fecit istud: ovemq; certe quadruplo pensabit, qui tantum facinus committere non dubitaverit. NA. Tu es ille, David. Deus creavit te regem Israelitarum, teque liberavit ex manu Saul: tibi tradidit domum Domini tui, & uxores, quas complecteris: tibi Israelitarum, tibi Judæorum familiam dedit: alia atque alia insuper daturus, si ea non satis essent. Et tu contempto ejus præcepto U-

riam

riam Hettæum Ammonitarum telis ob-
jectum indignissime trucidasti, ejusque ux-
orem, nulla Jovæ habita ratione, in matrimo-
nium duxisti. Ob quæ flagitia nunquam à
tua domo aberit clades. Nam Deus conflagrat
tibi malum domesticum: tuasque uxores te
vidente alteri tradet, qui cum eis luce pa-
lam congregietur. Tu quidem occulte feci-
sti, sed Is faciet in luce, atq; in oculis omni-
um Israelitarum. DA. Peccavi in Deum. NA.
Deus quoq; remittet illud quidem tibi pec-
catum, ne ob id morieris. Sed quia ista re ini-
micis Jovæ occasionem maledicendi dedi-
sti, filius, qui tibi natus es, morietur. Hæc me
tibi nunciare jussit Deus.

SENTENTIA.

*Callide reprehendendi sunt potentes. Qui alterum damnat, se ipsum
damnat, si similia committit. Nihil est tam reatum, quin detegatur. Si
peccatum tuum rescisci non vis, peccare noli.*

THECUANA. 2. Reg. 14.

ARGUMENTUM.

*Thecuana femina à Ioabo subornata oratione recta atque figurata
impetrat à Davide revocationem Absolomi ejus filii ob fratricidium
profugi.*

Mulier Thecuana, David, Ioabus.

FIdem tuam; o Rex. D. Quid mali habes?
M. Mulier sum deserta, & viduata viro,
cui superstites fuerant duo filii, ii dum ru-
ri forte inter se contenderent, nec esset, qui
litem dirimeret, cecidit alter alterum, eum-
que morte mulstavit. Nunc universa me
familia

familia urget poscens ad necem eum, qui super est, ob interemtum fratrem, cupiensque perdere unicum hæredem parætum: & quod mihi miseræ lucis superest (quod certe est perexiguum) extinguere, meique viri nomen memoriãque prorsus à rerum natura tollere. D. Recipe te domum tuam, ista mihi curæ reserit. M. Verum interim periculum est, ne te, tuisque nescientibus, poena mihi & meis irrogetur. D. Si quis in te mutiat, deferro ad me nã ille saxo nunquam postea te tanget. M. Sed memineris per Deum immortalem, multos esse occisi cognatos & vindices, à quibus omnibus exitium meo filio metuendum sit. D. Eundem tibi ego Deum iuro, me provisurum, ne tuus filius ullum pilum amittat. M. Dabis mihi veniam, si te liberius jam alloquar. D. Sane. M. Quæ te (malum) ratio inducit, ut cum te mihi mulieri vilissimæ tam facilem præbeas; populo toti eique præstantissimo ita sis durus & inexorabilis, ut ei nolis condonare profugum tuum, cujus non minus est cupidus quam ego sum mei nati? præsertim cum in eo non minus fortasse tui generis propaganda spes posita est, quam me in meo. Neq; enim potes habere exploratum, te alium regni successorem esse procreatum. Nam moriendum certe est,

idque

idque incertum, an hac ipsa hora: & ita moriendum ut in hanc vitam reditus non pateat: non magis, quam aqua semel effusa recolligi non potest, quo magis nobis habenda ratio est, ut in nostri generis propagatione quodammodo immortales reddamur. Quod si supplicii æquitatem præ tendis, vide ne non æquitatem legi parendo, sed iniquitatem, Deum legis auctorem non imitando, sequi videare. Neq; enim ille continuo fontes perdit, id quod tu minime omnium ignoras: sed etiam atque etiam cogitat de reconciliandis eis, qui ob suum aliquod factum ab eo sunt alienati. Atq; ut jam meam rationem intelligas, equidem non sine dubitatione feci, ut te hac de re adirem. Nam quod videbam populum ipsum tam parum apud te valere, ne ipsa nihil possem, valde metuebam. Et eam ob rem, quo callidius te inducerem, sic mecum ipsa cogitavi: Hem regem adibo, & cum eo, quasi meum sit negocium, sic agam. Quod si obtinero, ut me contra eorum odium tueri velit, qui me una cum filio meo fortunis omnibus vitæque ipsa, evertere properant: tum ab eo contendam, ut, si sibi constare velit, suam clementiam, quam uni expositâ habeat, tam multis clausam esse non patiatur. Quam rem me impe-

traturam esse, ô Rex, non diffidebam. Cum enim præclare scirem, te in jure dicendo, & æquitatem ab iniquitate dijudicando singulari quadam, & plane divina semper fuisse prudentia præditum, non dubitabam, quin, qui tibi nunquam abfuisset, Deus idem nunc esset in hac justissima causa affuturus. D. Ne me cela, quod te rogabo. M. Roga sane. D. Nonne istud tutum fecisti impulsore Joabo? M. Ita tibi secunda omnia opto, ô Rex, ut nullius harum rerum quenquam ulla ex parte auctorem habeo præter Joabum, ipse justit, ipse præmonstravit quæcunque dixi: ejus instinctu rem omnem involucris figuratam texi, quam tu pro tua divina sapientia, quâ omnia, quæ in mundo constant, tenes, facile intellexisti. D. Impetrasti Joabe. I sane reductum adolescentem Absolomum. J. A go tibi gratias immortales, ô Rex, nunc demum intelligo, me apud te valere gratia, postquam hoc sum à te consecutus.

SENTENTIA.

In aliena causa facilius judicant homines, quam in sua. Itaque hominem ab aliena ad suam per similitudinem deducere prudentia est.

SEMEIS. 2. Reg. 16.

ARGUMENTUM.

Semeis Davidem conviciis proscindit, quæ David fert patienter.
Semeis, Abisæus, David.

PRodi, prodi homo sanguinarie & scelestæ, Expetit à te Jova omnem sanguinem

nem domus Sauli, cuius tu regnum occupa-
sti, quod Jova Absolomi filio tuo tradidit.
Nunc, nunc tua te scelera petunt, homicida
crudelissime, quem ego hinc jam lapidibus
obruam. A. Nonne indignum est, canem istū
mortuum regi conviciari? Visne ut eum ad-
oriar, eiq; caput decutiam? D. Quid tum po-
stea, fili Sarviæ, si conviciatur? & si ei Jova
mandavit, ut Davidi malediceret, quis ab eo
facti rationem reposcat? En meus ipse fili-
us, qui ex meis visceribus ortus est, mortem
mihi machinatur, quid faciet Jemine natus?
Sinite eum maledicere, nam Jovę jussu facit.
Fortasse respiciet Jova meam miseriam, mi-
hique bonum rependet pro hodiernis hujus
conviciis. S. Sceleratissime, & flagitiosissime
mortalium omnium, non solum bipedum,
sed etiam quadrupedum nequissime, qui per
nefarias cædes ad regnum pervenisti; qui
Sauli domum funditus extirpasti; qui homi-
nem optimum, ejus uxore constuprata, cru-
delissime occidisti, & ejus neci plurimos te
meliores addidisti, adulteriumq; homicidio
cumulasti, homo perfidiose & impure, quid
potest in te satis graviter dici? quem ego hinc
saxis jam mactabo, & unius justissima cæde
tot nefarias cædes expiabo.

SENTENTIA.

Maledicta constanter ferre, magni est animi, non ferre, effeminati.

Achitophel Absalomo prudens, sed impium consilium dat, de opprimendo Absalomi patre Davide: Verum Chuseus Davidi bene volens altero consilio illud reddis irritum.

Achitophel, Absalomus, Chuseus.

Absalome, censeo, ut ego nunc, lectis duodecim hominum millibus, Davidem hac nocte persequar: eumq; perterritum & fatigatum, defessumque, omnibus qui cum eo sunt fuga delapsis, solum interficiam, deinde cæteros omnes ad te sic reducam, ut sponsa deduci solet ad sponsum. Ita fiet, ut, cum tu unius mortem expetas, cæterorum omnium saluti consultum sit. AB. Perplacet quidẽ tuum consilium: sed vocetur huc etiã Chus. Archita, ut audiamus, quid ipse quoq; dicat. Chusæ, suadet Achitop. ut regem hac nocte invadam⁹, territumq; & à suis destitutum, salvis reliquis opprimam⁹, Tu quid censes? sequemur ne ejus cõsiliũ, an non? C. Achitophelis consilium, hominis alioquin prudentis, hac quidem in re nõ probo. Tu scis, ut pater tuus, & qui eum comitatur, homines sint strenui, & ur̃sa agresti pullis orbatã ferociores. Præterea pater tuus vir rei militaris scientissimus non est cũ reliqua turba per noctẽ acturus. Nũc latet in aliquo antro, aut alio loco. Quod si quis principio de tuis ceciderit, & rumor sparsus fuerit, factã esse cedere

Absa-

Absalomorum: illi ipsi qui nunc sunt leonibus animosiores, exanimabuntur. Sciunt enim universi Israelitę, patrem tuum virum esse fortissimum, nec non ejus milites: verum meum consilium est, ut conveniant ad te. Omnes Israelitę à Dane ad Bersabam, qui futuri sunt arena numerosiores, utq; tu ipse inter eos præsens incedas. Tum eum adorti, ubi ubi erit, rore densius invademus, ut neq; ipse, neque ejus comitum vel unus evadat. Quod si se in aliquod oppidum receperit, id oppidum universi vel funibus cinctum in flumen ita everriculabimus, ut ne calculus quidem relictus fiat. A. B. Melius est illud consilium quam Achitophelis: obtemperabitur tibi.

SENTENTIA.

Impiorum prudentia bonis perniciosa est, piorum salutaris. Impius favere & consulere contra pios, impium est. Rursus impios ad piorum salutem decipere pium est, & ipsis etiam impiis utile. Minus enim graves pœnas Deo dabunt, si pios non occiderint.

ABSALOMUS, 2. Reg. 18. & 19.

ARGUMENTUM.

Absalomus è prælio elapsus de quercu crinibus pendens à Ioabo nactatur. Hujus audita nece David sese afflicta, & à Ioabo propterea objurgatur.

Miles, Ioabus, Achimaas, Chusis, Speculator, David,

Quidam.

CUm persequerer fugientes, & dissipatos hostes, Absalomum vidi cæsarie pendentem de quercu. J. Vidisti autem? cur non

eum ad terram deturbatum occidisti? Num
 meæ partes fuissent decem de argenteis num-
 mis & baltheo remunerari. M. Ego vero, si
 mihi mille nummi in manum annumeren-
 tur, non sim manum filio regis injecturus.
 Nam audientibus nobis præcepit rex tibi A-
 bisæoq; & Etræo, ut adolescenti Absalomo
 caveretis: nedum ut ego tam perfidiose tan-
 to cum vitæ meæ periculo facerem: neque
 enim restant regi ignota esse posset. Verum
 jam ad eum ventum est: tu ipse vide, quid ti-
 bi agendum putes. J. Videbis me non ita cun-
 ctantem: morere boni parētis perversa pro-
 genes. Accipe hæc tria tela de mea manu,
 recta in medium pectus. Vos mei armigeri,
 circumfusi eum conficite. Tu præco confe-
 ctum bellum est, cane receptui, ut à perse-
 quendo revocentur milites. Ac. Visne igitur
 ut ad regem curram eiq; renunciem, Iovam
 de ejus hostibus sumsisse supplicium? J. Tu
 vero ne feceris hodie, alias facies: hodie qui-
 dem non es jucundum allaturus nuncium,
 propterea quod regius filius est mortuus. Tu
 Chusis, i ad renunciandum regi, quod vides.
 C. Libenter & quidem cursim. Ach. Quid si
 ego quoq; Chusim cursu consequar? J. Cur
 consequaris fili? non es obtenturus euange-
 lium. Ac. Sed quid si consequar? J. Per meli-
 cet.

eet. AB. Curro, facile Chusim antevertam. J.
 Nos vero hoc Deo hominibusq; invisum ca-
 daver in hanc vastam voraginem in hac syl-
 va detrudamus, & lapides insuper cumulate
 exaggeremus, ut tam nefarium facinus me-
 moria, ac nomine loci notetur. Nam talibus
 sunt digni monumentis, qui mortem iis ma-
 chinantur, quorum beneficio vitam sunt ad-
 cepti. Sp. Heus Rex video hominem huc ac-
 currentem solum. D. si quidem solus est bo-
 ni aliquid portat. Sp. Video item quendam
 alium currentem etiam solum. D. Is quoque
 letum nuncium affert. Sp. Ex cursu priorem
 conjicere videor Achimaam esse, Sadoci fi-
 lium. D. Virum bonum nominas, de nuncio
 læto venit. Ac. Salve Rex, & simul agendas
 Jovæ gratias existima, cujus auspicio subacti
 sunt, qui in te arma sumserant. D. Salvusne
 est adolescens Absalomo? A. Magnam ho-
 minum turbam vidi, cum me huc mitteret
 Joab: certum quid sit nescio. D. Recede,
 consiste istic. C. Regem plurima salute & læ-
 titia impertio, cujus Deus hostes omnes ho-
 die ultus est. D. Salvusne est adolescens Ab-
 salomus? C. Utinam sic sint omnes tui hostes,
 ô rex, & quotquot tibi malum machinantur.
 D. Fili mi Absalome, fili mi, fili mi Absalo-
 me, fili mi, utinam ego pro te sim mortuus.

Abfalome filii, filii, heu me miserum! C. Luctum attuli non lætitiā, nec solum regi qui audito interitu filii se cōjecit in cænaculum portæ, ubi in lucta sit, & se afflicteret, sed etiam populo universo, cujus lætitiā audita Regis tristitia in mœrorem convertet, sed video Joabum huc advenientem, stomachatur. Jo. Lepidum Regem, & dignum, cujus adhuc vivat filius: ubinam est? Q. Sursum est. Jo. Quem ego nisi, sed me comprimam. O turpe spectaculum! Itane vero David? sic cine tuos omnes hodie dedecoras, & eorum honestissimam victoriā in foedissimum luctum convertis? qui te tuosque liberos, & uxores, tum justas, tum concubinas, à crudelissima morte vindicaverunt? At non oportet, (quod tu facis) ita amare inimicos, ut oderis amicos. Nunc quidam facile ostendit, ita tuos omnes & nobiles & ignobiles pro nihilo habere. Nam equidem comper tum habeo, te unius Absalomi salutem nostra omnium morte velle redemptum. Verum age, prodi, & tuos affare leniter, nam per Deum immortalem, nisi tu prodeas, efficiam, ut ante noctem omnes ad unum à te deficient: quo gravius malum nullum unquam in vita tibi venit.

SENTENTIA.

Honora parentes tuos, si vis vivere diu. Indignus est vitæ, qui in aurorem

Florem vitæ suæ ingratus est. Dignus est infami morte, qui bonum malo pensat. Ardentem amorem ne summa quidem injuria extinguit.

BERZELÆUS, 2. Reg. 19.

ARGUMENTUM.

Berzelæum pro ejus in se meritis vult David in aulam ducere: Sed illo propter senectam recusante abducit ejus loco Chamaamum.

Berzelæus, David.

Salve nobis tandem reddite Israelitarum rex. D. O salve multum Berzelæe, homo de me multum benemerite. Trajicies tu mecum Jordanē: ego te apud me alam Hierolyms. B. At quot annos natus, ut cū Rege Hierosolymam ascendā? Ago nunc octogesimū annum: poteronē bonum à malo discernere: poteronē cibo & potione delectari? aut fidicinum, fidicinorumve cātus audire? quid opus est, ut tibi amplius sim oneri? Liceat mihi tecum paululum trans Jordanem progredi (Cur enim tanto me cumules beneficio?) liceat, inquam, reverti, & in mea patria finire vitam, itaque meorum parentum sepulchro humari. Cæterum hic Chamaamus tecum perget, hoc tu uteris, ut tibi visum erit. D. Ergo trajiciat Chamaamus: ego eum omnibus beneficiis ornabo, quibus ornandum esse judicaveris, tibiq; omnia præstabo, quæ à me expetiveris.

SENTENTIA.

In homines pios & gratos bene conferuntur beneficia.

BETHSABA, 3. Reg. I.

ARGUMENTUM.

Bethsaba de Naeban's consilio à vetulo Davide impetrat, ut rex creetur Solomo.

Naeban, Bethsaba, David, Banaias.

A Non audivisti, Bethsaba, Adoniam Hagithæ filium regem creatum esse, in scio domino nostro Davide? Age dabo tibi consilium, quo tuæ, tuiq; filii Solomonis vitæ consulas. Conveni Regem Davidem, & ex eo quære, qui fiat, ut cum Solomoni filio tuo regnum post se soliumq; suum sit pollicitus, nunc regnet Adonias. Ego, te adhuc cum eo colloquente, ingrediar post te, & tuam orationem complebo. **B.** Bene consulis, adeo eum. **Salve Rex.** **D.** Quid vis? **B.** Domine, tu mihi per Jovam Deum tuum jurasti, Salomonem filium meum post te regem fore, & in solio tuo sessurum: Atqui, Adonias te nesciente regnum invasit, bovesq; & altilia, ovesq; & capras magna copia immolavit, ad quas epulas cum regio omnes, Abiatharemque pontificem, & exercitus ducem Joabum invitaverit, Salomonem tuum non invitavit. In te autem domine Rex, omnium Israelitarum oculi sunt intenti, ut eis significes, ecquis sit in solio tuo post te sessurus. Te quidem vita defuncto, mecum & cum meo nato Solomone pessime agetur. **N.** Salve rex Israelitarum, Jussistine Adoniam tibi in regnum succedere? Nam is quidem hodie rus descendit,

dit, pecoraq; multa mactavit, & eo regiones omnes natos exercitusque duces, & Abiatharem pontificem vocavit, qui nunc apud eum epulantur, Adoniamq; regem salutant, me verò & Sadocum Pontificem & Banaiam Jojadæ filium, & Salomonem tuum non invitavit. Velim ex te scire an hæc res te authore fiat, neq; tu mihi significaveris, ecquis sit in tuo solio post se sessurus. D. Evocetur huc mihi Bethsaba. Audi Bethsaba per Jovam immortalem, qui meam vitam ex tot angustiis eripuit, quemadmodum tibi per Jovam Deum Israelitarum juravi, Salomonem filium tuum post me esse regnaturum, & in solio meo pro me sessurum, sic hodie faciam. B. Vitam regi Davidi precor sempiternam. D. Convocentur huc Sadocus pontifex & Nathan vates, & Banaias Jojadæ filius. N. Assumus. D. Adhibete vestros conservos, & Salomonem filium meum mulæ, quam habeo, impositum deducite Gehonem, eumque ibi tu Sadoce, & tu Nathan, regem Israelitarum ungitote. Deinde vobis sequentibus, ipse venito sessum in solio meo, pro me regnaturus. Hunc enim tum Israelitarum, tum Judæorum imperatorem esse Jubeo. N. Faxit Jova, Deus tuus Domine rex, ut quemadmodum tibi affuit, sic assit etiam Solomoni
ejusque

ejusque solium etiam supra Davidicum extollat.

SENTENTIA.

Sapientioris consilium sequi sapientia est.

SOLOMO, 3. Reg. 3.

ARGUMENTUM.

Deavum meretricum litem de oppresso per somnum alterius infante contendentium dirimit Solomo divina sapientia.

Meretrix: Solomo. Altera meretrix.

TUam fidem imploro, ô rex, audi me paulisper. So. Quid novi rei est? loquere. M. Ego & hæc mulier in eadem domo agimus, & utraq; peperimus; sed ea triduo post me: cumq; domi effemus, neq; quisquam præterea adesset, mortuus est ejus filius noctu, ut fortè incubuit. Itaq; media nocte surrexit, & surreptum meum filium, qui meo lateri accubabat, supposuit sibi, suum autem mortuum mihi, me dormiente. Mane ubi me erexi mammam infanti datura video mortuum. Hic ego, cum jam diluxisset, cum eum diligenter contemplor, animadverti non esse eum, quem pepereram: A. Non ita est, quin meus est qui vivit, tuus qui interiit. M. Imo vero tuus mortuus est, meus vivit. A. Mentiris. M. Non enim vere mentior, sed dico quod res est. So. Utraque suum esse affirmat eum, qui vivit, demortuumq; repudiat. Cedo huc mihi tu cultrum, partimini æqualiter puerum viventem, & date utriq; dimidium. M.

Obse-

Obsecro te rex, detur ei potius totus, quam intereat. A. Nec meus esto nec tuus, placet, divide medium. So. Eum ad iudico priori, quæ peremi vetat: nam ea mater est.

SENTENTIA.

Ad plerasque lites dijudicandas opus est divina sapientia. Iudicium multa simulanda sunt, ut sapienter judicet. Et verum & fictam a morem res ipsa detegit.

ROBOAMUS, 3. Reg. 12.

ARGUMENTUM.

Roboamus repudiato seruum sano consilio, juvenum insanum consilium sequitur de opprimendo majori in super servitute populo, quam ipsius pater Salomo oppresserat.

Roboamus, Senes, Iuvenes.

Petiit à me universum Israelitarum vulgus, ut, quoniam meus pater iugo eos pressisset, ego illius servitutis gravitatem levarem: se enim ita demum mihi obedituros. Nunc ex vobis, senes, scire velim, quid mihi suadetis, ut eis respondeam super hac re? S. Si hodie populo obsecutus fueris, eisq; obtemperans humane responderis, habebis tū semper obtemperantē. R. Audio. Nunc exite paulisper forās. Introducantur juvenes, æquales mei, mecumq; educti. Quid mihi auctores estis juvenes, ut populo respondeam, petenti, ut sibi à gravitate servitutis, qua sunt à patre meo oppressi, relaxem aliquid? J. Tu vero respondeas, tuorum membrorum minimum crassius esse, quam tui parentis medium corporis truncum. Quid si ille eos gra-
vi ju-

vi jugo pressit, te pressurum graviore. Si eos scuticis cæcidit, te eos scorpionibus conscisurum. R. Probe, vestrum mihi consilium magis probatur, quam senum. Itaq; id sequar.

SENTENTIA.

Senum propria est prudentia, juvenum temeritas. Stulti stultorum consiliis libenter obsequuntur.

SAREPHTHANA, 3. Reg. 17.

ARGUMENTUM.

Elias missus à Jova Sarephtanam mulierculam perpetua ejus farina & oleo à fame tuetur.

Elias, Sarephtana mulier.

HEus mulier, quæso te, ut feras paululum haque in aliquo vasculo, quod mihi bibendum des. S. Ego vero perlibenter. E. Sed heus, afferto tecum & frustrum panis. S. Ego vero (Jovam Deum tuū immortalem testor) coctum non habeo: sed tantum farinæ pusillum in cado & olei pusillum quid in ampulla. Nunc colligo paululum ligni ad id, quod habeo, mihi meisq; liberis parandum: quo confumto superest ut fame pereamus. E. Bono sis animo, i factum ut dixisti. Sed mihi prius depticium inde confectū afferto, deinde tibi, tuisq; liberis factura. Nam hoc tibi à Jova Israelitarum Deo confirmo, non prius farinæ cadum & olei ampullam exhaustum iri, quam Jova terram pluvia irrigaverit. S. Faciam ut jubes.

SENTENTIA.

Tenet & famelicos respicit Deus. Tenuēs & famelici multo facilius credunt Deo, quam potentes & saturi. Primitiæ debentur Deo & suis. Deus eorum laborem felicitat, qui Deo primas tribuunt. Feliciter habet, qui cum Deo habet, quantumcumque habet.

ELIAS, 3. Reg. 18.

ARGUMENTUM.

Elias cum latuisset tres annos & sex menses quo toto spacio non pluerat, inventus est ab Abdia, venit ad regem Achabum: & convocatis Baalis Lucanisque vatibus, constituto inter ipsos & Eliam certamine de litatione, cum illi litare Baali non potuissent, ipse Iovæ litat: deinde vates illos necandos curat. Postremo consensu monte Carmelo pluviam impetrat à Iovâ.

Abdias, Elias, Achabus, Populus, Vates Baalis,
puer Eliæ.

Misit rex ad quærendam tota regione aquam; si forte gramen invenire possimus, quo toleremus equos & mulos, ne jumentis privemur. Ipse rex alia via ejusdem rei gratia profectus est. Jam enim tres annos & amplius nulla fuit pluvia. Itaque omnia peraruerunt, nec usquam viriditas ulla potest inveniri. O Elia, tuæ preces nobis invexerunt hanc siccitatem, quæ non nisi tuis ejusdem precibus finiri potest, sicut ipse minatus es. Quod nisi pateris inveniri te, actum est, perimus. Sed video venientem huc hominem hirsutum, qui habet latera cincta cingulo pelliceo. Fallor ne, an is est ipse Elias? certe videtur. Heus tunc es Dominus Elias? EL. Sum. I nunciatum domino tuo, adesse Eliam. AB. Nunciatum eo? quid

quid peccavi, ut tu me Achabo necandum objicias? Jovam ego immortalem juro, Deū tuum, nullam gentem, nullam regnum esse, quo dominus meus non dimiserit, qui te, conquirerent. Cumq; negarent adesse te, ille regna & gentes obtestabatur, ut dicerent an tu illic esses quod te nusquam inveniret. Et tu mihi nunc jubes, ut domino meo nunciatum eam, adesse Eliam, qui postquam à te digressus fuero, auferet te Jovæ spiritus, nescio quò. Ego interea, qui hoc Achabo nunciatum i vero, cum ille te non invenerit, interficiat ab eo, & tamen Jovæ reverens fui à pueritia: nisi forte tibi relatum non est, quid ego, Jezabele vates occidente, fecerim, ut eorum centum abdiderim in duabus cavernis, videlicet in utraq; quinquaginta, & eos pane & aqua aluerim. Et tu mihi nunc jubes, ut eam ad nunciandum domino meo, adesse Eliam, quo me interficiat? E. Sic vivet armipotens Jova, cui ego apparere ac ministrare soleo, ut ego me Achabo ostendam hodie. AB. Postquam istud mihi ita confirmas, ibo. Salve rex, incidi in Eliam. A. In Eliam autem? AB. Ira. A. Eliam tu invenisti? AB. Eum ipsum. A. Quæso te, adest Elias vates? AB. adest Elias vates. A. Duc me ad eum continuo. AB. Eamushuc, inveniemus. Atq;

eccum

eccum tibi obviam. A. Tune is es, qui per-
turbas Israelitas? E. Non ego Israelitas per-
turbo, sed tu tuaq; paterna familia, qui omif-
sis Jovæ præceptis, Baales sequimini: quæ
caussa fuit, ut Jova vobis istos ardores immi-
serit: verum cura mihi convocandos omnes
Israelitas in montem Carmelum, Baalisq; va-
tes quadringentos quinquaginta: & lucanos
vates quadringentos, Jezabelis convictores.
A. Fiet ita. Assunt quos jussisti, Elia. E. Audi-
te vero Israelitæ. Quousq; in utrumq; crus
claudicatis? Si Jova Deus est, hunc sequimi-
ni: si Baal Deus est, hunc sequimini. Nihilne
respondetis? Ego unus Jovæ vates super sum.
cum Baalenses vates sint quadringenti quin-
quaginta, lucorumque vates quadringenti.
Dentur nobis duo tauri, quorum unum illi
sibi deligant, dissecentque, & lignis impo-
nant, neq; ignem subjiciant, alterum ego im-
molabo, superq; lignis collocabo, nec ignem
supponam. Tum vos Dei vestri nomē appel-
late, ego Jovæ nomē appellabo. Ac qui Deus
igne de coelo demisso annuerit, sequē exora-
tum ostenderit, is Deus habeatur. Pop. Pla-
cet vero, atq; ita fiet. E. Vos igitur Baalis va-
tes, deligite vobis taurum alterum, & prio-
res facite, quoniam plures estis, Deiq; vestri
nomen invocate, nullo igne subjecto lignis

sacrificabilibus VA. Accipiamus conditio-
 nem, Mactemus tantum, imponamus frustu-
 la lignis, O Baal exaudi nos, ô Baal, demitte
 ignem de cœlo, quò te Deum esse ostendas.
 Baal, Baal, ô Baal, præpotens Deus, Baal, ô
 Baal, Deus noster: noli committere, ut unus
 Jovæ vates plus possit apud Deum suum,
 quam nos octingenti quinquaginta apud te.
 Effice Baal, ut, quoniam te plures colunt,
 quam Jovam, majores etiam vires habere vi-
 dearis. O Baal, Baal, Baal, ô Baal: non audis
 nos? Nonne te coluimus hactenus? quid in
 te commisimus? non vis tuas vires ostende-
 re? Quo plures habeas cultores: nonne æquū
 est eò te magis exorari? Baal, ô Baal, nisi nos
 exaudis, actum est de te, deq; tuo populo. U-
 nus hic Jovæ vates tuum cultum abolebit.
 Quis te colet, ô Baal, quis te deinceps adora-
 re volet? ô Baal, Baal, ô Baal, quis te non con-
 demnet, & pro nihilo ducet, si nos in tanto
 discrimine non exaudiveris? In quem vero
 magis necessarium usum reservabis tuam
 potentiam? Nos te invocamus, nos aram tuā
 prætergredimur: & jam meridies est, neque
 tu respondes, aut exoraris. O Baal, Baal, Baal,
 ô Baal, noli perdere nos. E. Clamate majore
 voce. Certe enim Deus est: Sed forsitan ali-
 quid altius contemplatur, & animo, agit,
 quam

quam ut possit istas tam exiles voces audire, aut occupatus est, aut iter habet: nisi forte dormit, ut sit expergefaciendus. V. Heu Baal Deus noster, quid amplius tibi faciemus? O Baal, ô Baal, ô Baal. E. Euge recte, secate vos isto modo gladiis & cultellis, ut à vobis ipsis cruentati misericordiam Baalis excitetis. Sed nihil respondet, nec attendit vestros clamores? Surdo canitis. Agite jam omnis populus, accedite ad me, instauremus aram Jovæ, quæ diruta est: & saxa duodecim capiamus pro numero tribuum filiorum Jacobi. Ex his saxis aram Jovæ nomine construamus, & circum eam deducamus profundam scrobem, Agite componatur strues lignorum, mactetur taurus & superimponatur. Recte est. Replete quatuor amphoras aquâ, & eam in hostiam, inque struem effundite. Iterate idem: tertiâ. Bene est. Redundat aqua circum aram, ipsamque scrobem replevit? ne quid fraudis subesse putetis. Nunc, ô Jova: Deus Abraham, Isaaci, & Israelis, effice, ut hodie intelligatur apud Israelitas, & te Deum & me servum tuum esse, tuoq; jussu hæc omnia fecisse. Exaudi me Jova, exaudi me, ut sciat hic populus te Jovam esse Deum, qui eorum animos retroflexeris. POP. Orem miram! Ignis delapsus à Jova, & hostiam, & li-

gna & saxa, & humum absumsit, & scobis aquam lambit. Jova Deus est, Jova Deus est. E. Si igitur Jovam esse Deum agnoscitis, & ad terram proni adoratis, comprehendite Baalenses vates omnes, qui vos à Jovæ cultu magno vestro malo avocarunt. Cavete ne quis omnino evadat. Agite, ducamus eos ad Ciso nem fluvium: jugulentur hic vates omnes Baalis, ne quem deinceps à veri Dei cultu possint avertere. Perite populi deceptores, corruptores atque pestes, & dignas præstigiis vestris poenas date, ut deinceps adoretur & in honore habeatur is unus, cui debentur omnia. Nunc Achabe, ascende, ad capiendum cibum: sentio enim jam adesse murmur pluviz. Ego ascendam in verticem Carmeli. Sequere me puer. P. Faciam here. E. Age jam puer, dum ego hic in summo Carmeli jugo maneo, i spectatum mare versus: & mihi, quod videris, renunciatum venito. P. Libenter here. Feci here, neque quicquam vidi. E. Reverte eodem septies. P. Parebitur. Iam iterum venio. Iam tertio. Iam quarto. Iam quinto. Iam sexto. Superest, septimo specularum eam. Here, vidi nubeculam instar palmæ hominis ex mari afferri. E. Instat pluvia. I nunciatum Achabo, ut junctis jugalibus in urbem descendat, ne à pluvia

pluvia opprimatur. Pu. Eo. E. Ego succin-
ctis lateribus ei Iezrael præcurram. Pu. Sal-
ve rex, jubet Eliás, ut properè jungas e-
quos, & te in urbem recipias, ne te pluvia
opprimat. A. Agite mei, festinemus: ingruit
pluvia: nigrescit cœlum nubibus atq; ven-
to. Properemus: vix evademus, quin made-
fiamus.

SENTENTIA.

*Iustorum preces, incredibile dictu, quantum polleant apud Deum. Injusti justos accusant eorum malorum, quorum sunt ipsimet auctores. Præsente Elia nihil possunt Baalenses. Præsente Iova torpet Baal. Vt nox diei, Sic veritati cedit mendacium. Impiorum plena sunt omnia, piorum exiguus est numerus. Sæpe magis uni credendum quam mille: nam paucorum est sapientia. O cœcum genus hominum! quando tandem hæc videbitis, aut quæ tandem lux penetrabit istos oculos? Numquam nisi sero sapietis. Vitam affit aliquis igneo spiritu ignea-
que oratione Eliás, qui caritatis ignem de cœlo devocet, quo nostrarum precum sacrificia exardescant, ut deinceps solus Iova extollatur.*

MICHEAS, 3. Reg. 22.

ARGUMENTUM.

Achabo Israelitarum regi consulunt falsi vates, ut Ramotha Galatidicam urbem bello adoriatur: fore enim, ut ea potitur. At Michæas vates contrarium prædicit, eamque ob causam conicitur in vincula.

*Achabus Israelitarum, Iosaphatus Iudæorum rex, Vates,
Nuncius, Sedecias, Michæas.*

AD sunt hîc vates Iosaphate plus minus
quadringenti, quos ad explorandam
Dei voluntatem censuisti accersendos. Io.
Video: superest ut eos interroges. A. Quid
mihi auctores estis, Vates? censetisne ut bello

Ramotha adoriar, an ab incepto desistam?
 VA. Nos vero censemus, ut adoriaris: nam victoriam tibi annuit Dominus. Jo. Num quis præterea hic est Jovæ vates, ex quo sciscitemur? A. Est item unus: sed quem male odi, quoniam nihil unquam mihi, nisi sinistrum, vaticinatur. Is est Michæas, filius Imlæ. Jo. Non decet regem ita loqui, sed jube eum acciri. A. Tu siste huc nobis propere Michæa. Nu. Ita faciam. S. Vide sive hæc, Achabe, cornua ferrea, quæ ego fero? Hæc tu modo, quasi cornu petes, & fundes. Syros ad interneccionem: ita tibi per me futurum pollicetur Deus. V. Ita prorsus fiet. Aggredere sane Ramotha, feliciter pugnabis, eamq; Dei beneficio capies. Nu. Cæteri quidem Vates omnes, Michæa, Regi uno ore felicem successum, promittunt. Itaq; censeo, ut tu quoq; ei bene omineris, quemadmodum ipsi. M. At ego Deum immortalem juro, me ea solum, dicturum, quæ mihi divinitus inspirata fuerint. A. Michæa, quæ est tua sententia? arma ne in Ramotha inferamus, an non? M. Quidni inferas? jam tibi victoriam annuit Jovæ. A. Quousq; tandem mihi illudes? Te etiam atq; etiam obtestor per nomen ejus Jovæ, ne mihi quicquam nisi verum dicas. M. Nunc verum audies. Vidi omnes Israelitas balan-
 tes

tes in montibus, sicut oves sine pastore solent. Atque Jova, non habent isti dominos, inquit, redeantq; suam quisq; domum cum bona pace. A Dixine ego tibi, eum nihil mihi nisi infaustum prædicturum? M. Igitur audi certissimum oraculum. Vidi Jovam in folio suo sedentem, omni cœlesti exercitu dextra lævaq; stipatum, atque ita dicentem: Ecquis mihi in errorem inducet Achabum, qui Ramotha ibi casurus, invadat? Cumque alius aliud diceret, processit quidam Spiritus, qui stans ante eum, Ego, inquit, facturum me recipio. Cui Jova: Quonam modo? Tum ille: Aspirabo falsa omnibus ejus vatibus, quæ dicant: Probe, inquit Jova, succedet, aggredere negotium. Nimirum ex his liquet, omnes istos tuos vates esse falso spiritu afflatos, & Deum tibi male cogitare. S. Accipe colaphum pro isto tuo mendacio. Nam qua ratione divinum numen, cujus tu instinctu te loqui simulas, à me emigravit, ut te docuerit? M. Tum scies, cum trepidus te in intima penetralia penitus abdes. A. Corripe Michæam, & eum deduc ad Amonem, prætorem urbanum & Joam regium filium: & jube meo jussu in carcerem concludi, atque ibi pane atro & aqua parce ac duriter pasci, donec salvus redeam. M. Siquidem salvus redi-

bis, nihil caussæ est, quo minus dicar mentitus oraculum: atque equidem hoc clarissima voce omnibus inculcatum volo.

ARGUMENTUM.

Falsi Vates (quorum ingens est numerus) dicere solent, quæ placeant hominibus & imprimis assentari principibus. Veri vates (qui patri esse solent) assentari nesciunt, & improbis semper dura dicunt. Et quoniam improbi in hac vita dominari solent, fit plerumque, ut veritatis præmium vincula sint & necesse. Nam obsequium amicos, veritas odium parit. O mundi potentes! utinam hæc in animos vestros demittatis.

SUNAMITIS, 4. Reg. 4.

ARGUMENTUM.

*Eliseus ab hospita sua Sunamitide oratus ejus filium revocat in vitam.
Eliseus, Gibezi, Sunamitis.*

ECce Sunamitidem illam hospitam nostram, Gibezi: curre ei obviam rogaturus, utrum valeat ipsa & vir, & puer ejus. G. Faciam: Salve mulier, fatisne salva es & tuus maritus, & puer, valentne? S. valent, sed sine me pervenire quo volo. G. Quonam properas? S. Ad tuum herum. G. Nescio quid novi videtur accidisse huic mulieri. Sed quid istuc rei est? Heus mulier, tune audes pedes vatis complecti, apage. E. Sine eam, animo ejus male est, quod me Jova celavit. S. Perieramne à te filium? an non admonueram, ne mihi imponeres? E. Accingere Gibezi, & cape meum baculum, atque abi, si quem offenderis, ne salutato, neq; salutates resalutato. Ubi eo perveneris baculum faciei

factei pueri imposito. G. Eo. S. At ego profecto nunquam te omittam, quin unâ tecum venias. E. Age sane, tuæ voluntati obsequar, præ i, jam te sequor. G. Here, feci ut iusseras, sed puer neq; vocem edit neq; audit, neque potuit omninò expergefieri. E. Ne trepida mulier, introeamus cubiculum. S. Hic quidē plane mortuus jacet in meo lectulo. E. Exito foras, & me hîc relinquito. solum eum solo clausa janua. G. Nescio quid magnum expecto: non abs re sese conclusit intus. S. Faxit Deus ut natum recipiam! G. Hospita. S. Quid novæ rei est? G. Salva es, visus sum audire sternutantem puerum. S. Revixi si verum prædicas. E. Heus Gihezi. G. Me vocat: quid est here? E. Accerse huc mihi istam foeminam. G. Te vocat: S. Adeo. E. Recipe jam tuum filium incolumem. S. O divine vir, quas tibi gratias agam pro tanto munere? E. Deo hoc totum acceptum ferendum est, mulier, non mihi, qui per me possum nihil.

SENTENTIA.

Fides est omnipotens. Suorum preces quamvis maxima potentium exaudit Deus.

NAAMAN, 4. Reg. 5.
ARGUMENTUM.

Naaman Syrus ab Eliseo à lepra sanatus ei gratias agit, & dona offert, quæ vero Eliseus non accipit. Deinde digressum Naamanem consequutus Gibezi Elisei famulus, ab eo pecuniam & vestes aufert per mendacium: eamque ob causam ab Eliseo reprehensus fit leprosus.

Naaman, Eliseus, Gibezi, Minister Naamanis.

Revertor ad te Elisæe, & meum tum in Deum, tum in te peccatum confiteor, veniam peto. E. Quidnam peccasti? M. Cum tu me per ministrum tuum jussisses corpus Jordano septies immergere, si à lepra (cujus depellendæ causæ veneram) sanus esse vellem: primum indignatus sane sum, & me tibi despectum esse ratus, quod tantum ministrum ad me misisses. Nam speraveram te ipsum exiturū, & invocato Dei nomine manum loco admoturum, & ita morbum sanaturum. Deinde indignum mihi videbatur, tantum tribui vestris aquis, ut, cum Abana aut Pharphar fluvii Damasci vestris nihilo deteriores essent ad me sanandum inutiles, Jordanis tantam habere vim putaretur. Itaq; abibam ira plenus. Quod nisi mei famuli fuissent me sapientiores, equidem medicinam repudiassem. Sed cum illi dicerent absurdū esse, me, qui rem quamlibet magnam salutis causā facturū essem, à tam parva re fugere, tentavi quid possent aquæ Israelitarum, & me septies in Jordanem immerfi: quo factō ita sum (ut vides) sanatus, ut non sit pueri corpus nitidius, aut integrus. Quapropter intelligo jam, & confiteor nullum in toto mundo esse Deum, nisi eum, quem vos Israelitæ colitis. Itaq; pro tam singulari beneficio

quæso

quæſo te, ut à me munuſculum hoc accipias. E. Apage ſis, egonè munus accipiam? N. At ne me repudia. Non equidem id facio, quo tibi tantum meritum remetiar, quod neq; fieri poteſt: ſed ut hoc mei in Deum, & in te grati animi pignus apud te relinquem. E. Iſtum gratum animum apud te habeto: dona ne addito. N. Atqui. E. Ne urge tantopere. Nam (ut tu ſemel ſcias) Deum immortalem juro, cui ego appareo atq; adminiſtro, me nihil à te accepturum. N. Si ita decreviſti, nolo improbius inſtare. Cæterum oro te, ut hinc mihi terræ duorum mulorum onus aſportare liceat, nam ſtatui deinceps nullis diis, præterquam uni Jovæ adolere aut ſacrificare. E. Laudo, aſportato ſane. N. Præterea eſt aliud, ſuper quo te velim conſulere. Solet meus dominus, quandocunq; in ædem Remonis adorationis gratia com meat, meis humeris inniti, ubi, inclinante ſe, non poſſum, quin me quoq; inclinè. Eam mihi rem Jovæ ignoſcet, opinor. E. Ita. Abi cum bona pace. G. Hem parſit dominus meus accipere oblata ſibi ab iſto Syro munera? At mihi ita fit Jovæ propitiuſ, niſi eum curſu conſequor, aliquid accepturus. Immuniſ ut abeat tam dives homo, tanto affectuſ beneficio? N. Non convenit, Religioniſq; habeo, nihil ei dediſſe. Sed
videone

videone ejus famulum cursu contendentem? Ipse est, quantum ex incessu conjicio: G. E. curru defiliit, & mihi procedit obviam? N. Salvane omnia, puer? G. Pax, te tribus verbis volo. Modo ad herum meum venerunt duo de vatū genere juvenes, è monte Ephraimitarum: Ea de caussa rogabat herus ut mihi ad eos argenti talentum des, & duas vestes de splendidioribus. N. Imo vero duo talenta auferas, atq; utinam plura voluisset, libenter dedissem. G. Non est opus. N. Ne dubita accipere, erit aliquis eorum usus. Vos colligite hoc argentum in duobus fiscis: addite has duas vestes. Vos duo præferte ei has sarcinas. Iubeto tuum herum meo nomine salvare plurimum. G. Faciam. Vale. N. Et tu. G. O me felicem, cui res tam bene succedunt! Ite hac juvenes, sequimini me per hoc obscurum ostium: deponite hic sarcinas, jam mihi nihil opuse est vestra opera. Quod reliquum est, ipse facile per me perficiam. Abite. M. Vale ergo. G. Valetate vos quoq; Nunc res mihi bene gesta est, abscondam hic hunc thesaurum, ubi eum nemo præter me sciat. Sed jam, ne meus herus aliquid suspicetur, si nimis diu absim, offeram me ei. E. Unde noster Gizehis? G. Nusquam equidem ivi. E. At etiam audes velle mihi verba dare? quasi ego non
una

una animo adfuerim, cum homo de curru revertit tibi obviam. Hoccine tempus est accipiendorum ullorum munerum? Improbè à te factum. Itaq; pro isto tuo peccato lepra, qua liberatus est Naaman, in te, & in tua progenie imposterum hærebit.

SENTENTIA.

Bona spiritalia plerumque aspernatur mundus, quia splendora carent & apparatu mundano. Ne famulorum quidem consilium commendandum est: sæpe etiam est olitor valde oportuna loquutus. Dona spiritalia non emuntur precio carnali. Avaritia mendaces facit, & homines in miseriam præcipitat. Dei spiritum latere frustra coneris.

HAZAEEL, 4. Reg. 8.

ARGUMENTUM.

Hazaelis percontanti prædicit Eliseus mortem Benadadi regis Syriæ, & insuper ipsius Hazaelis regnum, & sævitiam in Israelitis.

Hazael, Eliseus.

Benadadus Syriæ rex, qui nunc æger est, misit me ad te Elisæe, ad percontandum de salute sua. E. Renunciato ei morbo levatum iri: & tamen Jova mihi interitum significavit, Heu! H. Quid tibi volunt ista suspiria, quæ fixo vultu ita alte trahis? E. O Hazael, Hazael, video quantam tu vastitatem sis Israelitis illaturus. Tu eorum ædificia incendes, tu juvenes ferro trucidabis, tu pueros elides, tu gravidas mulieres discerpes. H. Egone vilissimus homuncio tanta facinora potero? E. Ostendit mihi Jova, te fore regem Syrorum.

SENTENTIA.

Pius dolet populi Dei calamitas, quam ois merito, & divinitus illata.

JEHUS, 4. Reg. 9.

ARGUMENTUM.

Jehus ab Elifæi puero unctus rex Israelitarum, Ioramum Israelitarum, & Ochoziam Iudeorum regens, & Iezabelem Iorami matrem occidit.

Puer Elifæi, Jehus, Duces, Speculator, Ioramus Israelitarum Rex, Nuncius, Alter nuncius, Iezabel.

HAbeo quoddam ad te mandatum, dux. JE. Quem nostrum appellas? P. Te ipsum dux: secedamus intro: Jova te, Jehu, Deus Israelitarum hoc oleo per me ungit regem futurorum Israelitarum: juvetq; ut Achabi domini tui stirpem trucidet. Statuit enim suorum omnium tum vatum, tum reliquorum sanguinem à Iezabele expetere, universamq; Achabi domum perdere & ejus memoriam, genusq; stirpitus ex Israelitis tollere: tamq; eo redigere, quo redacta domus est Jerobami Nabati filii, & Basæ Azizæ filii. Jezabelem autem comedent canes in agro Jezraelano insepultam. Sed ego hinc fuga me proprio. Du. Quomodo se res habet, Jehu, quorsum venit ad te lymphatus iste? JE. Hominem nostis, ejusq; orationem. Du. Minime vero. Doce nos, quidnam dixerit? IE. Unxit me regem Israelitarum è Ioyæ mandato, cui certum est Achabum, Achabiq; domum per me ulcisci. Du. Supponamus prope regi vestes nostras, socii, eumq; collocemus in editissi-

ditissimo graduum. I præco proclama tuba, regem esse Iehum. IE. Nunc Duces, si vobis ita videtur, cavete, ne quis ex oppido evadat, qui hujus rei nuncium ad Iezraelē perferat. Nos conscendamus equos, & eo festinemus ire. Nam illic decumbit Ioramus, sanandorum vulnerum gratia, quæ in prælio contra regem Iezraelem à Syris accepit: eodemque venit Ochozias Iudææ rex, ad eum visendum. S. Video quendam hominum globum. Io. Tu conscende equum, & ei cursu profectus obviam, quære ut valeat. N. Fiet. IE. Accurrit huc eques quidam. N. Rogat rex Iehu, ut valeas? IE. Quid ut valeam? recede pone me. S. Pervenit nuncius ad eos, neq; revertitur. Io. Heus tu conscende equum, & eodem curre. N. Fiet. IE. Accurrit hic alter. N. Rogabat Rex, Iehu, an valeas? IE. Quid an valeam? recede pone me. S. Pervenit ad eos nuncius, sed non revertitur. Incessus autem ferocitas declarat esse Iehum Nimsi filium. Io. junge currum equis, auriga: exeamus homini obviam Ochozia. IE. Tandem veniunt ipsi reges opportune. Io. Valetne Iehu? IE. Quid, valetne? durantibus tot matris tuæ Iezabelis stupris & maleficiis? Io. Fugiamus Ochozia: circumvenimur. IE. Siquidem potestis de regis corpore sanguinem elicere: hem

hem tibi, hinc moriturus eras. Tu Badaccar triumvir, abjice eum in fundum Nabothi Iezraelensis. Nam memini, cum aliquando ego & tu Achabum hujus patrem in eodem curru sequeremur, ei oraculo dictum esse, Iovam sanguinem Nabothi ejusque natorum pridie ejus diei respexisse: eumq; in agro ejusdem Nabothi, quem ille iudicio per calūniam oppressisset, in illum vindicaturum esse. Quare fume hoc cadaver, idq; in fundum abjice, sicut ferunt Iovæ dicta. Sed fugit Ochozias: persequimini eum, occidite, pereat hoc ad flagitia concors hominum genus. Pergamus in oppidum: nondum peracta ultio est. Superest totius mali fons Iezabel, quam jam videre videor de fenestra prospicientem. At etiam fucata est: nimirum ut morti placeat. IEZ. Nunquid bene accidit Zambri, qui dominum suum interfecit? IE. Ecquid istic à me est? Recte, vos ejus eunuchi præcipitate eam. Iez. Perii foeminarum impurissima, & à meis equis conculcata.

SENTENTIA.

Etiā subditos armat & excitat Deus in principes impios. Equum est enim, ut qui adversus Deum dominum suum consurgit (id quod faciunt omnes impii) adversus eum consurgant ipsius servi.

JOAS, 4. Reg. 13.

ARGUMENTUM.

Ioē Israelitarum regi se aegrotum visenti prædicat Elisa us victorias, quas sit de Syris reportaturus.

Ioas Rex Israelitarum, Elifcus.

Heu pater patriæ! heu columnen Israeli-
tarum! tu quidem nunc æger jaces. E.
Non est ejulandi tempus, cape arcum & sa-
gittas. I. En cepi, quorsum? E. Impone ma-
num arcui. I. Feci. E. Aperi fenestram adver-
sam orienti. I. Aperui. E. Jaculare, Hem sic
volo: collimasti: Ista, ista est salutaris nobis,
mortifera Syris sagitta, quos tu in Apheco,
Dei præsidio, occisione occides. Sed perge,
cape sagittas. I. Cepi: quid tum? E. Feri ter-
ram. O factum male! si quinquies percussis-
ses, aut sexies, tum poteras Syros delere fun-
ditus. Nunc eos ter tantum superabis, quo-
ties videlicet terram pulsa visti.

SENTENTIA.

*In vate plus est præsidii, quam in exercitu. Vatis mors est Regi de-
ploranda. Fata abstrusa sunt.*

JONAS, JONÆ I.

ARGUMENTUM.

*Vexati tempestate nautæ, invocatis frustra diis, factaque jactura, Io-
nam vatem excitant, qui in navi dormiebat. Deinde sorte jacta, ut eum
fontem esse tempestatum causam esse deprehenderunt, jaciunt in mare,
ipsiusmet admonitu. Ita pacatur tempestas.*

Naucerus, Nautæ, Ionas.

PRÔ Jupiter, quanta sævit tempestas?
quanti undarum fluctus nostram navem
undiq; verberant? Dicas Neptunum & Æo-
lum, omnesq; adeo Deos in nostram conju-
ravisse perniciem. Ne sævi tantopere aqua-
rum præpotens Neptune, ne eos perde, qui

K

se

se tuæ fidei mandaverunt. Tuq; ò *Æole*, cui potestatem in ventos dedit *Jupiter*, cohibe tam effrenatum eorum impetum. *NAUT.* Dii immortales, quid habetis in animo? hucine venisse nos, ut tam miserè periremus? *Parcite*, quæsumus, *parcite*: nos vobis sacra faciemus, tibi *Neptune* taurum, vobis agnum, *Tempestates*, mactabimus: tantum liceat hinc salvis evadere. *NAU.* *Ledæ* proles *Castor* & *Pollux* amica sidera, obsecro, vestram fidem, reddite nobis mare tranquillum, reddite amicam cœli serenitatem. *NAUT.* Nihil agimus video, tam surdi sunt Dii, quam est ipsum mare. *NAU.* Quid superest? *NAUT.* Ut jacturam faciamus. *NAU.* Durum. *NAUT.* Sed necessarium: extremo autem malo extremum adhibendum est remedium, atque utinam vel sic evadere liceat. Festinate, dejiciamus has merces. Præstat rem perdere, spem aliquam retinentes, quam cum re certum exitium expectare. Vos ò cœli marisque potentes Dii, este saltem contenti hac nostra miseria: quid mortem in super minamini? Hei mihi, magis magisque furiant venti, ingravescit tempestas, irritantur superi, non placantur nostris votis & precibus. Quo jam, quo me vertam? Erat hic nescio quis peregrinus. Ubi nunc est? *NAUT.*

Dormit

Dormit ad infimum navis latus. NAUC. O supinam securitatem! Heus, heus peregrine, quem tandem dormiendi modum facis? potes in tanto periculo indulgere somno? Quin tu surgis, & tuum in hoc temporis articulo Deum invocas: si quis forte superum existat, qui hoc à nobis malum avertat, & præsens auxilium ferat? NAUT. Frustra laboramus, caussa tanti mali perscrutanda est. Oportet aliquem hic adesse, qui se nefario aliquo scelere obstrinxerit, propter quem tantopere irascantur Dii. Sortiendum est quis sit in caussa. NAUC. Placet, ducantur sortes. Euge, fors hunc peregrinum designat. Vides te peregrine accusari? Dic quæso, unde tantum in nos malum ortum sit, quod vitæ genus sequaris? unde & quo eas? cujus sis, & qua gente natus? J. Jam jam nullum superest effugium: teneor manifesto, O inevitabilem Dei potentiam. Ego sum Hebræus, Jovæ cælestis Dei cultor, qui & mare & terram fabricatus est. Is me Niniven ire jusserat, ut eum populum, ocio & luxu diffluentem & perditum, mea admonitione ad meliorem frugem, & sanio rem vitæ rationem deducerem. Cum ego muneris tristitiam defugiens statueram Tarsum in Ciliciam me conferre & ejus conspectū evitare, cujus oculis omnia

sunt subjecta. NAU. Periimus funditus. Inscite prorsum homo, & male abs te factum. Sed postquam factum quod est, infectum fieri nō potest, quid tibi nunc censes faciamus, ut placatiore mari utamur, quod vehementius semper agitari vides? I. Vos vero me in mare deturbetis, si id sedatum vultis. Nam certo scio ego, mea unius causa vos hac tam vehementi tempestate afflicti. NAU. Avertant superi, ut tua morte salutis nostrae consulamus. Non faciemus, agite viri fortes, incumbamus remis, conemur ad terram appellere. Eja adhibite summas vires: eja rumpam⁹ hos fluctus. O rem miseram! crescit assidue malum, nulla ratione terram possumus attingere. I. Frustra sudatis invito Deo. NAUC. Quid ergo est, tene nos in mare? I. Nisi mavultis mecum una perire. NAUC. O desperatissimum perfugium! sed tamen fatius est te solum, quam nobiscum interire. Faciendum est socii: nulla alia ad evadendum via est, video. Effertur mare, rumpitur navis, mors nobis versatur ob oculos. Demergamus eum. Obsecramus te JOVA, ne perde nos ob hujus viri mortem, neve à nobis poenas sanguinis ejus expetas. Vides nos necessitate impulsos facere, & tu omnia tuo arbitrato moderaris: laciatur. O rem admirabilem! videtis ut subito

bito sedata sit tempestas, eo dejecto? Videtis mare sic tranquillum, ut nunquam tranquillius? Agnosco, agnosco ego Jovæ potestatem immensam, is nimirum Deus est, cæteri ne quicquam precibus interpellantur. Uni, uni detur gratia, uni itaque sacra vota; faciamus.

SENTENTIA.

*Frustra implorantur falsa numina sæviente vero Numine. Deum effugere nec terra nec mari possis. Cum fontibus navigare, hoc est, ver-
sari noxium est. Manente causa poenæ, manet poenæ.*

RABSACES: 4. Reg. 18.

ARGUMENTUM.

Rabfices ab Assyriæ rege Senacheribo missus ad Hierosolymitanos, qui erant in muris, ipse extra muros jubet deditionem facere: Et in Iovam ejusque populum petulantissime invehitur, nemine quicquam respondente.

Rabfices, Eliacimus.

VOS hoc nomine regis magni, id est, regis Assyriorum, Ezechiaë nunciate; Quæ tandem fiducia nitatur? verbisne, an consilio, an viribus dimicare cogitet? qua tandem spe fretus ab eo defecerit? an videlicet confidit confractæ isti culmeo baculo, id est, Ægyptiis: cui si quis innitatur, ei manum perforaret? talis est Ægyptiorum rex Pharaon omnes, qui ei confidunt. Quod si mihi dicitis, nos Jova Deo nostro confidere? an non is est cujus Ezechias sacella arasque sustulit: jussitq; Judæis & Hierosolymitanis, ut Hierosolymæ ad certam quandam aram Deo

supplicarent? Age Ezechia, vis cum Domi-
 no meo rege Assyrio sponfionem facere si ti-
 bi dedero duo equorum millia, ut tu nō pos-
 sis ad eos totidem equites suppeditare. Tunc
 aufis vultum subire vel unius prætoris, mini-
 mi servorum domini mei? & fiduciam tibi
 collocas in Ægyptiorum curribus & equiti-
 bus? An porro sine Jova ad hunc locum va-
 standum ascendi? Jova ipseme jussit in hanc
 regionem proficisci, eamque depopulari. E.
 Quæsumus te, ut nos Syriacè (scimus n.) allo-
 quaris, nō judaicè, in auribus hominum, qui
 sunt in moenibus. R. Quasi ad dominū tuum
 aut ad te miserit me Dominus meus ad hæc
 dicenda, ac non ad eos qui sunt in muris, ut
 vobiscum & merdam suam comedant, & ur-
 rinam bibant: Audite Judæi, Regis magni,
 Regis Assyriorum dicta, Ne vobis imponat
 Ezechias: neq; enim poterit vos ab ejus ma-
 nib⁹ defendere: neve ab eo persuaderi vobis
 sinite, ut Jovæ fidatis, quasi vos defensuro, ne-
 que urbem istam in manum Assyriorū regis
 permisso. Nolite Ezechiaæ credere, sed po-
 tius Assyrio regi obtēperate, qui vobis man-
 dat, ut secum benevole agatis, & vos ei deda-
 tis, & suis quisque vineis & ficibus, & puteis
 tātisper utamini, donec veniat ad vos in ve-
 stræ similem terram transferendos, in terram
 frumen-

frumenti, & vini, & panis, & vinearum & oli-
varum, & olei, & mellis feracem, ut hac rati-
one vestre salutis prospiciatur, neve Ezechie
fidem habeatis: faller enim vos inani fiducia
defensionis Jovæ. An reliquarum gentium
dii suam quisque terram ab Assyriæ rege de-
fenderunt? Ubi sunt dii Hemathi & Arpha-
di? ubi Sepherphaimi? ubi Enæ? ubi Avæ?
nunquid Samariam ab ejus manu tutati sunt?
Quis tandem est omnibus omnium terra-
rum Diis, qui suam terram ab ejus manu de-
fenderit, ut Jova Jerosolymam defensurus
esse videatur? E. Obrumescamus neve ei
quicquam respondeamus: ita enim fert Re-
gis mandatum. Sed eamus hæc Regi nunci-
atum.

SENTENTIA.

*Rescanda insolentes sepe reddunt homines, & in ipsum etiam
Deum petulant. Prosperos successus sibi ascribunt superbi, cum de-
beant Deo. Cum maledicenti & verbosi rixandum non est, sed Deo com-
mittenda causa.*

EZECHIAS, Esa. 38.

ARGUMENTUM.

*Ægrotans rex Iudeorum Ezechias, cum esset ei ab Esaiâ vate de-
nunciata mors, precibus à Jova impetrat vitæ prorogationem.*

Esa. 38, Ezechias.

Impera domi Ezechia: nam isto tibi mor-
bo moriendum est. Hæc est Dei voluntas:
EZ. O durum nuncium! ô sancte Deus! memi-
neris quam fideliter & integro animo te sem-
per colueram, & ad tuam voluntatem vitam

omnem direxeram. Hic pietatis honos? sic religionem remuneraris? Menè nunc in medio ætatis cursu in eas angustias esse redactum, ut subeundum sit sepulchri ostium, & reliquo vitæ tempore carendum? Eheu! iam ego non fruar communi hoc cœlo? cœlo ego non fruar, cuius amœna lucè illustrantur, qui in terra degunt vitam? Iam ego avellor à charo conspectu & consuetudine hominum, qui hunc orbem incolunt? Ex hac vita discedo & emigro, tanquam è pastorali tuguriolo, fatali ævi stamine & filo ante diem amputato. Paulatim atteror, & consumor in horas: neque quicquam propius expecto, quam si jam jamq; absumptus animam agam. Ad mane si ventum est, membrana omniaturo cruciatu dilaniari sentiens, mortem in vesperum expecto: Hirundinis, aut gruis ritu stridulas voces emitto, & columbarum more querulos edo gemitus, cœlumq; suspiciens, consumptis lachrymis, ipsa oculorum tabe, intolerabiles animæ testor dolores. O rerum domine omnium! ajo mihi fieri injuriam, cuius te vindicem esse par est. Miserum me! quid jam? quid mihi venire in mentem possit, quo possim tuum animum ad id quod volo flectere? Meanè vitæ brevitatem miserabiliter commemorem? O rerum author & mode-

moderator! longius est profecto naturale vi-
 vendi spacium, quàm quantulum à te mihi
 conceditur. Haccine mihi ætate tam imma-
 turè spiritus reddendus est? An tu me vide-
 licet sempiterno somno consopire paras, ut
 postea in vitam revoces? aut cujus altissimã
 tranquillitatem acerbissimo casu contami-
 nari passus sis, eum scilicet jam letho absum-
 ptum, è putido busto vindicabis? & cujus vi-
 tam ægrotantis tueri neglexeris, eundem
 morte deletum, amico lucis usu rursus do-
 nabis, peccatis (quorsum de fonte mors sca-
 tet) quasi post tergum rejectis, & æterna ob-
 livione obliteratis. Deinde à quibus gratitu-
 dinem, & ex ea manantem laudationem ex-
 pectas? à mortuis, credo, sepulti te celebra-
 bunt & tuum paratum miseris præsidium
 prædicabunt humati? Vivi, vivi tibi, gratias
 agent, veluti ego hodie: & parentes liberis
 commemorabunt tuam egentibus omnibus
 expositam tutelam. Intende meæ saluti, Jo-
 va, & nos de tuis laudibus carmina, quam
 diu vivemus, in æde tua modulabimur. Es.
 Ades animo, rex. Jubeor tibi læta nunciare.
 Jova, Deus Davidis, authoris generis tui tuã
 præcationem audivit, tuasq; lachrymas re-
 spexit. Itaq; sic habeto, te per eum sanari, &
 tertio abhinc die ascēsurum in sanum. *Quin*

imo addet tuæ vitæ quindecim annos, teque eripiet è manibus Assyriorum, unà cum hac urbe, cujus se defensorem præbebit propter semet ipsum: tum etiam propter Davidem sui cultorem. Sed vos famuli sumite palatium quam ulceri ejus imponatis ut convalescat. Ez. Sed quo signo intelligam, me in sanitatem restitui & tertio die venturum in eadem? Ez. Vides hoc Achazi solarium? Ez. Video. E. Optio tibi datur, utrum velis umbram decem gradibus procedere, an reverti? Ez. Facile est umbram progredi: potius retrocedat. O rem miraculosam! nunc, nunc video, volente Deo, nihil esse arduum.

SENTENTIA.

Piis precibus usque adeo flectitur Deus, ut interdum etiam decretum suum rescindat. Quamvis morbos interdum naturalibus remediis insurabiles sanat Deus, tamen naturalia remedia non semper repudiat. Non medicinæ, sed Deo tribuenda est sanatio, & tamen utendum est medicina.

JEREMIAS, Jer. 26.

ARGUMENTUM.

Jeremias urbis & templi ruinam vaticinatur eam ob causam comprehenditur à sacerdotibus & vatibus ad nocendum. Sed factò ad tumultum concursu, proceres & senatores & Achicamus id prohibent.

Jeremias, Sacerdotes, Vates, Proceres, Senatores, Achicamus.

Audite omnes omnium Judææ urbium homines, quotquot hoc templum, in cuius ego sto vestibulo, intratis, adorandi Numinis gratia: audite quæ Deus mea voce vobis effatur. Nisi eum audieris, & ex lege quam vobis

vobis præscripsit, vivetis: tum autem dicta-
 vatum, ejus cultorum, quos ipse ad vos mit-
 tit, per quos vos mature admonere nunquam
 intermisit, ea inquam, nisi audietis, hanc ip-
 sam eodem sacram in eum statum rediget, in
 quem Silonem redegit, & hanc urbem omni-
 um orbis terrarum gentium ludibrio expo-
 net. SA. Quid sibi vult clamorosus iste? V. Om-
 nibus minatur exitium, SA. At sibi non mi-
 natur, sed conflatur maximum malum. Quin
 invadamus hominem? V. Atqui ita opus est.
 SA. Comprehendite eum viri, cavete ne ef-
 fugiat: faxo jam scias Jeremia, quæ mala no-
 bis obnuncias, ea te in temetipsum excita-
 se. Itane vero, ut huic templo Silonis rui-
 nam, & urbi vastam everfionem & solitudi-
 nem denunciaveris, & hæc tam dira impune
 protuleris? morte pœnas lues. V. Meruit
 certe. PR. Unde tantus iste tumultus, sacer-
 dotes? aut quid vult tantus hominum con-
 cursus? quid novæ rei accidit? SA. Hic ho-
 mo dignus est qui capite det supplicium, qui
 quidem tam horrendas clades huic urbi sic
 vaticinatus, quemadmodum vos ipsi audistis.
 J. Audite me, si placet, & vos omnes popula-
 res audite me, Jovæ ego optimi maximi in-
 stinctu huc veni, ea in fanum & urbem præ-
 dicturus, quæ vos audivistis. Quare corrigite
 vestram

vestram vitam & mores, Deiq; vestri admo-
 nitioni obtemperate, ut mutet consilium,
 malumq; quod in vos cogitat, avertat. Quod
 ad me pertinet, equidem video me in vestra
 manu esse: vos mihi, quod videbitur, faciatis
 licet. Veruntamen sic habetote: si me inter-
 feceritis, vos, urbemq; & hanc rempublicam
 innocentis sanguinem supplicio luituros.
 Certe enim Jova misit me ad vos, ut vobis
 audientibus ea omnia dicerem. PR. Nos qui-
 dem non videmus justam causam, cur hic
 capite plectatur: siquidem nos nomine Jove
 Dei nostri afflatus est. SEN. Audite vos vicis-
 sim nisi molestum est. Micheas Morastita va-
 ses fuit tempore Ezechiaë regis Judæorum,
 qui Jovæ optimi maximi nomine omni Ju-
 dæo populo audiente ausus est dicere, Sio-
 nem in agrum redactum aratum iri, Hiero-
 solymamq; in rudera collapsurum, & mon-
 tem sacrum in solitudinem redigendū. Nun-
 quid in eum morte animadvertit Ezechias
 aut ullus Judæorum? An non Deum reve-
 rentia & precatione sibi placuerunt, malum-
 que quod ab illo jam jamq; imminebat, de-
 pulerunt, & nos tam immam scelere animos
 nostros obligabimus? Quid Urias, nihilne
 nos movebit? Is fuit filius Semæjæ, ex Caria-
 thiarino, qui eadem in urbem hanc à Jova
 est

est vaticinatus, quæ modo Jeremias. Quod cum Joacimus rex audivisset, nec non ejus milites & proceres, eum quæsiit ad necem. Id ubi rescivit ipse, territus aufugit in Ægyptum. Sed eo misit rex Elnathanem, & quosdam alios, qui in illinc extractum ad eum adduxerunt, eumq; ferro crudeliter necavit & ejus corpus in plebejorum sepulchretum projiciendum curavit. Itaque, qui fuerit exitus, videtis. Nunc dispicite, utrum nefarium hujus facinus, an consideratam illius prudentiam malitis imitari. AH. Profecto nunquam finam vos manus Jeremiæ sanguine commaculare.

SENTENTIA.

Veritas odium periculumq; parit. Malo vate aut doctore nihil iniquius: plerumque plus sapiunt & plus æquitatis habent meruditi, quam doctores. Pœnam si vis effugere, fuge culpam. Miora imitanda sunt exempla: immutiora declinanda.

ANANIAS, Jerem. 28.

ARGUMENTUM.

Ananias Judæis liberationem ad biennium falso vaticinatur. Jeremias contra graviores, insuper captivitatem prædicit, & ipsi Ananie mortem à Jova denunciat.

Ananias, Jeremias.

Audi tu Jeremia, una cum universo hoc populo, quæ jussu Dei vobis denuncio. Ego (inquit Jova optimus maximus, Israelitarum Deus) jam rumpam jugum regis Babyloniorum, & post duos annos referam in hunc locum omnia vasa templi, quæ Nabuchodon-

chodonosor hinc ablata Babylonem deportavit : Jeconiamque filium Joacimi Judææ regis, omnesq; captivos Judæos, qui sunt abducti Babylonem, huc reducam, fracto Babylonis imperio. J. Utinam ita faciat Jova, & tua dicta omnia ad rem conferat, atque huc vasa sacra reportet, captivosq; omnes à Babylone revocet! Verum audi, & quæ apud te & omnem populum eloquar, trade memoriæ. Claruerunt ante me & te jã olim Vates, qui multis nationibus, magnisque regnis bellum, aut famem, aut pestem præsignaverunt. Quod si quis aliquando secunda pronunciabat, eius prædictum aut rei eventus à divino afflatu profectum comprobabat, aut frustratio refellebat. Hoc quia in hac vaticinatione futurum certo scio, malo te rei exitu confutari, quam mea oratione irritari. A. Cedo mihi istam torquem : audite vero omnes, qui hinc estis, quid ferant mea dicta: Quemadmodum hoc ego collare perrumpo, ita Jovã scitote perfracturum dominationem Nabuchodonosoris, post biennium. J. Nolo tecum amplius rixari. A. Abeas, licet ego hoc teneo, & tenebo, ne trepidate Judæi, adventat jam certissimũ vobis præsidium & salus. Bono animo este. J. Assum tibi à Deo, Anania, qui tibi me ita renunciare jubet : Vincula lignea,

inquit, rupisti Anania, sed pro eis ferrea feres. Nam ego ferreum jugum collo imponam omnium istarum gentium, quo serviant Nabuchodonosori Babyloniorum regi, sub cuius ego ditionem etiam agrestes bestias subjunxi. Hæc sunt, de quibus te, Anania, Deus meo ministerio præmonitum voluit. Sed nõ est, crede mihi Anania, non est, quod incitationem & permotionem divinam ostentes, & hunc populum spe inani erigas. Neq; enim à Deo missus ades, cuius ego inflatu perniciem tibi proximam denuncio, teq; hoc anno vita defuncturum confirmo: quoniam tuis verbis deficiendi ab eo causa es.

SENTENTIA.

Mali doctores solent improbis fausta dicere: & qua placeant. Boni contra. Hinc fit, ut boni inveni sint, mali amoveantur. & auctoritate polleant. Veris vaticiniis ratio creditur ante eventum: præsertim si assint falsi vates, qui veris contraria doceant. Mali vates diuinæ pænæ improborum verbis leniunt, re ipsa exasperant. Cum pervicacibus rixandum non est. Qui improbis blandiuntur, eos à Deo avocant.

SEDECIAE, Jerem. 38.

ARGUMENTUM.

Jeremias consulentem se Sedeciam, Iudææ regem monet, ut se dedat Chaldeis, alioquin venturum ipsum & urbem in miseram calamitatem.

Sedecias, Jeremias.

VOlo ego te consulere super rebus meis Jeremia: sed noli me quicquam celare. J. Rem omnem tibi aperiam, sed ea conditione, ne me interimas, neve consilium meum repudies. S. Per Deum immortalẽ, qui nostros animos creavit, nõ perimam te, neq; tradam

illis hominibus, qui tuam necem cupiunt. JE. Satis habeo: Accipe jam quod sit Dei consilium. Si te contuleris ad principes Babylo-
nios, & tuæ, tuorumque vitæ confules, & incendium ab urbe depelles. Sin minus, & urbs Chaldæis dedita igni cremabitur, neq; tu eorum manus evitabis. SE. At enim valde metuo, ne me Chaldæi Judæis, qui ad ipsos transfugerunt, tradant, omni irrisione ludendum. J. Non tradent, crede mihi, obtempera Dei monitis, cujus ego voluntatis interpretes tibi sum datus: si te ipsum amas tuæq; salutis provides. Quod si te dedere renuis, hæc tibi divinitus denuncio: Omnes mulieres, quæ supersunt in regia, eductæ ad principes Chaldæos, & in os indignissime irridebunt, ut circumventum & proditum à tuis necessariis, & in ipso cœno perfide destitutum. Tuæ autem uxores omnes & liberi tradentur Chaldæis: neq; tu eorum manum effugies, qui in manus regis eorum venias, qui hanc quoq; urbem incendet. SE. Vide ne quis hac reificat, ne tu pereas. Quod si proceres audierint nostram congressionem, teq; convenerint, rogantes, qua de re inter nos actū sit, & mortem minantes, nisi indicaveris, dices, te à me precibus petivisse, ne committam, ut in domum Jonathanis reducaris ad miserabilem mortem.

SENTENTIA.

Veritas cum periculo dicitur. Imprudentes dum leuius aliquod malum inuisibile vitant, incurrunt in grauius, quod fuerat inuisibile. Qui tolerabiles poenas Deo dare recusat, eum incitat ad grauiiores.

Finis Libri Secundi.

DIALOGORUM SACRORUM.

LIBER TERTIUS.

TOBIAS, Tob. 4. & 5.

ARGUMENTUM.

Tobius Tobiam filium suum pietatem docet. Deinde iubet, ut ducem quaerat ad petendam ex Media pecuniam, ibi a se depositam. Tobias Genium, qui se hominem simulabat, nactus, cum eo proficiscitur.

Tobius pater, Tobias filius, Raphael Genius, Anna mater.

CUM hac vita discessero, nate, sepelito me honorifice: tum autem matrem tuam honorato: nec eam, donec vivet, deserito, neve ei parum morigerando vitam reddas acerbam. Recordare filii, quod dolores perpessa sit propter te, cum esses in eius utero. Cum igitur vitam finiverit, eam mecum honeste sepelito in eodem sepulchro. Ac per omnem vitam memento Creatoris tui, neve eum offende, neve ejus præcepta omitta. Quantumcunq; tibi Jova largitus erit, de eo ne parcito liberalitatem exercere. Ad homines inhumanos ne te aggregaveris. A respiciendis egentibus Israelitis ne abhorrueris, ne

L

Jova

Jova vicissim tuis temporibus adversis à te respiciendo abhorreat. Quod si tuæ facultates non ferent, ut large id facias: ut pro eo, quâtum id erit, quod suppeditabit, ne parce in benignitatem conferre, ut divitias tibi, & argenti auriq; thesauros in beneficentia repositos habeas. Nam thesauri nihil impios juvant. At hæc virtus à morte vindicat: ac quisquis beneficentiam exercet, Dei conspectum videbit, quemadmodum habet scriptum illud: Ego per beneficentiam conspectum tuum videbo: quam qui exercent, cœlestes habendi sunt. Tu ergo nate, corpus tuum ab omni libidinis obscœnitate tuere, uxoremque de tua cognitione ducito, nequaquam alienigenam, aut alius sanguinis, quàm tuorum majorum. Nos enim vatum progenies sumus. Memoria repete Abrahamum, Isaacum, Jacobum, qui uxores de sua sibi gente asciverunt, extraneorum affinitate repudiata eoque liberis fortunati fuerunt. Animum intende, fili, ad eâ, quæ ages: Quod tibi nolis fieri, aliis ne facito. Operarii mercedem ne retineto noctem unam, post eum diem, in quem cum eo pactus eris, ut & te præmio remuneretur Deus. Corpus tuum ab ebrietate abstineto. In nulla nequitia te oblectaveris. De tuo victu largire esuriētibus. De

tuo vestitu indue nudos. Quod tibi superat, id omne in beneficentiam confer, neque id gravate: hoc est vere pane & vino sepulcra justorum perfundere. Audi & attende quemlibet, qui modo verum tibi cōsiliū det. Ab Jova omnibus tēporibus pete, ut tuas rationes, consiliaque dirigat: neq; enim homini in manu positū est consiliū: sed uno Dei opt. max. qui quicquid vult efficit, alios depri- mens, alios efferens. Hæc mea dicta præcepta omnia conservato, & nunquam non ante o- culos habeto fortiq; & infracto animo esto: nam Jova tibi auxilio præsidioque erit, si ei toto animo totoq; pectore studueris. Nunc fili, illud tibi indicabo de pecunia, quam habeo apud Gabelem, mihi cognatione pro- pinquum (ea est decem argenti talenta) Re- gem in Media: nam incertum est, quando sim moriturus. Tu fili, si Jovam metues teq; ab omni scelere conservabis, magnas ab eo opes consequeris. TOBI. Omnia ut præcepisti mihi pater, sic faciam, sed velim mihi consi- liū des, qua ratione queam istam à Gabele pe- cuniam recuperare? nam neq; ille me, neq; illum ego agnoscam: neq; quo signo repetam pecuniam scio, neque qua via eatur in Me- diam teneo. TOBÆUS. Quod ad signum pertinet, hoc dices: me, cum ille mihi marfu-

pium suum tradidisset, dixisse: Accipe de manu mea, atque ex quo ei argentum in manum tradidi, annum hunc esse vigesimum. De via autem quære tibi jam hominem aliquem fidelem, qui tecum vadat, cui præmium dabimus. Proficiscere, fili, adhuc vivente me, & argentum pete. Jova te Deus Israelitarum in itinere conservet: tibiq; benevolentiam, studium, misericordiam, & illius omnium qui te videbunt, conciliet: teq; nobis sospitem & incolumem & ducat & reducat ante meum interitum. TOBI. Eo igitur ad conquirendum ducem. Et fortasse præsto adest, qui faciat. Nam video juvenem quendam in via stantem accinctum, & ad iter (ut videtur) paratum. RAPH. Adolescens cujus? TOBI. Domine possesne mecum in Mediam proficisci? RAPH. Equidem novi vias omnes, sumq; aliquando usus hospitio Gabelis gentilis nostri agentis Rages, in finibus Mediæ, quæ Rages distat ab Ecbatanis itinere duorum dierum, estque montana: Ecbatana autem in campestri loco posita sunt. TOBI. Prestolare paulisper, si placet, dum hanc rem patri renunciatum eo. Nam magnopere cupio te comitem habere, tibiq; dabo mercedem pro itinere. RAPH. I propera. Ego hic manebo donec redeas; noli diutius morari.

TOBI.

TOBI. Nactus sum virum bonum, pater, nostri generis, qui mecum proficiscatur. **TOBÆ.** Evoca eum ad me, ut scisciter unde terrarum sit & an satis fidus sit tibi futurus comes. **TOBI.** Faciam: huc accerferis à patre meo. **RAPH. Eo.** Salve vir divine. **TOBÆ.** Si salveo, cur mihi hæc usu veniunt, ut oculis captus in tenebris cœcus sedeam? **RAPH.** Qui tibi oculorum lucem cœcando ademit, idem te, quia vir bonus es, sanabit. **TOBÆ.** Ita faxit Jova. Sed ad rem. Meus hic filius Tobias vult ire in Mediam, frater, poterisne ire cum eo, & ego tibi mercedem dabo. **RAPH.** Potero, quippe qui vias omnes noverim, omnemq; illam regionem peragraverim, & montes teneam. **TOBÆ.** Cujus es? cujus generis, & quâ ex civitate? **RAPH.** Quid amplius quæris cum mercenarium habeas, qui tuum filium comitetur ex tui animi sententia? **TOBÆ.** Frater, nomen tuum scire velim, & cujus nationis sis. **RAPH.** Ego sum Azarias Hannaneelis filius, de familia Solemiti majoris, tuus gentilis. **TOBÆ.** Quod salutare faustumq; sit, Sed noli ægrè ferre, frater, quod voluerim tuæ familiæ genus cognoscere: meus gentilis es, egregia & nobili ortus familia. Nimirum nostri Hannaneelem & Nathanem, duos Solemiti filios, qui mecum itabant Hierosoly-

mam, cum Israeliticam terram incoleremus,
 mecumq; ibi adorabant: neque unquam ad
 deos peregrinos, qui in ea regione habean-
 tur, desciverunt, quod cæteri gentiles nostri
 fecerunt. Quare vade frater feliciter cum fi-
 lio meo: & redite feliciter, adjuvante Deo.
 Ego tibi in singulos dies drachmam solvam,
 & victum ut filio. Quod si vos Deus opt. max.
 salvos reduxerit, istud tibi præmium au-
 gebo. RAPH. Omitte timorem, nam ego
 cum filio tuo salvus cum salvo, & ibo & re-
 dibo. TOBÆ. Compara tibi, Tobia fili, quæ
 ad profectiorem sunt necessaria & profici-
 scere cum isto fratre. Deus omnipotens vos
 incolumes ducat, & reducat, & vobis hoc
 iter ductu Genii sui prosperet. TOBI. Valet
 mei parentes observandi. TOBÆ. Vale &
 ambula prospere. AN. Ohohoho. TOBÆ.
 Quid fles? AN. Rogas? nihil ne vereris pue-
 rum abs te amittere, qui in oculis nostris ob-
 servandis nostram senectutem reddere le-
 viorem? quasi vero, non nos sine illo argen-
 to aliturus esset Deus noster. TOBÆ. Ne ti-
 me soror. Nam & prospere ibit, & incolumem
 ad nos reversum tu ipsa tuis oculis as-
 picias. Deus noster ei Genium attribuet, qui
 ei iter bene fortunet, eumque salvum redu-
 cat. AN. Eheu.

*Parentum est filios docere pietatem. Piorum curam mandavit Deus
& Geniis suis.*

ASMODEUS, Tob. 6. 7. 8.

ARGUMENTUM

*Raphael Geniis agit cum Tobia de ducenda in matrimonium Sara
Raguelis filia. Deinde ubi ad Raguelm pervenerunt fit matrimonium.*

Raphael, Tobias, Raguel, Edna.

IAm tandem pervenimus Ecbatana, To-
bia frater. Hac nocte divertemur apud Ra-
guelm. Is senex quidam est, qui filiam habet
unicam, forma præstantem, nomine Saram.
Ego cum eo agam, ut eam tibi det in matri-
monium. Est bona indole prædita, & patri
dilectissima. Ausculta mihi, & de ea agito.
Ubi Rage redierimus, celebrabimus nuptias.
Non dubito quin non sit ille tuis postulatis
contradicturus. Nos eam ad patrē tuum du-
cemus Tob. At audio, frater, eam jam septem
viris esse traditam, qui antequam in ejus cō-
plexum venerint, mortui sint, ab Asmodæo
(ut dicitur) demonum rege necati. Quapro-
pter ne me ille interficiat, non mediocriter
pertimesco. Quod si fieret, parentibus tri-
stissimi causam exitus præberem, qui alium
nullum neque filium neque filiam habeant,
à quo eis vita defunctis parentetur. RAPH. Ve-
rere modo Jovam, ejusque memor esto: tum
etiam patris tui præceptum recordare, à quo
jussus es uxorem ejusdem tecum familiæ

ducere. Tum me autore nihil dæmonem timueris. Satis exploratum habeo, te eam in hanc noctem in matrimonio esse habiturum. Igitur ubi in cubiculum cum ea introveris fumito cor piscis, quem tu in Tigri flumine dilacerasti: & ex eo sub ejus pallam suffitum facito. Eo nidore olfacto dæmon puellam fugiet, nec unquam eam repetiturus postea. Cum autem tibi cum ea congregi libebit, surgitote de lecto geniali, Jovamque oratote, & obsecratote, ut vobis pro sua clementia opem ferre, puellæque mederi velit. Tum demum cum ea rem habebis, ex qua liberos mares procreabis. Sed omnem timorem abjice: nam ea tibi destinata est ante orbem conditum, per teq; eam Jovæ à dæmone vindicaturus est. **TOB.** Quod futurum sit, viderit Deus. Sed certe facit tua oratio, ut à conjugio non abhorream. **RAPH.** Jam appropinquamus domo Raguelis: & ecce eum ante suas ædes. Salve. **RAG.** Salvete & vos. Aspice huc Edna, quam hic adolescens, forma referat Tobæum fratrem meum? **E.** Unde estis, fratres? **RAPH.** Ex captivis qui sunt Ninivæ, ex Nephtalina tribu. **ED.** Nostisne Tobæum fratrem nostrum? **RAPH.** Novimus. **ED.** Valetne? **RAPH.** Valet. **TOB.** Iste Tobæus, frater (ut diciris) vester, pater meus est.

RAGO.

RAG. O Faustum diem! Libet te complecti. Jovam tibi propitium precor, fili: nam ex viro optimo & probissimo natus es. Age uxor, si quid est lautius, apparetur cœna: placeat arietem mactari. Volo ego hos hospites accipi liberaliter. Succedite nostro recto: præstemus nos hilares. T. Jam tempus admonet, Azaria, ut de matrimonio mentionem injicias. RAPH. Memini. Quoniam filiam habes tam nubilem, Raguel, & hic est Adolefcens, & æqualis illi, & tribu, is petebat, ut eam sibi nuptum locares. RAG. Non me præterit, satius esse eam tibi, quam alteri tradi. Sed verum tibi dicam. Eam jam septem viris locavi (ut tu scias) qui omnes ante ejus congressum mortui sunt. Verum ede & bibe, & istam rem omitte. T. Nihil agis: neque cibum ego neque potionem capiam, quin tu eam mihi in matrimonium concesseris. RAG. Postquam ita infixum in animo habes, obtineto sane. Et quia sanguinei estis, ego jam nunc eam tibi in matrimonium trado, ex instituto Mosaico & Israelitico. Huc ades Sara, accipe hanc Tobia, Jova Deus cœlestis vos hac nocte custodiat incolumes, suaq; in vos clementia utatur.

SENTENTIA.

Piorum opera sunt autore & duce Deo. Pii voluptatibus etiam licetis imperant, non serviunt, Pii fugant dæmonia. In pios potestatem non habet dæmon.

RAGUEL, Tob. 10.

ARGUMENTUM.

Tobias Ragueli socero suo valedicit, secum abduicens illius filiam Saram, uxorem suam.

Tobias, Raguel, Sara.

MI socer Reguel, tu à me postulasti, ut manerem apud te dies quatuordecim, & cum filia tua, uxore mea Sara suaviter viverem, id quod tibi concessi. Nunc finita est dies. Itaq; peto abs te, ut me dimittas, Mei enim parentes ambo dies numerant, neque putant hoc loco rem esse. R. Doleo me tam parvum spacium à te petiisse. Sed nihil obstat, quo minus id fiat longius. Mane apud nos diutius: ego mittam ad tuum patrè nuncium, qui ei totum negocium renunciaret, ne sit de te sollicitus. T. Quæso te, noli me remorari: cupio omnino ad parentes reverti. R. Quando urges, non remorabor invitum. En trado tibi meam filiam Saram, nec non dimidium facultatum mearum. Ite feliciter. Deus Jova, Deus majorum nostrorum, vos fœcundet, mihi que ex vobis liberos, mares ostendat, qui Jovanæ legi dent operam. Agite deosculari vos volo. Vide mea filia, ut tuum focerum & focrum (qui nunc tui parentes sunt) habeas in magno honore, maritum diligas: familiam regas, domum gubernes: & teipsam præstes inculpatam, &

cum

cum bona pace profecta efficias, ut bonam de te famam viventes adhuc læti hilaresque accipiamus. Et tu Tobia fili, vale. Jova te Deus cœlestis salvum perducatur, mihique ex te & filia mea Sara liberos Jovæ studiosos, eique probatos, ostendat, antequam morior. Ecce Saram filiam meam in potestate tua: noli eam unquam male tractare. Ite sane incolumes. S. Valetē parentes charissimi, valetē cognati & amici omnes. T. Vale socer: vale socrus: Valetē omnes. Ago Jovę gratias, qui me lætum reddiderit, & tot beneficiis tam mirifice affecerit.

SENTENTIA.

Vxorē est sequi virum, & propter eum parentes patriamque relinquere. Est enim matrimonii conjunctio arctior, quam natura.

TOBÆUS, Tob. II.

ARGUMENTUM.

Tobias ex Media reversus venit ad parentes, & felle piscis oculos patris sanat à cœcitate: quia de re pater Deo gratias agit.

Raphael, Tobias, Anna, Tobæus.

FRater, tu scis quam sollicitum reliqueris utrumque parentem. Quapropter antecedamus ego & tu, uxore tua cum famulis, reliquoque nostro comitatu subsequente. TOB. Bene mones. R. Præpara fel piscis. A. Atat, ô mi vir, adventat meus Tobias, cum comite. Curro ei obviam. RA. Tui patris, quem video esse cœcum, oculi felle isto aperientur, atq; sanabuntur. Itaque cum ad eum acces-

accesseris, illinito ejus oculos isto felle: tum ille fellis mordacitatem sentiens, sibi oculos fricabit, atq; ita dejecta albugine, & cœlum & te lætus videbit. A. O gnate, jam mortem non deprecor, postquam tuum conspectum cernere licuit. TOB. Salve mea mater, Sed accedit huc pater: Hei mihi! collapsus est. Accurram, O mi pater salve. TOBÆ. Salve fili optatissime, ut valetis. TOBI. Optimè, est Deo gratia. Sed patere me tibi oculos illinire hoc felle. Nā spero hoc tibi fore salutare. TOBÆ. Libenter patiar. TOBI. Expectemus paulisper. TOBÆ. Sentio fellis mordacitatem. TOBI. Frica tuos oculos. TOBÆ. O supra modum mirandum miraculum! Nunc te liquido video fili: amplectere me. Gratias ago Jovæ Deo Israelitarum, qui cœcos illuminat, qui mihi oculos aperuerit: cujus nomen nullis unquam sæculis satis digne laudari poterit: qui in me hoc tantum munus contulerit. Hic vulnerat & sanat: hic occidit & vitam dat: huic gratias ago, qui te nobis feliciter expedito itinere saluum lætumq; restituit.

SENTENTIA.

Deus suos à miseria tandem liberat. Medicina mordax: Deo gratias cum agende de omni bono.

RAPHAEL, Tob. 12.

ARGUMENTUM.

Raphael Tobæo & Tobie sibi mercedem solvere volentibus, se indicat, eisque officium præcipit.

Tobæus

Tobæus, Tobias, Raphael.

Tobia fili, solvamus isti homini, qui te committatus est, mercedem: & eam cum corollario. **TOB.** Pater demus ei dimidiam partem pecuniæ, quam illinc attuli. Nam is me incolumem duxit & reduxit: meamq; uxore sanavit, & argentum à Gabele abstulit, & tibi oculos sanavit: pro quibus omnibus quænam ei referri par gratia potest? **TOBÆ.** Huc ades Azaria. Accipe frater mercedem tuam, id est, dimidiam pecuniam, quam illinc apportasti, & vale: **R.** Canite Jovæ carmen novum eique gratias agite, & ejus nomen celebrate pro tantis ejus in vos collatis beneficiis: crebrisq; precibus, supplicationibus & beneficentia erga egentes eum affectate: quoad vivetis. Nam plus apud eum valet assiduum beneficentiæ officium, quam argenti auriq; copiosa congeries: utpote cum beneficentia, vindicet à morte. Equidem nihil vos de rei veritate celabo. Quo tempore tu tuaq; nurus Sara, sancti opem numinis precibus suppliciter magno cum animi angore implorabatis, vestras ego preces (ut vos sciatis) ad majestatis solium subvehebam, cumque tu mortuos sepeliebas, aderam tibi, tuisq; difficillimis rebus, ab Jova, qui te oculorum cæcitate tentaverat (solet enim hoc pacto periculum

culum facere bonorum) missus sum ad te san-
 mandum, & Saram tuam nurum. Sum au-
 tem Raphael Genius, unus de principibus,
 qui ad gloriæ solium famulantur. Nolite ti-
 mere. Bene vobis se res habet. Agite Jovæ
 gratias pro tantis miraculis, quæ vobis exhi-
 buit. Nam quod me, quandiu vobiscum ver-
 satus sum, edere & bibere vidistis, species il-
 la fuit, quæ vestris oculis obversabatur: cum
 re ipsa neq; ederem, neque biberem. Quare
 mandate hæc omnia literis, quæ vos vestri
 erga Deum officii per omnem vitam admo-
 neat, atq; hanc rem omnem in omnium æta-
 tum æternitatem testentur: & Jovæ gratias
 agite, ejusq; sacram memoriam pie retinere,
 meque jam absolvite, ut ad Deum me reci-
 piam, à quo sum missus ad vos.

SENTENTIA.

*Deus piis sepe ne cogitantibus quidem prospicit. Per cruceſ ducit
 Deus suos ad felicitatem. Piorum primordia tristia, exitus læti.*

ACHIOR, Judith. 5. 6.

ARGUMENTUM.

*Querenti Oloferni de Iudeorum statu narrat Achior: & quoniam
 eos invictos esse dicit (nisi forte Deum suum offenderint) iratus Olofer-
 nes eum jubet ad Bethulienſis Iudeos deduci, ut una cum illis pereat.*

Olofernes, Achior, Proceres.

NArrate mihi, vos Chananæi, de istius
 rationis hominibus, qui in montanis
 habitant, quas incolant urbes, quantam ha-
 beant copiarum multitudinem, qua re plu-
 rimum

mum valeant & possint, quo rege & exerci-
 tus duce utantur: & cur soli mihi ex occi-
 dentalibus obviam venire neglexerint. **A.**
Audi domine orationem servi tui. Enuncia-
 bo tibi rem omnem, ut sese habeat, de gente
 ista montana, quæ finitimos ibi fines incolit:
 neq; ullum ex ore meo mendacium excider.
 Homines sunt prognati à Chaldæis, qui prin-
 cipio Mesopotamiâ incoluerunt. Cum enim
 Deos patrios Chaldæorum detrectarent, pa-
 triisq; moribus relictis, unum sibi Deum cœ-
 lestem ad adorandum delegissent, ab illis ex-
 agitati in Mesopotamiam aufugerunt. Ibi
 cum aliquandiu commorati essent, iussi à
 Deo suo in Chananæam commigrare, parue-
 runt, atque in Chanaanâ commorati ma-
 gnum auri argentiq; & pecoris numerum
 comparaverunt. Postea dominante fame, in
 Ægyptum devenerunt, ubi tam diu inco-
 luerunt, donec in innumerabilem hominum
 multitudinem excreverunt. Deinde cum à
 rege Ægypti crudelius tractarentur, & late-
 res conficere indignè & labore servili coge-
 rentur, Deum suum implorarunt, qui totam
 Ægyptum ineluctabilibus calamitatum i-
 ctibus percutit. Quibus malis coacti Ægy-
 ptii, eos tandem à sese emiserunt. Sed postea
 remisso malo, cum eos fugientes revocare,
 rur-

rursumque in servitutem redigere conarentur. Deus illis mare rubrum disclusit, ita, ut ab utroque latere aqua in muri firmitatem concreta staret, qua illa via in sicco per medium maris, solum pertransiverunt. Eodem Ægyptius exercitus consequutus aqua submersus ita est, ut ex innumerabili multitudine, ne nuncius quidem evaserit. Trajecti mare rubrum, in solitudinem montis Sinæ venerunt, ubi mortalium nemo consistere unquam, aut habitare potuerat, ibi dulces ex amaris fontes ad bibendum habuerunt, & victum de cœlo per quadraginta annos acceperunt. Ac quocumque unquam venerunt, Deus eorum hostes pro eis, nullo arcu, nulla sagitta, nullo scuto, nullo gladio debellavit, neque unquam huic genti resisti potuit, nisi si quando à sui Dei cultu deflexit. Nam quoties alium Deum, quàm suum, coluerunt, direpti sunt, & omnes à bello contumelias pertulerunt. Quoties autem Dei sui cultum repetiverunt, Deus eis cœlestes resistendi vires dedit. Ad extremum Chananzos, Jebuszos, Pherozos, Hettos, Hevzos, Amorrhæos, & fortissimos quoque Hesebonios deleverunt: eorumque agros & oppida occuparunt: At, quam diu sese à Deo suo offendendo continuerunt, multis bonis fructi, Deoque suo (qui impro-

improbritatem odit) prospero usi sunt. Et ante hæc tempora, cum ab ea vivendi ratione, quam eis Deus tradiderat, declinavissent, diversis diversarum gentium bellis profligati, & tandem frequentes in extraneas regiones captivi abducti sunt, eorumq; & sanum solo æquatum, & oppida capta, & ab hostibus compilata sunt. Sed nunc ad Deum suum conversi ex dissipatione congregati sunt, desertosq; montes occuparunt, & Hierosolymanam (in qua eorum sacrarium est) obtinuerunt. Quare disquirendum est, domine, si qua in offensa sunt apud Deum: Nam si sunt, facile eos, ipso concedente, superabimus. Quod si nihil ab eo est commissum, bello superfedendum censeo: ne, Deo pro eis propugnante infamiam apud omnes mortales subeamus. PR. Quis est iste, qui tantum tributis Israelitis, ut eos putet Nabuchodonosori posse resistere? homines imbelles, & rei militaris ignaros, qui, me hercle, unum tui, Olofernes, exercitus impetum sustinere non potuerunt. Invadamus modo, & Achiori ostendamus, eos posse superari. OL. Quoniam tu nobis istud oraculum, præclare vates, edidisti, Israelitas à Deo suo defensum iri, ut intelligas unum esse Deum Nabuchodonosorem, contra cuius invictam potestatem ne

illorum quidem Deus stare possit, nos, qui ab eo missi sumus, illos ad unum funditus ad interneccionem ita delebimus, & equitatu proculcibimus, ut eorum montes sanguine redundant, & campi corporibus compleantur, citiusq; illos ad fugam, quam nos ad perdendum vires deficient. Hæc est totius orbis domini Nabuchodonosoris indeclinabilis sententia. At tu Ammonitarum mercenarie, Achior, qui tam divinum nobis oraculum effatus es, esto sane tanta particeps potentia, & quos nobis anteponis ad eos desice, ut cum eis potius, ut dignus es, pereas, & inter eos à nostra acie, contrucidatus des pœnas. Quod si totidem tuæ superstitioni confidis ut me, quæ suscipio, præstare nō posse credas, quid metu exalbescis? Sic tibi tuta sunt omnia, non peribis nisi cum illis, quos perire non posse vaticinaris. Vos mei satellites, abripite hunc, & Betuliam ad suos Israelitas deducite: ut illorum potius exitii quam nostræ sit socius victoriæ.

SENTENTIA.

Veritas inuisa mundo. Etiam de veritate rogantes veritatem audire nolunt. Assensatorum plene sunt domus aureeque potentium. Assensatorem qui amat, ruinam amat. Casum antecedit superbia.

JUDITHA, Judith. 8.

ARGUMENTUM.

Juditha Betuliensium primates oburgat, quod de urbi deditione patiti sint: Et eos consolata sese ad eum succurrendum parat.

Iuditha, Ozias, & cæteri Senatores.

Attendite primates populi Betuliensis. Promisistis populo, & quidem interposito jurejurando, vos urbem hostibus post quinque dies esse dedituros, nisi Deus vobis interea tulerit auxilium. Itane vero tempus divinæ statuitis misericordiæ, & ei diem vestro arbitrio dicitis? Hoccine tandem est Deum ad clementiam pellicere? an ad iracundiam instigare? Dicitis mihi vos, qui Dei voluntatem in certum quoddam curriculum includitis, potestisne (non dicam Dei sed) hominum animos, & consilium pervertigare? Quid Dei horum omnium Auctoris, mentemne ejus tenetis? Nihil minus fratres. Nolite Dei iram provocare, qui, si nolit intra quinque dies auxiliari nobis, at potest intra quot velit, potest nos quolibet die vel tutari, vel hostium crudelitati objicere. Vos vero nolite Dei quasi vadari consilium. Neq; enim is est, ut aut minis hominum more terrenus, aut arbitrio cujusquam sit coercendus. Quare expectemus ab eo salutem, ejusq; auxilium petamus. Spero eum, pro sua facultate, nostras preces auditurum, præsertim cum nulla hodie in nostro genere neque tribus extet, neq; natio, neque populus, neque civitas, quæ deos colat fabriles: quæ res su-

perioribus temporibus in causa fuit, ut patres nostri bello & direptionibus vastati & ab hostibus magna clade concisi sint. At nos alium Deum non agnoscimus: unde sperare debemus, eum non esse nos nostrumque genus despecturum. Quod si in hostium potestatem venimus, non tantum nobis nocuerimus, sed etiam reliquæ Judææ nostraque sacraria depeculâda reliquerimus, quorum pollutionem, & consanguineorum nostrorum metum, & nationis captivitatem & nostrarum possessionum vastitatem Deus temeritati nostræ accepta feret, & à nobis poenas reposcet, ubicunq; gentium sumus servituri, ut à nostris dominis indignitates omnes & contumeliæ nobis sint perferendæ. Neq; enim talis servitus nobis Dei gratiam, sed hominum affert infamiam. Quamobrem fratres (quandoquidem à vobis aliorum animi pendet, vobis sacrarium, vobis fanum, vobis ara nititur) demonstrate consanguineis nostris, non esse desperandum, contraque quicquid acciderit, fortiter esse & constanter ferendum, Deoque in his omnibus gratias agendas, qui nos tentat, sicut olim patres nostros tentavit. Recordamini Abrahamum, Isaacum, Jacobum, Moysen, denique omnes veros Dei cultores & amicos, quot, quan-

quantos, quam varios perpeffi sint dolores. Constituite nunc altera ex parte eos, qui Dei periclitationis impatientes, contemptius de eo, & gravius, & fenserunt, & loquuti sunt, ut foedè perditì, & à serpentibus examinari sint. Quare ne horum desperationē sequamur, sed illorum superiorum fiduciam imitemur, cogitemusq; nos, non ut hostes extremo supplicio affici, sed ut servos fontes salutari verberationis. medicina corrigi. Oz. Recte tu quidem omnia, & quæ nemo neget. Neque nunc primum tua prudentia, intelligentia, consilium innotescit: quin jam ab ineunte ætate vulgo. compertum est, ista esse in te singularia. Sed & plebem fitis ad efflagitandum & nos plebs ad jurandum adigit, quod jusjurandum violari nobis nefas est. Quocirca precare tu pro nobis DEUM, quæ pia & religiosa mulier es, ut pluvia nostros lacus impleat, ne siti deficiamus. Ju. Quemadmodum igitur id quod dixi, à Deo esse sentitis: ita etiam id quod facere decrevi, an ab eodem proficiatur, periculum facite, Deumq; orate, ut meum cõsiliu[m] comprobet. Sum enim facinus editura, quod omnis posteritatis memoria concelebre. Vos hac nocte ad portam eritis: ego cum ancilla mea exhibo, ac spero fore, ut Deus intra dies,

post quos urbis deditioem concessistis, per me Israelitis subveniat. Sed nolo vos in meum propositum inquirere: neq; enim vobis (nisi re perfecta) enuntiabo: neq; quicquam aliud, nisi Deum pro me usq; ad meum reditum orate. Oz. Bene vale, Deo tibi ad hostium ultionem viam praeunte.

SENTENTIA.

Deo praeſcribendum non eſt, inſonibus etiam in ſumma deſperatione Deo bene ſperandum eſt. Magnum eſt in innocentia praſidium.

OLOFERNES, Judithæ 10. II.

ARGUMENTUM.

Judiſſa ad Olofernem perducta ei per dolum promittit de Iudaia viſitatoriam.

Excubitores, Judiſſa, Milites, Alter, Olofernes.

Cuias es mulier? unde? quo? J. Ex Hebraeis sum, quos, quia exploratum habeo venturos in vestram potestatem, ab eis transfugio, meq; ad Olofernem Imperatorem recipio, ut ei illorum arcana aperiam; viamq; demonstrem, qua omnibus motanis, sine suorum cujuscumq; caede potiatur. Ex. Bene tuae vitae prospexisti, quae ad dominum nostrum venire, & cito venire decreveris. Nos te ante eum sistemus. Quo cum perveneris, nolito animo formidare, quo minus rem omnem ei exponas. Nam hoc tibi confirmare possumus, te eo beneficio esse usuram. Deducamus eam ad Imperatoris tabernaculum. Vos reliqui interea excubias nihilominus habete.

habete. Nos centum eam ducemus. M. Heus tu, quo tam mane, tanto studio & frequentia festinatur? AL. Dicitur, transfugam quandam Hebræam ad Imperatorem duci, quæ sit mirabili pulchritudine. M. Accurramus. O venustatem incredibilem! Quis militiam detractet adversus Hebræos, qui tales habent mulieres, pro quibus pugnando occumbere quis dubitet? J. Salve Imperator maxime. OL. Allevate eam mei satellites. Bono animo es mulier, depone animi metum. Nam ego nemini unquam male feci, qui terrarum orbis domino Nabuchodonosori servire voluerit, Quod nisi tui me, montium fiducia, contempsissent, nunquam ego meam in eos hastam vibravissem. Sed ipsi sibi malum hoc conflaverunt. Verum dic mihi, quam ob causam ab eis ad nos profuga transferis. Nam ad salutem venisti, sume animam: vives & in hanc noctem, & in posterum, neque tibi quisquam officiet: contraque tecum bene agetur, quomodo solet cum servis domini mei regis Nabuchodonosoris. J. Attende igitur quæ dicam domine, & ea memoris manda. Dicam autem nihil vanum (absit) sed ea dicam, quæ si sequi voles, rem tibi perfectam tradet Deus, neque tuus te conatus frustrabitur. Ita vivat omnium terrarum

rarum rex Nabuchodonosor, & ejusdem tibi cōcredita potestas, à quo ad omnes mortales corrigendos missus es, ut per te non solum homines illi serviant; verum etiam feræ, pecora, volucres sub ejus imperium tua virtute subjiciantur. Nam non solum de tua sapientia, tuiq; ingenii acumine fama apud nos percrebuit, sed etiam per omnes jam oras sermones dissipati sunt, te unum esse toto in regno optimum, potentissimum, & in rei militaris prudētia admirabilissimum. Jam vero, quæ Achior in tuo consilio dixit, & quæ tu ei respondisti, audita nobis sunt. Nam comprehensus à Bethuliensibus, rem omnem eis exposuit. Cujus tu cave ne orationem negligas, sed memorię tradas: est enim vera: neq; enim superari, neq; armis debellari natio nostra potest, nisi Deum suum scelere aliquo sibi infestum reddiderit. Quare, ne tuus labor irritus & inanis fiat, expectandum est, dum scelus quoddam, quod jam in animis conceptum habent, commiserint: quo scelere cum Deum irritaverint, facile & sibi perniciem, & tibi victoriam conciliabunt. Cum enim commeatu & aqua deficiantur, statuerunt pecora invadere: & quæ gustare Deus in lege vetuit, omnia decreverunt insumere, frumentiq; primitias, & vini oleique

que decimas (quæ servabant dicata sacerdotibus, qui Hierosolymis apud Deum nostrum ministrant) consumere habent in animo, quæ nec manibus tangere, cuiquam profano fas est. Idque ut sibi facere liceat, miserunt Hierosolymam (nam & Hierosolymitani eadem fecerunt) qui sibi potestatem à senatu afferant: quâ potestate ad eos relata facturi sunt quod dixi, & tum demum in tuam potestatem venturi. Horum ego omnium non ignara ab eis aufugi, ejusmodi erga te facinus ex Dei mandato editura, ut ad ejus auditum omnes sint mortales admiraturi. Sum enim religiosa, cœlique præpotentem Deum noctes diesque colo. Interea apud te commemorans, domine, noctu ititabo in vallem, Deumque precabor: qui ubi me certiores de eorum peccato scelere fecerit, veniam id tibi indicatum. Tum tu cum omnibus copiis, nullo ex eis repugnante, proficisceris. Te ego per mediam Judæam ad ipsam perducam Hierosolymam, tuumque currum in media urbe sistam, ut eos tanquam pastore destitutas oves abigas, nullo tibi nec cane oblatrante. Hæc ego, mihi præsignificata, & prænunciata, ut tibi enunciarem, missa sum. OL. Bene fecit Deus, quod te populo præmiserit, quæ res & nobis victoriam, & domini mei contemtoribus perniciem

afferet. Quod si tu, quam es & forma eleganti & oratione eloquenti, jam præstabis, quæ locuta es, & Deus tuus mihi Deus erit, & tu Nabuchodonosoris domestica per totum orbem celebraberis. Agite mei servi, ducite hanc in meam cellam, eique de meo peno alimenta præbete. J. Dabis veniam, non licet mihi gustare tua, nisi velim mihi malum conflare. Sed vescar eis, quæ mecum attuli. OL. Quid, ubi quæ tecum habes defecerint, unde tibi talia subministrabimus cum veskrata cibaria non habeamus? J. Sic tu bene vivas, domine, ut ego non ante consumsero, quæ habeo, quam Deus per me effecerit quæ decrevit facere.

SENTENTIA.

Qui verum audire non vult, dignus est qui mendacii decipiatur. Qui veritati non credit, si mendacio facile capitur. Mulieris pulchritudo & oratio fallax. Bonum consilium qui repudiatis in malum consilium cadit.

VIRAGO, Judithæ 13.

ARGUMENTUM.

Juditha noctu caput Olofernis ferens Betuliam portis apertis intrat, & caput illud ostendens eis, quid facto sit opus, præscribit. Deinde quoniam pacto Olofernem interfecit, Achiori narrat.

Juditha, Excubitores, Cives, Ozias, Achior.

HEUS, heus vigiles aperite, aperite portam. Deus, Deus noster nobis adest, qui hodie insignem & præclarum victoriæ honorem tradidit Israelitis. E. Judithæ vox auditur socii: descendamus properè ad portam.

tam. Convocentur huc senatores, vos incendite faces. J. Vide Abra, ut istud caput habeas in promptu, ut id poscente, me continuo de pera una cum velo depromas. Jam hic aderit omnis civitas. C. Præluce funalibus vos: aperite portam janitores: intromittite eam, ut videamus, quid novi ferat. J. Laudate Deum, laudate Deum, qui ab Israelis stirpe misericordiam suam non averterit, sed hostes nostros hac nocte per meas manus fregerit. En vobis caput hostis vestri Olofernus, summi Assyriorum imperatoris. En velamen, in quo ille jacebat ebrius, quem Deus mea facie deceptum, muliebri manu occidit: meque euntem, manentem, redeuntem, inviolatam, intemeratamque conservavit, neque ab ullo violari permisit. Et nunc & illum vicisse & me evasisse, & vos liberatos esse lætor, vosque ut Dei bonitatem infinitamque misericordiam prædicetis exhortor. C. Agimus Deo nostro gratias, qui tibi tantam virtutem tribuerit, ut hodie per te nostros hostes in nihilum redegerit. Oz. O omnium mortalium foeminarum DEO acceptissima fœmina! ô coeli terrarumque creatoris Dei nunquam satis prædicandæ laudes: qui tuum vulnus in caput principis hostium nostrorum direxerit: quo facto,

tan-

tantam tibi hodierno die nominis gloriam comparavit, ut tuæ virtutis laus tandiu in hominum mentibus hæsuræ, & linguis celebranda sit, quamdiu hujus immortalis Dei facinoris memoria durabit, quæ quidem in tantis nationis nostræ angustiis non dubitaveris vitam tuam ruinæ opponere, & jam despondentibus animos subvenire. I. Attendite nunc fratres. Hoc caput in pinnis murorum nostrorum suspendetis. Deinde orto Sole universi armati eruptionem facietis, ita ut ad eorum oppugnanda præsidia descendere videamini. Tunc accidet id (quod erit necesse) ut ad Olofernis tabernaculum concurratur, quo invento mortuo, tantus illos timor occupabit, ut præsidium sibi in fuga ponant. Tum vos sequamini licebit, eosque passim Deo concedente obteratis. Sed ante accersatur mihi Achior Ammonita, ut Israelitarum contemptorem (à quo ad nos tãquam ad certam necem, amandatus est) videat. Ades tum Achior, Deus Israelitarum (cui tu testimonium dedisti, ultorem esse hostium suorum) caput omnium infidelium hac nocte mea manu truncavit. Quod ut ita esse credas, ecce tibi caput Olofernis, qui sua arrogantia Deum Israelitarum dispicabatur, tibi que mortem in communi Israelitarum cæde assignabat.

gnabat. Ac. O te non solum in omnibus Judææ domiciliis, sed etiam in omnibus gentibus felicem, cujus audito nomine, homines ad Deum laudandum excitabuntur. Sed jam narra mihi, si placet, quomodo te hac tota in re gesseris. J. Principio cum hinc (ut scis) profecta incidissem in vigiles, ab eis deducta sum ad Olofernem, apud quem magna omnium expectatione jussa dicere, cur advenissem, simulavi me esse perfugam, quæ desperatione rerum nostrarum ad eum trásissem, demonstraviq; ea, quæ ex te audivisset, esse vera. Neq; enim genus hoc hominum posse superari, nisi aliquo facinore admissó. Sed jam fame pressos Israelitas cogitare vefci eis, quibus vefci lex prohiberet: quo scelere si se obstrinxissent, facile eos victum iri. Quare expectaret, dum id scelus esset perpetratum: mihiq; interea in ejus castris versanti faceret, quandoq; vellem, exeundi potestatem, ut Deum precarer, & illo scelere commisso à Deo certior fierem, eumq; de eo admone-rem: tum demũ eum esse superaturum. Credidit ille, mihiq; omnia, quæ petieram, concessit. Ita triduo in castris versata sum: noctu interim in vallem Deum salutandi gratia, ventitans, Deiq; præsens auxilium suppliciter implorans. Quarto deniq; die ab illo ad

comparationem accersita, adfui: ostendique
 me, quicquid imperasset, esse facturam. Po-
 tatur: ipse mei cupiditate ardens largius sese
 invitat. Clausa coena, cum cæteri vino pleni
 discessissent, Bogoa eunuchus tabernaculum
 externe clausit, me ibi sola relicta cum Olo-
 ferne: qui ebrietate & somno oppressus in-
 lecto recubuerat. Hic ego, cum pedisequæ
 meæ mandavisset, ut extra cubiculum ma-
 nens, exitum mihi tutum curaret, Deum (ad
 illius lectum stans) cum animo meo oravi,
 ut mihi tum meisque adesset. Deinde ad le-
 cti columellam, quæ erat propter caput O-
 lofernis, accedo: inde acinacem detraho
 ad lectum me applicans, sinistra cæsariem
 ejus prehendo, Deumque tacite precata, ut
 me in ea re confirmaret, collum summa vi
 bis ferio: amputatoq; capite corpus à stragu-
 la veste provolvo, & ablato velo exeo, ac
 pedisequæ caput trado: quo in escariam pe-
 ram indito ambæ de more, sic quasi ad sup-
 plicationem egressa, huc tuto pervenimus.
 C. Salvi sumus, reviximus, ô faustam noctem,
 quæ nos ab æternâ nocte vindicas! Ac. Quan-
 quam quod dixi Oloferni de Dei vestri po-
 testate, non aliter dixi, quam sentiebam: ta-
 men nunc multo magis hac re confirmatus
 credo, voloq; deinceps non tatum Israelita-
 rum

rum laudator, sed civis esse, & in vestrum
numerum pignore circumcisionis ascisci.

SENTENTIA.

*Superbissimus quisque turpissima morte dignus est. Vel famina mar-
tum potest Deus hostes suos ulcisci. Cedo duco facile vincamur malices.*

SUSANNA, Dan 13.

ARGUMENTUM.

*Susanna à duobus senatoribus (quæ ipsorum libidini obsequi recu-
sasset) accusata adulteris, ad supplicium damnata ducitur. Sed divinitus
supervenit Daniel, qui interrogations prudentis Senatorum calumniis
am palam facit: atque ita in ipsorum caput supplicium convertit.*

Duo Seniores, Cencio, Susanna, Daniel puer.

Audite universa Judæorum concio,
quamobrem in vestrum iudicium ad-
ducta sit Joacimi hæc uxor Susanna. Heri
cum nos duo iudices in hortis ejus mariti
foli deambularem, hæc cum duabus pe-
dissequis ingressa est, quas ubi foras aman-
davit, hortorumq; januam obseravit, venit
ad eam quidam juvenis, qui tum in occulto
latebat, & cum ea concubuit. Nos qui in hor-
torum angulo eramus animadverso tanto
flagitio accurrimus, & eos vidimus qui-
dem coeuntes sed illum comprehendere
nequivimus. Nam cum esset valentior quam
nos, aperta janua exiit. Tantum hanc pre-
hensam rogabamus, qui esset ille juvenis,
sed noluit nobis enunciare. Hæc nos, im-
positis huic reæ (sicut mos est) manibus testa-
mur. C. Satis explorata res est, Senatores sunt
qui testificantur: & iidem iudices, dubitari

non

non potest. Plectatur capite, quemadmodum
lex jubet. Su. O Deus immortalis, qui occul-
ta nosti: qui omnia etiam antequam facta sint
perspicias: tu scis, ut hi falsum contra me te-
stimonium dixerint, ac vides, ut capite dem-
pœnas, cum nihil eorum commiserim, quæ
isti contra me per calumniam malitiamque
commenti sunt. Duo SEN. Non est miran-
dum, si turpissimum facinus inficiatur. Sed
interim ducatur ad supplicium, ut hoc dete-
stabile facinus expietur, ne tam foeda in po-
pulo macula hæreat. DAN. At ego testor me
in hujus sanguinem nullo modo consentire.
CON. Quidnam istud est, quod clamas tu?
DAN. Itane stulti estis Israelitæ, ut neq; quæ-
stione habita neq; veritate comperta, Israe-
litidem condemnaveritis? Revertimini in
forum. Dico istos contra eam falsâ esse testa-
tos. SEN. Ergo tu sede in medio nostrum, &
tuam nobis pronuncia sententiâ, postquam
tibi senatus divinitus datur. DAN. Sejungite
procul alterum ab altero, ut eos examinem.
Adducite huc mihi istum. Vetule annis, ve-
terator malitia, nunc tua te scelera petunt,
quæ factitabas antea, cum in fontibus con-
demnandis, fontibus absolvendis iniqua ju-
dicia faceres. Jova innocentem & injustum
interfici vetante. Nunc igitur, hanc siquidem
vidisti,

vidisti, dic, sub qua arbore congressos videris. SE. Sub lentisco. DA. Probe in tuum caput mentitus es. Jam enim Genius, mandato ab illo accepto, discindet te medium. Amovete hunc, adducite huc alterum. Age genus Chananæum, non Judæum, te venustas decepit, tua tibi cupiditas mentem pervertit. Ita vero agebatis cum Israelitibus, quæ præ metu in vestrum congressum veniebant. Sed non Judæ proles in vestram nequitiam sustinuit. Age igitur, sub qua illos arbore congressosprehendisti? SE. Sub ilice. DA. Tu quoque probe in tuum caput mentitus es, jamq; præstò est Dei Genius cum ense, qui te medium difsecet, ambosq; perdat. C. O Dei bonitatem immensam, à quo nunquam deseruntur, qui in eo fiduciam suam collocarunt. Abripiamus ad necem hos nequissimos & improbissimos vetulos, ut ex lege eadem poena plectantur quam innocenti moliebantur.

SENTENTIA.

Impii peccata peccatis tegere volunt. Deus innocentium preces exaudit. Impii in foveam cadunt, quam pii excavaverunt.

CHALDÆI, Dan. 2.
ARGUMENTUM.

Nabuchodonosor Babyloniæ rex Chaldaeos jubet ut somnium quoddam suum (quod ipsi exciderat) dicant, & interpretentur, quod cum illi non possent, imperat eos necari.

Nabuchodonosor, Chaldaei.

N

Agite

A Gite vero conjectores, augures, arioli, Chaldæi, homines explicandi ea, quæ sunt obscuritate involuta, peritissimi, evellite hunc mihi ex animo scrupulum, meumq; mihi somnium aperite, cujus interpretationem anxius desidero, eam ob rem estis convocati. **CH.** Vitam tibi, rex, sempiternam precamur. Eloquere sane nobis somnium, & nos id interpretando evolvemus. **N.** Oblitus sum, quod nisi vos & somnium mihi, & somnii significationem edisseritis, & vos per summum dedecus vitam amittetis, & vestre domus complanabuntur. Sin autem edetis, multis à me muneribus & præmiis atq; honore afficiemini. Proinde facite si sapitis. **CH.** At somnium dicere tuum est, nos interpretationem recipimus. **N.** Enim vero video vos ex eo excusationis occasionem arripere, quod videtis eam rem mihi memoriâ excidisse. Sed nihil agitis: Nisi enim me hac suspicione levatis, nō potest esse dubium, quin uno omnes animo statueritis, me longis quibusdam ambagibus pessime deludere, & tempus consumere dicendo: quamobrem eloquimini mihi somnium, ut intelligam vos interpretari etiam posse. **C.** Nemo est in terra qui istud præstare possit, neq; quisquam unquam rex, aut princeps, aut dominator tale

tale quid quæsit ex ullo divino. Est enim, quod tu rogas, omnino difficilius, quam quod possit quisquam expedire, præter unos deos, qui inter mortales non versantur. N. Papæ! ergo vos prorsus inutiles estis, & hominum animis inani præclaræ rei professione tenebras offunditis? quis vestri erit usus? Comprehendite satellites, colligate, abducite ad extremum supplicium istos omnes nebulones. Jubeo ego atq; impero, totum hoc tam indoctum & insipiens doctorum & sapientum genus ad necem trahi, ut quorum nullus in vita usus est, eorum mors sit viventibus salutaris.

SENTENTIA.

Deus sapientum sapientiam perdit. Deus sapientes hujus mundi implicat in explicabiliter.

DANIEL, Dan. 2.
ARGUMENTUM.

Daniel Nabuchodonosori somnium ipsius dicit & interpretatur: quod quidem est de quatuor mundi imperiis, videlicet Chaldaeorum, Persarum, Macedonum, & Romanorum, quibus succedit regnum Christi, quod omnia illa abolet.

Daniel, Ariochus, Nabuchodonosor.

Noli interimere istos sapientes, Arioches, quos jussit rex occidi. Sed deduc me ad eum, ego suscipio interpretationem. A. Placet, sequere me. D. Sequor. A. Nactus sum hominem ex captivis Judæis, ô rex, qui pollicetur interpretationem. N. Tune is es, Balthasar, qui possis mihi & quid in somnis viderim,

derim, & quid id significet, effari? D. Quod tu quæris arcanum, ô rex, non sapientes tibi, non conjectores, non arioli, non præstigiatores possunt explicare: verum est in cœlo abditorum demonstrator Deus, qui ea tibi præmonstrat, quæ olim eventura sunt. Igitur tuum somnium, & visum, quod tibi secundum quietem occurrit, hujusmodi est. Cum in lecto cubiculari jaceres, in cogitationem venisti, quid posthac futurum esset: id quod tibi ignotorum ille doctor declarat, idemque mihi, non propter excellentem sapientiam, qua unus cæteris mortalibus præstem, verum mihi idem aperuit, quo tibi plana faciam ea, quæ tu cum tuo animo cogitasti. Tibi in somniis objecta est species quædam inusitata magnitudine simulacri ante tuos oculos stantis, aspectu terribili, cujus caput erat ex auro probatissimo, pectus & brachia argentea, venter & fœmora, ærea: pedes partim ferrei, partim cretacei. In eo spectando dum tu hæres, saxum sua sponte, avulsim incidit in eos pedes, eosq; contrivit, quo casu confractum simul est ferrum, creta, æs, argentum atq; aurum, omniaque fragmenta ventus tanquam æstate stipulas ex area sic sustulit, ne vestigio quidem relicto: ipsum autem saxum, quo ista est statua,

muta-

mutatum est in ingētem montem, qui totum terrarum orbem complevit. Et hoc quidem est somnium. Jam interpretationem audiemus. Tu rex es regum: tibi cœlestis ille Deus nobilissimum regnum & præclarissimam largitus est potestatem: omnesq; homines, quotquot ubiq; terrarū sunt, terrestresq; bestias & aerias volucres sub tuum imperium ditionemq; subjunxit. Ita tu caput aureum: Post te autem existet aliud regnum tuo deterius, id erit argenteum. Deinde æreum, cujus ditio late in omnem terram patebit. Post quartum surget durum & plane ferreum. Ut enim ferri duritate omnia atteruntur & comminuuntur, ita ejus imperii violentia & rigor omnia violabit & contundet. Pedes autem, pedumque digitos quod vidisti, partim ferreos, partim victiles, regnum istud dissidens erit, & ex parte ferreum rigorem obtinebit, sicut vidisti ferrum cum argilla conjunctum: illa vero digitorum partim ferro, partim argilla constantium diversitas regni inæqualitatem loquitur, quod partim valens, partim debile futurum est. Quodq; ferrum vidisti argillæ conjunctum: illi quidem propinquitate inter se conjungentur, sed invicem cohærebunt, quomodo ferrum in terram ferum ruminari non potest. Ejus regni tempore

fuscitabit Deus regnum, nulla unquam temporum serie delendum, neq; alii genti tradendum, quod quidem franget & abolebit omnia illa regna, ipsumque permanebit in sempiternum. Quemadmodum vidisti è rupe saxum, nulla manu erutum, quod ferrum, terram, æs, argentum, aurumque perfregit: Ita Deus ille maximus tibi præsignificat ea quæ post hoc tempus futura sunt, estque somnii certissimum, & cum re ad verbum conveniens. N. O immensam ineffabilemq; sapientiam! ô profundum & ingeniosum intellectum! afferte huc citò odores & libamina. Dignus est, cui suffimina fiant, cuique divini honores præstentur. O Balthasar! vester Deus vere Deus est deorum, regnorumque dominator, & obscurorum explicator, postquam tu rem tam profunda ignorationis caligine demersam potuisti in lucem eruere.

SENTENTIA.

Deus arcana sua piis, & per piros etiam aliis patefacit. Omnia deterrius abeunt ipsi ad adventum Christi. Christi imperium æternum est.

FORNAX, Dan. 3.

ARGUMENTUM.

Nabuchodonosor Babiloniæ rex erectam à se statuam auream imperat à cunctis suis populis congregatis adorari. Hoc cum Sadracus, Mesfacus, & Abednego Iudæi facere recusassent, in fornacem conjiciuntur. Sed cum ab igne indemnes fuissent, Nabuchodonosor ipsorum Deum factum esse confessus, imperat adorari.

Sadracus, Mesfacus, Abednego, Præco, Delatores, Nabuchodonosor, Proceres.

Quor.

Quorsum pertinet tanta hominum multitudino, à tam diversis nationibus in hunc locum cōvocata? M. Nescio: nisi quod, dum video immanem illam statuam jussu regis erectam, metuere incipio, ne quid rex impium cogitet. AB. Ego quoq; valde commoveor, ac, ne velit eam adorari, vereor. S. Quid agemus igitur, si jusserit? A. Nos vero non adorabimus, nam hoc quidem esset Deo cultum renunciare. S. Qua tandem istud ratione? A. Rogas? Hominem, vivam Dei immortalis effigiem, ad pedes inanis & stupidi rei mortalis simulachri procumbere? Quid indignius, aut magis impium fieri aut cogitari potest? M. At licebit, periculi deprecandi gratia cultum simulare, cum tamen animus in Deo semper fixus hæreat. A. Apage sis. Satisne se viro probaret mulier, si, cum alteri corpus suum prostitueret, sed tamen virum suum semper in animo ferre diceret. Hæccine tibi justa excusatio videretur? M. Nequaquam. A. Atqui non minus est hoc absurdum. Tune, qui unus es, te ipsum divides, & alteram tui partem Deo alteram Vejovi addices? Quæ tanta animi mollicies aut quæ perversitas nos, quos honestum esset propter mortales dominos quamlibet mortem oppetere, quiq; id in aliis laudamus, metu

frangi, & ab officio & pietate erga Deum immortalem deduci? S. Quid ergo censes? A. Subeundum quemvis cruciatum potius, & fortiter occubendum, quam tantillum modo de via deflectendum. S. O masculum pectus: laudo te. Equidem ita sentiebam, sed volui, quid animi haberes, tentare. Verum edicitur silentium, & video in loco edito præconem: audiamus quid proclamet. PR. Pax sit vobis. Edico vobis, qui ex quacunque natione, populo, lingua præsentés adestis, ut simul atq; sonum audietis tubæ, tibix, citharæ, sambucæ, Psalterii, symphonix, & reliquorum concentuum, procumbatis, & signum aureum adoretis, quod rex Nabuchodonosor erigendum curavit. Quid si quis non paruerit, continuo in ignem cadentis fornacis injicietur. S. Deum immortalem, quod scelus video? Eone impietatis & insanix prolabi homines, ut id tanquam Deum colant, quod hominum manu factum homine deterius est, & inferius? M. O vesaniam! illud vide sis, ut prociderunt omnes. Ego certe centies mori malim. DELA. Videtis ne illos tres Judæos, qui non procubuerunt? AL. Video: enunciandum id est regi. DE. Recte sane, eamus ad eum. AB. Adeone concedisse constantiam, ut in tanto numero nullus sit, quem

non labefactaverit metus? DE. Optamus tibi rex vitam quam longissimam. Tu edicto cavisti, ut omnes audito cantu musico procumberent, & aureum simulacrum adorarēt: rebellibusq; pœnam descripsisti, ut igni cremarentur. Nunc homines quidam Judæi, quos tu procurationi Babylonicæ præfecisti, Sadracus, Mefacus & Abednego, tuum edictum contemnunt, neq; eosdē tecum deos colore, neq; statuam adorare curant. N. Itane est? Ergo inventientur, qui meum imperium ditrectent? ergo ego non maximus? Properate, adducite eos propere. DE. Fiet. N. Jam ego eos docebo, quid sit mihi non obedire: jam efficiam, ut scient me esse regem. DEL. Adducimus tibi homines, ô rex. N. Itane est Sadrace, Meface, & Abednego, ut vos neque meos deos veneremini, neq; auream statuam à me erectam adoretis? Quid? nunc saltem non estis parati, auditis concentibus musicis, accidere ad eam? Nam nisi facitis, protinus in fornacem immittemini. Ecquis verò est Deus, qui vos à meis manibus liberet? S. Nihil sumus solliciti, quomodo tibi ad ista respondeamus. Est Deus, quem nos colimus, qui & potest nos ex flamma servare: & ex tuis manibus, rex, profecto servabit. Quod etsi non ita esset, tamen omnino (ne tū erres)

neq; deos tuos coleremus, neq; ante statuam
 inclinarem. N. Proh Deum atq; hominum
 fidem, tanta esse quenquam audacia, ut aufit
 mihi in eos repugnare? Ite, comportate li-
 gna, subjicite igni alimenta, efficite eum se-
 ptuplum hujus, qui nunc est. Vos vero ô for-
 tissimi viri totius exercitus, comprehendite
 hos tres viros, colligate. Eja. Quid statis?
 nihil opus est detrahere vestes, vincite unâ
 cum omni amictu. Hem. sic volo: præcipita-
 te eos inflamman. Videamus quid possit eo-
 rum Deus. Properate ignavi, ego vobis hoc
 scepro comminuam capita. Papæ! videte
 ut flamma eos hauserit, qui ipsi in flammam
 alios conjecerunt. Sed quid? ô rem miraculi
 plenam! quid ego video? Eho, mei proceres,
 nonne tres viros in ignem constrictos inje-
 cimus? P. Factum rex. N. Atqui ego video
 quatuor viros solutos in media fornace in-
 gredientes illæfos & indemnes: quorum
 quartus forma est augusta, & plane divina.
 O rem inauditam! Accedam propius ad o-
 stium fornacis. Heus Sadrace, Mesace, & A-
 bednego, summi Dei cultores, exite huc. S.
 Assumus ô rex è torrida flamma divinâ be-
 nignitate erepti. PR. Dii boni, quid hoc rei
 est? quanta miracula hodie cernimus? Vide-
 te saltem, ut ignis in horum corpora nullam
 vim

vim habuerit: ut ne pilus quidem crematus sit: ut amictus integri nulla flamma nota inusti sint. N. Gratias ago Deo Sadraci, Mefaci, & Abednegonis, qui genium suum miserit ad liberandum sui cultores, qui ipsius fiducia nixi, spreto regis edicto maluerunt sua corpora ad cruciatū tradere, quàm ulli Deo præterquam suo, ullum cultum aut honorem habere. Itaq; decerni placet, decretumq; in omnibus omnium linguarum nationibus & gentibus, promulgari, ut qui male de hoc Deo dixerit, turpissimo exitio plectatur, ejusque domus publicetur & evertatur, ut illius facinus memoria & nomine loci notetur. Nam præter hunc unum, præsens ac salutis præpotens Deus nullus est.

SENTENTIA.

Maxima pars mundi homines magis metuit quam Deum. Mori fatuus est, quam simulachra colere. In justissimum quemque gravissima secernunt principes hujus mundi. Deus suos novit vel ex mediis flammis eripere. Pii patiendo vincunt.

BALSAZAR, DAN. 5.

ARGUMENTUM.

*Accersitus ex matris consilio à Balsasare Babylonicæ regis Daniel va-
tes, et legit & explanat scriptum murus in pariete, quod Chaldaei non
potuerant.*

Balsasar, Regina, Daniel.

Nullumne esse è vobis, qui hoc legere & explanare possit? O homines ad nullam rem idoneos! Quid attinet vos in tanto honore esse, si cum maximè opus est, tū minime pote-

potestis? R. Regem multum diuq; salvere iubeo. Audivi ut tu te crucies & æstues, quod nemo possit tibi hoc scriptum enucleare. Sed te ne afflicta, neve tantopere pertimesce. Vir est quidam in regno tuo mente sanctissimorum Deorum præditus, cujus excellens perfectaq; doctrina, peritia, sapientia, tempore patris tui cognita perspectaq; fuit: quo nomine rex eum magorum, ariolorum, divinorum, Chaldæorumq; magistrum esse voluit, quod eum Danielelem (nam id est ei nomen, quanquam Rex Balsafarem nuncupavit) cōpertum esset singulari ingenio & prudentia valere, inq; somniis interpretandis, ambiguisq; aperiendis, & obscuris declarandis longe alios omnes antecellere. Proinde si me audies, eum evocabis, ut te ista difficultate liberet. B. Evocetur sane. R. Mox aderit, ne trepida. D. Assum tuo accersitu, ô rex. Tunc es ille Daniel, ex captivis Judæis, quos meus pater huc è Judæa traduxit? D. Etiam. B. Audio te afflatu augustissimorum Deorum agi, scientiaq; & prudentia atq; sapientia facile principem esse. Eam ob rem te advocavi. Sed quam ob rem, audi. Cum hîc læto solutoq; animo opipare convivarer, una cum mei regni optimatibus, ecce extitit quædam quasi manus, quæ digitis inscripsit in testorio parieti.

rietis è regione condelabri ea quæ tu vides,
ad quæ explicanda evocavi omnes Babylo-
nios sapientes: sed eorum nemo, non modo
interpretari, sed ne legere quidem potest. Te
autem accepi implicata evolvere, & obscura
optime doclarare posse. Nunc itaq; si potes
hoc legere, & mihi quid eloqui, purpura &
aureo torqui insignitus tertium regni prin-
cipatum obtinebis. DA. Tua tibi dona ha-
beto, aut ea alii largitor. Ego tamen hoc scri-
ptum & legam, & tibi planum faciam. Itaq;
ades animo, è rex. Nabuchodonosori patri
tuo olim largitus est Deus magnificum re-
gnum, splendoremq; egregium: qua de cau-
sa omnes eum gètes & nationes trepide me-
tuebant, quippe qui, quotiescunque visum
erat, interimeret, cæderet, efferret, deprime-
ret. Sed cum jam secundis rebus elatus in-
temperanter superbiret, & animos tolleret,
de folio deturbatus est, & omni splendore
amisso, ex hominum consortio ejectus, cum
in brutam naturam sensumq; translatus in-
ter feras habitavit: herbarumq; pastu, boum
ritu delectatus, ventos, imbresq; & omnes
naturales coeli mutationes nudato corpore
pertulit: donec tandem recognovit sum-
mum illum Deum, terrestris hujus imperii
principem esse, & ei quem vellet præficere.

Tu

Tu quoq; Balsasar, qui es ejus sattu editus, nihilo te modestiorem præbuiſti, cum tamē ea omnia præclare ſcires: ſed te contra cœlorū Dominum insolentius geſſiſti: & nunc vaſa terreſtris ejus domiciliū proferri juſſiſti, quibus tu, tuiq; proceres, & uxores, tum juſtæ, tum concubinæ, in bibendo vino abuſi eſtis. Quin etiam deos celebraviſti aureos, argenteos, æreos, ferreos, ligneos & lapideos, qui neq; cernunt, neq; audiunt, neq; ſentiunt: Deo autem, in cujus manu tua vita & facta omnia ſunt, nullum honorem habuiſti. Quare ab eo miſſa eſt hæc manus, cujus ſcriptum hoc eſt, Meſus eſt, meſus eſt, ponderavit & diviſit. Senſus autem: Meſus eſt, meſus eſt Deus tuum regnum, & id consummavit: ponderavit, ponderatus es in trutina, & inventus levior: diviſit, diviſum eſt tuum regnum, & Medis Perſuq; diſtributum.

SENTENTIA.

Cum maxime opus eſt, tum minime juvant hujus mundi ſapientes. Cum trepidat & nihil poteſt humana ſapientia tum maxime ſeſe exercit divina. Qui alieno exemplo non ſapit, ſuo periculo maloq; dignus eſt. Hominum imperia in Deſunt arbitrio.

HAMAN, Eſther. 7.

ARGUMENTUM.

Eſther a regina regi Aſſuero patefacit perfidiam Hamanis in Iudeos, eamq; ob cauſam rex illum jubet in crucem tolli, ab eo ipſo erectam, ad tollendum in eam Mardocheum Iudeum.

Aſſuerus, Eſther, Haman, Harbona.

L Aute ſane & prolixè à te accepti ſumus,
regi-

regina, uxor charissima. Quamobrem roges jam, quid libet licet, id rogatum feres. Dic quid petas: vel sit dimidium regni mei, tamen impetrabis. E. Siquidem habeo te propitium, o rex, & si ita tibi videtur, vitam mihi meisq; popularibus concedes. Hoc unum peto. Nam sumus proditi, & indignissimo crudelissimoq; exitio destinati. Quod si servituti addiceremur, equidem tacita ferrem: quanquam indignus esset hostis, qui tantum regi damnum compararet. As. O superi, quis hominum est tam audax, ut id ausus sit etiam cogitare? aut ubi is est? E. Ecce hic adest hostis infestissimus, homo hominum quantum est pessimus, Haman. As. Proh Deum atq; hominum fidem! o coelum! o terra! ardeo, tanta inventum esse quemquam audacia. H. Exiit ita inflammatus. Quantum ego illum video, res mihi ad restim rediit. Sed tamen tentabo animum reginae, si forte miserescat mei, quod si haec non succedat, actum est, ilicet perii. Regina, jam non deprecor culpam, merui, fateor: nec potest ullum supplicium majus esse meo crimine. Sed te supplex, genua amplectens per istam clementiam rogo. As. Quem neq; pudor neque mea majestas deterruit. Sed quid video? Atat, etiam ad lectum reginae? O magne Jupiter, etiam

etiam ut reginam domi apud me vi comprimat? Corripite, velate vultum: indignus est qui lucem tueatur. HARB. At etiam si scias, quid machinatus sit in Mardocheum, hominem de te, rex, optime meritum, utpote per quem facta in te conjuratio patefacta sit: Crucem ante domum suam in altitudinem cubitorum quinquaginta erigendam curavit, in qua eum tolleret. AS. Per commode cadit, auctorem in eam tollite, ut eadem, qua alios captat, via capiatur.

SENTENTIA.

Muliebrium illecebrarum magna vis est in utramque partem: hoc est, vel ad nocendum, vel ad iuvandum. Malum consilium consultori pessimum. Impis suo ipsorum laqueo jugulantur.

ARTAXERXES, Nehem. 2.

ARGUMENTUM.

Nehemias à rege Artaxerxe veniam & opes impetrat, eundi instauratum urbem Hierosolyman.

Artaxerxes, Nehemias.

Qui fit, ut vultu sis adeo tristi, cum non ægrotes? Mirum ni animi tristitia est. N. Rex in perpetuum vive. Possūne non tristi vultu esse, cum urbs in qua sepulchra sunt majorum meorum, everisa sit, & ejus portæ igne deflagaverint? A. Quidnam ergo petis? N. Si tibi videtur, & si quid apud te valeo, ut me dimittas in Judæam, ad instaurandam urbem patriam. A. Ego vero dimitto. Tu dicito: quid tibi ad istud fieri velis?

N. Cu.

N. Curabis, si placet, ut mihi dentur literæ ad prætores Syriæ, qui me curent deducendum, dum perveniam in Judæam. Deinde literæ ad Asaphum regis silvæ custodem, qui mihi ligna suggerat ad reficiendas portas arcis, quæ est ædi conjuncta: urbisq; moenia, & domum, in quam sum diversurus. A. Dabuntur quæ petis. N. Ago tibi gratias immortales, rex, tibiq; fortunatissimum, longissimumq; regnum precor.

SENTENTIA.

Regis animum Deus habet in manu, eumq; quocumq; vult inclinat. Cui propitius est Deus, huic conciliat benevolentiam potentum.

NEHEMIAS, Nehem. 5.

ARGUMENTUM.

Expostulant pauperes Iudæi de dicitum erga se iniquitate avaritiæ. Et Nehemias divites cogit in ordinem.

Plebeji, Nehemias, Divites, Sacerdotes, Populus.

Magnus est tum nostrum tum nostrorum liberorum numerus, comparandum est inde frumentum, quo vivamus. AL. Oppignorandi sunt fundi nostri, & vineæ, & domus, ut nos frumento contra famem muniamus. AL. Jam pro nostris agris & vineis ad tributum regi pendendum, pecuniam sumsimus mutuam. An æquum est, ut cum ejusdem nobiscum consanguinitatis sint alii, eademq; sit liberorum eorum atque nostrorum conditio, nos tamen liberos nostros in servitutem dedamus, sintq; jam filiarum no-

○

strarum

strarum nonnullæ emancipatæ, neq; eas vindicare possimus, cum fundos & vineas nostras teneant alii? N. O indignum facinus! Ita ne vero divites fœnus à vestris exigitis? Ergo nos confanguineos nostros Judæos, in exteras gentes venditos pro nostris viribus redemerimus: & vos eosdem emeritis, ut Dominos non amiserint, sed mutaverint? Non rectè facitis. Nonne in metu Dei nostri vivetis, ut barbarum, hostium nostrorum, vituperationem evitetis? ego quoq; & mei cognati atq; famuli argentum eis, frumentumq; mutuo dedimus. Agite remittamus hoc nomen. Reddite eis hodie agros suos, & vineas, & oliveta, & domos, tum centesimum condonate argenti & frumenti, & vini & olei, quæ eis mutuo dedistis. D. Reddemus neque ab eis quiequam exigemus. Sic faciemus, ut tu hortaris. N. Vos vero sacerdotes, jurate vos ita facturos. S. Faciemus. N. Ergo quemadmodum ego meum gremium excutio, sic quicumque hæc non præstiterit, eum excutiat Deus ex domo & labore suo: sicq; esto excussus, vacuusque. Po. Amen.

SENTENTIA.

Avaro homine nihil est iniquius. Avarus animam venalem habet. Multum pollet etiam apud iniquos justus & gravis homo.

VERITAS, 3, Efd. 3.

ARGUMENTUM,

Darius Persarum rex proponit optimatibus suis trium stipatorum suorum sententias adjudicandum, quænam esset optima. Sunt autem eæ, de viribus vini, regis, mulierum, & veritatis. Hic cum stipatores iussu regis suæ quisque sententiæ rationem reddidisset, palmam obtinuit Zorobabel, qui veritati primas tribuisset: Et à rege præter statutum dispensationis præmium impetrat, ut Hierosolymitanum sanum instaret.

Darius, Anagnostes, Stipator, Alter Stipator, Zorobabel, Optimates.

HÆc causa est, mei proceres, cur vos iusserim convocari. Cum mei corporis custodes, dormiente me, inter se (ut sit) confabularentur, eo delapsi sunt, ut certatim dicerent suam quisque sententiam, eequæ res maximam vim habeat: ea conditione, ut cuius dictum ego & Persidis triumviri doctissimum iudicassemus, huic victori pronunciatum ea darentur, quæ jam audietis recitata schedula. AN. Cujus dictum sapientissimum erit, is à Dario ingentia dona, & victoriæ ornamenta consequitor, purpuraq; inducitor, & in auro bibito, & in auro dormito: & aureis frenis currum bissinamque cidarim, & torque circumdatum collum habeto: & edoto, Dariiq; familiaris dicitur. Primi sententia est hæc: Maximam vim habet vinum. Alterius: Maximam vim habet rex. Tertii: Maximam vim habent mulieres, sed omnia vincit veritas. D. Nunc evocentur huc juvenes, ut ipsi sua dicta declarent. Dicite juvenes suæ quisque sententiæ rationem. ST. PRI. Quantam vim

vim habet vinum, ô viri, omnes, à quibus bibitur, homines fallit: eandemq; regis ac privati, eandem servi ac liberi, eandem pauperis & divitis mentem afficit, omniumq; animos ad lætitiã & hilaritatem convertit: neque doloris ullius, neque debiti memor, omnium animos divites reddit, oblitumque, vel regis vel satraparum efficit, ut nihil nisi magnificũ loquantur, utq; cum potaverunt homines, & fraternæ necessitudinis & amicitiz memoria deposita, continuo gladios stringant, neq; postea, ubi à vino resipuerũt, quid fecerint, recordentur. O Viri, nonne permagnam vim habet vinum, quod hæc fieri cogit? AL. O viri, nonne permagnam vim habent homines, qui & terras & maria, quæque in eis insunt omnia teneant? Atqui Rex omnibus antecellit & dominatur, in eosque principatum tenet. Ita ut quicquid jubet, faciant: si jubet ut inter se belligerent, parent: si contra hostes mittit, vadunt, & montes & muros, & turres demoliuntur: occidunt, & occiduntur, neque regis dictum excedunt. Quod si vicerunt, ad regem omnia referunt cum quæ prædati sunt, tum cætera. Item qui non militant, neq; bella gerunt, sed terram colunt, hi quoque ubi sata messuerunt, ad regem referunt, coguntq; alius alium tributata regi

ea regi ferre. Is unus si jubet perimere, perimunt, si dimittere, dimittunt, jubet verberare, verberant: jubet vastare, vastant: jubet construere, construunt: jubet excindere, excindunt: jubet serere, serunt; cunctusq; ejus tum populus, tum magistratus eidem parent: eoque interim accumbente, cibum capiente, dormiente, circum undiq; custodiam agunt, neque cuiquam discedere, & negotia curare licet, neq; ejus dictis non parere. Quare sic statuo, viri, regis maximam esse vim, cui sic obtemperetur. Z. Magnus quidem rex est, viri, & homines multi, & vinum multum potest. Quis ergo est, qui his dominatur? Aut quis horum principatum tenet? nonne mulier? mulieres reges genuerunt & omne mortalium genus, qui mari ac terra dominantur, ab his ortum est: hæ ipsos educaverunt vinearum satores, ex quibus vinum fit: hæ hominum vestes faciunt: hæ hominibus gloriæ sunt, nec possunt sine fæminis homines esse. Quod si aurum argentumve, aut aliquam rem præclaram comparaverunt, nonne pulchræ alicujus, & eleganti formæ mulieris amore capti his omnibus omissis in eam oculos defigunt? eam hianti ore intuentur? auroq; & argento, & omni rerum pulchritudini anteponunt? Homo omisso

suo ipsius parente à quo educatus est, suaque
 patria uxori adhærescit, & cum uxore vitam
 finit, & patris, & matris, & patriæ immemor.
 Atque ut perspiciatis, mulieres in vos do-
 minari, nonne quæ labore & industria para-
 tis, omnia mulieribus datis atque affertis?
 Sumit homo gladium, & foras ad latroci-
 nandum & furandum proficiscitur, & ma-
 re & flumina tranat, & leones videre susti-
 net, & per tenebras grassatur: Atq; ubi fura-
 tus, prædatus, grassatus est, ad amicam omnia
 refert, plusque diligit homo suam conjugem
 quam parentes: usque adeo, ut propter fœ-
 minas multi mente alienati, multi servi facti
 sint, multi perierint, multi lapsi sint & pec-
 caverint. Quid? an mihi non creditis, nonne
 ingens regis potentia est? nonne omnes
 eum nationes vel tangere formidant? At-
 qui videbam, cum hominis præclarissimi
 Bartaci filia Apame, regis concubina, ad re-
 gis dextram sedens de ejus capite diadema
 auferret, suoque imponeret: tum regis ma-
 lam sinistra manu feriret, rege interea eam
 ore hianti aspiciente, arridenti arridente,
 & succensenti blandiente, quo eam sibi re-
 conciliaret. An non multum valent mulie-
 res, ô viri, quæ hæc faciant? multum sane &
 mulieres pollent, & ingens terra est, & ex-
 celsum

celsum cœlum: & Sol cursu velox, qui uno die cœlum circumvectus eodem recurrat, unde profectus est, magnus sane est: sed veritas maxima est, & omnium potentissima. Veritatem omnis terrarum orbis vocat: veritati cœlum ipsum favet: veritatem omnia reformidant & tremescunt: neq; quicquam in ea vitiosum inest. Vitiosum vinum est, vitiosus rex, vitiosæ mulieres, vitiosi mortales omnes, & ejusdem vitiositatis sunt eorum opera omnia, in qua vitiositate veritatis expertes pereunt. Ac veritas æterna pollet & perpetuo vivit vigetque: neq; ea est, quæ cujusquam ratione, de recto deflectat, ac non eadem sit omnibus: sed ab omni iniquitate & privatione aliena, æquum facit, ejusq; facta probant omnes, nec inest in ejus judicio quicquam iniquum. Cæterum & ab hac, & à regia magnificentia, & à potentia, & à majestate seculorum omnium laudetur Deus veritatis. O. Maxima veritas est, maximamq; vim habet. D. Vicisti pete quid vis, etiam præter ea, quæ scripta sunt, nos id tibi dabimus, quoniam doctissimus juvenis es, & à me proximus sedebis, meusque familiaris vocabere. Z. Memento voti tui, quod te Hierosolymam instauraturum pollicitus es, tum, cum regnum affecutus es: omniaq; vasa

Hierosolyma exportata eo remissurum, quæ seposuit Cyrus, cum de Babylone exscindenda votum fecit, eaq; se illò missurum promissit. Et tu recepisti te instauraturum fanum, quod igni cremarunt Idumæi, tum, cum à Chaldæis pervastata Judæa est, & nunc hoc est, quod à te postulo, rex domine atq; flagito: hæc est magnificentia quam à te expecto. Oro igitur, ut votum præstes, quod cœli regi tuo ipse ore nuncupasti. D. Laudo te, & bene mones, faciam.

SENTENTIA.

Honesta est de virtute contentio. Utinam inter sese sic certarent hodie stipatores principum. Utinam & principes bona veraq; dicta sic & iudicarent, & remunerarentur. Sed fuit illud seculum argenteum molitum est ferreum. Certe rara sunt hodie in aulis huiusmodi certamina. Omnia vincit veritas.

Finis Libri Tertii.

DIALOGORUM SACRORUM.

LIBER QUARTUS.

MARIA, LUCI.

ARGUMENTUM.

Gabriel Genius Mariæ nunciat se edituram filium Dei: querentique modum, demonstrat id fore à Spiritu sancto. Illa credens, assentitur.

Gabriel, Maria.

SAlve ornatissima, Domino conjunctissima, mulierum felicissima. Quid metuis Maria? bono es animo, nam accepta es Deo.

En

En ego tibi renuncio, te isto utero conceptum parituram natum, quem Jesum nomine vocabis. Is erit maximus, & filius summi parentis censebitur: eumq; donabit rerum omnium præpotens Deus solio Davidis, auctoris generis ejus. Itaq; postëris Jacobi regnabit in æternum, nec ullus erit ejus regni finis. M. Quomodo fiet istud, cum ego viri notitiam non habeam? G. Spiritus sanctus sese in te sinuabit, teque Dei optimi maximi vis gravidabit. Itaq; sanctissimus iste foetus, ut erit, ita etiam dicetur Dei filius. Elisabeta quoq; (quo magis credas) tua cognata, jam senex concepit filium, & nunc sextum jam mensem fert uterum, & tamen inter steriles habebatur. Usq; adeo nulla est, quam Deus non possit. M. Ecce me Domini servam, eveniat mihi, prout tu dixisti.

SENTENTIA.

Deo nihil est arduum. Promittenti Deo credendum est, etiamsi quid nature contrarium promittat. Neque enim nature obnoxius est autor ipse nature.

BAPTISTA, Matth. 3. Marc. 1. Luc. 3.
ARGUMENTUM.

Ioannes Baptista populum docet vitæ correctionem, & de Christo vaticinatur.

Ioannes Baptista, Plebs, Publicani, Milites.

Progenies viperina, qui vos summonuit futuram pœnam fugere? Edite ergo vitæ melioris indices fructus, & ne ideo ma-

gnos vobis spiritus & arrogantiam sumite, quod patrem habetis Abrahamum. Dico enim vobis, Deum posse ex his saxis suscitare liberos Abrahamo. Jam vero securis arborum radici admota est, omnisq; arbor fructum bonum non edens excindenda est, & in ignem injicienda. PL. Quid ergo faciemus? Jo. Qui habet duas vestes, impertiat non habenti, & qui habet cibaria, idem faciat. Pu. Nobis autem, magister, quid faciendum est? Jo. Nihil ampliusquam quantum vobis decretum est, exigit. Mi. Quid etiam nobis? Jo. Ne quem pulsate, aut per sycophantiam circumvenite, & stipendiis vestris este contenti. Sed audite universi: Ego quidem abluo vos aqua, ad vitæ emendationem. Sed me præstantior me subsequitur: & ita præstantior, ut ego non sim dignus, qui ejus calceorum solvam corrigia. Is vos abluet sacro spiritu, & igne: qui quidem vannum manu tenet, aream suam perpurgaturus, frumentumque in horreum comportaturus, & paleam igni crematurus inextincto.

SENTENTIA.

Bona arbor bonos fructus edit. Abstinentium ab iniustitia: si penas vitare velis.

NATHANAEL, Joan. I.

ARGUMENTUM.

Nathanael à Philippo monitus venit ad Iesum, & in eum credit.

Philippus, Nathanael, Iesus.

De

DE quo scripsit Moses in nostra disciplina, & vates, eum reperimus, Jesum dico, filium Josephi, à Nazareth. NA. A. Nazareth potest aliquid bonum existere? P. Provisè mecum. J. Video huc venire vere Israelitam, id est, hominem ab omni fraude alienum. N. Unde me nosti? J. Priusquam te Philippus appellaret, cum esses sub ficu, videbam te. N. Magister, tu es filius Dei, tu es rex Israelitarum. J. Quoniam dixi tibi, te à me sub ficu esse visum, ita credis, majus his videbis. Credite mihi, posthac videbitis cœlum apertum & Genios divinos ascendentes & descendentes ad me.

SENTENTIA.

Vnde minime speres, inde existit bonum. Adviduus est Christus, ut eum agnoscas. A minoribus, si credas, ad majora venies.

NICODEMUS, Joan. 3.

ARGUMENTUM.

Jesus differit cum Nicodemo de renascendo.

Nicodemus, Iesus.

Magister, scimus te doctorem venisse, divinitus: nam nemo ista tam portentosa facere posset, quæ tu facis, nisi assit ei Deus. J. Accipe igitur doctrinam eo dignam, qui venerit à Deo. Qui denuo natus non fuerit, mihi crede, Dei regnum adipisci non potest. N. Quo pacto potest homo nasci, qui sit senex? Nunquid potest iteram in ventrem suæ matris ingredi, atq; nasci? J. Cum de

Lei

Dei regno, quod divinum est, locutus sim, debes existimare, hanc quoque generationem de qua loquor, per quam ad illud regnum perveniatur, esse divinam. Proinde omitte istam à muliere nativitatem. Nam si quis à muliere nasceretur, talis esset renatus, qualis fuisset antequam renatus: id est esset adhuc terrestris & humanus, propterea quod ex re terrestri & mortali nascitur, (cujusmodi est mulier) id terrestre & mortale est, quandoquidem quæque res sui similem gignit. At ex spiritu qui fuerit renatus, is divina quadam & spiritui conveniente natura præditus erit, quoniam quod à spiritu gignitur, id ejus simile est, à quo originem habet, videlicet spiritus. Neque vero mireris, quod dixerim, vobis esse renascendum: quamvis hanc nativitatem non videas. Nam quod accidit in vento, cujus quamlibet in partem spirantis sonitum audis: neque tamen oculis cernis, unde veniat, aut quo feratur: idem fit & in omnibus ex spiritu genitis, ut hæc generatio sentiri & intelligi possit, oculis aspici non possit. N. Quomodo possunt ista fieri? J. Tu Israelitarum magister es, & hæc nescis? Atqui hoc tibi confirmo nos non ignota, aut tantum audita dicere, sed prospecta & visa testari: sed tamen testimonium nostrum vos

non accipitis. Quod si terrestria, quæ dixi vobis, non creditis: quomodo cœlestia si dixerō, credetis? Si hanc similitudinem, quam ego duxi ab eo, (quæ res terrestris est, & subjecta sensibus) non capis, ideoq; non credis: quomodo intelligeres rem ipsam, cujus declarandæ causa similitudine usus sum, quæ res cœlestis divinaq; est, neq; sub sensus cadit? Atqui hæc nisi à me didiceritis, à quo discatis, nullus est. Neq; enim potestis in cœlum ascendere, & ea à Deo discere. Nam in cœlo nemo ascendit, præter eum hominem, qui de cœlo descendit, qui quidem est in cœlo. Is autem ego sum à quo nisi hæc didiceritis, desperanda vobis cognitio est. Quocirca attende, quale sit hoc renasci, de quo loquor. Quemadmodum Moses serpētem illum æreum extulit in desertis, in quem serpentes intuentes à serpentum morsu sanarentur: ita me oportet extolli, ut omnes in me intuentes, à me pendent, mihiq; fidentes, non pereant, sed vitam adipiscantur æternam. Hæc est igitur renascēdi conditio superius à me proposita, sine qua negavi quenquam posse regnum cœleste consequi. Nam qui mihi fidem habent, ita immutantur, tantoque meliores fiunt, ut plane renati dici possint, & cœlesti regno digni sint. Etenim tanto genus humanum

num profecutus est amore Deus, ut unigenitum filium suum tradiderit, cui quicumque fidem habeat, non pereat, sed ad vitam perveniat æternam. Non enim misit Deus filium suum in hanc vitam, ut homines cõdemnet, sed ut per eum serventur homines. Qui ei fidem habet, non damnatur: qui vero non habet, is jam damnatus est, quia unigeniti Dei filii nomini fidem non adjunxerit. In hoc autem damnantur homines, quod cum venerit in orbem lux, tenebras magis quam lucem, amant: quippe quorum prava sint opera. Siquidem quisquis vitiosa facit, lucem odit, neque in lucem prodit, ne ejus facta arguantur: qui vero recta facit, is in lucem prodit, ut patefiant ejus opera, utpote facta divinitus.

SENTENTIA.

Renascendum est, & ex carne in spiritum migrandum. Ut enim terrestriasque gravia sunt, in cælum ascendere, aut in cælo esse non possunt: ita iniustitia, quæ res terrestris & gravis est, in regnum Dei venire, aut ibi esse nequit. A solo Christo salus est.

SAMARITANA, Joan. 4.

ARGUMENTUM.

Iesus apud fontem cum muliere Samaritana de vera potione veroque Dei cultu colloquitur. Cumque supervenissent euntium cibum apportantes discipuli, eos quoque de vero cibo docet.

IESVS, Samaritana, Discipuli.

DA mihi bibere, mulier. S. Quomodo tu Judæus à me muliere Samaritana petis potum? Neque enim habent ullum Judæi cum

Sama-

Samaritanis commercium. J. Si intelligeres munus Dei, & quis sit, qui à te potum petit, tu ipsa peteres ab eo, tibi que ipse daret aquam perennem. S. Domine, neque situlam habes, & puteus est profundus? unde ergo habes istam aquam perennem? Num tu major es patre nostro Jacobo, qui tradidit nobis hunc puteum: qua aquatione usus est ipse, & filii ejus atq; pecora? J. Hæc aqua fitim ad tempus tantum explet, mea autem ad perpetuitatem, ita ut qui ex aqua à me accepta biberit, non sitiat unquam: nam ea aqua fiet in eo fons scatens in omnem perennitatem. S. Domine, imperti me ista aqua, ne amplius sitiam, neve huc ad hauriendum veniam. J. Invocatum virum tuum & huc cum eo venito. S. Non habeo virum. J. Rectè ais, te non habere virum. Quinq; enim viros habuisti. S. Video te esse vatem, itaque non committam, ut tibi frustra incidisse videar. Majores nostri in monte hoc Deum coluerunt. Atqui vos contenditis, Hierosolymis esse colendum. Quid tu censes? JE. Mulier crede mihi, veniet tempus, cum neque in monte hoc: neque Hierosolymis coletis patrem. Vos quid colatis nescitis, nos quid colamus, scimus: quippe quia salus à Judæis est. Sed veniet tempus, & quidem jam est, cū

veri

veri cultores patrem animo & vere colent. Etenim à talibus se pater coli postulat. Animus est Deus: & qui eum colant, animo & vere debent colere. S. Scio venturum esse Messiam. Is cum venerit, rem omnem nobis planam faciet. J. Ego sum ille, qui tecum loquor. Disc. Video magistrum ad puteum sedentem, & colloquentem cum quadam muliere. AL. Mirum est, solum cum sola! Sed scit ipse cur id faciat. S. O faustum diem: Sed ego, quid cunctor ire in urbem, ut meos tam bono nuncio afficiam? Disc. Comparavimus cibum, magister, vescere. J. Ego cibum habeo comedendum, quem vos nescitis. Disc. Num quis absentibus nobis, attulit ei quod edat? J. Mihi pastus est id facere, quod vult is qui me misit, ejusque opus absolvere. Vos quidem dicitis, abhinc quatuor menses futuram messem. Et ego sic: Erigite oculos, & videte agros, ut jam ad messem flaveant. Et messor præmium aufert, & sator fructum concedit ad victum perpetuum, ut satoris simul & messoris commodo cautum sit. In quo sane dictum illud comprobatur, quod ait: Alium serere, alium metere. Ego vos misi ad metendum, in quo vos colendo non laborastis: alii laborarunt, vos in eorum laborem invasistis.

SENTENTIA.

Christus venit ad docendum, servandumq; fontes, Christus eternum vivificumque cibum potionemque dat. Deus animo & vere adorandus est, nullo locorum discrimine. Dei voluntatem exequi, cibus esse debet homini Christiano.

CENTURIO, Matth. 8.
ARGUMENTUM.

Iesus à centurione exoratus, ejus puerum membris captum, verbo sanat.
Centurio, IESVS.

Domine, puer meus jacet domi membris captus, graviterq; cruciatur. J. Ego ibo eum curatum. C. At ego non sum dignus, cujus tu tectum subeas: sed tantum jube verbo, & sanabitur. Nam ego quoque, qui sub alterius sum potestate, tamen obtineo auctoritatem in eos, quibus præsum, milites: ac si quem jubeo ire, it: si venire, venit: si servum facere quid, facit. J. O re admiratione dignissimam! Credite mihi, ne in Israelitis quidem tantam fiduciam inveni. Et sine dubio multi de oriente atq; occidente profecti, accumbent cum Abrahamo, Isaaco, & Jacobo in regno cœlesti: cum interea ii, ad quos regnū pertinebat, in alta noctis caligine dimerfi nihil aliud agent, quam flebunt & frendebunt. Tu abi, & ut confidisti, sic obtineto.

SENTENTIA.

Christus tam facile morbis imperat, quam dux militibus. Primi eunt ultimi & ultimi primi.

PISCATORES, Lucæ 5.
ARGUMENTUM.

Petrus jacto reti jussu Iesus, plurimos pisces capit.

P

IESVS.

IESVS, Petrus.

Subduc in altum oriam, Petre, ut retia laxetis ad prædam. P. Præceptor, totam noctem laborantes, nihil cœpimus: sed tamen, postquam ita jubes, demergam rete. O rem miram! Adeste socii, adjuvate nos. Rumpitur rete, ita multis piscibus est plenum. Corripe tu istas plagas altrinsecus, vos, vos invergite in naviculam. Desinite, desinite, sustinete rete: jam hæc plena est, infundamus in alteram. O rem inauditam! penè submerguntur cymbæ, præ piscium multitudine. Quæso te Domine, abia me: nam homo nocens sum. J. Ne metue: deinceps jam homines piscaberis.

SENTENTIA.

Absque Christo piscari, hoc est homines docere operam ludere est. Christo auspice, felix est piscatura.

SIMON, Luc. 7.

ARGUMENTUM.

Iesus miranti cum animo suo Simoni, apud quem ipse cibum capiebat, cur se pateretur ab impudica muliere attrahari, causam reddit.

Simon, Iesus.

IAm dudum specto mulierem istam, quæ meum hunc hospitem tam molliter curat. Qui si vates esset, intelligeret utique, quæ & qualis sit mulier, quæ ipsum attrahat, nam prostituta pudicitia est. J. Simon paucis te volo. S. Dicas licet magister. J. Duos debitores habebat quidam creditor, quorum alter quin-

quingentos, alter quinquaginta debebat denarios. Is, cum non essent solvendo, utrique condonavit. Dic uter eum plus amare debeat? S. Opinor, cui plus condonavit. J. Recte judicas: Vides hanc mulierem? cum introivissem domum tuam, ne aquam quidem ad lavandos pedes meos dedisti: ea lacrymis eos perfudit, & suo capitis capillo exterfit: Tu mihi osculum non dedisti, ea, postquam sum ingressus, non destitit mihi pedes deosculari. Tu nec oleo mihi caput unxisti: ea unguendo etiam mihi pedes perunxit. Qua de causa sic habeto, ei multa remitti peccata, quoniam multum amavit. Cui autem minus remittitur, minus amat. Remittuntur tibi peccata, mulier: tua te fiducia servavit: abi cum bona pace.

SENTENTIA.

A sinistris suspicionibus abstinendum. Ex conjectura judicare, temerarium est. Magno beneficio magnus amor conciliatur.

JAIRUS, Marc. 5. Lucæ 8.

ARGUMENTUM.

Jesus à Iairo exoratus ejus filiam ita sanatur, & inter eundam mulierem profusio sanguinis laborantem sanat. Demde subì in Iairi domum venit, ejus filiam, quæ interea decesserat, revocat in vitam.

Iairus, Jesus, Mulier, Petrus, Nuncius,

Est mihi unica filiola, optime JESU, duodecimū annum agens, quæ nunc domi desperato morbo laborat. Obsecro te, & obtestor etiam, atque etiam, ut domum venias,

eiq; manus imponas, ut revivifcat, & revalescat. JE. Faciam vero, eamus M. Salva sum si possum vel extremam ejus oram vestis attingere. Conabor, nec me hæc hominum turba impediet, quo minus ad eum accedam. JE. Quisnam tetigit mea vestimenta? D. Tu vides, quanta te hominum multitudo circumfistat & comprimat, & rogas, quis te tetigerit? J. Certe tetigit me aliquis: nam sensi vim quandam exire à me. M. Perii misera, non latuit eum. Obsecro te, ignosce mihi, ego sum illa. JE. Narra mihi rem omnem ut sese habet. M. Ego misera, jam duodecim annos languebam profluvio sanguinis, cum interea toto illo tempore multis adhibitis medicis & omnem rem insumissem, neq; quicquam profecissem, sed indies deterius haberem: jamq; ob omnibus medicis eram desperata. Cum autem tuorum factorum admirabilitatem fama atque auditione accepissem, accessi ipsa sic mecum cogitans: me felicem, si vel limbum ejus togæ liceat tangere! Hoc animo per mediam turbam accessi propius, nec me spes fefellit: nam simul atq; te tetigi, sensi vim omnem morbi fugatam esse, & omnem sanguinis fluxionem constitisse. J. Bono animo es, filia, tua te fiducia servavit: Abi cum bona pace, ex tuo malo sana. N. Tua filia
 mortua

mortua est Jaire : quid jam molestus es magistro ? J. Ne metue, Jaire, tantum confide: evadet. Sed quem ego domi strepitum audio, introeamus. Eho, quid tantopere fletis ? quid ejulatis ? Pax sit rebus. Non est mortua puella, sed dormit. Exite foras omnes. Vos, Petre, Jacobe, Joannes, & vos puellæ parentes manete intus, videbitis quanta sit Dei potentia. Cedo mihi istam puellæ manum : puella surge. JA. Bone Deus, quam mirificus es ? O mea filiola, vidione ego te renatam ? J. Videte diligenter, ne quis hoc resciscat, & puellæ cibum præbete.

SENTENTIA.

Plus potest vel limbus vestis Christi, quam universa hominum scientia. Quæ aliis insanabilia Christo sunt facilissima.

PHILIPPUS, Matth. 14 Marc. 6. Luc. 9. Joan. 6.

ARGUMENTUM.

Iesus quinque panibus & duobus piscibus quinque virorum milia satiat.

Discipuli, IESVS, Philippus, Andreas.

Vides quæ te circumstet hominum multitudo, in tam vasta solitudine ? & jam dies multum inclinavit : itaque censemus ut eam dimittas, ut in finitima rura & vicos divertens sibi cibaria comparet. Hic enim, quod edat non habet. J. Nihil opus est ut abeant. Præbete vos eis cibum. D. At non satis nobis suppetit, unde tantum hominum numerum pascamus : sunt enim (quantum licet

conjicere) plus minus quinques mille viri, ut mulieres & parvulos omittamus, nisi forte eamus eum panes. J. Unde autem ememus ad tam multos Philippe? P. Equidē non video, nam ducentis denariis vix tātum emi possit, ut inde ad singulos minimum quantum perveniat. J. Quot habetis? videte. A. Ad est hīc puer, qui habet quinq; panes hordeaceos, & duos pisces: præterea nihil est. Sed hæc quantula sunt ad tam multos? J. Afferte huc modo. Jubete omnes in viridi gramine discumbere catervatim, centenos & quinquagenos. Cedo mihi istos panes. Nunc pater cœlestis, qui pro tua benignitate pascis omnia, neque in multis pascendis tenuior, neque in paucis copiosior es, qui nulla lege rerum teneris, à quo omnium natura pendet, effice rogo, his tantulis cibariis multiplicandis, ut hæc hominum multitudo admirabiliter saturata tuam inexhaustam liberalitatem recognoscat. Agite discipuli, distribuite hos cibos in omnes: satīs superq; erit, unde ad facietatem comedant.

SENTENTIA.

Christi cibus est inexhaustus. Plus habet Christus, quam egent homines.

PANIS, Joan. 6.

ARGUMENTUM.

Iesus de vivifico pane, hoc est, de suo ipso differit apud Iudæos.

Iudæi, Iesus, Petrus.

Magister

MAgister, quando huc venisti? **JE.** Vos profecto me queritis non quia miracula vidistis, sed quia pane satiati estis. Procurate cibum non interiturum, sed in omnem perennitatem permanens, quem quidem ego vobis dabo. Nam me pater comprobavit Deus. **Ju.** Quid agemus, ut divina opera faciamus? **JE.** Hoc est divinum opus, ut fidem habeatis ei, quem misit DEUS. **Ju.** Quod ergo tui specimen das, ut eo viso tibi credamus? quod tale facis, quale fecit olim Moses? quo duce majores nostri Manna viderunt in solitudine, quemadmodum literis proditum est. Panem de caelo dedit eis comedendum? **JE.** Non Moses (mihi credite) panem vobis de caelo dedit: sed meus pater verum vobis de caelo panem dat. Nam Dei panis est, qui de caelo descendit, & vitam dat hominum generi. **Ju.** Domine, da mihi perpetuo panem istum. **JE.** Ego sum panis vitalis: qui venit ad me, non esuriet: & qui mihi fidem habet, non fiet unquam. Sed hoc vobis dico: & vidistis me, neque fidem habetis. Quicquid mihi dat pater, ad me veniet: & venientes ad me non ejicio foras. Descendi enim de caelo, non ut mecum, sed ut ejus, qui me misit, patris voluntati paream. Haec est autem ejus, qui me misit, patris voluntas, ut ex eo omni, quod mihi

commisit, nihil perdam, sed id ultimo die ex-
suscitem. Hæc est autem ejus, qui misit me,
voluntas, ut quisquis filium aspicit, eiq; cre-
dit, is vitam æternam adipiscatur, & à me ul-
timo die in vitam revocetur. Ju. Nonne hic
est Jesus, Josephi filius, cujus nos patrem ma-
tremq; novimus? quo pacto igitur ait, se de
cœlo descendisse. JE. Ne mussate inter vos.
Nemo potest ad me venire, nisi patre, qui me
misit, trahente eum, à me ultimo die in vitam
revocandum. Scriptum est in vatibus, omnes
fore divinitus doctos. Quisquis ergo ex patre
audivit & dicit, is ad me venit, nō quia patrē
quisquā viderit, nisi qui est à Deo, is patrem
vidit. Credite mihi, qui mihi fidit, is vitam
habet æternam. Ego sum panis vitalis: Man-
na usi sunt majores vestri in desertis, & tamē
mortui sunt. Hic est panis, qui de cœlo de-
scendit, ejusmodi, ut qui eo vescatur, non sit
moriturus. Ego sum panis vivus, qui de cœlo
descendit: quo pane qui vescetur, vivet in-
perpetuum. Panis autem, quem ego dabo, ca-
ro mea est, quam pro humani generis vita
dabo. Ju. Quomodo potest hic nobis carnem
suam dare comedendam? JE. Hoc vobis con-
firmo, nisi & carnem meam comederitis, &
sanguinem meum biberitis, non habetis vi-
tam in vobis. Qui comedit meam carnem, &
bibit

bibit meum sanguinem, habet vitam æternam: & ego eum in vitam revocabo ultimo die. Caro enim mea verè est cibus, & sanguis meus est vere potus. Qui mea carne vescitur, meumq; sanguinem bibit, is in me manet & ego in eo. Quemadmodum vivit pater, qui me misit, ita & ego per patrem vivo: & qui me comedit, is quoque per me vivet. Hic est panis, qui de cœlo descēdit: cujus longe alia vis est quam Mannæ, qua usi majores vestri, tamen mortui sunt. Hoc pane qui vescitur, vivet in sempiternum. Ju. Dura vox, quis eam audire possit? Jē. Ergo hoc vobis absurdum videtur? Quid si me videatis eò ascendentē, ubi eram antea? Nonne multo vobis absurdius videbitur, ut qui in cœlum ascenderit, is in terris comedatur. Non sunt mea dicta ita accipiēda, ut dicam ipsam carnem meam comedi. Nam caro quidem nihil juvat: sed est divina quædam comedendi ratio, qua vita æterna comparatur, de qua ratione verba facio. Nam quemadmodum, qui panem comedit, is per panem vivit: ita qui per me vivit (id quod mihi credendo & à me pendendo efficitur) is me comedere dicitur. Sed sunt quidam ex vobis, qui fidem non habēt. Hanc ob causam dixi vobis, neminem posse ad me venire, nisi hoc ei datum fuerit à patre

meo. Jam vero multi à me propterea discedunt. Quid vos? num etiam vultis discedere? P. Domine, quem ad eamus? tu verba vitæ æternæ habes, & nos credimus & novimus, te esse Christum, Dei viventis filium. JE. Equidem vos duodecim elegi, sed vestrum unus diabolus est.

SENTENTIA.

Anima: cibis magis est procurandus quam corporis. Vt pane corpus, sic veritate (quæ Christus est) anima pascitur.

PRÆPOSTERI, Matth. 15. Marc. 7.

ARGUMENTUM.

Iesus à Phariseis & Scribis de discipulorum suorum illotis manibus reprehensus, in illos reprehensionem retorquet, demonstratque, peccatum non extra, sed intus esse in animo.

Pharisei & Scribe, Iesus, Discipuli, Petrus.

Cur faciunt discipuli tui contra institutum antiquorum, ut cibum capiant illotis manibus? J. Cur & vos contra præceptum Dei facitis instituto vestro? Deus enim (ut ait Moses) parentum utrumque coli præcepit: & si quis patri matrive maledixerit, eum morte mulctari. At vos ita homines instituitis, ut parentibus demonstrent, donaria à se in fiscum templi collata, in ipsorum parentum utilitatem esse cessura. Ita estis in causa, ut nihil ad illam honoris speciem addant, dum se satis parētibus facere arbitrantur, si in templum donaria conferant: quamvis parentibus non, ut debet, subveniant, quo

quo vestro instituto Dei præceptum rescidistis. Multa sunt ejusdem generis alia, in quibus dum hominum instituta teneatis, Dei præcepta omittitis: lotiones urceorum, & poculorum, & cætera ejusmodi. Ficti homines, recte vaticinatus est de vobis Esaias, ubi ita dicit: Hic populus ad me ore accedit, & me labiis colit: sed animo procul à me absūt. Utrum frustra me ex institutis præceptisque hominum venerantur. Sed attendite omnis multitudo, & intelligite. Non quod intrat per os coinquinat hominem, sed quod exit per os, hoc vere coinquinat hominē. Si quis habet aures ad audiendum, audiat. **DIS.** Ecquid scis, Phariseos isto tuo dicto esse offensos? **J.** Omnis stirps, à patre meo cœlesti non plantata extirpabitur. Sinite eos: duces sunt cœci cœcorum. Quod si cœcus cœcū ducat, ambo in foveam cadēt. **P.** Ediffere nobis sententiam istam. **J.** Adeone etiam vos tardi estis? aut nondū intelligitis, nihil quod intrinsecus in hominem intrat, posse eum coinquinare? non enim in cor penetrat, sed in ventrem fertur & in latrinā per excrementa ciborū ejicitur. Sed quæ ex homine per os exeunt, ea ex corde proficiscentia coinquinant hominem. Hinc nascuntur malevolentia, hinc adulteria, hinc supra, cædes, furta, falsa testi-

testimonia, sordes, malitia, dolus, protervitas, invidentia, maledicta, superbia, stulticia. Hæc tam multa intrinsecus manantia, polluant hominem. At illotis manibus cibum capere, non polluit hominem.

SENTENTIA.

Ficti homines speciem pietatis habent: ejusdem vim repudiant. Quisq; plus tribuit rebus exterioribus, eo minus habet interiorum. Tanto minoru quisque facit speciem, quanto plus habet rei.

CHANANÆA, Matth. 15. Marc. 7.

ARGUMENTUM

Iesus à Chananeæ exoratus, ejus filiam liberat à furia.

Chananeæ, Discipuli, Iesus.

Miserere mei, ô tu Davidide: filiam habeo, quæ furiis miserè agitur. Heu me infelicem! ne respondere quidem dignatur. Obsecro te etiam atque etiam, miserere mei, respice me, utere tua in me clementia & mansuetudine. D. Absolve eam, quæsumus: clamore nos obtundit. J. Non sum missus nisi ad oves perditas domus Israelis. C. Domine, subveni mihi. J. Sine primùm saturari liberos. Neq; enim convenit liberorum panem objicere catellis. C. Etiam sane, & tamen catelli quoq; comedunt de micis liberorum, quæ decidunt de mensa dominorum suorū. J. O mulier, magna est tua fides! Obtineto sane quod vis. Et propter istud dictum abi læta: nam furia emigravit è tua filia.

SENTENTIA.

Christus

*Christus exorabilis est etiam iis, quos maxime videtur excludere.
Fide Christus expugnatur.*

FERMENTUM, Matth. 16. Marc. 8.

ARGUMENTUM.

*Iesus discipulorum diffidentiam & tarditatem arguit, qui quod ipse
de fermento spirituali dixerat, intelligebant de carnali.*

Iesus, Discipuli.

CAvete vobis diligenter à fermento Pharisæorum, & Sadducæorum, tum etiam Herodis. D. Hoc dicit, quia panes non accepimus. J. Quid vobiscum cogitatis, diffidentes, panes à vobis esse omissos? adeonè cœci animo estis? adeone sensum omnem amisistis, ut nihil intelligatis, neq; vobis veniat in mentem illorū quinq; panum, quos in quinque hominum millia dispertivi? quot enim corbes frustis refertas abstulistis? D. Duodecim. J. Quid cum septem panes in duodecim millia dissecui? quot canistrorum frusta abstulistis. D. Septem. J. Qui fit, ut non intelligatis, me non de pane loqui, dum jubeo vitari fermentum Pharisæorum & Sadducæorū.

SENTENTIA.

Dicta Christi spiritualia interdum secundum carnem interpretantur etiam Christiani. Hominem à carne ad spiritum traducere est difficile: diffidentia ex homine, quamvis pia, egre pellitur.

CLAVIGER, Matth. 16. Marc. 8. Luc. 6.

ARGUMENTUM.

Iesus discipulos sciscitatus, quenam esset inter homines de se famos & audita Petri confessione ei claves regni cœli promittit: deinde ejus carnalem in cruce deprecanda animum objurgat: & de hominis abnegatione docet.

Iesus, Discipuli, Petrus.

Quem

Quem me dicunt homines esse? **D.** Alii
 Joannem Baptistam, alii Eliam, alii Je-
 remiam, alii aliquem ex veteribus vatibus,
 qui in vitam redierit. **J.** Vos autem quem me
 esse dicitis? **PE.** Christum, Dei viventis fi-
 lium. **J.** Beatus Simon Bar Jona, quoniam
 istud à carne & sanguine edoctus non es: sed
 à patre meo, qui est in coelis. Et ego tibi vi-
 cissim dico: Tu es Petrus, & super hanc pe-
 tram ædificabo Ecclesiam meam, quam ne
 universæ quidem Orci vires superabunt: ti-
 biq; dabo claves regni cœlestis: ac quicquid
 obstrinxeris in terra, erit obstrictum in cœ-
 lis: & quicquid solveris in terra, erit solutum
 in cœlis. Cæterum etiam atq; etiam cavete,
 ne cuiquam indicetis, me esse Christum. Me
 quidem oportet Hierosolymam proficisci,
 omnesq; à Senioribus & Pontificibus & Scri-
 bis contumelias & indignitates perpassum,
 interfici, tertioq; post die resurgere. **PE.** Re-
 spice te Domine: nunquam istud tibi acci-
 det. **J.** Abi è meo conspectu, Satana: impedi-
 mento mihi es, quod divina non sapis, sed
 humana. Quod si quis me vult sequi, renun-
 ciet sibi ipsi, & me, crucem ferens quotidiana-
 nam, subsequatur. Nam qui volet vitā suam
 servare, eam perdet. Qui vero vitam perdi-
 derit mea causa & Evangelii, eam servabit.

Quid

Quid enim prodest quenquam etiam totum mundum lucrari, si vitæ suæ jacturam faciat? aut quid habeat quicquam, quod cum vita sua compensare possit? Etenim quem mei, meorumq; dictorum in hoc adultero sceleratoq; hominum genere poenituerit, ejus me vicissim poenitebit, cum & meo & paterno splendore conspicuus veniam, unâ cum sanctis & divinis Geniis. Nam venturus sum, & pro suis quenque factis remuneraturus. Quin etiam hoc vobis confirmo, quosdam esse ex hoc conventu, qui non sint obituri mortem, quin me regni divini præpotentem venisse viderint.

SENTENTIA.

Christi cognitio ab homine non proficitur. Sequendus Christus esse isque omnibus preferendus.

LUNATICUS. Matth. 17. Marc. 9. Luc. 9.

ARGUMENTUM.

Iesus Lunaticum, quem ejus discipuli sanare non potuerant, sanat, ab ejus patre exoratus.

Pater Lunatici, Iesus, Dæmon, Quidam, alius.

Magister, oro te, ut me, meumq; unicum filium, quem tibi hîc adduco, respicias. Agitur nescio quo furiali spiritu muto: credo eum Dianæ incitatione ita misere infestari. Nam cum subito eum mala illa pestis corripuit, vociferat: tum vero admotis dolorum facibus repente divexatur, & cruciatibus fodicandis horribiles gemitus

eus

tus & dentium stridores edens, spumas agit in ore, & vix tandem sevis cruciamentis perfractus, à tam immanium furiarum vinculis laxatur. Eum deduxi ad tuos discipulos, & oravi, ut eum à tanto malo liberarent, sed non potuerunt. JE. Diffidens hominum genus, & pravum: quousq; versabor inter vos? què ad finem vos perferam? Hic mihi adducatur. P. Ecce eum tibi: Hei mihi, vide sis ut repente, te viso, concidit: vides ut spumans volutatur. J. Quam pridem hoc ei evenire cœpit? P. Jam à pueris, ac sæpe in ignem, sæpe in aquam præceps ruit: ut dicas eum in mortem ferri. Sed tu si quid potes, opitulare nobis, nostri misertus. J. Si potes credere, nihil est quod credenti fieri non possit. P. Credo ego quidem, Domine, sed tu adjuva fidem meam. J. Spiritus mute & surde, ego tibi impero, ut istinc emigres, remigraturus nunquam. D. Bruun. QUIDAM. Ut confusus est? ut mortuo similis? ALTUS. Imo ego puto plane mortuum, ita nihil omnino movetur. J. Cedo mihi istam manum, surge, esto incolumis. Trado tibi filiū tuum omni morbo vacuum.

SENTENTIA.

Hominis imbecillitas diffidentia argumentum est. Fides est omnipotens. Christus etiam infirmæ fidei opitulatur.

LAPIDANTES, Joan. 8.

ARGUMENTUM.

Iesus de seipso cum Iudæis differit, eorum vanam ob Abrahamicam stirpem arrogantiam retundit, veram libertatem docet, & lapidationem ab eis effugit.

Iesus, Pharisei, Iudæi.

EGO sum lux mundi. Qui me sequetur, non ingredietur in tenebris, sed utetur luce vitæ. P. Tu de te ipso testaris, testimonium tuum non est verum. JE. Etsi ego testor de me ipso, verum est tamen testimonium meum, quoniam scio unde venerim, & quo abeam: id quod vos nescitis. Vos more hominum iudicatis: ego non iudico quemquam. Et tamen ut maxime iudicem, iudiciū meum verum sit: utpote qui non sum solus, sed una etiam assit, qui me misit, pater. In vestra quoque lege scriptum est, duorum hominum testimonium verum esse. Ego de meo testimonium dico: dicit etiam is, à quo sum missus, Pater. P. Ubinam est tuus pater? JE. Vos neque me novistis, neque patrem meum. Si me noveritis, meum quoque patrem noveritis. Ego abiturus sum, & vos me requiretis, atque in peccato vestro moriemini. Quo ego abibo, vos non potestis venire. JUD. Num ipse se interficiet, ut dicat, quo ipse abiturus est, nos venire non posse? JE. Vos hinc inferne estis, ego superne. Vos ex hoc mundo estis, ego non item. Ideoque dixi vobis, vos in peccatis vestris morituros: Id quod fiet, nisi credideritis

2

me

me eum esse. P. Nam quis tu es? J. Jam dudum id vobis sum elocutus. Equidem multa de vobis habeo vere dicere, sed ut ille, qui me misit, verax est, ita ego quoq; ea demum, quæ ex eo audivi, hominibus renuncio. Verum enim verò cum me extuleritis, tum demum intelligetis me eum esse, quia sponte faciam nihil: contraque sicut me docuit pater, ita loquar, mecumq; habeam eum, qui me misit. Neque enim me solum deseruit pater, ad cuius ego arbitrium omnia semper facio. Quod si vos, qui mihi creditis (video enim esse non parum multos) in meis dictis manebitis, vere discipuli mei eritis, veritatemque intelligetis, quæ vos in libertatem vindicabit. Jud. Nos. Abrahami progenies sumus, neque cuiquam unquam servivimus: & tu audes dicere, nos factum iri liberos? J. Credite mihi, quicumque facit peccatum servus est peccati. Atqui servo non est domi perpetua mansio, filio est. Ergo si vos filius libertate donabit, re ipsa liberi eritis. Neq; vero me præterit, vos esse progeniem Abrahami: sed enim cupitis me necare, postquam mea in vobis oratio locum non habet. Ego quod cognovi à patre meo, loquor: itidem vos, quod didicistis à patre vestro, facitis. Ju. Noster quidem pater Abraham est. J. Si A-
braha-

brahami filii essetis, Abrahamo digna faceretis. Nunc cupitis me perimere, hominem, qui verum vobis sum effatus, id quod audi- vi ex Deo. At nihil tale faciebat Abrahamus. Vos patre vestro digna facitis. Ju. Atqui è stupro nati non sumus. Unum patrem habemus Deum. JE. Si è Deo patre essetis, amaretis me, quippe cum à Deo profectus venerim. Neque enim mea sponte veni, sed ab eo missus. Cur meam orationem non agnoscitis? cur mea dicta audire non potestis? vos ex patre Vejove estis & patris vestri libidini- bus ministros vos libenter præbetis. Ille jam ab initio fuit homicida, nec in veritate per- stitit, nempe veritate vacuus. Quod si falsum loquitur, de suo loquitur: utpote mendax, mendacique pater. At mihi vos, quia verum dico, non creditis. Quis me vestrum coar- guerit peccati? Quod si verum dico, cur mihi non creditis? Qui à Deo est, Dei dicta audit. Vos ideo non auditis, quia à Deo non estis. Ju. An non recte dicimus, te esse & Samaritanum, & furiosum? JES. Ego fu- riosus non sum, sed patrem meum decoro: vos vero me probro afficitis, sed non ego meæ laudi studeo: est qui studeat & cum ra- tione. Credite mihi: qui mea dicta observa- verit, mortem non videbit unquam. Ju. Nunc

plane videmus te furere. Abrahamus ipse mortuus est, & ipsi vates, & tu eum à morte in perpetuum vindicas, quis tibi dicto audiens fuerit? Num tu major es patre nostro Abrahamo, qui tamen mortuus est, ut etiam ipsi vates? Quem tu te facis? JE. Si ego me ipsum laudarem, laudatio mea nulla esset. Pater meus est, qui me laudat, quem vos, cum dicatis vestrum esse Deum, tamen non novistis. At ego novi eum; quod si negarem, vestri essem similis, id est mendax: sed novi eum, ejusque dictis pareo. Abrahamus ille parens vester gestivit videre diem meam, & vidit, & vidisse gavissus est. JUD. Quinquaginta annos nondum habes, & Abrahamum vidisti? JE. Imo antequam Abrahamus esset, ego erā. JUD. Proh scelus, hæccine nos tam indigna ferre? quin eum comperimus lapidibus? Agite fiat lapidatio. Sed quid hoc est? nunquam comparet: evanuit.

SENTENTIA.

Patrem sequitur sua proles. Cui quisque obediit, ejus filius aut servus est. Ex opere judicatur de homine. Impii sunt ex Diabolo nati. Servire justitia, & ea demum libertus est. Simulatores dum sese negant homicidas, in eo ipso vestigio homicidia moliantur. Simulatorem si homicidii argueris, occidet te, si poterit ut se non homicidam esse ostendat. Vitiis tantum saperet mundus, ut ex suis eos fructus cognosceret.

CORCUS NATUS, Joan. 9. & 10.

ARGUMENTUM.

Jesus cecum natum sanat. Pharisæi postquam hoc, etiam in terris agnoscit ejus parentibus referunt, de Jesu male dicunt. & sanctum, quia

de Jesu

de Iesu benedicebat, eijciunt. Et Iesus ei sese aperit: Et Phariseos caecitate arguens de se ipso, bono pastore, disputat.

Discipuli, Iesus, Cæcus natus, Vicini, Pharisei, Iudices.

Nuncius, Parentes cæci.

M Agister, utrum propter suum hic, an propter parentum peccatum cæcus natus est? JE. Propter neutrum: tantum ut divina in eo opera demonstrarentur. Me oportet rem agere ejus, qui me misit, dum dies est. Veniet nox, cum agi non poterit. Donec in hac vita ago, lux sum hominum. Sed age jam, huic homini lucem conferam. Confectum est. Abi lotum in piscina Siloa. C. Faciam, & quidem libenter. O me felicem! si possum a dipisci id, quod homines vocant lucem, quo ita delectantur, ut negent quicquam esse jucundius. At ego nunquam ne suspicari quidem potui, quale esset, neq; omnino animo & cogitatione comprehendere, quid album, quid ve atrum dicant. Ita mihi natura iniqua fuit, ut mihi rem omnium prædicatione suavissimam inviderit. Sed jam videor mihi ad piscinam pervenisse, lavabo me, ut sum iussus. O Deus immortalis quid hoc rei est? Hoccine est videre? Ho, ho, vix sum mei compos præ gaudio. Video ego cælum, terram, homines. Bone Deus, quis est hodie tam fortunatus, quam ego sum? ô populares aspiciate, aspiciate eum, qui ex utero matris cæ-

cus est exceptus, nunc liquido videntem. V. Estne hic ille qui solebat sedens mendicare? ALIUS. Plane. ALIUS. Fieri non potest. ALI. Est ejus similimus. C. Imo ego vere ille ipse sum. V. Quo pacto tibi aperti sunt oculi? C. Quidam homo, quem Jesum nuncupant, pulverem sputo suo temperatum meis oculis illevit: Deinde jussit, ut irem lotum in Siloa: quo facto, sensum videndi sum affecutus. V. Ubi est ille? C. Me latet. V. Deducamus eum ad Phariseos. C. Quò libet. V. Adducimus vobis hominem, Pharisei, qui ait se, cū à nativitate cœcus esset, videndi munus à Jesu esse affecutum. PH. Quomodo istud amabo? C. Cœno mihi oculos illevit: quibus deinde ablutis video. PH. Is homo nō est à Deo profectus, ut qui Sabbathum non agat. ALI. Qui possit improbus bona tam stupenda? PH. Tu quid de eo censes, qui tibi oculos aperuerit? C. Egone? Vatem esse. JUD. Credibile non est, eum qui nūc videt, cœcum fuisse, vocentur huc ejus parentes. ALIUS. Sane placet. Heus vos, accersite eos. NUNC. Fiet. JUD. Placet hanc rem altius sciscitari. NUNC. Assunt. JUD. Hiccine est filius vester, quem vos prædicatis cœcum esse natum? Qui fit ut nunc cernat? PAR. Hunc filium esse nostrum, & cœcum fuisse natum scimus: quomodo

modo nunc cernat, nescimus: quisve ei oculos aperuerit, nos fugit, ipse jam grandis est, ipsum interrogate, de se ut eloquatur. PH. Appellatur iterum. Ades tu, fatere verum. Nobis satis cognitum est, hominem illū esse sceleratum. C. Sceleratus sit, nec ne, nescio: unum illud scio, me, cum cœcus fuerim, nunc oculis uti. PH. Quid fecit tibi? quomodo illustravit tua lumina? C. Jam vobis dixi, neque audivistis. Quid denuo vultis audire? Nam vos quoq; vultis ejus discipuli fieri? PH. Abi in malam rem. Tu es ejus discipulus: nos Moysi sumus discipuli. Satis scimus, cum Mose locutum esse Deum: at hic unde sit nescimus. C. Ergo in eo est admirabilitas, quod vos nescitis unde sit, cum mihi oculos patefecerit. Jam scimus, improbos à Deo non audiri: sed si quis pius est, & Dei voluntati parens, eum audit Deus. Nunquam post hominum memoriam fando auditum est, quemquam illustravisse oculos cœci nati. Quod nisi esset is profectus à Deo nihil posset. PH. Tu scelerum plenus es & nos doces: Abi foras in malam crucem. JE. Audio eum, quem nativa cœcitate liberavi, exactum esse à Judæis. Et ecce eum. Heus tu, habesne fidē Dei filio? C. Quis autem is est, ut ei fidem habeam? JE. Vides eum, ipse est, qui tecum loquitur.

C. Ego vero fidem habeo. JE. Ego in hunc terrarum orbem ad hoc discrimen, & ad hunc delectum veni, ut qui non vident, videant, & qui vident, cœci fiant. PH. An tibi nos videmur cœci? JES. Si cœci essetis, non essetis in vitio. Nunc quia dicitis vos cernere, peccatum in vos hæret. Sic accipite: Qui non intrat per januam in caulam, sed alio transcendit, is fur est, & latro. Qui autem intrat per januam, pastor est ovium: Huic janitor aperit: Hujus vocem exaudiunt oves. Hic suas appellat nominatim, easque educit, eductisque præit viam: hunc oves consequuntur, ut cuius vocem agnoscant. Alienum autem non sequuntur, sed defugiunt: quoniam non agnoscunt alienam vocem. Verum ut intelligatis, quid mihi velim, sic habetote. Ego sum janua ovium, omnes, quicumque ante me venerunt, fures sunt & latrones, nec eos audiverunt oves. Ego sum janua. Per me qui intrabit, servabitur, & ingressum, & egressum liberum habebit, & pascuam nansciscetur. Fur non aliam ob causam venit, quam ut furetur, mactet, perdat. Ego veni, ut vita fruatur, & melius habeant. Ego sum pastor bonus: Pastor bonus animam ponit pro ovibus. At mercenarius ille non pastor, cuius propriæ non sunt oves, si quando videt lupum venientem, relictis

relictis ovibus in pedes se conjicit: lupus oves agit, rapit. Ille mercenarius fugit: nempe ut mercenarius: nec curam habens ovium. Ego sum pastor bonus, & meas novi, vicissimq; eis sum notus. Quemadmodum me novit pater, ita ego novi patrem, & animam pono pro ovibus, quæ etiam mihi adducendæ sunt, meamq; vocem audient: atq; ita fiet unum ovile, unusq; pastor. Ideo me pater amat, quia animam pono, eam resumpturus. Eam quidem nullus mihi eripere potest, sed ipsa mea sponte eam pono: habeo enim potestatem eam ponendi, rursumq; sumendi. Hoc mihi in mandatis dedit meus pater. **JUD.** Furiosus est, & insanit, quid eum auditis? **AL.** Hæc non sunt furentis. Potestne furia cæcorum oculos lucis usu donare.

SENTENTIA.

Quos sanæus est Christus, prius fœdar: hoc est, fœdos esse ostendit. Simulators nihil est vel pertinacius vel crudelius. Equidem sic mihi persuasi, etiamsi reliqui omnes veritati crederent, simulatores non esse credituros. Quos mundus ejicit, eos Christus accipit, eisq; sese aperit. Quæ divina sapiunt, mundum furere videntur. Aperi hie tandem oculos, & cæce munde, & noli continuo furoris arguere, si quis aliquid vel agit vel dicit, quod tu & belua centiceps, vel non approbas, vel non intelligis. Cognosce, & iterum tertioq; cognosce, antequam judices. Nam ad pernicitiam properat cito qui judicat.

RENOVALIA. Joan. 10.

ARGUMENTUM.

Iesus Judæis Christum Deique filium se esse fatetur: ob eamq; causam illi eum lapidare conantur.

Judæi, IESVS.

Q5

Quam-

Quamdiu nostros animos suspensos te-
 nebis? Si tu es Christus, dic nobis aper-
 te. J. Id dixi vobis, nec creditis, ea quæ patris
 mei nomine facio, satis de me testantur. Sed
 vos non creditis, quia non estis ex ovibus
 meis: quemadmodum dixi vobis: Oves meæ
 vocē meam audiunt, ego eas cognosco, ipsæ
 me sequuntur, ego eis vitam largior sempiternam.
 Non possunt unquam perire, neque mihi eas quisquam de manu eripuerit. Pater
 meus, qui mihi eas mandavit, maximus est
 omnium: nec eas possit quisquam de ejus
 manu extorquere. Ego autem & pater unum
 sumus. Ju. O audaciam! videtis quam nefaria
 vox? Agite obruamus hominem lapidibus.
 JE. Multa ego vobis præclara opera, patre
 meo auctore, edidi: quod tandem est eorum,
 propter quod me lapidatis? Ju. Nullam
 bonam ob rem te lapidamus, sed ob impia
 tua in Deum dicta, simul quod homo cum
 sis, Deum te facis. JE. Eho, an non ita scriptū
 extat in vestris literis: Ego vos Deos appel-
 lavi? Si Dii appellati sunt illi, ad quos Dei
 sermo habitus est, quo scriptum rescindi non
 potest: me, quem pater consecravit, & in
 hunc terrarum orbem misit, vos impium
 dicitis, si dixi me Dei esse filium? Si patre di-
 gna, non præsto, mihi ne credite: sin autem
 ea

ea præsto, tamen factis meis credite si non mihi, & tandem cognoscite & patrem in me, & me in patre esse. Ju. Enim vero ista jam nõ sunt ferenda, injiciamus ei manus, quid stamus? Papæ ubi est? nusquam est? ubi est? evanuit in auram, præstigiator: at non semper evadet: tenebitur aliquando.

SENTENTIA.

Quæ non intelligunt, damnant imperiti. Homicidia suas, religionis nomine, prætexerunt simulatores. Vera dicta habet mundus pro impis.

THOMAS, Joan. II.

ARGUMENTUM.

Iesus discipulos suos se comitari jubet, euntem ad Lazarum in vitam revocandum.

IESVS, Discipuli, Thomas.

A Beamus iterum in Judæam. D. Magister, a modote volebant lapidare Judæi, & eodem redis? JE. Diei horæ sunt duodecim. Qui interdiu iter facit, non offendit: Nam lumen hujus mundi videt. Qui vero noctu iter facit, offendit: caret enim lumine. Jam vero Lazarus ille noster amicus obdormivit: eum ego eo expergefactum. D. At si obdormivit, salvus est. JE. Planius dicendum est: Lazarus mortuus est, id quod equidẽ vestra causa gaudeo, ut rei fidem adjungatis, cum sciatis me non adfuisse ibi. Sed eamus ad eum. TH. Eamus & nos morituri cum eo.

SENTENTIA.

Christo mortuum excitare tam facile est, quam homini dormientem. Christo mors formis est.

LAZA-

LAZARUS, JOAN. II.
ARGUMENTUM.

Iesus Lazarum in vitam suscitavit.

Martha, Iesus, Maria, Iudæi.

CUM essem domi, allatus est mihi nuncius, advenire Jesum. Itaque ei extra vicum obviam procedo. Sed eum advenientem video, adibo & salutabo. O Domine, si affuisses hic, meus frater non fuisset mortuus. Sed nunc etiam scio, te, quidquid à Deo petiveris, impetraturum esse. **JE.** Reviviscet frater tuus. **MARTH.** Scio ego revivisciturum, cum reviviscant homines in illo novissimo die. **JE.** Ego sum resurrectio & vita, ita ut mihi confidentes omnes & mortui sint reviviscunt, & vivi nunquam sint morituri. Credis hoc? **MARTH.** Etiam Domine. Ego credo, te esse Christum illum Dei filium, orbi expectatum. Sed eo evocatum Mariam sororem meam, quæ domi misera luctu tabescit. **J.** Quam multa acerba & perpeffu aspera evenire, in hominum vita necesse est. Me miserescit harum miserandarum muliercularum, quæ charissimi fratris morte concussæ mœrore conficiuntur, & jam ad me, sicut ad certum asylum confugient, opemque meam & præsens auxilium implorabunt. Atque ecce eas huc accurrentes cum magna hominum multitudine. Ipsa autem Maria ut plorat, ut lamentatur, ut suo luctu

omni-

omnibus lacrymas excutit: Jam credo, mihi ad pedes jacebit supplicans. MARIA. O Domine, si tu hinc affuisses, meus frater non fuisset mortuus. JE. Ubi eum posuistis? JU. Venit: Ut commotus est & lachrymarum vim profundit, nimirum eum valde amabat. ALI. Non poterat is, qui cæco oculos reclusit, efficere ne hic moreretur? Sed videte ut rursus conturbatur. J. Hic est monumentum, amovere saxum. MART. At jam foetet, Domine, nam quatrimum est. JE. Dixine ego tibi, te, si potes credere, visuram gloriosum & plane divinum factum? Tollite modo saxum. Pater, gratias tibi ago, quod me audivisti. Equidem sciebam, ut me semper audias, sed dicebam propter circumstantem hominum multitudinem, ut credant me à te esse missum. Lazare, veni foras. JU. O rem seculis omnibus inauditam! Videte, videte hominem è sepulcro emergentem vincitis pedibus & manibus fasciis, vultu sudario obvelato. O immensam Dei potentiam! JE. Solvite eum, & dimittite liberum.

SENTENTIA.

Christi vox etiam à mortuis auditur, & nos vivam non audimus.

REPUDIUM, Matth. 19. Marc. 10.

ARGUMENTUM.

Iesus cum Phariseis & discipulis de divortio colloquitur.

Pharisei, Iesus, Discipuli.

Licet

Licetne viro repudiare uxorem qualibet de causa? J. Quid vobis præcepit Moses? P. Moses? permisit uxori nuncium remittere scripto divortii instrumento. J. An non legistis, ut qui eos principio fecit, marem simul & foeminam fecerit? utq; ita pronunciatum sit: propterea vir, relicto utroq; parente, adhærebit suæ conjugi, fietq; ex duobus unum corpus. Itaq; jam non sunt duo, sed unum corpus. Proinde, quod Deus conjugavit, homo ne disjungat. P. Cur ergo præcepit Moses, ei dari devortii tabulam, eamq; repudiari? J. Habuit videlicet rationem vestræ pertinaciæ. Verum olim non erat ita factitatum. Quin hoc vobis confirmo: Quicumque repudiaverit uxorem suam (nisi ob stuprum) & duxerit aliam, adulterat. Eadem in causa sunt & foeminæ. Disc. Si ea est viri cum uxore conditio, non expedit connubia conjungere. J. At non omnes id præstare possunt, sed ii duntaxat, quibus datum est. Nam ejuratorum alii, ita ex utero matrum orti sunt, alii manu castrati sunt, alii seipfos castraverunt propter regnum cœleste. Qui hoc potest præstare præstato.

SENTENTIA.

Deus ipse, propter hominum peritiam aliquid interdum permittit, quod alioquin permittendum non esset. Olim fuit mundus nimis malus,

malus, & omnia abeunt indices in deterius. Libi omnibus resistere, nisi dono Dei, nemo potest.

DIVES, Matth. 19. Marc. 10. Luc. 18.

ARGUMENTUM.

IESVS ab adolescente interrogatus, vitæ viam docet: & quam sit ea divitibus difficilis, ostendit, deque præmis suorum differit.

Adolescens, Iesus, Discipuli.

MAgister bone, quid faciendum mihi est, ut vitam æternam adipiscar? **J.** Quid me dicis bonum? Nemo bonus est, nisi unus Deus. Quod si vis ad vitam pervenire, serva præcepta. **A.** Quænam? **J.** Ne adulterato. Ne occidito, Ne furator, Falsum testimonium ne dicito. Ne quem intervertito. Parentem utrumq; colito. Alterum ut te ipsum diligit. **A.** Hæc omnia servavi jam à teneris. Quid mihi restat? **J.** Probo. Unum tibi deest. Si vis perfectus esse, i venditum rem tuam omnem, & precium in pauperes erogato, thesaurum habiturus in cælo: deinde ad me sequendum crucem ferens venito. Eho abito mœstus: est enim perdives. **O** mei discipuli, quam difficulter, qui rem habent, ad regnum cœleste perveniunt: Obstupetis? **O** filii, quam difficile factu est, ut qui divitiis freti sunt, in regnum divinum ingrediantur. Dicam iterum: Facilius est rudentem trajici per foramen acus, quam divitem in regnum divinum introire. **D.** Ecquis igitur poterit salvari? **J.** Hoc humanis quidem viribus fieri

non

non potest, sed potest divinis. Nam omnia, quantumvis hominibus ardua videantur, à Deo tamen fieri possunt. D. Nos quidem (ut vides) reliquimus omnia, ut te sequeremur quid ergo nunc assequemur? J. Vos quidem certe, qui me secuti estis, cum in renovata vita in tribunali magnificus confedero, sedebitis etiam in duodecim tribunalibus duodecim tribus Israelitarum judicantes. Et omnino, quisquis domum, aut fratres, aut sorores, aut patrem, aut matrem, aut cōjugem, aut liberos, aut agros reliquerit, mei nominis & Evangelii, regniq; divini gratia, is & in hoc ævo, etiam inter tot acerba, centuplum accipiet, in futura ætate vita fruetur sempiterna. Sed multi primi erunt ultimi, & ultimi primi. Nam in regno cœlesti idem usu venit, quod in quodam patrefamilias, qui primo mane exiit ad conducendos in vineam suam operarios, & cum singulis denariis in diem, cum eis decidisset, eos in vineam admisit, iterumq; circiter horam tertiam egressus, vidit alios otiosos in foro manentes, quos etiam in vineam suam dimisit, seq; eis quod æquum esset, daturum promisit: item circa sextam, & nonam horam egressus, fecit idem. Hora autem fere undecima egressus, cum alios desides invenisset: Quid hic (inquit) statis to-

tum

rum diem otiosi? Nemo nos conduxit, in-
 quiant illi. Tum ille: Ite & vos in vineam
 meam, & quod erit æquum, accipietis. Ve-
 spere mandat vineæ dominus procuratori
 suo, ut operarios convocet, eisq; præmium
 persolvat, initio facto ab ultimis ad primos.
 Hi qui venerant hora fere undecima singuli
 acceperunt denarios, at primi qui sese plus
 accepturos rati essent, cum tantundem ac-
 cepissent, murmurabant in patrem familias,
 quod ultimos, qui unam horam opus fecis-
 sent, ipsis æquavisset, qui totius diei onus
 pertulissent, & ardores. Tum ille uni ex eis,
 Amice, inquit, non facio tibi injuriam. Non-
 ne denario mecum depectus es? aufer tuum,
 & abi. Libet mihi tantum dare huic ultimo,
 quantum tibi. An mihi non licebit meis uti
 meo arbitrio? An ne tu oculum malignum
 habes, quia ego sum benignus? Ita in regno
 coelesti ultimi primorum, & primi ultimo-
 rum conditione erunt. Multi enim sunt e-
 vocati, sed pauci electi.

SENTENTIA.

*Divitia magno sunt ad salutem impedimento. Divites divitiis, de-
 nique homines in quæ habent carissima, renunciare humanis viribus
 nequeunt: divinis queunt.*

DIVES IMMISERICORS, Luc. 16.

ARGUMENTUM.

*Dives immisericors apud inferos cruciatus ne tantulam quidem mi-
 sericordiam ab Abrahamo impetrare potest.*

Dives, Abrahamus.

R.

Pater

Pater Abrahame, miserere mei, & mitte Lazarum, qui summo digito in aqua intincto linguam mihi refrigeret: discrutior enim in hac flamma. A. Fili memineris, te bonis in vita, Lazarum malis esse defunctum. Nunc vicissim hic in voluptate, tu in dolore es. Præterea constat omnino inter nos & vos vasta vorago, ut hinc ad vos, aut istuc ad nos aditus transire volentibus non pateat. D. Saltem illud oro te pater, ut eum mittas in domum mei patris, ut meos fratres (habeo enim quinque) commonefaciat, ne ipsi quoque committant, ut in hunc tam tetri cruciatus locum veniendum sit. A. Habent Mosen, & cæteros vates, eos audiunt. D. Est illud quidem aliquid, pater Abrahame. Sed si quis à mortuis ad eos fuerit profectus, facilius vitam corrigent. A. Si Mosen & vates non audiunt, ne ei quidem, qui revixerit, obtemperaturi sunt.

SENTENTIA.

Inclementes inclementer punientur. Qualem se quisque alteri præbuerit, talem in se experietur Deum. Impiorum sera penitentia. Beati qui plorant, nara consolatione afficientur. Væ gaudentibus dolebunt enim. Nam rerum vicissitudo est. Qui sancta doctrina ad sanitatem non revocatur, desperandus est.

FILII ZEBEDÆI, Matth. 20.
Marc. 10.

ARGUMENTUM.

IESVS,

IESVS Iacobo & Ioanni, regnum petentibus, crucem proponit.

Mater Iacobi & Ioannis, Iesus, Iacobus & Ioannes.

MAgister, volebant quiddam à te petere hi mei duo filii. **JES.** Quidnam id est? **JAC.** Ut tibi, cum splendorem & imperium fueris adeptus, alter dexter, alter sinister assideamus. **JES.** Nescitis quid petatis. Potestisne idem mecum poculum ebibere, eademque lotionem abluere? **JAC.** Possumus. **JES.** Meum quidem poculum bibetis, meaque lotionem lavabimini. Sed ut mihi dextra lævaque assideatur, non est meum dare, nisi eis, quibus id paratum est à patre meo.

SENTENTIA.

Ad regnum Dei, non nisi per crucem venit, & tamen non hominis meritum, sed Dei donum est.

VINITORES, Matth. 21. Marc. 11. Luc. 20.

ARGUMENTUM.

Iesus à Pontificibus & Scribis & Senioribus de auctore suae potestatis interrogatus, ipsos vicissim de auctore lotionis Ioannis interrogat. Deinde per similitudines eis futurum prædicit, ut propter se repudiatum regno priventur.

*Pontifices & Scribe, & Seniores,
Iesus.*

Dic nobis, ex cuius auctoritate ista facias, & quis tibi dederit ut tantum posses? **JES.** Ego vicissim vos quiddam rogabo, de quo si mihi responderitis, dicam vobis, ex
R 2
cujus

cujus auctoritate hæc faciam. Lotio Joannis unde erat? à cœlone, an ab hominibus? P. Si à cœlo dicimus, dicet: Cur ergo ei non credidistis? Sin ab hominibus, periculum est, ne universus nos populus lapidet. Omnes enim Joannem habent pro vate. Negemus scire nos. Age nescimus. J. Ego quoq; non dicam vobis, ex cujus auctoritate hæc faciam. Sed quid censeatis? Habebat quidam duos natos, quorum priorem aggressus est his verbis: Nate, abi ad faciendum opus hodie in vinea mea. Cui ille: Non libet, inquit: post tamen mutata sententia abiit. Alteri deinde eodem modo dixit: qui pollicitus iturum se, non ivit. Uter paruit voluntati patris? P. Prior. J. Credite mihi, publicani & meretrices antecedunt vos in regnum divinum. Venit enim ad vos Johannes, vir integra vita, cui vos non credidistis: publicani & meretrices crediderunt. Quod cum videretis, ne sic quidem mutastis animum ut ei crederetis. Accipite aliã similitudinem; fuit quidam paterfamilias, qui consevit vineam: quam cum sepibus circumdedisset, torcularq; in ea defixisset, & castellum extruxisset, elocavit agricolis, domoque postea multo tempore abfuit. Post suo tempore misit ad agricolas servum, ad percipiendum fructum vineæ, quem illi male ac-

le acceptum plagis inanem remiserunt. Iterum mittit alium: eum quoq; lapidibus contusum, & ietibus indignissime mulctarum, vacuum remiserunt. Nec satis, addit tertium: quem etiam vulneribus confectum ejece-
runt. Pergit mittere alios atq; alios: qui omnes vel pulsati, vel occisi ab eis sunt. Et jam cum unum haberet filium, eumq; charissimum, ita secum cogitabat: quid agam? mittamne ad eos filium, meas delicias? at mittam, fortasse ejus conspectum verebuntur. Itaque facit. At vinitores eo viso sic loqui inter se insistant: Hic quidem est hæres, interimamus eum, ut invadamus in hæreditatem. Itaque ejectum è vinea perimunt. Cum ergo redierit vineæ dominus, quid faciet agricolis illis? P. Malos male perdet & vineam aliis tradet agricolis, à quibus fructum percipiet suo tempore. Sed absit, ut quibus tale eveniat. J. Nunquamne legistis dictum illud in monumentis literarum? Quem lapidem improbaverunt structores, adhibitus est ad caput anguli. A Domino profectum est, & mirum nobis videtur. Quamobrem sic ex me accipite. Auferetur à vobis regnū divinum, & dabitur genti suum fructum edituræ. Ac quisquis inciderit in lapidem eum, confringetur: & in quem lapis inciderit, eum conteret.

ret. Nam in regno coelesti similiter accidit, atq; in rege quodam, qui nuptias filio suo facturus servos suos misit, qui invitatos ad nuptias vocarent. Cumq; illi noluissent venire, alios item servos misit, quibus negotium dedit, ut dicerent invitatis, ipsu paravisse prandium: juvencos & altilia esse mactata, omnia deniq; esse parata: ut venirent ad nuptias. At illi eum aspernati discesserunt, alius in suum agrum, alius ad mercaturam. Caeteri comprehensos ejus servos è vita per summam ignominiam sustulerunt. Quà re audita iratus rex, eò suas copias misit, & homicidas illos perdidit, eorumq; urbem incendit. Deinde suis servis mandavit, ut (quoniam paratae erant nuptiae, & qui ad eas erant vocati non fuerant digni, qui in eis adessent) per vias passim abirent & ut quemq; invenissent, ad nuptias vocarèt: illi in trivìa profecti, quoscunq; invenerunt, eo coegerunt, tum malos, tum bonos, ita ut compleretur coenatio convivis. Ad eos contemplandos ingressus rex animadvertit ibi quendam non nuptiali vestitu indutum: & amice, inquit, quid huc intrasti sine vestimento nuptiali? Cumq; ille obmutuisset, jussit rex famulos, ut eum pedibus manibusq; constrictum, in teterrimas tenebras abriperent, ubi futurus esset plora-

tus, stridorq; dentium. Multi enim sunt vocati, sed pauci electi.

SENTENTIA.

Publicani, meretrices ad Dei regnum sunt aptiores, quam populum magistri atque gubernatores. Qui divitiis donis ornatus ingratum se præbet, is donis privatur. Optima quæque maxime improbantur à potentissimis quibusque.

DENARIUS, Matth. 22. Marc. 12. Luc. 20.

ARGUMENTUM.

Iesus à Phariseorum Herodisque discipulis, de tributo Cæsari pendendo, malitiosè interrogatus prudenter respondet.

Discipuli Phariseorum, Herodiani, Iesus.

Magister, scimus quod verax sis, divi-
namq; vivendi rationem vere & sin-
cere tradas, neq; ullius omnino hominis gra-
tia de veritate deducaris. Proinde dic nobis,
quid tibi videatur: liceatne nobis censum
pendere Cæsari, nec ne? **J.** Quid me tenta-
tis, Simulatores? exhibete mihi nummum
tributarium **D.** En tibi denarium. **J.** Cujus
est imago hæc, & inscriptio? **D.** Cæsaris. **J.** I-
taque reddite, quæ sunt Cæsaris, Cæsari, &
quæ Dei, Deo.

SENTENTIA.

Astutus astute respondendum. Captiosa ad nocendum interrogatio, vitiosa est. Sed ad eandem astuta ad seipsum tuendum responsio, vitiosa non est.

SADDUCÆI, Matth. 22. Marc. 12. Luc. 20.

ARGUMENTUM.

*Iesus à Sadducæis de septem maritorum uxore interrogatus, cuius-
nam futura esset in altera vita, docet, sibi nulla fore matrimonia. Et obi-
ter resurrectionem fore ostendit. Deinde legisperito, de maximo legis
precepto, respondet. Postremo illos quâdam interrogatione, de genere
Christi compefcit.*

Sadducæi, Iesus, Scribæ, Pharisei, Legisperitui.

Magister, Moses scripto sanxit, si quis mortuus fuerit sine liberis, superstite uxore & fratre, ut is frater ejus uxorem duceret, fratriq; prolem suscitaret. Fuerunt autem apud nos fratres septem, quorum primus ducta uxore sine liberis mortuus est, fratrique uxorem habendam reliquit. Eodem modo alter, & tertius: donec tandem singulis ad unum mortuis, ultima omnium moritur foemina. Cum ergo revixerint homines, cujus ex septem erit uxor, cum omnes eam habuerint? **J.** Erratis ignoratione literarum, & divinæ potestatis. In hac vita homines conubunt: sed quibus contingit donari vita illa novata, si nullis inter se matrimoniis copulantur, siquidem ne mori quidem jam possunt, suntq; quasi cœlestes & divini Genitii, Deiq; filii. Mortuos autem ad vitam revocari, vel Moses indicat in rubo (si forte unquam legistis) ubi Deus ait: Deum esse Abrahami, Deum Isaaci, Deum Jacobi. Viventium nimirum Deus est, non mortuorum, cum ei omnes vivant. Qua in re vehementer erratis. **L.** Quando hic tam exposite respondit, volo ego quoq; ejus acumen explorare. Magister quodnam est primum & maximum in lege præceptum? **J.** Audi Israelita: Domi-
nus

nus Deus tuus, Dominus unus est: Dominum
 Deum tuum toto animo, omni cura, studio,
 cogitatione, opere amato. Hoc est primum
 & maximum præceptum. Alterum ei simile
 est: Proximum ut teipsum amato. Majus his
 præceptum nullum est: ab his duobus tota
 legis & vatum doctrina pendet. L. Præclare
 sane, Magister, dixisti. Nam unus est Deus,
 præterea nullus, quem summa animi ope,
 cura, studio, opera, cogitatione amare, nec
 non alios ut seipsum diligere, omnibus præ-
 stat piamenti & sacrificiis. JE. Non loque abes
 à regno divino. Sed ut vos ego vicissim inter-
 rogem Pharisei: Quid censetis de Christo?
 cujus prognatum fore? P. Davidis. JE. Qui sit
 ergo, ut eum David, numine afflatus, Domi-
 num vocet ad hunc modum: Dixit Dominus
 Domino meo: Sede ad dextram meam, do-
 nec tuos tibi hostes scamni instar calcandos
 tradidero: Si eum David Dominum vocat,
 qui fieri potest, ut sit Davidis prognatus.

SENTENTIA.

*Sublata morte, sublata erunt matrimonia: utpote ad generis huma-
 ni propagationem instituta, qua propagatione jam nihil opus erit, nemi-
 ne moriente. Amor legis est perfectio.*

PETRUS, Luc. 22. Joh. 13.

ARGUMENTUM.

Iesus moriturus discipulos suos modestiam amoremque docet: sui deser-
 tionem, & Petri abnegationem prædicat: deque suo ad patrem discessu
 & Spiritus sancti missione disserit.

Iesus, Petrus, Discipuli, Thomas, Philippus, Iudas Thaddæus.

Inter gentes ut quisque plurimum opibus valet, ita maxime res est, & potentissimus quisq; facillime principis nomen obtinet. At vestra longe alia est ratio: quantoq; quisque major est, tanto summissius se gerat: & quanto plus imperio pollet, tanto magis ministrum se præbeat: uter enim major est, qui accumbit, an qui ministrat? nonne qui accumbit? Atqui ego inter vos sum sicut ministrans, vobisq; (qui permanferitis mecum in meis rebus adversis) legatum mihi à patre meo regnum similiter lego, ut edatis & bibatis in eadem mecum mensa in regno meo: & in tribunalibus sedentes, jus duodecim tribubus Israelitarum dicatis. Filioli, adhuc parumper vobiscum futurus sum? quæretis me, & quemadmodum dixi Judæis, quo ego iturus sum, eos venire non posse: ita vobis quoque nunc dico. Itaq; hoc novum vobis præceptum do, ut ametis vos inter vos, quemadmodum ego vos amavi. In eo cognoscent omnes, vos meos esse discipulos, si mutuo vos amore complectimini. P. Domine quo abiturus es? J. Quo ego abiturus sum, non potes me nunc sequi, sed postea sequeris. P. Qui minus nunc possum? animam pro te ponam. J. Animam pro me pones? Crede mihi, non-

nondum cecinerit gallus, cum tu me ter ab-
juraveris, Simon, Simon, Satanas ille (ne tu
sis nescius) expetivit vos ad cribrandum,
quasi frumentum: verum ego oravi pro te,
ne tu de constantiæ gradu dejicereris. Tu vi-
cissim aliquando recreatus confirmato fra-
tres tuos. P. Atqui paratus sum & carcerem
tecum & mortem subire. J. Hoc tibi confir-
mo, Petre, gallum hodie non cantaturum,
quin tu me tibi notum esse ter negaveris.
Porro cum dimisi vos sine crumena, & pera,
calceis, num qua re caruistis? D. Nulla. J. At
nunc, qui habet crumenam, adhibeto nec
minus peram. Quiq; non habet gladium,
vendito pallium suum & comparato. Nam
in me (ne vos nesciatis) superest compro-
bandum scriptum illud: Et inter improbos
habitus est: habentq; meæ res finem. D. Do-
mine ecce hic duo gladii. J. Satis est. Cæte-
rum, nolite animo perturbari, fidem habetis
Deo, & mihi fidem habete. In domo patris
mei mansiones multæ sunt: Quod si secus es-
set, dicerem vobis? Eo paratum vobis meum
id quod si fecero, reveniam ad vos mecum
assumendos, ut, ubi ero ego, ibi vos quoq; si-
tis. Et quidem quo & qua via proficiscar, sci-
tis. T. Nos vero nescimus quo eas, tantum ab-
est ut viam tenere possimus. J. Ego sum via,
veritas

veritas & vita: Nemo venit ad patrem nisi per me. Si cognosceretis me, meum quoque patrem cognosceretis: & jam nunc cognoscitis, & vidistis eum. Ph. Domine ostēde nobis patrem: id satis erit nobis. J. Tantum jam tempus vobiscum versor, & tu me non nosti? Philippe, qui videt me, videt Patrem. Qui fit, ut tu jubeas vobis patrem ostendi? Non credis & me in patre, & patrem in me esse? Quæ vobis dico, mea sponte non dico, sed ipse pater, qui in me manet, hæc agit. Credite mihi, & me in patre, & patrem in me esse: aut certe de ipsis factis mihi credite. Hoc vobis confirmo, eum, qui mihi fidem habebit, eadem mecum, vel etiam majora facturū. Nam ad patrem meum me confero, facturū quicquid per meum nomen petieritis, ut patris gloria in filio celebretur. Si quid (inquam) petieritis per nomen meum, id ego faciam. Si me amatis, præcepta mea conservate. Ego vero exorabo patrem, ut alium vobis confirmatorem det, qui vobiscum perpetuo maneat: Spiritum illum certum veritatis auctorem dico, quem hominum vulgus non potest comprehendere, quia eum neq; videt, ne cognoscit: at vos cognoscitis, quoniam apud vos mansurus, & in vobis futurus est. Non relinquam vos pupillos: invisam vos. Post paulo

paulo jam me non videbunt homines, at vos
 videbitis: quia ut ego vivo, ita & vos vivetis.
 Tum cognoscetis, & me esse in patre meo, &
 vos in me, & me in vobis. Qui tenet præce-
 pta mea, eaq; conservat, ille est qui me amat.
 Qui vero me amat, amabitur à patre meo, e-
 undēq; ego quoq; amabo, meq; ei aperiam.
 Jud. Quid causæ est, ut nobis te ipsum sis ape-
 riturus, promiscuæ hominum multitudinī
 non item? JE. Qui me amat, dicta mea vita
 exprimet, eumque meus pater amabit, & ad
 eum veniemus, & apud eum degemus. Qui
 me non amat, dicta mea non exequitur. Ser-
 mo autem, quem auditis, meus nō est, sed pa-
 tris, qui misit me. Hæc quidem sum vobis e-
 locutus apud vos manens. Sed ille confirma-
 tor (Spiritus sanctum dico) quem mittet
 Pater nomine meo, vos docebit, & recolet o-
 mnia, quæcunq; dixi vobis. Pacem relinquo
 vobis, pacem meam do vobis: nec eam, qua-
 lem homines solent. Nolite animo perturba-
 ri, neq; formidare. Audivistis ut, dixerim vo-
 bis, abire me revisurum vos. Si me amaretis,
 gauderetis, quia dixissem ire me ad Patrem,
 qui major me sit. Et nunc dixi vobis, prius-
 quam evenit, ut cum venerit, credatis. Jam
 non multa loquar vobiscum. Venit enim hu-
 jus mundi princeps, nec habet, quod in me
 carpatur,

carpat, tantum eo res tendit, ut intelligant homines, me amare Patrem, & ita facere, uti mihi mandavit. Surgite, abeamus hinc.

SENTENTIA.

Inter Christianos quo quisq; maior, eo summissior. Ex charitate cognoscitur Christianus. Vt qui que sibi maxime confidit ita facilitate labitur. Spiritus sanctus Christianum perficit.

PILATUS. Matthi. 27. Marc. 15. Luc. 23. Joan. 18.

ARGUMENTUM.

Iesum accusant Iudæi. Pilatus interrogat. Iesus de suo regno & officio respondet. Pilatus eum ad Herodem mittit.

Pilatus. Iudæi. Iesus, Pontifices.

Quodnam crimen affertis in hunc hominem, quem mihi vincitum tradidistis. Ju. Nisi esset maleficus nunquam eum tibi tradidissemus. Pi. Abducite eum vos, & ex lege vestra iudicatot. Ju. Nobis non licet interficere quenquam. Sed si queris crimina, eum deprehendimus pervertentem gentem, & prohibentem Cæsari tributa dare, seque Christum regem esse dicentem. P. Libet ex ipso sciscitari. Heus tunc es rex Judæorū? JE. Tuane istud sponte dicis, an ex aliis auditum? Pi. Quasi ego Judæus sim. Tui te populares, & pontifices mihi tradiderunt. Quid commisisti? JE. Regnum meum terrestre non est: quod si esset, mei satellites pugnassent, ne Judæis addicerer. Verum regnum meum nic positum non est. Pi. Tu ergo rex es? JE. Recte ais. Ego eo natus sum, & in hunc terra-

terrarum orbem ingressus, ut testimonium perhibeam veritati. Quisquis à veritate est, vocem meam audit. PIL. Quid est veritas? Heus Pontifices, & plebs Judæa, ego nullum deprehendo crimen in hoc homine. Po. Atqui nemo est hodie nocentior, neq; supplicio graviore dignior. PI. Non audis, quæ in te proferant crimina? nihilne respondes? vide ut te graviter accuset: quid taces, nequeo mirari satis. Po. Populum sua doctrinà Galilæa ad hunc usq; locum excitat. PI. Estne is Galilæus? Po. Est. PI. Percommode cadit, quod est ditionis Herodis, qui nunc in urbe est. Itaq; eum ad illum duci jubebo.

SENTENTIA.

Auctoritatis suæ cedi volunt calumniatores piorum. Christi regnum mundanum non est.

BARRABAS.

Matth. 27. Marc. 15. Luc. 23. Joan. 19.

ARGUMENTUM.

Pilatus Judæorum importunitate fatigatus Iesum damnat ad crucem, Barrabamque latronem liberat.

Pilatus, Pontifices, Iudæi.

Nunc Judæi adduco vobis eum, ut intelligatis me nullum in eo crimen invenire. Ecce homo! Po. Crucifige, crucifige. PI. Comprehendite eum vos, & crucifigite. Nā ego nullum in eo crimen invenio. Ju. Nos legem habemus, quæ jubet eum morte plecti, quia filium Dei se fecit. PI. Metuo quorsum

evadant hæc. Unde nam es? mihi non elo-
 queris? An nescis me potestatem habere tui
 vel crucifigendi, vel relaxandi? J. Non habe-
 res ullam in me potestatem, nisi id tibi datū
 esset superne. Itaq; qui me tibi tradidit, in
 majore culpa est. Pi. Hic quidem mihi amit-
 tendus est, video. Ju. Si eum amittis, non es a-
 micus Cæsari. Pi. Age, jam educam eum ad
 vos. Ecce rex vester. Ju. Tolle in crucem, tol-
 le in crucem. Pi. Regem ego vestram in cru-
 cem? Ju. Nullum habemus regē, præter Cæ-
 sarem. Pi. Nihil ago, video: cedendum est
 multitudinis libidini. Cedo huc mihi aquā.
 Hæc manuum lotionem testatum volo, Judæi,
 me in sanguine hujus innocentissimi rei, ab
 omni noxa abesse. Vestra culpa esto. Ju. Ejus
 sanguinem nos, nostriq; posteri luunt. Pi.
 Ergo Barrabam hunc latronem liberum ha-
 bete, Jesum autem vestro arbitrio in crucem
 tollendum abducite.

SENTENTIA.

*Potestas a Deo est, Cæsari malum servire inimici Christi, quam Chri-
 sto: & latronem liberari, quam infotentem. Vitam non eadem fuerunt
 bodie.*

SIMON, Joan. 21.

ARGUMENTUM.

*Iesus in vitam suscitatus piscantibus suis discipulis apparet. Deinde
 eum eos prandere suffisset, Petro violentam mortem prædicit.*

IESVS, Discipuli, Ioannes, Petrus.

HEus juvenes, nunquid edulii habetis? D.
 Nihil. JE. Jacite rete ad dexteram navis
 partem

partem, & inuenietis. D. Faciemus. O miraculum! tanta est in nostro reti piscium multitudo, ut trahere non possimus. Jo. Dominus est. PE. Ego igitur indusum succingam, & ad eum ad ripam natabo. Dis. At nos navigabimus: neq; procul à terra absumus, jam appulimus: Hic est pruna impositus piscis & panis. JE. Afferte de piscibus, quos modo cepistis. PE. Attraham rete ad terram. O magnū numerum piscium! DI. Quot sunt? PE. Enumerabo. Sunt centum quinquaginta tres. Dis. Mirum est, rete non esse ruptum. JE. Venite pransum, Vescimini hoc pane & pisce. Simon Joannides, diligis me plus, quam hi? PE. Etiam Domine, tute scis quam te amem. JE. Pasce agnos meos. Simon Joannides, diligis me? PE. Etiam Domine, tute scis ut te amem. JE. Pasce oves meas. Simon Joannides, diligis me? PE. Domine, tu omnia scis, tu nosti quam te amam. JE. Pasce oves meas simul & hoc accipe. Cum esses juvenis, ipse te cingebas, & ibas, quo volebas: sed cum senueris, alius te, tum manus extenderis, cinget, & ducet quo noles. Sequere me. PE. Hic autem quid? JE. Si eum volo manere, donec reueniam, quid ad te? tu modo sequere me.

SENTENTIA.

Tubente Christo, qui piscatur, feliciter piscatur, id quod de hominibus, secundum spiritum, accipiendum est. Qui Christum amat, hinc

Christus oves commendat. Discipuli eadem conditio est, quæ magistri.

LINGUÆ, Act. 2.

ARGUMENTUM.

Cum Christi discipulos novis linguis loquentes Iudei putarent ebrios esse, Petrus ad eos orationem habens, demonstrat illud esse donum Spiritus sancti, à Christo in vitam excitato, effusi. Hoc audito, illi poenitentiam agunt, & in Christi nomine lavantur.

Iudei, Petrus.

Nonne omnes hi, qui loquuntur, Galilæi sunt? *AL.* Sunt. *J.* Ecquid est, quod nostrum quisq; vernaculam sibi linguam audit? Parthi, Medi, Elamitæ, Mesopotamiæ incolæ, & Judææ, & Cappadociæ, Pontiq; & Afiz, & Phrygiæ, & Pamphylia, & Ægypti, & ejus Lybiæ partis, quæ est secundum Cyrenem, & peregrinantes Romani, tum Judæi, tum adventitii, Cretensesq; & Arabes, audimus eos rerum divinarum amplitudinem nostris cujusq; linguis eloquentes. Hoc quidem jam non humanum est. Equidem sic obstupesco, ut nesciam, vigilemne, an somniem. Quid hoc rei est? *AL.* Bachi agitatio est? *O* Bache, pater es eloquentiæ. *J.* Quid ais? *AL.* Vini pleni sunt, mera temulentia est. Unde enim tam multas linguas, tam diversas, tam repente didicissent? *P.* Viri Judæi, & Hierosolymæ incolæ omnes, attendite, & mecum, quæ dicam, recognoscite. Non sunt hi temulenti, quemadmodum vos arbitramini (est enim hora diei tantum tertia) sed
viget

viget illa vatis Joelis prædictio : Ultimis autem temporibus (inquit Deus) omne hominum genus meo spiritu perfundam, ita ut vestri filii, filiarq; vaticinentur, & juvenes visis & senes insomniis edoceantur. Quin etiam servi & ancillæ tunc meo spiritu delibati vaticinabuntur. Sed id signis quibusdam præsignificabo, tum supra in cœlo tum infra in terra: videlicet sanguine & igne, & fumido vapore. Ipse Sol tenebris obducetur, Luna sanguine, antequam Domini magnus ille & insignis dies veniat. Quisquis autem Domini nomen invocaverit, evadet. Audite verba hæc, viri Israelitæ, Jesum Nazarenum, at quem virum? qui vobis à Deo repræsentatus est portentis, miraculis, signis, quæ per eum Deus in medio vestrum edebat, ut scitis: hunc vos, definito Dei consilio & providentia traditum, hominum impiorum opera comprehensum, ad palum alligatum sustulistis: quem Deus, ereptum ex mortis doloribus, in vitam revocavit, quatenus fieri non poterat, ut à morte teneretur. David enim dicit de eo: Propositum mihi Dominum ob oculos semper habeo: eoq; mihi dextero, nulla re commovero: nec vero solum mentis atq; animi læticia gestio, verum etiam ipso corpore fidenter persto: quod tu animam meam apud

S 2

infe.

inferos non deferes, nec permittes, ut is, qui tibi sua pietate placet, interitu deleatur: sed me viam vitæ docebis, mihiq; cumulatissimam apud te voluptatem præstabis. Si licet apud vos, viri fratres, libere de summo patre Davide loqui, is & vitam finivit, & sepultus est, & ejus monumentum apud vos ad hoc tempus extat. Sed cum vates esset, & sciret Deum sibi juravisse, sese ex foetu lumborum ejus, quod ad humanam conditionem pertinet, suscitaturum Christum, & in ejus solio collocaturum, præsciens Christi resurrectionis dixit, ejus neq; animam apud inferos relinquendam, neq; corpus interitu esse delendum. Hunc JESUM suscitavit Deus, cujus nos omnes testes sumus. Is Dei dextra elevatus, & promissum sancti Spiritus à Patre consecutus, effudit hoc, quod vos nunc videtis, & auditis. Neq; enim David ascendit in coelum, sed is ipse loquitur ad hunc modum: Dixit Dominus Domino meo, sede ad dextram meam, donec tuos tibi hostes instar subsellii calcandos tradidero. Hoc igitur pro certo habeat omnis Israelis posteritas, Dominum & Christum factum à Deo esse hunc ipsum JESUM, quem vos crucifixistis. Ju. O nos impios! Quid agemus, viri fratres? P. Mutate pristinam mentem, & abluimini cuncti in nomine

mine Jesu Christi, ad remissionem peccatorum, ut accipietis munus sancti Spiritus: ad vos enim pertinet promissio, & ad vestros liberos: & ad omnes remotiores quoscunque vocaverit Dominus Deus noster. Quamobrem habete curam salutis vestræ, eripite vos ex hoc perverso hominum genere. Ju. Bene & liberaliter dicis, & nobis omnino sic placet: Eluamur.

SENTENTIA.

De spiritualibus carnaliter judicant carnales.

CLAUDUS, Act. 3.

ARGUMENTUM.

Claudum sanant Petrus & Ioannes. Deinde concursu facto populi. Petrus ad populum de Jesu (in cuius nomine fuerit sanatus ille) verba facit. Hinc superveniunt secta doctorum, & Apostolos in vincula dant. Claudus, Petrus, & Ioannes, Populares, Sacerdotes & Antistes sani, & Sadducei.

Respicite hunc miserum Claudum, viri optimi, quem mater claudum peperit, ita ut nunquam sese pedibus potuerit sustinere. Date mihi aliquid honoris & amoris Dei gratia, ut vobis Deus sese vicissim benignum præbeat. PE. Aspice nos. Neq; argentum mihi neq; aurum est: sed quod habeo, hoc tibi do. In nomine Jesu Christi Nazareni surge, & ambula. G. O mirum miraculum! mihi roborati sunt pedes: ut nunc firmenter incedo: O quam dulce est, consecutum esse bona, quibus carueris! Ago tibi gratias Deus

Optime maxime, cujus tanto sum beneficio sanatus. Vah quam iuvat ingredi & salire! **PO.** Nonne hic est mendicus ille claudus, qui solebat præ foribus templi sedens mendicare? **ALIUS.** Plane is est: nec possum satis mirari, hunc tam expedite nunc ingredi, qui antea loco se movere non posset. **POP.** Videor mihi somniare. Subsequamur eum: ingreditur in porticum Salomonis. **PE.** Quanta huc concurrit multitudo? quid hoc admiramini, viri Israelitæ, aut quid nos intuemini, quasi privatis viribus aut pietate effecerimus, ut hic incederet? Deus Abrahami, & Isaaci, & Jacobi, patrum nostrorum, illustravit puerum suum Jesum, quem vos in conspectu Pilati adductum repudiastis, cum illi absolvendum judicasset. At vos sancto & innocente repudiato, petiistis, hominem homicidam vobis condonari, & vitæ auctorem occidistis, quem Deus à mortuis excitavit, cujus nos testes sumus: ejusque nominis fiducia hic, quem videtis & nostis, corroboratus est, & illius confidentia integerrimam valetudinem in vestro omnium conspectu consequutus est. Et nunc fratres, scio vos per imprudentiam fecisse, ut etiam vestros principes: sed Deus, quæ tot suorum vatum voce prædixerat, passurum esse Christum, ea hoc

modo perfecit. Quamobrem revertimini ad sanitatem, ut deleantur vestra peccata, donec recreationis tempora veniāt à Domino, cum prænunciatum vobis Jesum Christum mittet: quem oportet cœlum continere, usq; ad tempora instaurationis omnium, quæ Deus tot suorum sanctorum voce vatum jã olim prędixit. Moses enim majoribus nostris ita dixit: Vatem vobis suscitabit Dominus Deus vester ex vestra consanguinitate, mei similem: ei parebitis ad omnia, quæ vobis dicet. Quod si quis Vati illi dicto audiens non fuerit, is ex medio hominum tolletur. Eodẽ modo tam multi vates, qui à Samuele deinceps fuerunt, qui hæc tempora prędixerunt, & tanta ante denunciaverunt. Vos estis ex vatibus orti & in eo fœdere comprehensi, quod percussit Deus cum majoribus nostris, cum diceret Abrahamo, per ejus semen felicitatem consequuturas omnes orbis terrarum nationes. Ad vos primum Deus suscitatum puerum suum Jesum misit, qui vos felicitatem afferret, si modo nostrum unusquisque è suis vitiis descisceret. SAC. Enimvero jam ferendum non videtur, tantam eis licentiam dari, ut populũ publicè doceant. Nam quid futurum est? SAD. Quid? nisi ut nobis relictis omnes ad eos transeant. Nam quod

resurrectionem mortuorū, nescio per quem
 Jesum futuram prædicant, facile animos im-
 peritę multitudinis in suam sententiam per-
 trahunt. AN. Itaq; maturè occurrendum huic
 malo est: Comprehendite eos, satellites, con-
 ficite hos nugatores in vincula. Hac illi no-
 ãte garriant, cras nobiscum serio disputatu-
 ri. Non jam cum indoctis rationem habebūt,
 quos possint facile seducere: ad pontifices
 eis, & principes, & senatores, & scribas veni-
 endum erit, qui eorum argutias vehemen-
 tius refutabunt. Nam plebem quidem ha-
 bent ad omnia sequacem.

SENTENTIA.

*Christi nomen est omnipotens. Veritati solent invidere & adversari
 docti hujus mundi.*

PRIMATES, Actor. 4.
ARGUMENTUM.

*Petrus & Iohannes de sanato claudio apud primates causam dicunt:
 & illis interdicentibus, ne deinceps Iesum doceant, obtemperaturos ne-
 gant.*

Senatores, Petrus, Iohannes, Primates, Annas, Caiphas.

Quanam potestate, & cuius nomine hoc
 fecistis? PE. Si nos hodie de collato in
 hominem infirmum beneficio interroga-
 mur, principes populi, & Israelitarum sena-
 tores, quam re sanatus sit; hoc vobis omni-
 bus, cunctoque Israelitarum populo notum
 esse volumus, sanatum esse in nomine Jesu
 Christi Nazareni, quem à vobis crucifixum
 Deus

Deus à mortuis excitavit. Per eum hic astat in vestro conspectu sanus. Hic est lapis à vobis ædificantibus rejectus, qui adhibitus est ad caput anguli, nec est in ullo alio salus, nec ullum aliud nomen est sub cœlo hominibus datum, per quod nobis liceat servari. P. Hoc supra omnia mira mirabile est, homines illiteratos & idiotas, tam confidentè & scite loqui. SE. Atqui erant hi Jesu comites, & hic homo vere sanatus est. Jubeantur exire paulisper è concilio, ut hac de re inter nos consultemus. Exite paulisper. Quid faciemus hominibus his? Nam conspicuum ab his miraculum editum esse, omnibus Hiero solymę incolis manifestum est, nec possumus negare. CA. Ita est. Sed ne hæc res in vulgus dimanet latius, minemur eis acerrime, ne amplius de nomine hoc cuiquam mortalium verbum faciant. Nam quã ratione in eos animadvertamus, non video. Omnis populus hac de re Deum laudat: homo, cui tam difficili in re præsens auxilium oblatum est, annum agit supra quadragesimum, estq; omnibus notissimus. AN. Bene mones, intromittantur. CA. Attendite Galilæi. Interdicitur vobis, ne omnino vocem mittatis, nevé doceatis in nomine Jesu. PE. & Jo. Utrum æquum sit & Deo probari possit, vobis obtemperare potius

quam Deo, vos videritis. Nos quidem non possumus quæ vidimus & audivimus non dicere. CA. Vos nisi malo coacti rectè facere nescitis. Sed nisi parebitis, vestræ contumaciæ poenas acerbissimas luetis.

SENTENTIA.

Beneficia divina pro maleficiis habent primates orbis, veritatemque prædicari non patiuntur. Veritatem suam celavit Deus sapientes & liceratos, eamque patefecit parvulis. Deo magis obediendum est, quam hominibus.

GAMALIEL, Actor. 5.

ARGUMENTUM.

Cum fuissent Petrus & Iohannes ex vinculis divinitus liberati, primates, eo cognito, illos evocant, & illi doctrinæ suæ causam dicunt. Tum Gamalielis suscipiuntur.

Apparitores, Antistes fani, Quidam Pontifices, Sacerdotes,

Petrus, Gamaliel.

Carcerem quidem invenimus clausum diligentissimè, & custodes foris ante januam astantes; sed ubi aperuimus, neminem intus invenimus. AN. Videor videre rerum naturam inverti. Nunquam huiusmodi monstra ne fando quidem audita sunt. Quid? egressosne esse clauso carcere? QU. Homines illi, quos vos in custodiam dedistis, sunt in fano, & ibi populum docent. AN. Hæc sunt ejusmodi, ut quemvis de mente dejiciant. Sequimini me apparitores: adducamus eos in concilium. PO. Sed sine vi: etenim concitabitis in nos vulgi seditionem, & statim ad saxa venietur, nam magnum est plebis in eos studium.

studium. SA. Nisi providemus, actum de nobis est, jam nullo in precio sumus: omnium oculi in eos sunt coniecti: prospiciendum aliqua ratione est. AN. Ecce homines. PON. Nonne vos vetuimus isto nomine docere? Atqui replevistis Hierosolymam doctrina vestra, & vultis in nos illius hominis sanguinem derivare. PET. Parendum Deo magis est, quam hominibus. Deus majorum nostrorum Jesum suscitavit, quem vos in patibulo suspensum interfecistis. Hunc Deus doctorem & servatorem sua dextra extulit, ut per eum Israelitis ad sanio rem vivendi rationem reversis, veniam daret peccatorum. Et nos sumus ei testes harum rerum: nec non sacer ille Spiritus, quo Deus ei obedientes, afflavit. Po. O audacissimos impostores! Quid agimus viri, quin de his poenas sumimus? GA. Jubete, si placet, eos paulisper foras discedere. Considerate, viri Israelitæ, de hominibus his, quid eis sitis facturi. Superioribus diebus extitit Theudas quidam, qui sese jactabat esse aliquem, cum quo homines ad numerum quadringentorum sese conjunxerunt. Is occisus est, & quotquot ei parebant, dissipati & ad nihilum redacti. Post eum extitit Judas Galilæus, tempore professionis, multumq; ad sese hominum traduxit: sed &

is perit, & omnes, qui ei obtemperabant, profligati sunt. Nunc quoq; vos summoneo, ut vobis ab his hominibus temperetis, eosq; missos faciatis. Nam si hoc consilium & opus ab hominibus est, dissolvetur: sin à Deo est, id dissolvere non potestis, nisi forte vultis videri Deo repugnare. AN. Non male consulit Gamaliel. PON. Ut mihi quidem videtur. Sed evocemus homines, eosque virgis cædamus, & vetemus ullam Jesu nominis mentionem facere.

SENTENTIA.

Nil est ad veritati credendum durius primatibus hujus mundi. Boni consiliarii maxima est utilitas. Qui Dei operi repugnat, Deo repugnat.

STEPHANUS, Act. 6. & 7.

ARGUMENTUM.

Accusatus impietatis Stephanus, causam dicit tanto spiritu, ut ei resistere non valentes Iudæorum primi, eum lapident.

Testes, Pontifex, Stephanus, Senatores, Scribæ.

Hic homo non desinit impie contra hunc religiosissimum locum, & contra legem loqui: Etenim audivimus eum dicere, Jesum Nazarenum eversum esse hunc locum, & traditos nobis à Mose ritus mutaturum. P. Suntne ista vera? St. Attendite, fratres & patres. Deus gloriosus apparuit patri nostro Abrahamo, cum esset in Mesopotamia, antequam Charræ degeret: eiq; mandavit, ut ex solo natali digrederetur, veniretq;

in terram, quam ipse ei ostenderet. Tum ille
 ex terra Chaldaea profectus, Charræ habita-
 vit, unde eum (mortuo ejus patre) Deus in-
 hanc terram transtulit, quam vos nunc incol-
 litis: in qua nullam ei possessionem tradidit,
 ne vestigium quidem pedis: & tamen promi-
 fit sese ei ejus possessionem daturum, & ejus
 post eum soboli, cum liberos non haberet.
 Locutus est autem cum eo, ad hunc modum:
 ejus posteros, peregrinos fore in terra extra-
 neorum, eorumq; servitutem & injurias per
 quadringentos annos perpeffuros. Sed illam
 ego gentem, cui servient, (inquit) ulciscar:
 exhibunt postea, & me hoc ipso loco adora-
 bunt eamq; rem initio cum eo circumcisi-
 nis foedere firmavit. Is genuit Isaacum, eum-
 que octava die circumcidit. Isaacus Jaco-
 bum, Jacobus duodecim summos patres.
 Summi patres invidia adducti Josephum in
 Ægyptum ducendum vendiderunt. Sed af-
 fuit ei Deus, eumq; ex omnibus angustiis e-
 ripuit, & effecit, ut Pharaon Ægypti Rex ei suæ
 sibi sapientia commendato, totius Ægypti,
 totiusq; suæ familiæ principatum traderet.
 Cum autem, orta fame in omni Ægypto &
 Chamæa, patres nostri in magna essent diffi-
 cultate cibaria: Jacobus, qui audivisset fru-
 mentum esse in Ægypto, eos illò semel atq;
 iterum

iterum dimisit. Estq; Josephus altero itinere à fratribus suis agnitus, ejusq; genus Pharaoni declaratum. Tum Josephus patrem suum Jacobum, & familiam omnem, ad homines septuaginta quinque accersivit. Descendit igitur Jacobus in Ægyptum, ubi cum vitam finiisset, ipse & patres nostri, translati sunt Sichemam, & in sepulchreto suo, quod sibi Abrahamus argenti precio à filiis Emoris emerat, conditi. Interea propinquante promisso tempore, de quo Deus Abrahamo juraverat, crescebat popul⁹ in Ægypto multiplici numero, donec extitit rex alius, qui Josephum non noverat. Is nostrū genus frustrari conatus, patres nostros eo usq; afflixit, ut etiam foetus eorum exponi curaret, ne cōservarentur. Quo quidem tempore natus est Moses, vir Deo acceptus, qui domi paternæ tres menses enutritus, cum tādē expositus esset, sublatus est à filia Pharaonis, & ab ea pro filio educatus: fuitq; Moses in omnibus Ægyptiorum disciplinis eruditus, & dictis, factisq; potens. Cumq; jam quadragesimum ætatis annum compleret, venit ei in mentem, consanguineos suos Israelitas visere: cumq; vidisset quadam injuria affici, eum defendit, ejusq; injuriam, cæso Ægyptio, ultus est. Arbitratur autem cōsanguineos suos

intel-

intelligere, Deum ipsis per ipsum salutem dare: quod illi non intelligebant. Postero die conspicatus eos contendentes, pacem inter eos conciliare studebat, consanguineos esse commemorans: cur alius alii noceret? Sed qui alteri faciebat injuriam, eum repulit, quærens quis eum principem & judicem inter eos constituisset? num se vellet interficere, quomodo pridie interfecisset Ægyptium? Ex eo dicto Moses aufugit, & in terra Medianitarum peregrinus fuit, ubi filios duos genuit. Peractis autem quadraginta annis, apparuit ei in solitudine montis Sinæ Genius Domini, in flamma & ardore rubi. Quo spectaculo admiratus, cum ad visendum accederet, audita Domini ad eum vox hujusmodi est: Ego sum Deus patrum tuorum, Deus Abrahami, Deus Isaaci, & Deus Jacobi. Hic cum tremefactus Moses non auderet intueri: Detrahe tibi (inquit ille) calceos de pedibus: nam locus, in quo tu stas, sacer est. Vidi afflictionem populi mei, qui est in Ægypto: eorumque gemitu audito, ad eos liberandos descendi. Itaque volo mittere te in Ægyptum: Hunc Mosem, quem illi repudiaverant, quærentes: quis eum principem & judicem constituisset: Hunc ipsum Deus principem & liberatorem misit, ductu Genii, qui ei in rubo apparue-

paruerat. Hic eos eduxit, miraculaq; fecit, & prodigia, tum in Ægypto & mari rubro, tum in desertis, annis quadraginta. Hic est Moses ille, qui dixit Israelitis: Dominum Deum ipsorum vatem eis ex eorum consanguinitate suscitaturum, ipsi Mosi similem, cui parent. Hic ille est, qui in multitudine fuit in desertis, cum Genio, qui cum eo locutus est in monte Sina, & cum majoribus nostris: qui vitalem accepit doctrinam, quam nobis traderet, cui noluerunt dicto audientes esse majores nostri sed eo rejecto, animis sese in Ægyptum converterunt, & ab Aarone petiverunt, ut sibi faceret deos, qui se antecederent: Nam, Mosi illo, à quo essent ex Ægypto educti, sese nescire, quid accidisset, dicebant. Itaq; vitulum tum fecerunt, & sacrificium statux peregerunt, delectati operibus manuum suarum. Et Deus averfus, eos sivit prolabi ad cultum astroru, quemadmodum in vatum monumentis scriptum est: Nunquid mihi victimas & sacrificia obtulistis quadraginta annis in desertis, posteris Israelis? annon adhibuistis tabernaculum Molochi, & sidus Dei vestri Romphanis? quæ vos simulacra fecistis ad adorandum, ob quæ ego transferam vos ultra Babylonem. Tabernaculum oraculare habuerunt majores nostri

in
in

fecit, & in desertis; sicut præscripserat is, qui Mofi
 rationem ejus faciendi ostendit. Quod ab
 ro, tum rationem ejus faciendi ostendit. Quod ab
 Mofes illis acceptum, eorum successores, unâ cum
 eum i. Josua introduxerunt dum, cum invaserunt
 quinita. in fines earum gentium, quas Deus eorum
 ni pare. adventu exterminavit: donec ventum est
 fuit in ad tempora Davidis, qui usus Deo favente
 utus est voluit domicilium invenire Deo Jacobi. So-
 tris: qui lomo autem ædem ei ædificavit. Sed non in
 bis tra. templis manu factis habitat Supremus ille,
 es esse quemadmodum dicit vates: Coelum mihi
 sese in sedes est, & terra pedibus meis subsellium:
 e peti. Quam mihi vos domum extruetis, (inquit
 recede. Dominus) aut quis mihi locus requiei erit?
 t, dice. Nonne mea manus fecit ista omnia? Pertina-
 sacri. ces, & animo & auribus incircumcisi: vos
 eribus semper Spiritui sancto restitistis, & vos, &
 os sivi. majores vestri. Nam quem illi vatem non
 modum sunt insectati? An non eos necaverunt, qui
 Nun. adventum justî prænuñciaverunt? cujus vos
 tulistis modò proditores fuistis & interfectores, qui
 Israe. Geniorum administratione acceptam le-
 Molo. gem non servastis. PO. Disrumpor præ ira-
 æ vos cundia. Hunc cine tam arroganter? STE.
 uę ego Ecce autem video coelum apertum, & fi-
 berna. lium hominis Deo ad dextram astantem.
 nostri SE. Et. SC. O impudentiam! Quid eum au-
 didimus amplius? invadamus in eum universi,

T

ejicia-

ejiciamus eum ex urbe. Agite jam lapidetur. Vos testes, vestrum est initium facere lapidationis, sustinete partes vestras. TE. Nos vero perlibenter. Atq; ut simus expeditiores, hic apud te, adolescens, vestimenta nostra deponemus. SC. Quid cunctamini? ferite, ferite, etiam atquè etiam geminate. Vos omnes cooperite hunc lapidibus, conjicite vniverfi, jacite grandine densius. ST. Domine Jesu, accipe spiritum meum. TE. Properemus, obruamus eum lapidibus. ST. Domine, noli in hos vindicare hoc facinus.

SENTENTIA.

Veritatem impietatis loco habent retores hujus seculi. A quibus veritate vincuntur, eis vim inferunt. Sic pugnant retores tenebrarum hujus mundi.

CORNELIUS Actor. IO.

ARGUMENTUM.

Accessus à Cornelio Centurione Petrus, de IESV docet, & in ejus nomine lavas.

Cornelius, Petrus.

AUdivi modò intus advenire eum, què curavi accersendum. Itaq; ei exeo obviam. O salve multum mi Petre. P. Ah, quid agis? surge, quid me ita accedis? Ego quoq; homo sum, ne tu me divinis honoribus afficias. Ingrediamur. Quinam sunt isti, quos hic convenisse video? COR. mei sunt cognati, & necessarii atq; amici, quos huc iussi convocare.

convocari. PET. Vos scitis, ut nefas sit homini Judæo hærerere, aut congregari alicui extero: Sed me Deus docuit, neminem profanum aut immundum censere hominem: Quamobrem accersitus nihil dubitavi venire. Nunc scire velim, quam ob causam me accersiveritis. CO. Quarto ab hinc die ad hanc horam eram jejunos, & domi meæ hora nona preces faciebam. Ecce autem, vir quidam extitit in meo conspectu veste splendida: & tua, inquit, precatio, Corneli, exaudita est, tuaq; misericordia & benignitas Deo in memoria insedit. Mitte ergo Joppen, accersitum Simonem cognomine Petrum (is diversatur apud Simonem coriarium, ad mare) qui ubi advenerit, colloquetur tecum. Ego continuo misi ad te: & tu rectè fecisti quod venisti. Nunc nos omnes in Dei conspectu assumus, ad audienda omnia, tibi à Deo mandata. PE. Re ipsa comperio, nullum Deo personarum esse discrimen: contraq; apud omnes nationes, qui eum metuunt, vitamq; innocenter instituunt, ei esse acceptos. Omnium summa est in disciplina quâ curavit erudiendos Israelitas, quos læto pacis nuncio afficit per Jesum Christum. Vos scitis quæ res acciderit per totam Judæam usq; ad Galilæam post loti-

onem, quam publicavit Joannes: de JESU loquor Nazareno, sacro Dei numine & potentia prædito: qui ultro citroq; commens multa multis beneficia conferebat, omnesq; sanabat, quotquot à Vejove illo divexabantur: quippe cum Deus ei adesset. Et nos testes sumus omnium, quæ fecit tum in reliqua Judæa, cum Hierosolymis. Quem ipsi Judæi palo affixum sustulerunt. Eum Deus tertio die in vitam revocavit, & manifestò ostendit, non vulgo, sed nobis designatis divinitus testibus, qui quidem cibum pationemq; sumimus cum eo, postquam à morte revocatus est: Ac munus ab eo assignatum habemus, ut vulgo prædicemus, ut testificemur eum viventium & mortuorum judicem à Deo destinatum. Hunc omnes vates testantur, eum esse per cujus nomen veniam peccatorum consequantur, quotquot ei confidunt. Sed quid hoc novæ rei est? numine corripiuntur omnes, qui me audiunt, & jam diversis linguis loqui incipiunt. Num quid causæ est, cur minus aqua abluantur, qui eodem nobiscum numine afflati sunt? abluantur sanè nomine Domini.

SENTENTIA.

Nullus conditionis hominem non admittit Christus. Apud omnes nationes, quicumq; Deum meminit, innocenterque vivunt, Deo accepti sunt.

CIRCUM-

Reprehensus à Christianis Iudæis Petrus, quod cum Cornelio, extraneæ gentis homine, congressus fuisset, causam dicit, & obtinet.

Christiani, Petrus.

NOS quidem factum tuum probare nullo pacto possumus, ut liberè loquamur. P. Quodnam id est, tandem? CH. Quod homines præputio præditos, convenisti, & cum eis cibum cepisti. PE. Si vobis videtur, rem omnem, prout sese habet, enarrabo: vosea audita iudicabitis. CH. Placet, enarra. PE. Cum in oppido Joppe orarem, visus sum mihi videre (cum essem extra me raptus) vas quoddam descendens, quasi linteam magnum, quod quatuor capitibus de cœlo demissum ad me usq; pervenit. Id, cum attentus contemplerer, vidi quadrupeda, terrestria, & feras, & reptilia, & aëreas volucres: simulq; vocem audivi dicentem mihi: Age Petre, macta & vescere: Tum ego: Minime, Domine: nihil enim vnquam immundum aut impurum per os meum intravit. At illa vox iterum de cœlo inquit: Quæ Deus purgavit, tu ne pollue. Idq; ter factum est, & tum demum omnia in cœlum subducta sunt. Tum cum continuo præsto fuerunt tres homines in ea domo, in qua eram, ad me Cæsareâ missi. Cum his, ut abjecta

omni cūctatione congredere, divino afflatu admonitus sum. Iverunt unā mecum sex fratres hi, ac nobis hominis domum ingressis renuntiavit iste, ut Genium domi suæ vidisset astantem, & sibi præcipientem, ut mitteret Joppen homines, qui accerferent Simonem, cognomine Petrum: ex quo ea audiret, quæ & ipsi egissent, & ipsius toti familiæ salutaria. Hic cum ego loqui cepissem, illi divino afflatu correpti sunt, quemadmodum & nos sumus principio. Tum recordatus sum illud Domini dictum, quo dixerat: Johannem quidem abluisse aquâ, sed nos spiritu sacro ablutum iri. Quod si eodem illos munere affecerat Deus, quo nos, cum in JESU CHRISTI Domini fidem venissemus: ego quis eram, ut possim obistere Deo? CHR. Jam nihil addimus: sed gratias Deo agimus, qui etiam exteris, per vitæ castigationem aditum ad vitam patefecerit.

SENTENTIA.

Imitanda est Petri modestia, qui quod divino jussu fecerat, ejus causam hominibus reddere non dedignetur. Quos Deus admittit, eos repudiare nemo debet.

RHODE. Act. 12.

ARGUMENTUM.

Eductus divinitus ex carcere Petrus Christianis narrat, quomodo fuerit oductus,

Petrus, Rhode, Christiani.

A Perite mihi has fores aliquis. RHO. Nescio

scio quis pulsat ostium: proviso quis sit PET.
 Ecquis mihi aperit tādē? RHO. Petr⁹ est, petr⁹
 est. O me felicē! ô populares salvi sum⁹. Pe-
 trus præ foribus vestibuli stat, CHR. Insanis.
 RHO. Minimè verò. Agnovi ejus vocem. CH.
 Genius ejus est. PET. Heus, heus, an expecta-
 tis, dum ego hæc effringam fores? RHO.
 Non auditis eum pulsantem? CH. Aperiam?
 O mirum miraculum! Tu ne ergo verus ades
 Petrus? PE. Pax sit rebus: Audite ut me Do-
 minus eduxerit è carcere. A quatuor qua-
 ternis militibus per vices custodiebar. Cum-
 que hac nocte dormirem inter duos milites,
 vinctus duabus catenis, carceremq; custo-
 dirent ante januam custodes, ecce adest Ge-
 nius Domini, cujus in adventu domus splen-
 dore illustrata est. Is me pulsato latere ex-
 pergefatum, jussit surgere confestim, con-
 tinuoq; mihi è manibus exciderunt catenæ:
 Tum ille: Præcinge te, inquit, & indue san-
 dalia. Atq; ita feci, jussusq; amicare pallium,
 & eum sequi, parebam: cum jam egressus,
 nondum intelligerem rem veram agi, sed
 mihi visum cernere videre. Et jam præter-
 gressi primos & secundos custodes, veni-
 mus ad portam ferream, qua itur in urbem;
 quam ultrò nobis patefactam egressi, pro-
 cessimus vicum unum, atq; ibi me reliquit

ille. Tum ego, ubi ad me redii, aperto intellexi eum à Domino missum esse ad me, ex Herodis manu, & tanta Judæi populi expectatione eripiendum. Hæc vos Jacobo & fratribus nunciabitis. Mihi aliò concedendum est.

SENTENTIA.

Deum nulli carceres, nullæ catenæ prohibent, quò minus liberet suos. Quos liberare vult Deus, tenere nemo potest.

PHILOSOPHI. Acor. 17.

ARGUMENTUM.

Paulus Athenis de Deo & Christo, & resurrectione locutus, à Philosophis deridetur, à Dionysio Arcopagita admittitur,

Stoici, Epicurei, Paulus, Dionysius.

Possumus ne ex te scire, quæ sit ista tam nova doctrina, quam affers? Nam inaudita quædam nostris auribus affers, JESUM nescimus quem novum Deum, & alteram vitam prædicans. Hæc qualia sint, velimus ex te discere. PA. Video vos omnino, Athenienses paulò superstitioniosiores. Nā cum præteriens vestra spectarem sacra, aram quoq; offendi, in qua inscriptum inerat: ingnoto Deo. Eum vobis ego Deum, quē ignorantés colitis, annuncio. Deus qui fecit mundum, & omnia, quæ in eo constant, cum sit cœli terræq; Dominus, non habitat in templis manufactis: nec hominum manibus colitur, quasi ulla re egeat, qui ipse omnibus vitam, spiritum, omnia deniq; conferat: quiq; ductum

etum ex unius sanguine omne hominum ge-
 nus, in omni terræ solo collocaverit: quibus
 stata vivendi tempora, certosq; inhabitan-
 di terminos præfinivit, ut suum Dominum
 quærerent, & forte pervestigare & invenire
 eum possent, cum tamen non procul absit ab
 unoquoq; nostrum: cum per eum vivamus,
 moveamur, & simus, & quidam etiam ve-
 strorum poetarum dixerunt: Ejus enim ge-
 nus sumus. Quod si genus sumus Dei, non
 debemus existimare, auro & argento, aut
 lapidi, arte & industria humana cæ lato, nu-
 men esse simile. At nunc, omissis ignoran-
 tiæ temporibus. Deus omnibus ubiq; homi-
 nibus denunciât, ut vitam corrigant. Statuit
 enim diem, in qua universos homines cum
 summa æquitate judicaturus est per virum
 quendam, per quem id facere decreverat :
 quem dum à morte revocavit, certam ejus-
 dem conditionis adipiscendæ spem fecit o-
 mnibus. E. Festivum nugatorem, qui hic no-
 bis homines morti eripit. STO. De hoc satis
 in præsentia: alia te de eadem re audiemus,
 DION. At ego ita affectus sum tua oratione,
 peregrine, ut jam nihil dubitem, quin ita
 sit: statuiq; à te non discedere (si tibi mole-
 stum non est) nisi ista doctrina, quantum
 satis est, instructus. PAUL. Mihi verò nihil ju-

cundius fieri potest, quàm & tecum, & cum omnibus ita animatis ea communicare, quæ divinè edoctus passim divulgare sum iussus.

SENTENTIA.

Mundana sapientia divinam pro stultitia habet. Dem ex suis operibus, sicut opifex, cognoscitur.

LYSIAS, Act. 21. & 22.

ARGUMENTUM.

Comprehensus in Templo Paulus à Iudæis, illis eripitur à Lyssa tribuno, ejusq; permissu apud Iudæos causam dicit. Sed tumultuantibus Lyssas eum virgis cædis jubet. Verum ubi civem Romanum esse cognovissent, solvit.

Iudæi, Lyssas, Paulus, Centurio.

Suscurrete viri Israelitæ. Hic est homo ille, qui contra populum & legem & locum hunc omnes ubiq; docet. Quin etiam Græcos introduxit in sacrum, & sanctum hunc locum profanavit. **ALIUS.** Extrahamus eum è fano: interimamus eum. Quid expectamus? jam pridem debuit interfici. Quod si factum esset, has turbas evitasset. **ALIUS.** Vapula, homo seditiose. Hic nocte ictibus trucidabimus. Hem tibi. **ALIUS.** Desinamus hunc verberare, populares, nam video huc venire tribunum cum militibus. **LY.** Unde tam subito tanta orta est seditio? Eho hiccine in causa est? Comprehendite hunc milites, & ei injicite catenas. Quisnam est? Aut quid fecit? tacete clamosi homines. Possimne ex vobis scire, quidnam commiserit. **A-**

lius

lius aliud, nescio quid clamat. Nihil intelligo, abducatur in castra. Quæ (malum) hæc tanta violentia est? Hic jam, credo opprimemur in turba. IV. Interime eum. PA. Licetne mihi te alloqui? Ly. Scisne Græce? Nonne tu es Ægyptius ille, qui superioribus diebus concitata seditione eduxisti in silvas illa quatuor millia hominum sicariorum? PAU. Ego homo sum Judæus, Tarsensis, civis non obscuræ Ciciliæ Civitatis. Sed oro te, permitte mihi ad populum loqui. Ly. Permitto. PAU. Audite meam hanc ad vos defensionem, fratres & patres. Ego homo Judæus sum, Tarfi in Cicilia natus, & in hac urbe educatus ad pedes Gamalielis, patris legibus accuratè institutus, & Dei cupidus, quemadmodum vos omnes estis hodie: qui hanc vivendi viam sum capitaliter infectatus, viros simul & mulieres constringendo & in carcerem condendo. Testis est mihi Pontifex, totusq; Senatus, à quibus etiam epistolas ad fratres acceperam, & Damascum proficiscebar, eos quoq; qui ibi essent, victos Hierosolymam ad supplicium adducturus. Sed in eo itinere cum appropinquarem Damasco, circiter meridiem, repente de coelo multa me lux circumfulsit: collapsus ad terram vocem audivi dicentem mihi;

hi: Saule, Saule, quid me insectaris? Tum ego: Quies, Domine? Atq; ille: ego sum Jesus Nazarenus, quem tu insectaris. Qui autem mecum aderant, lucē viderunt illi quidem & territi sunt, sed vocem non audiverunt alloquentis me. Tum ego: Quid agam Domine? & Dominus: Surge, inquit, & proficiscere Damascum, ibi tibi dicetur omnia, quæ te facere statutum est. Cumq; præ lucis illius splendore non viderem, manu ductus à meis comitibus, perveni Damascum. Ananias autem quidam vir pius, & legi convenienter vivens, testimonio omnium illic habitantium Judæorum venit ad me, & astans mihi: Saule frater, inquit, aspice. Cumq; ego eodem tempore vestigio in eum intuitus essem. Deus Patrum nostrorum (inquit ille) destinavit te ad cognoscendam ejus voluntatem, & ad justum videndum, vocemq; ex ejus ore audiendam, quoniam testis ei futurus es apud omnes homines, earum rerum, quas & videris & audiveris. Et nunc quid cunctaris? agedum, abluere, & invocato Domini nomine peccata tua elue. Reverso autem mihi Hierosolymam, & in templo oranti accidit, ut, extra me ipsum raptus, viderem eum dicentem mihi, prope & Hierosolyma celeriter exi: non accipient

cipient enim tuum de me testimonium. Cui
 ego: Domine, inquam sciunt ipsi ut ego so-
 litus sim in custodiam dari, & per collegia
 virgis cædere eos, qui tibi confiderent: utq;
 cum tui testis Stephani sangvis effunderetur,
 adessem, & ejus neci consentiens, vesti-
 menta custodirem eorum, qui eum interfici-
 ebant. Tum ille, vade, inquit, nam ego te
 ad procul remotas gentes amandabo. **JUD.**
Tolle istum, ex orbe terrarum: neque
 enim convenit eum vivere. **Lys.** Nihil un-
 quam tale vidi. Necesse est graviorem ali-
 quam esse causam, quæ universum popu-
 lum in hunc commoveat. Neq; enim ita
 clamarent & vestes discinderet, pulverem-
 que in aerem jacerent. Hæc non solent sine
 maxima causa fieri. Milites intromittite e-
 um in castra, & virgis cogite causam fateri,
 propter quam causam ita in eum clametur.
CEN. Fiet. **Dispolietur** jam, & funibus deli-
 getur. **PA.** Licetne vobis hominem Roma-
 num indemnatum verberare? **CEN.** Vide
 quid agas, **Lysia:** Nam hic homo Romanus
 est. **Lys:** Itane? adibo eum. Dic mihi, es ne
 Romanus? **PAV.** Etiam. **Lys.** Ego ipse magno
 precio in istam civitatem susceptus sum.
PAV. At ego natus sum. **Lys.** Desistite mili-
 tes, jam satis superq; factum est.

Iniqui homines Veritatem vi opprimere conantur. Pellitur à medio sapientia, ubi vires geritur. Romana civitas plus habet auctoritatis apud homines, quàm Christiana. Sic fit & hodie: si cuius præpotentis civitatis aut principis auctoritatis commenderis, locum ubique invenies. Sin nihil nisi justitiam habeas, vilissimus eris.

ANANIAS Actor. 23.

ARGUMENTUM.

Paulus vincit Ananiam Pontificem acerrimè reprehendit in ex-legem. Deinde dicens se speratæ resurrectionis reum, Phariseos & Sadducæos inter se committit, & ab illis adversus hos defenditur.

Paulus, Ananias, Assistentes, Lyfias, Sadducæi, Pharisei.

Fratres ego ad hoc tempus, Deo confcio, optime mihi conscius fui. ANA. Percutiatu-
r ei os. PAV. Percussurus est te Deus, paries in crustate. Ergo tu sedes, ut de me ex lege judices, & contra legem jubes me pulsari? Ass. Pontifici Dei conviciaris. PAV. Nesciebam, fratres, eum esse Pontificem. Scriptum est enim Principi populi tui ne maledicito. Verùm audite fratres, qui in hoc concilio adestis: Ego Phariseus sum, Pharisei filius: speratæ resurrectionis mortuorum reus sum. SA. Lepidum nugatorem hoc se modo evadere posse sperat. PH. Non male loquitur: nihil in eo mali video. Quod si Spiritus cum eo locutus est, aut aliquis Genius, ne Deo repugnemus: SAD. Ideo eum defenditis vos, quia se vobiscum sentire clamat. PHA. Nos eum defendimus, quia defensione dignus est. Quid enim commisit? vul-

ris opprimere infontes? SAD. Imò vos vultis tueri fontes? Lys. videndum nobis est, ne hic ab istis discerpatur. Tu jube huc descendere exercitum, ut eis eripiantur, & in castra abducatur.

SENTENTIA.

Injustus Iudex, incrustatus paries, Pius profunt interdum aduersariorum inter se controversia quemadmodum rixantibus inter se canibus evadunt homines. Si quando tuetur simulator pius, id magis suis, quam æqui amore facit.

NEPOS PAULI. Actor. 23.

ARGUMENTUM.

Lysias à Pauli nepote de Iudeorum in Paulum conjuratione carior factus copias parandas curat, quæ Paulum ad Felicem prætorem tuum perducant.

Centurio, Lysias, Nepos Pauli.

PAULUS, qui est in vinculis, me evocatum rogavit, ut hunc ad te adolescentulum adducerem: habere enim eum aliquid ad te. LY. Cedò mihi manum, adolescentule. Dic mihi hic in occulto, quid habeas, quod velis mihi enunciare. NE. Judæi constituerunt petere à te, ut cras in consilium educas Paulum, quasi aliquid diligentius in eum quæsituri. Sed tu noli eis obtemperare: nam insidiantur ei homines ex eis supra quadraginta, qui sese devoverunt, si vel comederent, vel biberent, quin eum interfecissent. Et nunc parati tuum mandatum expectant. Lys. Laudo te quod me scitè admonuisti. Discedes hinc & nemini hæc indicabis quæ
mihi

mihî demonstravisti. Vos duo centuriones paratos habete milites ducentos, qui Cæsariam proficiscantur, & equites septuaginta, hastatosq; ducentos ad horam tertiam noctis, & jumenta adhibete, ut eo impositum Paulum ad Felicem prætorem perducant. Ego ad eum epistolam scribam.

SENTENTIA.

Ficti homines pijs pertinacissimè insidiantur. Sæpè minus est in gentilibus iniquitatis, quàm in iis, qui se Dei populum gloriantur.

TERTULLUS. Actor. 24.

ARGUMENTUM.

Paulum accusat Tertullus orator apud Felicem prætorem. Paulus crimina diluit. Felix causse cognitionem differt in adventum Lyfian tribuni Paulumq; jubet remissius custodiri.

Felix præses, Tertullus orator, Paulus, concio Iudeorum.

Adest hic re⁹ ille Paulus, Anania Pötifex, & vos seniores. Superest ut vester orator accuset. TER. Quod maxima pace per te fruimur, quodq; tua prudentia hæc provincia rectè administratur, nobis omnino gratissimum est, optimè Felix: & agimus gratias quas possumus, maximas. Sed ne tibi diutius sim molestus, quæso ut nos pro tua æquitate paucis audias. Invenimus hominem hunc pestilentem, & seditiones omnibus ubiq; terrarū Judæis concitantem, ac sectarum principem Nazarenorum, eo usq; ut etiam sanum profanare conatus sit. Eum nos comprehensum voluimus ex no-

stra

stra lege judicare. Sed intercessit Lyfias tri-
 bunus eumq; magna vi è manibus nostris
 eripuit, ac jussit, ut ejus accusatores apud te
 adessent. Ex quo quidem Lyfia poteris, si
 quærere voles, certior fieri de omnibus cri-
 minibus, quibus nos hunc insimulamus.
 Atq; hæc ita se habere testis est universa Ju-
 dæorum, quos adesse vides, concio. CON.
 Ita est. P. Litcetne mihi causam dicere? FEL.
 licet. PA. Equidem eo confidentius pro me
 dico, quod scio te multos jam annos huic
 genti jus dicere, ut possis intelligere, me non
 plures duodecim complevisse dies, ex quo
 Hierosolymam, ad divinum cultum con-
 cessi. Neque vero me in templo invenerunt
 cum aliquo colloquentem aut vulgi seditio-
 nē faciētē, neq; in collegijs neq; oppidatim,
 nec me eorū possunt convincere, de quibus
 accusant. Illud autē libenter apud te cōfite-
 bor, me ex institutione, quam sectam di-
 cunt, Deum colere patrium, fidemq; adjun-
 gere omnibus, quæ in disciplina nostra &
 vatibus scripta extant: tantumq; mihi de
 Deo spondere, ut exploratum habeam,
 mortuos tum bonos tum improbos ali-
 quando revicturos: id quod ne ipsi quidem
 non sperant. Atq; equidem in id incumbo,
 ut rectam conscientiam Deo semper homi-
 nibusq;

nibusq; probare possim. Veneram autem post annos complures, ut muneribus egestaten nonnullorum meorum popularium allevarem, ac ferta libarem, cum me expiatum offenderunt in fano, nulla cum turba, aut tumultu. Ii sunt quidam ex Asia Judæi, quos oportebat apud te præsto esse, & accusare, si quid in me crimen, dicant sanè, dum asto in concilio. Nisi fortè criminosa est una hæc vox, quam inter eos sic clamavi: Ego hodie à vobis reus agor defensæ mortuorum resurrectionis. FEL. Jam finem facite. Cum Lysias tribunus venerit, cognoscam de vestra causa. Interea tu Centurio Paulum custodi, ita ut remissius habeatur, nevé aliquis necessariorum ejus aditu aut famulatu prohibeatur.

SENTENTIA.

Veritatis professionem, seditionem interpretatur calumnia: calumniatores modo ementiendo, modo torquendo, nihil candidè dicunt. Calumniatoribus calumnia impune est. insonibus innocentia est non vitium. O iudices, ubinam dormit lex talionis!

FESTUS, Act. 25. & 26.

ARGUMENTUM.

Paulus ad Agrippam regem causam dicit in qua de sua legatione mortuorumq; resurrectione disserit. Festus præses eum insanum appellat: Agrippa insonem judicat.

Festus præses, Agrippa rex, Paulus:

Videtur hunc hominem, Agrippa rex, & omnes viri, qui hîc adestis, de quo omnibus Judæorum multitudo tum Hierosolymis,

mis, tum hîc interpellavit, clamans, indignum esse eum vivere amplius. Ego verò eum comperirem, nihil eum capitale admisisse, & ipse ad Augustum provocasset, statui mittere: & tamen quid certum de eo scribam ad dominum, non habeo. Ea de causa produxi eum ad vos, & maximè ad te, rex Agrippa, ut re disquisita habeam, quod scribam. Absurdum enim mihi videtur, mittere vinctum: neq; crimina, quæ ei imponentur, significare. AGR. Liberum est tibi, pro teipso dicere. PAU. Quod omnia de quibus à Judæis postulor, hodie sum apud te, rex Agrippa, defensurus, hominem Judæicarum consuetudinum atq; controversiarum vel imprimis peritum, equidem beatum me existimo. Quamobrem oro te, ut me æquo animo audias. Ac meam quidem actam ab ineunte ætate vitam (principiò enim versatus sum Hierosolymis inter meos populares) norunt omnes Judæi, jam diu scientes (modò velint fateri) me vixisse Pharisæum, qua exarctissima nostræ religionis secta est. Et nunc hîc sto reus speratæ præstationis eorum, quæ majoribus nostris à Deo promissa sunt: quo quidem se perventuras duodecim tribus nostræ, Deum noctes diesq; assi due colendi, sperat. De hac spe, rex Agrippa à Judæis

utem
 sege-
 rium
 xpia-
 rba,
 idæi,
 & ac-
 sanè,
 inosa
 ama-
 fensæ
 inem
 ogno-
 turio
 atur,
 u aut

calum-
 dicunt.
 est non

egatione
 um ap-

ex, &
 no o-
 oly-
 mis,

accusor. Itane vero incredibile apud vos
judicatur, à Deo mortuos excitari? Equidē
statueram, multa mihi contra Jesu Nazareni
nomē esse facienda, itaq; feci Hierosolymis,
multosq; sanctos per potestatem, quæ mihi
à Pontificibus permīssa erat, in carceres
conclusi, & capite mea sententia damnavi.
Quin eos per omnia collegia tormentis sep̄e
cogebam nefaria dicere: jamq; immodicē
in eos furens, persequabar etiam ad exteras
urbes. Cumq; aliquando proficiscerer Da-
mascum, cum potestate mihi à Pontificibus
permīssa, die medio, Rex, in itinere vidi de
cœlo Solis splendore majus lumen, quod
me meosq; comites circumfulsit. Cumq; o-
mnes ad terram corruissemus, vocem audi-
vi affantis me, & Hebræo sermone dicentis:
Saule, Saule, quid me infestaris? Durum ti-
bi fuerit contra stimulos calcitrare. Tum
ego: Quis es, inquam, Domine? Ego sum,
inquit ille, Jesus, quem tu infestas. Verūm
surge, & confiste in pedes. Nam ego tibi ap-
parui, ut te & ministrum, & testem constitu-
am eorum, quæq; vidisti, quæq; tibi demon-
strabo, vindicando te à populo & gentibus,
ad quas nunc te mitto ad eorum oculos ape-
riendos, ut è tenebris in lucem, & ex Sata-
næ potestate ad Deum se convertant, & ita
pecca-

peccatorum veniam consequantur, & ad eandem cum eis sortem perveniant: qui, quia in fidem meam venerunt, sancti sunt. Nec ego, rex Agrippa, cœlesti visioni non fui dicto audiens: qui primum eis, qui Damascierant, & Hierosolymis, perq; omnem Judææ regionem: nec non ipsis gentilibus correctionem vitæ denunciarem, & exhortarer, ut ad Deum sese converterent, & vitæ correctionem factis ostenderent. Hac me causa Judæi in fano comprehensum, conabantur interficere. Sed divino præsidio ad hunc usq; diem steti, parvos juxta ac magnos commonefaciens, neq; quicquam dicens extra ea, quæ tum cæteri vates, tum Moses futura antè denunciaverunt: Christum videlicet esse mortem passurum, primumq; ex mortuis in vitā revocatum, lucē populo & gentibus nunciaturum. FES. Infanis Paule. Nimiæ te literæ ad insaniam redigunt. PA. Non infanio optime Feste: sed veracis & sobrii hominis verba profero: Scit rex, ad quem confidenter loquor, ut quem nihil horum latere putem: neq; enim in tenebris gestum est. Credisne rex Agrippa, varibus? Credis, scio. AG. Propemodum mihi persuades ut Christianus fiam. PA. Deus faciat, ut non propemodum, sed planè,

non solum tu, sed etiam omnes, qui me audiunt, hodie fiant tales qualis ego sum: exceptis his vinculis. FES. Surgamus, discendamus hinc. Hic homo mihi videtur, nihil morte dignum, aut carcere, commisisse. AG. Poterat absolvi, nisi provocavisset ad Cæsarem.

SENTENTIA.

Vera sapientia stultorum iudicio, insania est. Licet interdum ex calumniatorum mente magis quam verbis crimina diluere. Neq. enim nominatim accusabatur Paulus de resurrectione mortuorum: sed cum esset in ipsius doctrina (quæ ei crimini dabatur) etiam resurrectio, ser. vivit non iniuste cause sue.

IUDEX. Matth. 25.

ARGUMENTUM.

Christus in ultimo adventu suo de bonis malisque sententiam pronunciat.

Iesus Iudex, Dexter, Sinistri.

Venite beati Patris mei: possidete paratum vobis regnum ab orbe condito. Nam cum esurirem dedistis mihi comedere: cum sitirem, bibere: hospitem me accepistis: ægrum visitastis, incustodiam datum, invisistis. D. Domine quando te vidimus esurientem, ut aluerimus? aut sitientem, ut potum dederimus? quando autem hospitem, ut acceperimus? aut nudum, ut vestiverimus? quando ægrum, aut in vinculis, ut inviserimus? IE. Credite mihi, quatenus minimo horum fratrum meorum fecistis, mihi

mihifecistis. Vos autem abite à me, execrabiles, in ignem æternū Vejovi ejusq; geniis paratum: qui me neq; esurientem cibo, neq; sitientem potione refecisti: hospitem non suscepistis: nudum non vestivistis infirmum, & in carcerem conjectum non invisistis. Si Domine quando te vidimus esurientem, aut sitientem, aut hospitem, aut nudum, aut infirmum, aut in carcere, neque subvenimus? JE. Credite mihi, quatenus horum minimo non fecistis, mihi non fecistis.

SENTENTIA.

*Pro suis quæque factis remunerabitur Christus.
Quod cuius Christianorum sit, id ipsi
Christo sit.*



V 4

DECEM

DECEM DEI PRÆCEPTA, ET ALIA DEINCEPS
SEQUENTIA, QUÆ AD REIP:

institutionem pertinent, ex Exodi cap.

20. & reliquis.

Deushæc omnia Israelitis ad hunc modum effatus est: Ego sum Jova Deus tuus, qui te eduxi ex domicilio servitutis Ægyptiæ.

1. Deos alios nullos, præter me, habeto.
2. Simulacrum ullius rei, quæ extet aut supra in cœlo, aut infra in terra, aut in aquis sub terra, ne facito, neve ea venerator, neve colito. Nam ego sum Jova Deus tuus, Deus impatiens socii; qui parentum culpam etiam in liberos persequor, vel ad tertiam usq; , quartamq; stirpem osorum mei: clementiaq; utor ad millesimam usq; stirpem erga mei amantes, mea; præcepta conservantes.
3. Jovæ Dei tui nomen inaniter ne adhibeto: neque enim sinet impunitum Jova, qui ejus nomen inaniter adhibuerit,
4. Diem Sabbathi sanctè agere memento. Sex diebus agito, tuaq; opera omnia patrat. Septimo autem die, quod Jovæ Dei tui
Sabba-

Sabbathum est, nullum opus facito, neu tu, neu tuus filius aut filia, neu tuus servus aut ancilla, neu tuum jumentum, aut apud te degens peregrinus. Nam cum sex diebus fecisset Jova cœlum, terram, mare, quæque in eis sunt omnia, feriatum est die septimo: qua de causa Jova diem Sabbathi festum sacrumque fecit.

5. Parentem utrumquè honorato, ut diu ætatem producas in terra, quam tibi Jova Deus tuus donat.

6. Ne hominem occidito.

7. Ne adulterato.

8. Ne furator.

9. Falsum testimonium contra alium ne dicit.

10. Alterius domum ne concupiscito: alterius uxorem ne concupiscito: néve servum aut ancillam, néve bovem aut asinum, nihil denique quod sit alterius.

Hic universus populus visis fragoribus, fulgetris, tubæ sonitu, & montis fumo, perterriti abscedere, & procul stantes à Mose, petere, ut ipse eis audientibus loqueretur, non Deus, ne morerentur. Quibus Moses: Ne metuite, inquit: nam ad vos tentandos venit Deus, utq; vos ejus timor ob oculos propositus a peccando deterreat. Igitur

procul stante populo, accessit ad illam,
caliginem, ubi Deus erat. Et Jova Mosi
sic fatus est: Commemorato Israelitis, ut
me secum de cœlo viderint loquentem, ne
præter me Deos sibi argenteos aut aureos
fabricentur. Sed mihi cespitium altare fiat,
in quo solida sacrificia & pro salute balan-
tibus bobusvè faciatis: quocunque in loco
mei nominis monumentum posuero, ibi
vos aditurus, vobisque prosperaturus. Quod
si mihi altare lapideum fiet, ne ex quadrato
lapide excitatote: nam id ferramenta admo-
vendo profanaveritis. Neve per gradus ad
meum altare ascenditote, ne in eo obscœ-
na vestra appareant.

Hæc autem eis jura propones: Si emeris
servum Hebræum, sex annos servito, septi-
mo autem anno manumittitor gratuito. Si
cælebs venit, cœlebs manumittitor: sin ma-
ritus, uxor cum eo manumittitor. Si Domi-
nus ei uxorem dederit, ex qua filios aut filias
procreaverit, fœminæ & nati domini sunt:
ipse solus manumittitor. Quod si servus ca-
ptus amore sui domini, & uxoris, & filiorum
noluerit manumitti, eum dominus ad recu-
peratores adducito, eiq; ad valvam aut ad
postem applicato aurem subula perforato,
& ille ei perpetuum servito.

Si quis

Si quis filiam suam vendiderit in famulatum, ea ne fervorum in morem manumittitor: Si ea Domino displicebit, nec ei eam desponderet, redhibeto. In Extraneam gentem emancipandi potestas ne esto, quia eam affecit ignomiâ. At si eam filio suo destinauerit, eodem jure cum ea, quo cum liberis agito. Si aliam duxerit, hanc victu, vestitu, congressu ne fraudato. Si tria hæc ei non confecerit, manumittitor gratis, sine precio.

Qui hominem pulsaverit, si is mortuus fuerit, capitale esto. At qui non captaverit, sed in eum fortè fortuna incurrerit, statuum vobis locum, quo confugiat. At si quis alterius necem per dolum de industria machinatus fuerit, is vel ab ara mea ad necem abstrahitor. (tale esto.)

Qui patrem aut matrem pulsaverit capi-

Qui hominem clepserit, eumq; vendiderit, aut is apud eum inventus fuerit, capitale esto. (poena esto.)

Qui patri aut matri maledixerit, capitis

Si quis alterū orta contentione percusserit lapide aut pugno, si ille non fuerit mortuus, sed in lectū decubuerit, si surrexerit & foras baculo innixus iverit, percussor sine fraude esto, tantum illius cubatū & medicationem præstato.

Si quis

Si quis servum suum, aut ancillam baculo percusserit, si præsens mors sequuta fuerit, tenetor. Verum si unum aut alterum diem superstes fuerit, ne tenetor, quoniam pecunia ejusest.

Si qui dimicando mulierem gravidam vulneraverint, & abortum intulerint, si perniciës non fuerit, ad æstimationem mariti mulieris mulcta esto, & ad eam rem arbitrii sunt. Sin autem perniciës fuerit, vitam pro vita pendito: oculum pro oculo, dentem pro dente, manum pro manu, pedem pro pede, suggillationem pro suggillatione, vulnus pro vulnere, vibicem pro vibice.

Si quis servi sui, aut ancillæ oculum percusserit, eumq; corruerit, eum manumittito pro oculo. Et si servi sui, aut ancillæ dentem decusserit, eum manumittito pro dente.

Si quem bos virum aut foeminam cornu petiverit, & is mortu⁹ fuerit, bos lapidator, ejus caro ne comestor, dominus bovis impunitus esto. At si bos antea fuerit petulcus, & ejus dominus admonitus fuerit, neq; tamen custodiverit, si virum aut foeminam occiderit, & bos lapidator & ejus dominus morte plectitor. Sin ei mulcta imponetur, tantum.

tantum vitæ suæ precium dato, quantum
 cunq; ei fuerit impositum. Sive puerum pe-
 tiverit, sive puellam, idem juris esto. Si ser-
 vum petiverit bos aut ancillam, argenti tri-
 ginta sici Domino solvuntor, bos dilapi-
 datur.

Si quis fossam vel aperuerit, vel demise-
 rit, nec obduxerit, & eò deciderit bos aut a-
 finus, auctor fossæ præstato: argentum Do-
 mino illius solvito, ipse mortuum habeto.

Si cujus bos alterius bovem vulnerave-
 rit, & ille mortuus fuerit, bovem vivum
 vendunto, & ejus precium dividunto, &
 mortuum etiam dividunto, aut, si notum
 fuerit, bovem antea esse petulcum, neque
 eum Dominus ejus custodiverit, bovem bo-
 ve pensato: ipse mortuum habeto.

Si quis bovem pecusve clepserit, maeta-
 veritque aut vendiderit, quinq; boves pro
 uno reddito, & quatuor balantes pro una.

Si fur in surripiendo deprehensus ictus fue-
 rit, & inde mortuus, homicidii poena ne
 esto (nisi orto Sole tum homicidii poena
 esto) Si habet unde reddat, reddito: si non
 habet, venditor pro suo furto.

Si deprehensum fuerit furtum penes eum,
 bos, asinus, ovis, capra, vivens, duplum
 reddito.

Si

Si quis emisso pecore compaverit fundum aut vineam alterius, damnum sarcito de optima parte fundi sui, aut vineæ.

Si in spinas immissus ignis metam aut fetetem aut messem corruperit, auctor ignis detrimentum præstato.

Si quis apud alterum argentum, suppellectilemve reposuerit, idq; de illius domo surreptum fuerit, si fur deprehensus fuerit, duplum reddito: Si autem fur non deprehensus fuerit, tum dominus domus ad recuperatores vocatur, nisi rem alterius inteverterit. Quacunq; in re crimen statueris, in bove, in asino, in ove, in capra, in veste, quacunq; res erit amissa, quæ cuja dicatur, causa amborum ad recuperatores defertor: utrum condemnaverint recuperatores, alteri duplum reddito.

Si quis alterius fidei asinum, bovem, ovem, capram, aut quodvis pecus commiserit, si id nullo vidente fuerit mortuum aut fractum, aut abactum, Jusjurandum Jovæ interponitor, illum rem alterius ad se non avertisse: eamq; satisfactionem dominus rei accipito, neq; fiduciarium rem reddito. Quod si ei furto ablatum fuerit, damnum præstato domino rei. Sin raptum à feris fuerit, testem exhibeto, neq; raptum præstato.

*Remittitur Camaloti si quis
sensum habetis Præzi*

m
o

e-
is

e-
o

t,

e-

u-

r-

-

e-

u-

l-

e-

ē,

fi

ū,

ti-

ē:


o,

ei

o-

-

nis



Biblioteka Jagiellońska



stdr0028784

